

# Godigo Nogi Ugwaba Sabo Teḡabi Po Wabo Buku Dabe

## Hasia nedabo tau sabo po

Te e buku da, te Israel dabe augwaligo te lotu po wabo teḡabi buku elaluai dao. Me badu teḡabi po dabe e bukude elalubo, augwali te Godigo beba sisinibo sogo augwaligo te Jerusalemde lotu weyu, te teḡabi dabe wali. Te me badu po dabe te we bidi dabego te lotu wabo side te gedu haluasa po wabo tiwai yali, ma te deli deli we bidi augwade te seḡe elalubaso, te tiwai wali.

E tiwai homu ebao, te bidi hauwago te teḡabi po dabe aseḡu, te gedu haluasa po wabo dabe aseḡu yali, te haniani sogode aseḡani. Tama nosali, gasa bidi dabego te po dabe deliba sisinama, tama te buku me deli pedalubo tiwai ilali.

Te teḡabi po dabe me, gedu haluasa po wabo dabe me, te homu kolesaga page te haniani elalubao. Te Godigo nogi ugwaba sabo teḡabi po dabe me elalubao, tama me te seḡe po pusulama, te dwai se sela saḡo gedu haluasa po wabo me elalubao. Tama me te mena usu sabo seḡe yai seḡe te tau sabo gedu haluasa po wabo me elalubao, tama me te gesi king bidi nigiliyu, genuai side wabo teḡabi po elalubao. Tama te Godiba konealubo homu elalubo haninibo po wabo teḡabi po me elalubao, tama te Godiba buba hwi po wabo teḡabi po me elalubao, tama me te haliga seḡe ebo me homu hauwa ebode gedu haluasa po wabo me elalubao. Tama me te boi bidi dabe dolomainu te Godiba gedu haluasa po wabo me elalubao, tama te teḡabi po dabego te wiegi yai kolesaga te we bidi dabe augwaligo wali pomainogo ola mani po me wai dao.

Te teḡabi po dabe me gedu haluasa po dabe te deliba taluama wali pode, te da we bidigo bidibo ula te badu po olama walio. Dago wiegi yai homu pemene ebo sogo elalu, me haliga seḡe ebo me elalubao. Te da gesi we bidi bidiyu, te bomo elalubao, tama te monu dabe yabo sogo me elalubao. Me sogo da gasi siyu, te me sogo da wiegi yai bugai haliga eyu yaibao. Te teḡabi po wabo bukude te tobage seḡe dabe te da we bidi dabe e toḡe bidibo ulade bidibo sogo, te dabolo dolo pedalubo seḡe dabede po dolo pusalio, tama tialima polobadu digi gagalama, te seḡe ela asali, megi e sogoba usu nagasoyu, te teḡabi po wabo bukude wali pogo te dago konealubo po daḡ waliyu, tama te Godigo we bidigo bidibo ula tau mu sabo po wai elalubao.

**Buku 1***(Tib 1-41)***Salmo 1***Doloba pai bidi dali, dwai bidi dali side po wai.*

- 1 Niwai bidi agai  
 te dwai bidigo po wali pisiḗbo bidi,  
 tama dwai seḡe sai bidigo tuḡde bilibo menio,  
 tama God dali posobo po wabo bidi  
 dali taluama, dulaluyu bidibo menio,  
 tama tiyu, te bidi aga  
 dwagi yai homu mu eyu bidaibao.
- 2 Magi baso meni, te bidigo Genuai Bidi Godigo  
 bomo yai po naga godolo mu eyu,  
 te po wali pabo dao.  
 Tama agai te bomo yai po siade dali, hulide dali nedeyu,  
 tede homugo kone paliyu ebo dao.
- 3 Te bidi te ni bidi mego aḡ sesegeḡe  
 bulai ni elalubo tiwai bidibao.  
 Te nigo nedudu walobo,  
 te sogo dolo naga waliyu ebo dao,  
 tama te ni yabe me sasia pabo menio.  
 Tama tigidali seḡ agai ebaso,  
 te bugagia pedalobo dao.<sup>a</sup>
- 4 Tiali goli, dwai bidi dabe augwali  
 te tiwai gilama mu menio.  
 Augwali te tubo nai wit bo  
 te waligo selasa pabo tiwai ebo dao,  
 te yalala pai olo nai mu dao.
- 5 Tama tiyu, dwai bidi dabe augwaligo  
 Godigo po tuḡ ebo aiyaba elalugobeo.  
 Awe, te dwai seḡe sai bidi dabe,  
 augwali doloba pai bidi bidibo hani  
 tomode bidigobeo.
- 6 Magi baso meni, Godigo te doloba pai bidi dabe  
 bugagia tonalubo dao,  
 tialima dwai kolesaga ebo bidi dabe,

---

<sup>a</sup> 1:3 Jer 17:8

augwali dwai dene ebo bulude  
bidada peyu, bidada pabo elalubo.

## Salmo 2

### Godigo king nigilali.

- 1 Magi baso te Israel hani isąwai we bidi dabego  
te God dali hagoma kolesaga yabo po mia saliwe?  
Magi baso te we bidi dabe augwaligo  
te dwai kolesaga yabo po te odolali po mia saliwe?
- 2 Te augwaligo king dabe tigidaligo  
me te hwąabo sisi yali.  
Tama te tobolu bidi dabe sisinama,  
tama Godiba po dwai wali,  
tama agai te sa muani bidi te polalubo bidi,  
agaba me te dwai po wali.<sup>b</sup>
- 3 Augwa te po wai, “Dago te augwali sigo nogo  
aligabo togoinao,” wali,  
“tama me te augwali sigo da kęalubo  
bono pisigina sąinao,” wali.  
“Te dena tedali bidinao,” wali.
- 4 God Genuai Bidi te dagalude dulalu, aga gisugu mayu,  
tama agai augwaliba posobo po obao.
- 5 Aga te haliga sębę posolo elama,  
tama augwaliba bomai po mobao.  
Tama agai wado po genuai weyu,  
te augwali wi dwai ilibao.
- 6 Tama te agai augwaliba te tama po obao,  
“Ena eno te bidi me deli nigilama, te king bidimainu yai,  
tama eno aga te Saionde munama bidimainu yali,  
te eno tedali gasagi yai wiegi yai  
bulu du dao,” agai te po obao.
- 7 God Genuai Bidigo sa muani kingo te po wali,  
“Megi da, eno te Genuai Bidigo enabolo mani po pusubao.  
Agai enaba te po wai,  
‘Nage eno wai dao.  
Megi tama nage te king bidi pedalubo sogo,  
ena te nago aya pedalubao.”<sup>c</sup>
- 8 Enaba hanalubaso, tama te tigidali hani

<sup>b</sup> 2:2 Tpi 4:25-26    <sup>c</sup> 2:7 Tpi 13:33; Hib 1:5; 5:5

- we bidi nageba mayu,  
tama te tigidali tọ pedai te naga saibao.  
 9 Te nago augwali te nago bomogo tonaluagameo.  
Tama te nago augwali dwasianu kakali  
minama, te bidigo te tọgo nigai sene  
alubo tiwai yaibao,' Genuai Bidigo te po wai."<sup>d</sup>  
 10 Tama tibaso, te dage king dabe,  
dagego bugagia olo muiąo.  
Dage te tọde tobolu bidi dabe, dagego te po odolama,  
tama dage dua dao.  
 11 Dagego Godide wi elama, tama agade midigi سیاo.  
 12 Dage aga dologoba mu pelama, tama kidu suganao.  
Meni baso da, teda agai haliga sębę  
polo elama, te dage isaibao.  
Bidigo konealubo homu Godiba daų weyu,  
tama agaba mu keą pelama ebo bidi,  
te aga wiegi yai homu pemene eyu bidaibao.

### Salmo 3

**Te kigamu bidi me deligo te bomo sainu, gedu haluasa po wali**

*Devit te aga ogwa Apsalomde wi pali, tama te sogo agai te balia  
po asęai dao. Te buku 2 Samuel, Dąi 15 me 16, te suo.*

- 1 Genuai Bidio, te eno boi bidi dabe augwali  
te hauwa mu pedalubao.  
Te bidi hauwago ena dolobo sę ebao.  
 2 Mu tama, te augwa hasi augwaligo  
enade te tama wabo,  
"Te Godigo aga me tau sogobeo," wabo.  
 3 Tiali goli, menio. Genuai Bidi naga digi  
te nago ena geme dualubo awa tiwai ebo dao.  
Nago naga ena te augwali aiyaba elalumainu ebo dao.  
Awe, nago naga te eno homu sęęę sela sayu,  
tama eno tobolu ugwaba sabo dao.  
 4 Eno te Genuai Bidiba i weyu,  
te ena tau somainu ebao.  
Aga te aga wiegi yai tedali gasagi yai  
bulu dude digi bidiyu,

<sup>d</sup> 2:9 Ped 2:26-27; 12:5; 19:15

tama eno i wabo odoyu, tau sali.

- 5 Ena te betde pibo, te ena isibo tiwai ebo dao.  
 Kigamude ena ma hodasa holama,  
 tama ena bugagia bidibao, magi baso meni,  
 Genuai Bidigo ena tonaluali.
- 6 Te 10,000 boi bidigo ena  
 te tigidali badu bobogela sobaso,  
 tagalao, ena augwalide wi me egobeo.

- 7 Genuai Bidi nage asao. Nage eno God,  
 nage aselama, ena tau sagasiyu,  
 te boi bidi dabego nogode ma sao.  
 Nago te eno boi bidi dabe tigidali  
 aiyaba mu elalubo dao.  
 Nago te dwai se ebo bidi dabe dolobo dao.
- 8 Genuai Bidi, nago deligo naga te da ma siyu,  
 tama da me dolisiąbo da.  
 Eno homugo nago te naga we bidi dabe  
 wiegi yai bugagia bidimainu ilao.

## Salmo 4

*Te Devitgo aseąani balia po me deli dao.*

**Te hulide bidi me deli te bomo sainu gedu haluasa po wai**

- 1 God, nago ena tonalubo bidi da.  
 Te eno nageba i wabo sogo,  
 nago te eno i wabo odoyu, tau sao.  
 Polobadu ena haliga seęę dwai ebaso,  
 tama nago eno te haliga seęę ebo dagala saąwani.  
 Nago te olo mu tau sabo  
 wiegi yai kolesaga enaba megı elama, tama eno  
 gedu haluasa wabo po odao.
- 2 Dage nogi elalubo bidi dabego,  
 te nisu naga sogo te dagego nogi  
 posobo po enaba obawe?  
 Nisu naga sogo dagego te haniani te dwai  
 seę ebo godolo homu iduaibawe?  
 Nisu naga sogo dagego te tibo po wabo

kolesaga wali piduaibawe?

- 3 Tiali goli, dagego te ebo sę koneięo,  
te aga pagede bidibo we bidi,  
te Genuai Bidigo augwali sa muani,  
te aga da weyu yali.  
Tama tigidali sogo eno agaba i obaso,  
agai eno te wabo i odobo dao.
- 4 Dage te Godide wi elama, tama  
te dwai sę ebo kolesaga tagalięo.  
Te dage betde godege pibo sogo,  
dagego tede bugagia kone paliyu,  
tama pedauwali pania sięo.<sup>e</sup>
- 5 Dagego te Genuai Bidigo wei eyu  
godolo ebo tobage ofa dabe iyęo.  
Tama dagego konealubo homu agaba dę mu waiyęo.
- 6 Bidi hauwago te tama po wabo dao,  
“Dago te wiegi yai nai dabe sobaso da,  
teda dago homu pemene  
wiegi yai yaibao,” wabo.  
God, nago te olo mu tau sabo wiegi yai  
kolesagago te da tau sao.
- 7 Te wit me wain te gide hauwa pedalubo sogo,  
te bidi dabe augwa wiegi yai homu  
pemene ebo dao.  
Tiali goli, te nago eno homude muani  
wiegi yai pemene ebo homugo,  
te augwaligo wiegi yai homu pemene ebo  
te aiyaba mu elalubo dao.
- 8 God, nago naga ena tonalubaso,  
tama ena bugagia bidibao.  
Tama tiyu, eno te magi nai me delide wi me ebeo.  
Te ena betba pabo sogo, te polo tama ena pibadi,  
nago ena tonalubo dao.

---

<sup>e</sup> 4:4 Ef 4:26

## Salmo 5

*Te Devitgo aṣani balia po me deli dao.*

**Te bidigo gedu haluasa po Godigo aga tonalumainu wali**

- 1 Genuai Bidi, nago eno gedu haluasa po wabo odao,  
tama eno homu he wabo madi olo muao.
- 2 Nage king me eno God da, te nago ena tau somainu,  
eno nageba gedu haluasa po obaso,  
nago eno i wabo odao.
- 3 Genuai Bidi, te tigidali sogo kigamude  
nago te eno gedu haluasa po odobo dao.  
Te giliga pedalubode eno nageba  
bomonama, gedu haluasa po obao,  
te ena ofa ebo tiwai.  
Tama eno te gedu haluasa po wali  
wei ponobo te nageba tonalubo dao.
- 4 God, te dolo isiabo kolesagade  
nago te wiegi yai homu pemene me egobeo.  
Tama te dwai we bidi te nago augwali gesegobeo.
- 5 Nago gedude te hagoma ebo bidi dabe  
te dolalumainu me egobeo.  
Tama te dwai kolesaga ebo bidi dabe  
te nago godolo homu mu me isiawaibao.
- 6 Nago te tigidali tibo po wabo bidi dolobo da.  
Tama bidi ela mubo bidi dabe, me te tibo po weyu,  
te gasa po dali ugwadu ma daganobo bidi,  
te nago godolo homu mu me egobeo.
- 7 Tiali goli, nago ena sesemane godolo mu ebo da.  
Tama ena te nago be tomoba asabo  
usu ebo tiwai yali.  
Eno te kidu sugunama, te nageba te nago tedali genuai  
lotu be tempel tomode lotu obaso, te usu yaibao.
- 8 God, te boi bidi hauwago ena dolainu ebao.  
Tama tiyu, nago eno saṣa dodolobaso,  
teda eno nago doloba pai kolesaga wali paibao.  
Awe, te nago homugo ena somainu  
homu ebo sunumi te enaba ola mao.
- 9 Te eno boi bidi dabego  
te mu po dwasianu me wagobeo.

Augwaligo te gasa bidi dolabo homu naga ebao.  
 Te augwaligo pedauwali te gų page tų dedage  
 dalalubo tiwai elalubao.  
 Augwaligo te homu bega sabo po hauwade te bidi dabe  
 dwai madiba kekebo dao.<sup>f</sup>

10 God, nago augwali po tų ilama,  
 tama augwaliba dwai dene mao.  
 Te augwaligo dwai sę emainu sininama,  
 te bage augwali dwai madi tula palomainao.  
 Te augwali nago gesabidide digibulu  
 sela sayao, magi baso meni,  
 augwaligo te nagede hagoma eyu,  
 tama te dwai sę hauwa ebao.

11 Tiali goli, te nago tonalubo we bidi  
 augwali tigidali,  
 augwa wiegi yai homu pemene yao.  
 Augwa te bugai homu mu elama,  
 tama te wiegi yai homu pemene ebo  
 balia sesemane waiyao.  
 Nago augwali bugagia sesela sao.  
 Tama tiyu, te nage wei mu ebo  
 we bidi dabego nago nogi ugwaba saibao.

12 Genuai Bidi, nago po wali pabo bidi  
 dabeba te nago wiegi yai nai mayu ebo da.  
 Awe, nago augwali geme dualiyu,  
 tama augwali bugagia mu tonalu ebo da,  
 te bidi te awago te seselaluyu,  
 te bugagia bidibo tiwai ebo dao.

## Salmo 6

*Te Devitgo asęani balia po me deli dao.*

**Te sęę elalubo bidigo te Godiba gedu haluasa  
 po weyu, aga tau somainu yai**

1 Genuai Bidi, nago wado yabo homu elalubao,  
 tiali goli nago  
 enaba wado po me wagio.

---

<sup>f</sup> 5:9 Rom 3:13



Nago haliga seęę yali, tiali goli nago enaba  
dene me magio.<sup>g</sup>

2 God, nago te ena homu dene eyu,  
te tau sabo kolesaga enaba yao.  
Magi baso meni, ena bomu mu menibao.  
God, nago ena usu ma ilao, magi baso meni,  
eno bomu tigidali sia salio.

3 Eno haligade genuai seęę mu elalubao.  
Tiali goli, God, nago magi ebawe?  
Nisu naga sogo enade  
te haliga seęę elalu bidimainuwe?

4 Genuai Bidi, nage begasa aselama,  
ena usu ma ilagasao.  
Awe, nage te olo mu tau sabo  
wiegi yai kolesaga ebo bidi da,  
tama tibaso, te ena isidali weyu, nago ena tau sao.

5 Magi baso meni, te isali bidi dabego  
te nage homu kone me egobeo.  
Te gų pagede te bidi me deligo  
nago nogi ugwaba sobaso, te usu me egobeo.

6 Ena i udu udubadi genama,  
tama ena bomu tigidali sia salio.  
Tigidali sogo hulide te gedu gela giguai aęęo  
te eno bet te gologo yai.  
Eno gela umabo mu udali digi,  
te eno tobolo ni het pilo  
te gela giguaigo gologo mu yai dao.

7 Ena gela udali madigi tama eno gedu bo dali,  
tama eno te nai dabe suabo  
usu meni yai, magi baso meni,  
eno boi bidi hauwa elalubao.

8 Dage te dwai kolesaga ebo bidi dabe, dage geda sao.  
Godigo eno gedu haluasa po odalio.<sup>h</sup>

9 Eno Godiba i weyu, ena tau somainu yali,  
tama aęę eno i wabo odalio.

Aęę eno gedu haluasa po wabo odali.

10 Te Godigo te boi bidi dabe aiyaba elaluama,  
tama aęęwali te seęę toliyu,

tama augwali hale mu yaibao.  
Tama polo tama augwali ma geasa wi peyu,  
augwali te noma siyu, umuna paibao.

## Salmo 7

**Te seęę elalubo bidigo gedu haluasa po wali**

*Me sogo Devitgo te Kus paniabo homu seęę elaluuli, te Benjamingo  
hani bidi me deligo, te po agaba wali, tama tiyu agai te  
Genuai Bidiba gedu haluasa po wabo balia po wali.*

- 1 Genuai Bidi, eno God da, ena nageba asiyu,  
tama ena te boi bidi dabede geme duala saibao.  
Nago ena tau sobaso,  
te ena pobeasa asali bidi dabego  
te augwaligo ena me eligobeo.  
Nago ena ma sobaso, te ena me dolobeo.
- 2 Tiyu, te ena augwaligo dolidalio,  
te laiongo bidigo tigiwali togobo tiwai gilama idalio.  
Tiyu, te augwaligo ena te gasaba me kekasa peyu,  
tama ena ma sainu yabo bidi me deli meni yaibao.
- 3 Genuai Bidi, eno God da,  
te eno dwai seę meba te tama eyu da,  
te eno gasa bidiba dwai seę eyu,
- 4 tama eno ena abagi dali geagano bilibo seę eyu,  
tama eno te ena boi bidi dolobo seę olo eyu ebaso da,
- 5 teda, nago te boi bidi dabego ena pobelama,  
tama ena tola somainu yagameo.  
Tama augwa ena ela muyu,  
tama ena mu dolomainu yaibao.  
Awe, eno tigi te tę daide olo elalumainao.
- 6 God, nago haliga sebę elama, te nage hogodama,  
tama te boi bidi dabego dwai sebę eyu,  
ena dali bomonama mu hwıbaso,  
te nago augwali dwai dene ilao.  
Ena God, te nago ena polo mu tau sao.  
Magi baso meni, nago te doloba pai kolesaga naga  
wei homu ebo dao.
- 7 Te tigidali we bidi nage paęba naga sisinama,  
tama nago augwali tonalumainu yao.

8 Genuai Bidi, nago te tigidali we bidigo kolesaga  
dagalubo da.

Tama tiyu, nago ena te po tude tau sao.  
Magi baso meni, nago koneani,  
eno dwai se me ebeo, eno te wiegi yai  
doloba pai kolesaga naga yai.

9 God, nage te doloba pai mu da.  
Nago te tigidali bidigo haliga me  
homu te dagalubo dao.

Tialima, nago te dwai se ebo bidi dabego  
dwai kolesaga ebo te tigidali silao.  
Tama nago te wiegi yai bidi dabego  
ebo dwagi yai kolesaga wei ponao.<sup>i</sup>

10 God aga da, te ena tonalubo bidi da.  
Agai te aga po wali pabo bidi dabe tau sabo dao.

11 God te po tu dodolobo odobo wiegi yai jas bidi,  
tama te doloba pai po tu ebo da.  
Sesemane sogo agai te dwai bidi dabe aiyaba elalueibao.

12 Te dwai se ebo bidi dabe te augwa  
homu begeleyu, ge nesiabaso da,  
teda Godigo te aga bainat hwa dulaibao.  
Tama te agai enesigi balibi dolama,  
te hwiabo sisi elalueibao.

13 Agai augwali te sia dabo enego usu sali.  
Agai te bidi dabe augwali ela muabo  
ene dabe sisi yai elalubao.

14 Te dwai bidi suao, agai te gasa bidi dali  
dwai se yabo homu beasi elalubao.  
Agai te tobage dwai se yabo sisi elama,  
tama te sesemane sogo tibo po wabo dao.

15 Agai tude genuai to dedage nigilama,  
te gasa bidi aba tulalumainu yali, tiali goli aga digi  
aga te nigali to dedageba tulalubo dao.

16 Te tiwai naga aga te yali dwai se  
tiali aga pageba ma asobo dao.  
Tama agai te gasa bidiba te wado me hwiyu ebogo  
begelama, tama aga digi aga dolaibao.

---

<sup>i</sup> 7:9 Ped 2:23

17 God te doloba pai mu da,  
 tama tiyu, eno agaba usu da weyu,  
 gedu haluasa po waibao.  
 Tama te Ugwadu Mu Bidibo God nogi ugwaba selama,  
 te eno balia po dabe waibao.

## Salmo 8

*Te Devitgo aęani balia po me deli dao.*

**Te Godigo magi baso da we bidi dade homu kone ebo dawę?**

- 1 Yawe, nage dago Genuai Bidi da, tama te tigidali  
 tę badu  
 te nago nogi te mu polalubao.  
 Nago genuai nogi dali, nago bomo dali si  
 te ugwanu mu elaluyu,  
 te dagalu aiyaba mu elalubao.
- 2 Nago te wai dabe me te ogwa wegı sibi munama,  
 tama augwaligo nago nogi dali,  
 bomo dali si te ugwaba sabo dao.  
 Tebogo nago te nage dali boi homu  
 ebo bage augwali dwai hale iliyu,  
 tama augwaligo sagia sabo dao.  
 Te nago po sela saęo bage me  
 augwaligo po wabo tagaluyu, olo bidibo dao.<sup>j</sup>
- 3 Te eno nago nogogo nigali dagalu subo sogo,  
 tama eno te poluaba me,  
 te tigidali hę te nago ugwade muani tonono ebo sogo,
- 4 eno midigi siyu, tama homu ebo da,  
 ‘Da tęde bidi te magi nai,  
 tama nago dade homu kone ebo dawę?  
 Da te olo nai tiwai da.  
 Magi baso nago da te bugagia tonalubo dawę?’<sup>k</sup>
- 5 Nago da nigilama, tama nago da  
 te nagaduba deli naga dologode bidimainu muani.  
 Nago da ugwaba siyu,  
 tama daba genuai nogi mabo dao.
- 6 Nago da sa muyu, te nago nigali nai tigidali

<sup>j</sup> 8:2 Mat 21:16    <sup>k</sup> 8:4 Jop 7:17-18; Tib 144:3; Hib 2:6-8

tonalumainu yai.

Nago te tigidali nai dago dologoba munama, elalubo dao.

<sup>7</sup> Awe, tigidali sipsip me, bulmakau me,  
te buside elalubo tigidali hasa dabe me,  
<sup>8</sup> tama te ugwadu bola bilibo tigidali ba me,  
tama te tamu ąide tigidali suęę me,  
tama te tamu ąide bilibo tigidali nai me.

Tigidali te da bidigo dologode bidibo dao.

<sup>9</sup> God, nage dago Genuai Bidi da.

Te tigidali bulu habude te nago nogi te mu polalubao.

## Salmo 9

*Te Devitęo aęęani balia po me deli dao.*

**Bidigo te Godigo doloba pai kolesagade te Godiba  
usu da weyu, gedu haluasa po wali**

<sup>1</sup> God, eno nageba usu da weyu,  
gedu haluasa po mu obao.

Eno te we bidi augwaliba te nago  
midigi sabo wiegi yai sę tigidali yali po waibao.

<sup>2</sup> Eno nageba homu koneama,  
tama eno te wiegi yai homu  
pemene ebo balia waibao.

Te Ugwade Bidibo God mu, te eno balia weyu,  
nago nogi ugwaba saibao.

<sup>3</sup> Te eno boi bidi dabego nage sulama, tama wi pai.  
Augwali tulaluama, tama mu isalio.

<sup>4</sup> Nage te jas tiwai te siade dulalu,  
tama nago te doloba pai po tų ebao.  
Nago eno kolesaga osola suyu, dagalali,  
te nago suali, eno magi sę me deli ebeo.

<sup>5</sup> Nago po odisiąwai bidi hani dabe,  
te Israel hani isąwai hani dabe, te nago po tų ilali.  
Nago te dwai sę ebo bidi dolali,  
tama te bidi meęo augwaliba  
te homu kone munu me ma egobeo,  
augwa hani nogi mu miyą saibao.

<sup>6</sup> Awe, te boi bidi dabe sesemane doludubadi usu nanio.  
God, nago te augwaligo hanu dabe dolama,  
tama te mena bidi me deligo

te augwaliba homu kone ma egobeo.  
Mu menio.<sup>1</sup>

7 Tiali goli, God te sesemane king bididubadi usu yai.

Agai te po tų yabo sisi yai dao.

8 Mu tama, agai te tųde we bidi tonalubo,  
tama agai bomai po te doloba pai mu da.

Agai te tigidali we bidigo kolesaga  
dagalubo sę te deli tigi poai sęgo naga dagalubo dao.

9 God te bomai be me deli tiwai.

Te bidi dabe te boi bidide sęę sobaso,  
augwa te agaba aselama, bidagasobo dao.

Te sęę sabo augwa te agaba pelama,  
te geme dualalubo dao.

10 God, te nageba asobo we bidi

te nago augwali tudiba munu me mugobeo.

Tama tibaso, te nage koneani bidi dabego  
da, te nageba konealubo homu dą mu wabo dao.

11 Genuai Bidi God te Saion hanude king bidibao.

Dagego te aga nogi ugwaba siyu, te tęąbi waiyąo.

Tama dagego te tigidali Israel hani  
isąwai bidiba po hanilama weyu,

te agai yali tigidali bomai sę po waiyąo.

12 Magi baso meni, Godigo te dene

tolobo bidi homugo konebo da.

Tama agai te augwaligo gela wabo  
te homugo me gegeda palugobeo.

Agai te augwaliba dwai dene mabo  
bidi dabeba te dwai dene wei ponobo dao.

13 Genuai Bidi, nago enaba te olo mu

tau sabo wiegi yai kolesaga yao.

Te boi bidi dabego enaba

te dene me sęę mabo, te nago suao.

Te pąde ena isainu ebadi goli,

tiali goli nage asiyu, ena dą walao,

te ena bugagia bidimainogo tiao.

14 Tama tiyu, eno te nago yali sę po tigidali weyu,

tama eno nago nogi ugwaba saibao.

---

<sup>1</sup> 9:6 1 Ko 15:27; Ef 1:22; Hib 2:8

Ena te Saion hanu sunumide dolalu,  
tama te nago ena ma sali po weyu,  
te wiegi yai homu pemene yaibao.

15 Te Genuai Bidigo po odisaḡo Israel  
hani isaḡwai bagego te tḡ dedage diginama,  
te da kalabus emainu yali.

Tiali goli, augwa digi teba tulaluai.  
Augwaligo te da tola somainu yabo bono  
gaḡaḡa geme muani, tiali goli,  
te bono gaḡaḡo augwa digi ma tola sai.

16 Awe, te tama tebogo te God agai  
kolesaga te bidi dabeba

te po tḡ ebo sogo ola mawai dao.  
Te dwai se ebo bidi dabego te gasa bidi dolabo se yali,  
tiali goli te naigo begelama, te augwa digi ma dolai.

17 Te dwai bidi dabe, me te God tudiba mubo we bidi  
hani dabe, te tigidali isimainu ebo dao.

18 Me ma, Godigo te magi doado bage  
meni yai bidi dabe te sesemane sogo homu  
kone palubo me tagalobeo.

Mu tama, Godigo te genuai seḡe elalubo  
bidi dabe tau siyu, te augwa konealubo homu  
te odolali me tagalugobeo.

19 Genuai Bidi, nage asao.

Te tḡde bidi dabego nage ela soyu,  
te poligi soabo bidi dabe te nago me  
gogolamuo.

Nago po odisaḡo Israel hani isaḡwai bidi dabe  
te nago po tḡde augwali dodolama,  
tama augwa kolesaga dagalamainao.

20 Genuai Bidi, nago augwali dwai wi ilao.

Nago te we bidi dabe augwali geḡ nomainu ilao,  
augwali te osogo bidibo tiwai konemainu ilao.

## Salmo 10

Te Godigo te dwai se ebo bagego kolesag dagalamainu  
eyu, bidigo gedu haluasa po wali

1 O Genuai Bidi, magi baso nage digibulu

dolalubawe?

Magi baso te dwai sę daba  
pedalubo sogo nago dade geme duala sobawe?

2 Te dwai bidi dabego te hagoma eyu,  
tama te magi doado bage  
meni yai bidi dabe pobeasa biliyu,  
te augwali dolainu ebo da.

Augwa te gasa bidi dabe kalabus ilainu,  
te nigali tę dedageba te augwa digi teba  
tulolumainao.

3 Te dwai sę ebo bidigo te aga ebo  
dwai homu kolesagade hagoma homu eyu ebo dao.  
Tama te hauwa nai wei eyu, pesa ebo bidigo agai  
te Godiba dwai po weyu,  
tama aga tudiba mudu gebo dao.

4 Te hagoma ebo bidigo te tama po wabo da,  
“Eno koneani, Godigo eno ebo dwai sę wei ponobeo.  
Agai enade magi homu me egobeo.”  
Te dwai sę ebo bidigo te tama homu eyu,  
agai te Godigo ebo kolesaga wali pabo menio.

5 Te agai yali sę tigidali, te wiegi yai pedalubo dao.  
Agai te Godigo po tę yabode  
te homu kone dwasianu me ebeo.  
Agai te boi bidi dabeba  
te posobo po weyu ebo dao.

6 Agai te aga homude kone palama, tama te po weyu,  
“Ena bomonama dolalubo da,” po wai.  
“Te magi nai me deligo ena dwasianu me degelegobeo.  
Te enade sęęę me gegegobeo,” te po wabo dao.

7 Te sesemane sogo agai te gasa bidi dolomainu,  
agai te i ola mabo po wabo dao,  
tama tibo po me, te gasa bidi  
wi ilibo po me weyu ebo dao.  
Polo tama agai te dwai sę ebo kolesaga me,  
te haniani sę yabo po mibo sę ebo dao.<sup>m</sup>

8 Te bidi te bidibo be nani pesage  
tomode geme dulaluyu,  
tama te dwai sę isęwai bidi dabe asobo tonaluama,

---

<sup>m</sup> 10:7 Rom 3:14



- tama augwali ela mubo dao.  
 Aga te geme dulaluyu,  
 tama te bomu meni yai bidi dolainu tonalubo dao.
- 9 Aga te geme duala selama, tonalu,  
 te laion me deligo aga tų dedage  
 tomode tonalubo tiwai ebo dao.  
 Aga te geme duala selama,  
 te bomu meni yai bidi tola sainu tonalubo dao.  
 Agai te aga bono gąą haliga gebelama,  
 tama aga kegasa pabo dao.
- 10 Te dwai sę isiąwai bidi dabe  
 mu dolama, tama pila mudali.  
 Te dwai bidigo genuai bomogo  
 te augwali aiyaba elalubo dao.
- 11 Te dwai sę ebo bidigo te tama homu ebao,  
 “Godigo te sę ebode magi sę me egobe da,”  
 homu ebao. “Agai ena me sugobeo.  
 Agai te aga gedu panianio,”  
 dwai bidigo te tama homu ebo dao.
- 12 Genuai Bidi, holalua, nago aga elao.  
 O God, nago te sęę tolobo bidi dabede  
 homu kone ebo me tagalugio.
- 13 Te dwai sę ebo bidigo te God  
 tudiba muani, tama aga homude  
 te tama homu ebo dao,  
 “Agai te eno dwai sę ebo wei ponogobe da,” wabo.  
 Magi baso agai te tama po wabo dawę?
- 14 Tiali goli, menio.  
 God, nago te dwai sę ebo bidi dabego  
 kolesaga subo dao.  
 Tama da gasa we bidi dabeba te sęę me dene mabo,  
 te nago koneani,  
 tama nago da tau sainu sisi yai.  
 Te bomu meni yai bidi aga digi  
 te nage nogoba muani,  
 magi baso meni, te sesemane sogo  
 nago te magi nai meni yai bidi  
 tau sabo dao.
- 15 Nago te dwai sę ebo bidi dabego  
 bomu silao.

- Nago te augwa yali dwai kolesaga  
 deli deli wei ponama,  
 tama mu usu nao.
- 16 Te Genuai Bidi te sesemane sogo  
 te king bidada peyu, bidada paibao.  
 Agai te aga po odisaḡbo Israel hani  
 isaḡwai bidi dabe  
 te aga tḡde ela gudulama,  
 tama augwali tede mu me bidigobeo.
- 17 God, te nage dologoba  
 asobo we bidigo usu da weyu,  
 gedu haluasa po wabo te nago odao,  
 tama nago augwali homu daḡ walao.
- 18 Te nago te tiana wai dabe me,  
 te haliga seḡḡ elalubo bidi dabego me, te augwaligo  
 gela wabo nago odobo dao.  
 Te nago augwali tau selama,  
 te augwa po tḡde te gasa bidi aiyaba elaluama,  
 buluba diḡ soaibao.  
 Tama tiyu, te dwai seḡ ebo bidi dabego  
 te augwali wi ma ilibaso, te usu me egobeo.  
 Te dwai seḡ ebo bage augwali te tḡde  
 osogo bidabo bage naga dao.

## Salmo 11

*Te Devitgo aseḡani balia po me deli dao.*

### **Bidigo konealubo po God dali daḡ wai**

- 1 Eno konealubo po mu daḡ wali,  
 Genuai Bidigo ena tonaluaibao.  
 Abagi dede, dage kolesaga isaḡyu,  
 dagego enabolo te po wali,  
 “Nage bulu duba wi pao,  
 te ba me deli wi ebaso, polo pabo tiwai yao.
- 2 Magi baso meni,  
 dwai bidi dabe augwaligo ene selama,  
 te balibiba tulama, nage enainu, te kegebao.  
 Augwali te hulua sai bulude geme dualama,  
 tama te dwagi yai bidi dabe enainu te ebao.

- 3 Tama tibaso, te we bidi dabe  
 augwaligo te bomai po dologode  
 bidibo kolesaga tagaliyu da,  
 teda dwagi yai kolesaga ebo bidi  
 aga mena tama tegowe?”  
 Dagego enabolo te po wali.
- 4 Genuai Bidi God aga dwagi yai bede bidibo.  
 Tama aga dagalude genuai tuni bidi bidiyu,  
 tama agai gedugo tigidali bidi subo dao.  
 Tama augwaligo tigidali se ebo agai osola subo dao.
- 5 Genuai Bidigo dwagi yai bidi dali,  
 dwai bidi dali osola subo dao.  
 Agai bomo yai po sela saḗbo  
 te bidi agai hagela mu ebo dao.  
 Te bagego gasa we bidi elebo kolesaga ebo dao.
- 6 Agai dwai kolesaga ebo bidibolo  
 posolo yai sia ugwadu aiyaba gelebo dao.  
 Tama te posologo augwali mu dene sabo dao.  
 Te augwaligo dwai se ebaso, dene somainogo tiwai.
- 7 Genuai Bidi aga dwagi yai dolo mu dao.  
 Tama agai te dwagi yai kolesaga ebo  
 we bidi godolo mu ebo dao.  
 Bidi augwaligo agai  
 po wali pabo bidigo aga gesabidi sueibao.

## Salmo 12

*Te Devitgo aseani balia po me deli dao.*

**Te gedu haluasa po wabo bidi da, te Godigo aga tau saibao**

- 1 God, nago da tau sao.  
 Te wiegi yai bidi deli me bidibo menio.  
 Te doloba pai bidi dabe subo me usugobeo.
- 2 Te tigidali bidigo te gasa bidi dabeba  
 tibo po wabo da.  
 Te homu bega sabo pogo augwali  
 te geagano bilibo tiwai ebo dao.
- 3 Genuai Bidi, nago te homu bega sabo  
 po wabo bidi dabe pedauwali paniam,

- tama te hagoma ebo bidi dabe  
pedauwali me paniao.
- 4 Te bidi dabego te tama po wai,  
“Te dena digi dena homugo po waibao,” wai.  
“Te mena bidi mego da me paligobeo,” wali.  
“Dego da tonalubo dawew?”
- 5 Tiali goli, Genuai Bidigo te tama po wai,  
“Te megii da, ena asaibao, magi baso meni,  
te magi doado bage meni yai bidi dabe te bidi  
dabego aiyaba elaluai.  
Tama te dene me seḡe tolali bidi dabe,  
te augwaligo gela udali.  
Te eno augwali te bugagia bidabo  
te augwa sainu tonaluali madi, teba muaibao,” wali.
- 6 Godigo daḡ walali po te mu po naga dao.  
Agai po te wiegi yai mu,  
te wiegi yai kapa silva tiwai dao,  
tama te silva augwaligo te a naga olama,  
nogo me badu si,  
te tama sogo siaba ulama, te dwasianu meda  
mu meni yai tiwai mu dao.
- 7 Genuai Bidi, da bugagia tonalua.  
Te sesemane sogo da bugagia tonalua,  
te tobage bidi dabego da dolomainu me egobeo.
- 8 Te dwai seḡ ebo bidi dabe  
te tigidali habu badu bilalubao.  
Tama tigidali we bidigo te dwai seḡ ebo kolesaga  
te wiegi yai nai da homu ebo dao.

## Salmo 13

*Te Devitgo asḡani balia po me deli dao.*

- Te Godigo aga tau somainu eyu, bidigo gedu haluasa po obao**
- 1 Genuai Bidi, nisu naga sogo nago te enade  
homu kone ebo tagalubawe?  
Te bidada pabo sesemane sogo usu nama, agawe?  
Nisu naga sogo mu nago ena sula tagalobawe?
- 2 Te nisu naga sogo ena te dene tolomainu ebawe?  
Te nisu naga sogo ulade me hulide

- te eno haliga sęęę elaluaibawe?  
 Nisu naga sogo ena te boi bidi dabe  
 dologode bididuaibawe?
- <sup>3</sup> Genuai Bidi, nage eno God da.  
 Nago enade homu koneama,  
 te eno gedu haluasa po wabo odao.  
 Te ena isidali weyu, nago ena daę ma walao.
- <sup>4</sup> Tama tialima, te boi bidi dabego  
 te enade po me wasiaęwaibao,  
 “Dago aga aiyaba elaluali,” te keęę po me wagobeo.  
 Tama augwaligo ena tulalubaso,  
 te wiegi yai homu pemene me idali weyu obao.
- <sup>5</sup> Tiali goli, ena da, eno te nago ena  
 sesemane godolo ebo kolesagade  
 eno homugo daę walai dao.  
 Tama eno wiegi yai homu pemene nageba ebao,  
 magi baso meni, te nago ena tau saibao.
- <sup>6</sup> Awe, Genuai Bidi, te eno nago nogi ugwaba sabo  
 balia po waibao. Magi baso meni, nago enaba  
 wiegi yai sę mu yai dao.

## Salmo 14

*Te Devitgo aęani balia po me deli dao.*

### Dwai kolesaga ebo bidi dabede elalubo po

- <sup>1</sup> Kolesaga meni yai dwai sę ebo bidi dabe  
 augwa hasi te po wabo dao,  
 “God bidibo menio,” wabo dao.  
 Te bidi dabe augwali te dwai bidi dao.  
 Augwaligo dwai kolesaga mu naga ebo dao.  
 Bidi me deligo dwagi yai kolesaga me ebo menio.
- <sup>2</sup> Genuai Bidi dagalude bidiyu,  
 tama aęai tęde bidibo we bidi aiyaba tonalubo dao.  
 Aęai te kolesaga koneai bidi me deli gegeyu,  
 te God gegebo sę ebowe naga suainu tebo dao.
- <sup>3</sup> Tialima, menio. Tigidali augwaligo dwagi yai tu  
 wali pabo tagalai.  
 Tigidali tiwai naga yai,  
 augwali dwai bidi mu pedelai dao.  
 Tama augwali me deligo dwagi yai kolesaga me ebeo.

Mu menio.<sup>n</sup>

- 4 Genuai Bidigo te po wai, “Te bidi dabe augwaligo  
dwai kolesaga yai,  
augwaligo homu kolesaga meni, agawe?  
Augwaligo te eno we bidi dabe ela silibao,  
te augwaligo te bret tubo tiwai gilama te mu silibao.  
Tama augwaligo enaba gedu haluasa  
po wabo menio,” wali.
- 5 Tialima, te bidi dabe augwali wi mu yaibao.  
Magi basowe, God aga te agai  
po wali pabo bidi dabe augwali dali bidibao.
- 6 Te dwai sę ebo bage augwaligo  
te nai meni yai bidi dabego yainogo ebo sę dali  
gisugu mabo dao.  
Tiali goli, Genuai Bidigo te nai meni yai bidi dabe  
augwali bugagia tonalubo dao.
- 7 Eno homugo Genuai Bidigo Saion bulu bidi me deli  
tagala palama,  
Israel we bidi ma somainogo te homu ebao.  
Nosali Genuai Bidigo aga hani bidi tau selama,  
tama augwali bugagia ma bidimainogo yaibao,  
tialima, Israel hani augwali homu dwagi yai emainogo.  
Ao. Te Jekop aga hani bage augwaligo  
dwagi yai homu mu yaibao.

## Salmo 15

*Te Devitgo asęani balia po me deli dao.*

**Godigo godolo yabo kolesaga dago emainogo yai**

- 1 Genuai Bidi, de nago dwagi yai bede bidibo  
usugowe?  
De nago te dwagi yai bulu du Saionde duagawe?
- 2 Bidigo God agai homu kolesaga  
tigidali wali painogo ebo bidi,  
tama sesemane sogo doloba pai kolesaga naga eyu,

---

<sup>n</sup> 14:3 Rom 3:10-12

- tama tigidali sogo mu po naga weyu ebo bidi,  
aga te Genuai Bidigo bede bidibo usu yaibao.
- <sup>3</sup> Agai gasa bidigo nogi doliyu,  
wialubo po wasiꝓo bidi,  
tama abagi dabe augwali dali dwai sę isꝓama,  
tama agai te sabilibo po  
gasa bidi dabe dali me wasiꝓwai bidi dao.
- <sup>4</sup> Agai Godigo te tudiba muani bidi dabe  
augwali godolo isiꝓama,  
tama agai Godigo po wali pabo bidi  
dabego nogi ugwaba sabo dao.  
Tama agai te Godigo gedude eno  
te sę yaibao po obaso da,  
teda agai te po usu naibao.  
Ma, tebogo te sęę agaba mobaso da,  
tagalao, agai te daꝓ walali po togogobeo.
- <sup>5</sup> Tama te agade negeli sali bidigo  
te negeli wei ponobo sogo,  
agai te giguai mone ma ugwadu  
daganobo mone mao olama, agai sogobeo.  
Te gasa bidi dabego te dwai sę isiꝓwai bidi me  
deli dali po tu yainogo eyu,  
tama augwaligo homu augwaligo  
te doloba pai bidibolo mone meba geme menama,  
tama agai te po tu ebode  
te tibo po kisilibo po waibao.  
Tiali goli, agai te mone selama,  
agai te tibo po kisilibo po wagobeo.  
Bidigo te dwagi yai kolesaga ebo  
wali pabo bidi aga tulalugobeo.

## Salmo 16

*Te Devitgo asęani balia po me deli dao.*

**Bidigo konealubo po daꝓ olama, God dali gedu haluasa po wai**

- <sup>1</sup> God, nago ena tonalua.  
Magi baso meni, eno te nago  
ena bugagia tonalueibao homu eyu,  
tama ena nage dologoba bidagasobo dao.
- <sup>2</sup> Eno Genuai Bidi Godibolo te po wai,  
“Nage eno genuai bidi dao.

Tigidali dwagi yai nai eno tolalubo,  
te nai nago naga mabo nai dao,” wali.

3 Augwaligo konealubo homu Godiba  
naga ąų wali we bidi, augwali e tęde bididubadi,  
augwali te tedali gasagi yai we bidi hani dao.  
Eno dwagi yai homu mu elama,  
augwali dali bidaio homu ebo dao.

4 Tibo po wabo god pageba painogo udabo we bidi,  
augwali sęęę hauwa saibao.  
Ena augwali dali deliba sisinama,  
te tibo godibolo nai ula mabo ofa sę egobeo,  
tama eno augwaligo te tibo godiba lotu po wagobeo.

5 God, nage deli eno God mu,  
tama eno gasa nai me menio.  
Tama nago eno sęą pali nai tigidali ena mawai.  
Eno bidibo ula nago tolalubo dao.

6 Eno dwagi yai nai tigidali nage dali naga olo sai.  
Mu tama, te nai dabe dwagi yai mu dao.

7 Eno Genuai Bidigo nogi ugwaba sobao, magi basowe,  
agai ena bugagia dodolobo dao.  
Tama hulide eno homu kolesagago  
te dwagi yai tų enabolo ola mabo dao.

8 Sesemane sogo eno homugo konebo,  
Genuai Bidi ena ąęde bidibao, te eno dolo nogo badu,  
tama magi nai mego ena me degelegobeo.

9 Tama tibaso, eno homu dwagi yai eyu,  
tama eno po wabo mobo dwagi yai homu ebo dao.  
Tama eno magi nai me dali wi ebo menio.

10 Magi baso meni, nago ena  
te isai bidigo bulude bidimainu tagala palogobeo.  
Tama nago naga tedali gasagi yai bidi  
aga te gų pagede damua pomainao wagobeo.°

11 Nago digi ena te bidibo ula te tų ola mawai.  
Nage ena dali ąęde bidibaso, nago  
te eno dwagi yai homu mu ebo dao.  
Tama nago ena sesemane bidada pabo sogo tau sabo,

---

° 16:10 Tpi 13:35



eno dwagi yai homu mu ebo dao.<sup>p</sup>

## Salmo 17

*Te Devitgo aṣṣani balia po me deli dao.*

**Dwai se isawani bidigo gedu haluasa po wai**

- 1 Genuai Bidi God, nago eno gedu haluasa i  
wabo po odao.  
Ena bugagia dolo bilai, tama eno te po sela aselama  
nagebolo obao.  
Eno tibo po olama, gedu haluasa po wabe,  
tama nago eno te gedu haluasa po wabo odao.
- 2 Nago ena tau selama,  
tama eno po tu ebo aiyaba elaluaio.  
Magi basowe, nago koneai,  
mena kolesaga dwagi yai ebo.
- 3 Nago eno homude koneai.  
Nago ena hulide me suagasai,  
tama nago ena usu sai,  
tama nago eno homu kolesaga  
dwai elalubo nago me subeo.
- 4 Eno dwai po bidi mebago wabo po tiwai wabo menio.  
Eno nago po bomo elama daḡ weyu,  
tama eno te wado po weyu,  
hwibo po wabo kolesaga tudiba muai.
- 5 Eno sesemane sogo nago kolesaga wali peyu,  
tama eno saḡa dwasianu me geda mubeo.
- 6 God, eno nagebolo gedu haluasa po wabo dao.  
Magi baso meni, nago eno gedu haluasa  
po wei ponobo dao.  
Nago olo eno gedu haluasa  
po wabo digi munama, odao.
- 7 God, nago dabolo dwagi yai homu elama,  
olo mu tau sabo genuai kolesaga  
ola mayu, tama ena tau sao.  
Da nage dali paḡde bidiyu, tama boi bidi augwaligo da

suidali weyu duala sai.

8 Ena tonalua, nago naga gedu tonalubo tiwai  
ena tonalua.

Ena nago bugagia mu dualao,  
te ba kakaruk aga wai dabe bogogo  
mesega sabo tiwai ilama yao.

9 Tama dwai bidi dabe augwaligo ena dologobeo.  
Augwaligo ena dali boi bidi mu elama,  
tama augwaligo ena bobegelebao.

10 Augwaligo gasa bidi dali  
homu dene eyu, olo me tau sabeo.  
Augwaligo genuai po daęą weyu,  
tama augwa nogi naga ugwaba sabo dao.

11 Augwaligo ena pobeasa biliyu,  
tama megi augwaligo ena bobegelebao.  
Augwaligo ena aiyaba elaluainogo  
bodolu munama, tonalubo dao.

12 Augwali te laiongo hasa elainogo ebo tiwai,  
tama te bomai laion duala sela  
tonalubo tiwai ebo dao.

13 Genuai Bidi, nage aselama,  
eno boi bidi dali hwınama, augwali aiyaba elalua.  
Nago bobobage hwągo augwali dali hwınama,  
tama ena dwai sę ebo bidi dabego nogode ma sao.

14 Mu tama, Genuai Bidi, nago bomogo ena tau siyu,  
tama bidi dabe augwaligo ena siligobeo.  
Ena te tęde nai naga sisinibo bidi dabe  
augwaligo nogode ma sao.  
Nago te dwai sę ebo bidi dabego  
kolesaga wei ponainogo sisi yai,  
tialima megi augwalibolo te sę yao.  
Tama augwaligo wai dabe dali me tiwai,  
tama augwaligo wąi dabe nosali pedalubode me  
tama naga tiwai sę yao.

15 Tialima, ena da, eno augwalide  
dwai sę me deli isąma,  
tama nosali eno nage mu sueibao.  
Nosali ena piali tagalama, ena hodaluama,  
tama nage ena dali bidibo sulama,

ena dwagi yai homu mu yaibao.

## Salmo 18

*Te Devitgo aṣani balia po me deli dao. Me sogo Genuai Bidi Godigo te Devit te Sol dali, gasa boi bidi dali augwaligo nogode ma sali sogo, te sogo Devitgo e balia po Genuai Bidibolo wai.*

**Te Godigo Devit tau sobaso, agai aga boi bidi dabe aiyaba elaluali**

1 God, eno nage wei mu ebao.  
Nago ena daḡ walai.

2 Genuai Bidi agai ena tau sabo da.  
Aga te eno bomai obo tiwai da.  
Genuai Bidigo ena tonalubaso, tama te boi bidi dabego  
ena me dologobeo.  
Genuai Bidi te hwḡbo sabele tiwai elama,  
tama ena geme seselalubo.  
Agai te ena ma selama,  
tama ena tonaluabo bomo elalubo dao.

3 Dago te Genuai Bidigo nogi ugwaba sao.  
Eno agaba gedu haluasa po weyu,  
usu da obaso, te agai ena tau selama,  
tama te boi bidi dabego dolainu yali usu ebeo.

4 Te paḡde ena isainu yai,  
tama te bonogo ena bomonama keḡnani tiwai yali.  
Te dwai se ebo bidi dabego enaba bomonama hwḡani,  
tama augwali te genuai tamu aḡ sigo  
ena mesegelibo tiwai yali.

5 Te paḡde ena isainu yali,  
te bonogo ena bomonama keḡnani tiwai yali.  
Te guḡ pagego ena dalainu tonaluai.

6 Ena haliga seḡe dwai ebaso, tama eno Godiba i wai.  
Eno gedu haluasa po te ena Godiba weyu,  
te agai ena tau somainu yai.  
Aga te aga wiegi yai be mude bidiyu, tama eno po odali.  
Te eno gedu haluasa po wabo te agai oloba pedelali.

7 Tialima, megi da, Genuai Bidigo wado po elalubao.  
Tama agai te toḡ mali mu ilali.  
Tama te bulu du page dabe te mumunu ela silali.

- 8 Te hano aga gunide pedelali.  
Tama aga pedauwalide dabo siago  
te doado bage hauwa ulali.
- 9 Agai te pọ dabe sela sọnama, tama aga aiyaba dulali.  
Tama husugu yai pọ te aga sọgọ dologode elaluali.
- 10 Aga te ensel dabe daide ugwadu dugulasa,  
tama bola asai.  
Te bogo te ba dabego bogo tiwai elalubao,  
tama te God auwasa polo mu asaibao.
- 11 Aga digi aga te hulua sigo haluali.  
Aga te tulubage umabo mu elalubo  
husugu yai pọ tomoba duala sai.
- 12 Te pọde be sele eyu, tama te bogoli mu elama,  
te agaba kisa sigi pali.  
Tama sia me talua ge tulubagego te husugu pọ aluama,  
tama aiyaba dulai dao.
- 13 Tama Genuai Bidigo te dagalude bomonama mu  
i weyu, te pọ kulukulu wabo tiwai yali.  
Tama te bidi dabego te Ugwade Mu Bidibo Godigo  
i wabo odali.
- 14 Agai te be selego te bidi dabeba ula enani,  
te bidigo te boi bidi dabe  
te enego enebo tiwai ebaso.
- 15 Genuai Bidi, nago te dwai sę ebo bidi dabeba  
wado ebo sogo,  
te bomai waligo augwali degelibo tiwai ebao.  
Tama te tamu ąi dologode tigidali tọ  
te bulu ulaba hania pedelali, tama te tọ page me  
te hania pedelalio.
- 16 Genuai Bidi te dagalude bidiyu,  
tama agai nogo te aiyaba muyu, tama ena tola sali.  
Ena te ayanu mu yai węde  
te hagawainu ebo bidi tiwai ebadi,  
tama Godigo ena ma salio.
- 17 Agai ena te boi bidi dabego bomai nogode me,  
te ena wei isiąbo bidi dabego nogode ma salio.  
Te bidi dabe augwaligo bomogo  
te eno bomo aiyaba elaluai dao.
- 18 Polobadu, te dwai sęgo ena gegelama,  
tama augwaligo enaba hwįagasali.  
Tiali goli tagala, te Godigo ena tonaluali.

- 19 Agai ena tonalubaso,  
tama eno te boi bidi dabe tagalali.  
Agai ena wei mu elama,  
tama agai ena ma sai dao.
- 20 Eno te doloba pai kolesaga wali pobaso,  
tama Godigo wiegi yai sę enaba bugagia yai.  
Eno dwai me deli ebeo,  
tama tiyu, Godigo wiegi yai sę enaba mawai dao.
- 21 Magi baso meni, eno te Genuai  
Bidigo bomai po bugagia wali pai.  
Eno dwai sę me isiąma, tama ena God tudiba me mubeo.
- 22 Eno te agai doloba pai bomai po  
te sesemane homu kone paliyu,  
tama eno agai po tudiba me mabeo.
- 23 Te magi dwai sę me deli isiąbo te agai koneani,  
tama eno te magi nai me delide magi sę me ebeo.
- 24 Tama tiyu, Godigo te eno doloba pai  
kolesagade homu koneama,  
tama agai ena bugagia mu tonaluai.  
Magi baso meni, agai koneani,  
te eno magi sę me isiąwai.
- 25 Te bidigo nage wali mu asobaso da,  
teda nago te nago po dolo wali pelama,  
tama nago aga tonalubo dao.  
Te bidi dolasa biliyu, tama te magi naide  
te magi me deli isiąbaso, nago agade te wiegi yai  
homu ebo dao.
- 26 Te bidi me deligo te meda mu  
meni yai kolesaga ebaso da,  
teda nago me agaba te wiegi yai kolesaga ola mabo da.  
Tiali goli, te bidigo dwai kolesaga wali pobaso da,  
teda nago agaba te dwai kolesaga wei ponobo dao.
- 27 Nago te augwa digi te haliga  
aiyaba elalubo we bidi dabe augwali te ma sabo da.  
Tiali goli, nago te augwa digi  
augwa nogi ugwaba sabo we bidi  
te aiyaba elaluaibao.
- 28 Te enade digi te Genuai Bidigo ula elalubao.  
Awe, tama ena Godigo te enade  
hulia sai elalubo te sela sębo dao.

- 29 Godigo te boi bidi dabe dali  
 hwıbo bomo te enaba mawai.  
 Tama agai enabolo te augwaligo  
 seselalubo nai dabe dolobo  
 te genuai bomo mawai dao.
- 30 Te God da, agai kolesaga te wiegi yai mu elama,  
 tama dolo mu elalubao.  
 Te Godigo te magi nai me delide po daę obaso da,  
 teda agai po te mu po naga wabo waibao.  
 Te agaba pabo bidi tigidali te agai bugagia tonalu,  
 tama te boi bidi dabede geme dualalubo da.
- 31 Genuai Bidi naga te God mu da.  
 Agaduba deli naga te dago boma pai obo dao.
- 32 Agai naga ena daę walama, tama ena bilibo sogode  
 te bugagia tonalubo dao.
- 33 Agai ena te bulu uni kibu hasa  
 bugagia bilimainu ebo tiwai eyu,  
 tama ena te bulu du dabede bidibo sogo  
 agai ena tau sabo dao,  
 tama ena tulalu me ebo meni.<sup>9</sup>
- 34 Agai enabolo te hwıbo ola mawai,  
 tama eno te bomai kapago nigai enesigi kegebaso,  
 usu yaibao.
- 35 Genuai Bidi, nago ena tonaluama,  
 tama ena ma dobola sabo dao.  
 Awe, nago dolo nogogo bomogo ena tau sabo dao.  
 Nago ena tau selama, tama ena te we bidi dabego  
 gedude genuai nogi elalubao.
- 36 Nago te eno sunumide tonalubaso,  
 tama te boi bidi dabego ena pageabi eyu,  
 te ena me tola sabeo.  
 Tama eno saęa te me kikila pisama,  
 tama ena me tula mubeo.
- 37 Eno te boi bidi dabe pobelama,  
 te augwali tola sali.  
 Tama eno augwali polo me tagala palobeo.  
 Menio. Eno hwınama, te augwali aiyaba elaluyu yai.
- 38 Eno te enego augwali enama,  
 tama augwali te ma hodaluainu  
 ebaso, te usu meni yai.

---

<sup>9</sup> 18:33 Hab 3:19

Augwali te isilama, tama te eno saęa pađe pila mubo  
tiwai yai dao.

39 Naga digi nago ena te boi bidi dabe  
dali hwıbo bomo daę walai.

Naga digi nago ena tau selama,  
tama eno augwali aiyaba elalui.

40 Nago te boi bidi dabe tudi ola momainu ebaso,  
tama enade wi pai.

Te enaba boi bidi yali bidi dabe  
te eno augwali ela muani.

41 Te augwali bidi me deli tau somainu te i wali,  
tiali goli dego augwali tau saibawe?

Te me deli meni yai.

Augwaligo te Godiba i wali, tiali goli agai augwaligo  
te gela wabo me odobeo.

42 Eno augwali mu dolama,  
tama augwali te waligo sela holobo tę hogomu  
tiwai pedelali.

Eno te boi bidi dabe elaluama,  
eno te sunumide agabo pu tiwai gagawai dao.

43 Nago ena tau siyu,  
tama te hagoma ebo bidi dabego ena dolomainu  
me ebeo.

Nago ena te we bidi hani dabego  
king pedalumainu ilali.

Te eno konesięwai we bidi augwali, te augwali aselama,  
tama eno seę yagasai.

44 Augwaligo eno po odolama,  
tama polo tama augwaligo wali pabo dao.

Te digibulu bulu bidi dabego  
kidu sugunagasiyu, gagamu ebo dao.

45 Te augwaligo haliga nagamea pelama,  
tama augwali didibili elama,  
tama augwa bomai obo tomode bidali tagalama,  
tama augwali ena dologoba bidagasobo dao.

46 Genuai Bidi bididubadi gebao.

Agai ena sesemane sogo bugagia seselalubo dao,  
te moni dobo dwai masigi tiwaigo ena  
mesegalobo dao.

Tama tiyu, eno agai nogi ugwaba sabo da.

- God da, te ena tau sabo bidi da.  
 Tama tiyu, eno agai genuai nogi ugwaba sobao.
- 47 Agai naga ena tau selama,  
 tama eno te boi bidi dabe aiyaba elalubo dao.  
 Tama agai deligo naga te haniani we bidi hani dabe  
 ena dologoba mubo dao.
- 48 Genuai Bidi, naga digi ena tau selama,  
 tama te boi bidi dabego ena me dolobeo.  
 Mu tama, Genuai Bidi, nago naga  
 ena te hwɨbode tau selama,  
 tama eno te boi bidi dabe  
 aiyaba elalui.
- Nago ena tau siyu, tama te hwɨbo bidi dabego  
 ena me ela mubeo.
- 49 Tama tiyu, te haniani tɔde bidibo  
 we bidi hani dabe tomode  
 eno nago nogi ugwaba siyu,  
 tama eno nago nogi ugwaba sabo balia po waibao.<sup>r</sup>
- 50 Genuai Bidigo ena Devit sa munama,  
 tama ena te king bidibao.  
 Tama agai eno te hwɨbode  
 sesemane sogo te boi bidi dabe  
 aiyaba elalumainu ilali.
- Agai ena godolo mu elama, tama te eno wɨ nɔɔ,  
 te nosali pedalubo bagede me, te tama tiaibao.  
 Agai te da godolo mu ebo kolesaga munu me siligobeo.

## Salmo 19

*Te Devitgo asɛani balia po me deli dao.*

**Godigo nigali tigidali naigo aga genuai nogi dabolo ola mabo dao**

- 1 Dagalugo dabolo ola mabo dao,  
 God agai bomo dali,  
 genuai nogi dali si mu elalubao.  
 Awe, tigidali nai dagalu ugwadu  
 elalubo naigo dabolo te Godigo digi augwali nigai,  
 te hania ola mabo dao.
- 2 Tigidali bidibo sogo te nai dabego po  
 naga hanilama, po wabo dao.

---

<sup>r</sup> 18:49 Rom 15:9



- Tama tigidali be hulibo sogo,  
 augwaligo dabolo te po ma wabo dao.
- 3 Ulade me, be hulide dali,  
 te dagalude elalubo nai dabego  
 pedauwali meni yai dao,  
 tama tiyu, po me wagobeo.  
 Dago te ulade me hulide dali  
 te nai dabego dogonide  
 po me wabo dago odobo menio.
- 4 Tiali goli, ulade me, hulide me,  
 te nai dabego da tigidali tęde we bidi  
 te Godigo bomo dali,  
 genuai nogi dali si ola mabo dao.  
 Tama augwaligo po tigidali  
 buluba pelama, usu mu ebo dao.
- Tama dagalude Godigo giligago  
 ugwa be me deli sę yai tiwai elalubao.<sup>s</sup>
- 5 Siago buluba teda soai, te bidi we siyu,  
 dwagi yai ebo gilama,  
 tama aga bidibo be tagalama, buluba teda soai.  
 Giligago aga dwagi yai homu eyu,  
 aga pabo tų wali pabo dao,  
 te bidi udawainogo sisi elama,  
 dolalubo tiwai ebo dao.
- 6 Sia ge pedalobo te dagalu sesege badu pedalobo dao,  
 tama gasa badu pabo dao,  
 tama magi nai me agai posolo ebo  
 digi me duala sogobeo.
- 7 Genuai Bidi Godigo bomo yai po  
 te tigidali dolo mu naga ebo dao,  
 tama dabolo bidibo bomo yai ula mabo dao.  
 Genuai Bidi God agai pode dago bomo yai  
 homu agabolo dą olama, muyu da,  
 te usu mu yaibao.  
 Te pogo dwagi yai homu kolesaga  
 agai po kuna konesiąwani bidi polo agai mabo dao.
- 8 Genuai Bidigo dabolo dwagi yai po mu ola mabo dao.  
 Te pogo dago homu kolesaga

<sup>s</sup> 19:4 Rom 10:18

- dwagi yai pemene mu ebo dao.  
 Genuai Bidigo tama tiao wabo po te dwagi yai mu dao,  
 tama dabolo dwagi yai koneabo homu kolesaga  
 mabo dao.
- 9 Bidigo Genuai Bidide wi eyu,  
 aga dologode bidibo bidi,  
 agai dwagi yai meda isiąwai kolesaga mu ebo dao.  
 Tama te kolesaga sesemane sogo  
 elalua peyu, mu elalua paibao.  
 Genuai Bidi Godigo dago yabo  
 kolesaga po tigidali wabo dao,  
 tama te mu po tigidali dolo mu ebo dao.
- 10 Te tobage pogo te wiegi yai nai go te aiyaba elalui,  
 awe, te meda isiąwai te gol,  
 te me te pogo aiyaba mu elalui,  
 tama dago agai te po mu godolo yao.  
 Genuai Bidi God agai bomo yai po te pusu mu yai,  
 tama te megego pusu ebo aiyaba elalui.  
 Agai te dwagi yai pusu mu ebo mege  
 ąi tubo te aiyaba mu elalui dao.
- 11 Nago bomo yai pogo naga sę bidi  
 eno koneabo homu kolesaga mabo dao.  
 Eno nago bomai po wali pobaso,  
 tama nago ena dulalubo digi dwagi yai ilibo da.
- 12 Tialima, niwai bidigo aga yali dwai sę koneaibawe?  
 Eno dwai sę meba yali te eno kuna konebeo,  
 tama nago eno te dualai dwai sę yali  
 peą sęlama, ma sela sęyao.
- 13 Ena nago sę bidi dao,  
 nago ena bugagia tonalua,  
 tama eno hagoma homu eyu, nago po sela sęy,  
 dwai sę ma idali weyu yao.  
 Nago eno dwai kolesaga ebo nago sulama tonalugio.  
 Tama tiyu, ena dolo bugagia bidiyu,  
 eno dwai sę genuai me egobeo.
- 14 Genuai Bidi, eno homugo eno po dali,  
 eno homu kolesaga dali,  
 te nago gedude usu emainogo te homu yai.  
 Genuai Bidi, nage bidibo digi ena duala selama,  
 tama nago ena tau siyu, ma dobola sabo bidi dao.

## Salmo 20

*Te Devitgo aṣṣani balia po me deli dao.*

**Te gedu haluasa po wabo bidi te Godigo aga  
tau siyu, te boi bidi aiyaba elaluaibao**

*Devit, te Genuai Bidigo seḗ bidi, agai te balia po aṣṣani. Agai te po Godiba wali  
te ula te bubugade Godigo aga tau selama, tama te boi bidigo aga aiyaba me  
elalusiyyu, tama te Solgo aga me dolobeo. Te po olama, te balia aṣṣai dao.*

- 1 Dago king bidio, eno homugo  
te nage haliga seḗe ebo sogo,  
te Genuai Bidigo nage tau somainu yao.  
Mu tama, te Jekopgo Godigo nage seselaluaibao.  
Awe, agai nogigo bomogo tama tiao.
- 2 Aga te aga wiegi yai be mu te Saionde bidibao,  
tama agai nage tau selama,  
tama nage daḗ walomainu yao.
- 3 Agai te nago ofa tigidaliba homu koneama,  
tama agai te nago tigidali  
te siaba ulubo ofa te wei elama, godolo yao.
- 4 Eno homugo Godigo te nago wei ebo nai  
tigidali momainu yao.  
Tama nago yainu homu yali seḗ tigidali  
te agai nage tau sobaso,  
tama nago te seḗ ebo usu yaibao.
- 5 Tama nosali nago te hwḗiani aiyaba elalubaso da,  
teda dago nago te yalide  
wiegi yai homu pemene eyu, bomonama i waibao.  
Tama dago te homu koneama,  
tama dili buduama, tama dago  
dobuali balia po weyu,  
dena Godigo nogi ugwaba saibao.  
Dago homugo te Genuai Bidigo  
nago te gedu haluasa po wabo po tigidali odaibao.  
Te kingo te po wei ponani po wali.
- 6 Megi da, eno koneanio,  
Genuai Bidigo ena tau sabo da, te king aga digi sa muani.  
Aga te aga wiegi yai tedali bulu dagalude bidibao,  
tama agai eno gedu haluasa po wabo odobo dao.  
Te agai bomode digi agai ena tau selama,  
tama eno hwḗibo side te eno augwali  
aiyaba mu elalubo dao.
- 7 Te meba hanigo hagoma eyu,

- te hwıbo karis dabeba homu muani,  
 tama gasa hani mebago te augwa  
 hos dabeba homu muani.  
 Tiali goli, dago te dena God Genuai Bidiba,  
 Godiba, konealubo homu daę wabo dao.  
 8 Te we bidi dabe augwali tulaluama,  
 tama mu hagawaibao.  
 Tiali goli, da te hodalı, tama bomonama dolaluaibao.
- 9 Genuai Bidi, nago ena king tau sobaso da,  
 teda eno te hwıbo aiyaba elaluaibao.  
 Te Genuai Bidigo te dago i wabo sogo te da tau sao.

## Salmo 21

*Te Devitgo aşıani balia po me deli dao.*

**Godigo te king tau selama, tama agai Godigo nogi ugwaba sali**

- 1 Genuai Bidi, nago te kingba bomo mobaso,  
 te agai wiegi yai homu pemene yai.  
 Te nago agai te hwıbode augwali aiyaba  
 elalumainu yali seęde  
 te agai homu pemene wiegi yai mu ebao.
- 2 Te agai wei eyu sainu yali nai, nago agaba manio.  
 Awe, agai nageba hanalu wali nai, nago te agaba mani.
- 3 Nage agaba asiyu, te wiegi yai homu ilabo nai dali  
 sela asai.  
 Tama nago te wiegi yai kapa gol elalubo  
 kingo madi aga toboluba muai.
- 4 Agai nageba te bidibo ula mao po hanalu obaso,  
 tama nago aga mawai.  
 Mu tama, nago aga bidibo ula  
 te sesabi mu elama, bidimainu yai.
- 5 Nago aga tau selama,  
 tama aga genuai nogi mu elalubao.  
 Nago nogi me bomo digi nago aga mani.
- 6 Mu tama, te nago wiegi yai seę ebo  
 kolesaga agade sesemane elaluaibao.  
 Nage aga paęde bidiyu, tama tebogo aga wiegi yai homu

pemene mu ilibo dao.

<sup>7</sup> Te Ugwade Mu Bidibo

Boma Pai God, kingo nageba  
konealubo homu ąą mu wali.

Nago olo tau sabo wiegi yai kolesaga  
sesemane sogo te kingba ebaso,  
tama tiyu, te aga bomo elama, dolalu iduaibao.

<sup>8</sup> Te kingo aga boi bidi tigidali nogogo touwaibao.

Tama aga digi te aga wei homu isiąbo  
bidi dabe te kalabus yaibao.

<sup>9</sup> Te aga hania te pepeli diliba pedalubo sogo da,  
teda agai te boi bidi dabe ela silibo da,  
te genuai siago te nai dabe ulubo tiwai gilama  
yaibao.

Mu tama, te Godigo wado po weyu,  
tama augwali aiyaba elaluama,  
tama te siago augwali tigidali dela silaibao.

<sup>10</sup> Te kingo augwaligo wai tigidali ela silaibao.

Tama te augwali hanigo wai dabe  
te ąde munu me bidigobeo.

<sup>11</sup> Te boi bidi dabe augwa homude koneama,

tama agaba dwai se yabo miani.

Tiali goli, augwaligo aga aiyaba  
elaluainu ebo usu me ebeo.

<sup>12</sup> Magi baso meni, te agai ene te augwaliba eneyu,

wi ilibaso te augwali wi paibao.

<sup>13</sup> God, nage te naga bomo dali asao.

Tama dago te nago naga bomogo yali  
genuai se dabede balia po waibao.

## Salmo 22

*Te Devitgo asęani balia po me deli dao.*

Te seęę elalubo bidigo gela wabo, me te bidigo puba hwi wabo balia po

<sup>1</sup> Eno God, eno God,

magi baso nago ena tagaluwe?

Magi baso nago ena tau sisąma ebawe?

- Magi baso eno gela wabo nago odobewe?<sup>t</sup>
- <sup>2</sup> God, eno nageba te giligade i wabo da,  
tiali goli nago eno po odobeo.  
Eno nageba te hulide me i wali,  
tiali goli nago te po wei ponesiꝓbaso,  
eno dwasianu toma me nabeo.
- <sup>3</sup> Tiali goli, naga digi nage  
te tedali wiegi yai mu elalubao.  
Nage te king bidibaso,  
tama te Israel dabego nago nogi ugwaba sabo dao.
- <sup>4</sup> Polobadu dago wꝓ nꝓ dabe  
augwaligo konealubo homu nageba daꝓ wali.  
Augwa konealubo homu daꝓ obaso,  
tama nago augwali tau selama,  
tama te boi bidi dabego augwali aiyaba me elalubeo.
- <sup>5</sup> Augwaligo nageba i weyu, gedu haluasa po obaso,  
tama nago augwali te boi bidi  
dabego nogode ma dobola sai.  
Awe, augwaligo konealubo homu nageba daꝓ wali,  
tama augwa te konealubo homu daꝓ wali  
te odolali me hagagobeo.
- <sup>6</sup> Tiali goli, bidigo gedude ena te tꝓde osogani tiwai,  
ena te olo bage tiwai mu da.  
Tigidali bidigo enaba wado po weyu,  
tama ena tudiba muani.
- <sup>7</sup> Tigidali we bidigo ena sulama,  
tama augwaligo posobo po enaba wabo dao.  
Augwaligo hamena enaba diniyu,  
tama augwa tobolu peme eyu ebo dao.<sup>u</sup>
- <sup>8</sup> Augwaligo te po weyu, “Nago konealubo homu  
te Godiba mubo da,” wabo.  
“Magi baso agai nage ma sabewe?  
Te Godigo nage wei homu eyu da,  
te magi baso agai nage tau sabewe?”  
Augwaligo te tobage po wabo dao.<sup>v</sup>
- <sup>9</sup> Tiali goli, God, nago naga ena  
te idago haligade selama, tama ena bugagia pedelali.  
Tama ena te ame tubadi, nago ena tonaluai.

- 10 Eno konealubo homu nageba muani,  
te idago ena ame nani sogode  
dađi elasa, megi e sogoba su nagasobao.  
Idago ena gesi noma ame nabode,  
tama nage eno God bidai.
- 11 Te seęę enaba megi pedalubao,  
tama tiyu, nago ena me tagaligio.  
Ena tau sabo bidi deli me menio.
- 12 Te boi bidi hauwago ena  
te bulmakau dabe pobeasa bilibo tiwai ebao.  
Augwali te Basan bulude omai bulmakau dabego  
bomo tiwai gilama ebo dao.
- 13 Te boi bidi dabe augwaligo te ena dolainu sisi elama,  
te laiongo dwai hwą wabo tiwai eyu,  
tama te uni hasa tuabo pedauwali nalubao.
- 14 Eno bomo tigidali silalio,  
augwa te tőba wę gelama,  
te soa sabo tiwai gilama yai.  
Te dili ununani tigidali te guda pai.  
Eno homu te mu nagamea pali,  
te posolo yai ili wę pedalubo tiwai yali.
- 15 Eno dogoni te wa mu pali,  
tama eno hamena te pedauwalide agana sai.  
Naga digi ena tagalama, ama ena mu isainu ebao.
- 16 Te dwai bidi dabego ena te tigidali habu badu  
te yowigo uni hasa pobeasa bilibo  
tiwai gilama ebao.  
Augwaligo eno saęade me nogode  
te augwaligo gaęgo kelebao.
- 17 Eno tigi dili tigidali te hania pedelali.  
Tama te bidi dabego ena sulama, tama ena dolali seęde  
te augwa wiegi yai homu pemene yai.
- 18 Augwaligo te eno ugwa dabe selama,  
augwa dobola sali,  
tama mena bidigo te eno ugwa dabe deli deli sabo bidi  
pedalumainogo eyu, augwaligo te satu gagali yai.”
- 19 Genuai Bidi, nage enade digibulu me bidamuo.  
Nage da, te ena sesemane sogo tau sabo bidi dao.  
Nage polo tama asiyu, ena tau sagasao.

---

” 22:18 Mat 27:35; Mak 15:24; Luk 23:34; Jon 19:24

- 20 Nago ena ma dobola sali da,  
teda augwaligo ena te moni hwągo me ela mugobeo.  
Nago ena tau sobaso da, teda te yowi tiwai bidi dabe  
augwaligo ena ela muainu ebaso,  
te usu me egobeo. Menio.  
Te ena bidibo ula elalu, bidaibao.
- 21 Augwaligo ena te laiongo uni hasa  
ela tubo tiwai gilama silainu ebaso.  
Nago ena te augwaligo nogode ma dobola sao.  
Eno magi sę me deli ebo te uni bulmakau dabe  
gesabidide me usugobeo.
- 22 Nago tama tiwai ebaso da, teda eno te ena hani  
bidi dabebolo nago yali sę po pusaibao.  
Augwali te lotu weyu, deliba sisinibo side,  
tama eno nago nogi te augwali tomode  
ugwaba saibao.<sup>x</sup>
- 23 Eno tama po waibao, “Dage te Godigo hani da,”  
po waiba, “aga nogi ugwaba sao.  
Dage Jekopgo hani, te Genuai Bidigo nogi ugwaba sao.  
Awe, dage te Israel dabego hani,  
dagego agaba lotu wabo po wao.
- 24 Agai te magi doado bage  
meni yai bidi dabe tudiba me mubeo.  
Agai te augwalide sęę me dene ebo  
te olo nai da homu me egobeo.  
Tama aga te augwalide digibulu me bidigobeo. Menio.  
Agai te augwaligo usu da weyu,  
gedu haluasa po wabo odobo dao.”  
Eno tama po waibao.
- 25 Te lotu wainu sisinibo genuai  
pesagede te eno nago nogi deli naga ugwaba saibao,  
te nago ebo sę tigidalide te tama tiaibao.  
Te polobadu eno yaibao po daų wali ofa,  
te eno te nagede wi ebo  
we bidi gedude yaibao wali.
- 26 Te magi nai doado bage  
meni yai bidi augwali eno i obaso,  
augwali aselama, te nai tulama,

---

<sup>x</sup> 22:22 Hib 2:12



haliga mu paęana paibao.  
 Tama te Godiba pabo bidi dabego,  
 teda augwaligo aga nogi ugwaba saibao.  
 Eno homugo Godigo augwali sesemane sogo  
 bugagia wiegi yai ilama, bidimainu yao.

- 27 Te tęde tigidali we bidigo augwaligo  
 te Godiba homu koneama,  
 tama augwa agaba ma asaibao.  
 Te tigidali hani we bidi dabe  
 augwaligo kidu sugunama, agaba lotu waibao.
- 28 Magi baso meni, Genuai Bidi te king bidiyu,  
 tama agai te tigidali hani we bidi tonalubo dao.
- 29 Te dwai kolesaga eyu, hagoma ebo bidi dabego  
 kidu sugunama, tama agaba lotu waibao.  
 Te bidabo ula elalubo usu isięyu,  
 te isabo aę ebo bidi dabego,  
 te tigidaligo kidu sugunama, te Godiba lotu waibao.
- 30 Te nosali pedalubo we bidi hani,  
 augwaligo te agai se yaibao.  
 Te bidi dabego te nosali pedalubo haniba  
 te Godide po hania pusaibao.
- 31 Te hani augwali ame nisiębadi,  
 tiali goli augwali pedalubo si da,  
 teda augwaligo te tama po augwaliba waibao,  
 “God aga digi te aga we bidi dabe ma sai dao,”  
 te po waibao.

## Salmo 23

*Te Devitgo asęani balia po me deli dao.*

**Genuai Bidi agai da tonalubo bidi dao**

- 1 Genuai Bidi te ena tonalubo bidi da, tama  
 ena te aga sipsip me deli tiwai dao.  
 Tama tiyu, te magi nai me deli ena me sę pogobeo.
- 2 Agai ena te wiegi yai tuabo nosaide  
 pila mumainu ebo dao.  
 Tama agai ena te dwasianu we ulu  
 pedalubo madi odasa pelama, tama ena te we tuyu,

te ena toma nabo dao.<sup>y</sup>

<sup>3</sup> Agai enabolo gesi bomo mabo dao.

Tama agai ena te doloba pai sunumidu  
odasa pabo dao, te agai tama tiaiba po  
polobadu wali gilama ebo dao.

<sup>4</sup> God, ena te dwai bulu

te be hulua sai madi bilibaso da,  
te tagalao, ena te dwai naide wi me egobeo.  
Magi baso meni, nage ena dali bidibao.  
Eno suali, nago te sipsip tonalubo  
bidigo dono tolasa bilibo suali,  
tama tibaso, eno homu nagame elama,  
bidibo dao. Ena me dologobeo.

<sup>5</sup> Nago te eno wiegi yai nai te hania

te tebol saide sisi ilama,  
tama eno boi bidi dabego suali goli,  
te augwaligo magi se me yabo usugobeo.  
Nago ena selama, te nage dali duayagasobo,  
tama ena nago bugagia gesebo dao.

<sup>6</sup> Genuai Bidi, eno mu koneani,

te nago ena bugagia tonalu,  
tama nago enade homu dene eyu, tau sabo kolesaga,  
te kolesaga si te ena dali sesemane sogo bidaibao.  
Tama, Genuai Bidi, ena nago bede  
sesemane sogo bidada peyu, bidada paibao.

## Salmo 24

*Te Devitgo aşani balia po me deli dao.*

**God da, te genuai tuni bidi king dao**

<sup>1</sup> Te tę dali, tigidali tęde elalubo nai,

te tigidali Godigo nai naga dao.  
Tigidali bulu me, te Godigo nigali nai dao.  
Tama tigidali bulude bidibo we bidi me,  
augwali me te Godigo hani we bidi naga dao.<sup>z</sup>

<sup>2</sup> Magi baso meni, agai tę ugwadu nigali,

tama aę aiyadu mu elalubo dao.

Tama agai tų page tamu ąi tomode nigai.

3 Niwai bidi te Genuai Bidi Godigo

bulu duba holobo usugowe?

Niwai bidi agai dwagi yai be tomoba pogowe?

4 Dwai sę isąwai bidi,

tama agai homu meda meni yai dwagi yai.

Tibo god dalibolo lotu po wasiąwai bidi,

tama bidigo gasa bidi tibo dąų wabo po me

ola masiąwai bidi.<sup>a</sup>

Tiwai bidi aga te usu yaibao.

5 Te bidi dali te Genuai Bidigo dwagi yai sę yaibao.

Awe, Godigo aga ma selama, tama te bidi dwagi yai bidi

dao waibao.

6 Tiwai bidigo God subo dao.

Aga te Jekopgo God pąba pabo dao.

7 Dage te tempel bede elalubo tų, dage dayao.

Dage te augwaligo polobadu mu

nigali tų, dage genuai gisiga dayao.

Tama polalubo genuai tuni bidi king tomoba somainao.

8 Genuai polalubo bidi, aga de dawę?

Aga te Genuai Bidi God deli dao.

Agai genuai bomo elalubao,

aga te boma pai king mu dao,

tama bidigo aga dali hwįbo usu ebo menio.

9 Dage tų, dage dayao.

Dage polobadu tų dao,

dagego genuai tų gisiga dayao.

Tama genuai polalubo tuni bidi king

be tomoba somainao.

10 Genuai polalubo tuni bidi king aga de dawę?

Aga te Genuai Bidi God dao, agai te genuai ami bidi

hani tonalubo dao.

Aga deli digi mu te polalubo tuni bidi king mu dao.

---

<sup>a</sup> 24:4 Mat 5:8

## Salmo 25

*Te Devitgo așani balia po me deli dao.*

**Te bidigo Godiba gedu haluasa po weyu, te aga  
bilibo dodolama, te tonalua po wai**

- 1 Genuai Bidi, megi eno  
gedu haluasa po nageba obao,  
te eno ofa me deli tiwai mobao.
- 2 Nage eno God da, tama eno konealubo homu  
nageba naga daų wabo da.  
Nago ena tau sao.  
Tiyu, eno konealubo po odolali elama,  
tama ena hale idalio.  
Nago te boi bidi dabego  
ena aiyaba elalumainu elama,  
tama augwaligo ena kęņę po omainu me igio.
- 3 Awe, nageba te konealubo homu aų wabo bidi dabe,  
te augwaligo konealubo odolali  
daų omainu elama, tama me  
tagaliyu me egobeo. Menio.  
Te nageba hagoma polo ebo bidi dabe,  
augwali naga te dwai dene somainu elama,  
tama augwa yali kolesagade hale yaibao.
- 4 God, nago te naga kolesaga enaba ola menama,  
tama nago sunumi enaba ola mao.
- 5 Te nago po mu eno wali pomainu ola mao,  
magi baso meni, nage te eno God dao,  
tama nago ena ma sabo dao.  
Te tigidali sogo nago ena tau somainu tonalubo dao.
- 6 Genuai Bidi, nago te naga olo mu  
tau sabo wiegi yai kolesaga,  
me homu dene ebo kolesaga te homu kone palao.  
Nago te kolesaga da dali ebo  
te polobadu digi yali te ela asudubadi,  
megi sogoba usu nagasobao.
- 7 Genuai Bidi, nago eno dwai sęęę sali,  
me dwai sę yali kolesagade homu kone me palamuo,  
te ena gesi bidide te sę yali.  
Nage te da godolo ebo Genuai Bidi God dao,

- tama nage te sesemane wiegi yai elalubo da.  
 Nago enade homu koneama, tama nago ena te olo mu  
 tau sabo wiegi yai kolesaga yao.
- 8 Genuai Bidi te wiegi yai elama,  
 tama agai te po tų sesemane dolo naga ebo dao.  
 Tama tiyu, agai te dwai seęę sabo bidi  
 dabeba te agai wei eyu, godolo homu yabo kolesaga  
 wali pomainu ola mabo dao.
- 9 Te aga dologode bidibo bidi dabe  
 te bilibo dodolaibao,  
 tama augwa te doloba pai kolesaga  
 wali pomainu ebo dao.  
 Agai te aga sunumi me te augwaliba ola mabo dao.
- 10 Godigo te agai da dali dąų wali po,  
 me bomai po te wali pabo we bidi  
 tigidaliba te agai homu kęą peyu,  
 godolo mu ebo dao.  
 Tama agai homu me hasegeliyu me egobeo.
- 11 God, nago te naga dąų wali po wali peyu,  
 tama eno yali dwai seę hauwa sela sayao.  
 Nago eno yali dwai seę tigidali sela sąbaso,  
 tama eno nago nogi ugwaba saibao.
- 12 Te Genuai Bidigo po wali mu pabo we bidi,  
 te Godigo augwaliba wiegi yai sunumi ola mayu,  
 tama augwali te sunumidu pomainu tebo dao.
- 13 Te tobage bidi dabe augwali da  
 te wiegi yai mu bidaibao,  
 tama augwa wai dabe me te tųde  
 bugagia bididuaibao.
- 14 Genuai Bidi God aga  
 te aga dologode bidibo we bidi dabe  
 augwaligo abagi mu dao,  
 tama augwali dali te dąų wali bomai po kontrak  
 te augwaliba ma ola mabo dao.
- 15 Tigidali sogo te Genuai Bidigo ena  
 tau somainu tonalubo da.  
 Magi baso meni, te ena dolainu yali  
 nai dabede te agai ena ma sabo dao.
- 16 Genuai Bidi, eno homugo nage ena ma aselama,  
 tama nago te olo tau sabo wiegi yai

- kolesaga enaba yao,  
 magi baso meni, enaduba deli tama eno bomo silalio.
- 17 Nago eno haliga seęę elalubo tigidali sela sayao,  
 tama eno haliga te nagame yai dua bidimainu yao.  
 Nago ena tau selama,  
 tama te seęę dabego ena elalumainu me egobeo.
- 18 Nago enade te haliga seęę,  
 me haliga dene ebo tigidalide  
 nago homu kone palama,  
 tama nago eno seęę tigidali sela sayao.
- 19 Nago te eno boi bidi dabe subao,  
 augwali te hauwa mu tama.  
 Augwaligo ena dali seęę mu genuai ebao.
- 20 Nago ena ma selama,  
 tama ena bugagia seselaluo,  
 tama te boi bidi dabego ena me dologobeo.  
 Nago ena tonalumainu eyu, te ena nageba asobao.
- 21 Eno konealubo homu nageba elalubao,  
 tama tiyu, nago eno te tigidali wiegi yai  
 doloba pai kolesaga emainu eyu,  
 tego te sesemane sogo ena tonalumainu ilao.
- 22 God, nago te naga we bidi tigidali ma dobola sao.  
 Tama te tigidali haniani seęęgo  
 augwali aiyaba elalumainu me elamu dao.

## Salmo 26

*Te Devitgo asęani balia po me deli dao.*

### **Te doloba pai bidigo gedu haluasa po wali**

- 1 Genuai Bidi, nago ena doloba pai bidi nogi  
 yao.  
 Magi baso meni, eno te doloba pai kolesaga yali,  
 tama eno konealubo homu nageba tigidali muani.
- 2 God, nago eno kolesaga tigidali usu sao.  
 Tama nago eno haliga, me homu, te dagalao.
- 3 Magi baso meni, nago te olo tau sabo wiegi yai  
 kolesaga enaba eyu,  
 tama ena sesemane sogo dodolobo dao,  
 tama nage te ena soabo madi  
 sesemane poligi solama,  
 tama nago ena me tagalubo menio.

- 4 Ena te dwai sę ebo bidi dabe dali me bilisiąwai.  
Ena te tibo po wabo bidi dabe dali me bilibeo.
- 5 Ena te dwai sę ebo bidi dabe dali  
bilabo te hagela homu mu ebo da.  
Eno augwali ela soabo dao.
- 6 Genuai Bidi, eno nogo wę telayu,  
te eno dwai sę me yali menibasoo,  
te nageba ola mayu tiali.  
Tama eno nago alta bagulubo sę eyu,  
tama eno nageba lotu po wabo dao.
- 7 Eno tama tiyu, tama eno nageba usu da wabo  
tęabi po me deli obao,  
tama eno te we bidiba te nago yali  
wiegi yai sę po pusubao.
- 8 Genuai Bidi, eno nago be te wei elama,  
godolo mu ebao,  
te nago genuai nogi dali,  
bomo dali si elalubo bulude.
- 9 Nago ena te dwai sę ebo bage dali me dologio.  
Nago ena te gasa bidi ela mubo  
bidi dabe dali me ela mugio.
- 10 Te bidi dabe augwaligo te  
dwai kolesaga sesemane sogo ebo dao,  
tama augwaligo te bidi meba  
te monego homu bega selama,  
te gasa bidiba dwai sę emainu tebo dao.
- 11 Tiali goli, ena digi eno da,  
te doloba pai kolesaga ebo dao.  
Nago te olo tau sabo wiegi yai kolesaga  
enaba elama, tama ena ma sao.
- 12 Ena bomonama dolalubao.  
Te magi nai me deligo ena dolomainu me egobeo.  
Te eno Genuai Bidi nago nogi  
te we bidi sisinama lotu wabo tomode  
te eno nago nogi ugwaba saibao.

## Salmo 27

*Te Devitgo așani balia po me deli dao.*

**Te Godigo nogi ugwaba sabo gedu haluasa po dao**

- 1 Genuai Bidi God aga te eno ula page da,  
tama agai ena tau sabo da.  
Tama tiyu, te bidi me delide ena midigi me egobeo.  
Genuai Bidigo naga ena seselalubao,  
te moni bomai obo tiwai te palialubao.  
Tama tiyu, te magi nai me delide ena wi me egobeo.
  
- 2 Te dwai șe ebo bidi dabe ena pąba aselama,  
tama dolainu usu sobaso da,  
te bidi dabe augwa digi șaęą tų dedageba tuloliyu,  
habala paliyu, augwa digi augwa ma dolaibao.
  
- 3 Awe, te ami hani me deligo ena  
bagua sagasobaso da, teda ena wi me egobeo.  
Te boi bidi dabego enaba hwięagasobaso da, tagalao.  
Eno konealubo homu Godiba munama,  
tama ena ibaba me kila sogobeo.
  
- 4 Eno te nai me delide naga te Godiba hanalu wali,  
tama eno homugo agai  
te tama șe emainu homu yali.  
Eno agaba te tama po hanalu wali,  
te ena bidibo ula elalubo sogo  
ena te agai bede tigidali sogo bidainogo yai.  
Te agai enaba wiegi yai homu bugagia ebaso,  
te eno wiegi yai homu pemene agaba yaibao.  
Tama eno agaba hanalu,  
te enaba wiegi yai sunumi  
ola momainu homu ebo dao.
  
- 5 Te dwai șe enaba pedalubo sogo,  
teda agai ena te agai beba geme dualaibao.  
Te aga wiegi yai beba te sunumi paliama,  
tama ena geme bugagia mu dualaibao.  
Te agai ena te genuai masigi mu  
me deli te daiba dualama,  
tama ena bugagia bidaibao.
  
- 6 Tama tiyu, te ena bobegelalubo  
boi bidi dabe augwali eno aiyaba elaluaibao.



Te eno wiegi yai homu pemene umabo mu elama,  
tama i weyu, te Godigo tedali wiegi yai bede  
ofa yaibao.

Te eno aga nogi ugwaba sabo balia po waibao.

7 Genuai Bidi, te eno nageba i wabo sogo,  
nago enaba te olo mu tau sabo  
wiegi yai kolesaga yao.

Tama nago eno gedu haluasa wabo po odao.

8 Eno homude eno te koneanio,  
nago enabolo te tama po wali,  
“Nage enaba asao,” wai.

Tialima, Genuai Bidi, te ena paibao.

9 Naga digi nage te enade geme duala selamuo.

God, te nago ena tau sabo da.

Nago enade sębę elama, tama ena sela sęgio,  
ena naga sę bidi da.

Nago ena hauwa sogo tau sali.

Nago ena me tagaligio.

Nage enade wi me pigio.

10 Aya me ida sigo te ena tudiba mubaso da,  
tagalao, te Genuai Bidigo ena tonaluaibao.

11 Genuai Bidi, te nago enabolo  
te nago homugo emainu ebo sę ola mao.  
Nago ena te wiegi yai sunumiba odasa pao.  
Magi baso meni, eno boi bidi te hauwa elalubao.

12 Te boi bidi dabego ena somainu,  
te nago ena me tagaligio.  
Augwaligo te po tų ebode tibo po weyu,  
tama ena wi ilainu eyu,  
augwaligo ena elaibao po wabo dao.

13 Mu tama, nosali ena me bididubadi,  
eno te Godigo wiegi yai sę te aga  
we bidi dabeba ebo te eno sueibao.

14 Te nago konealubo homu daų olama,  
tama te Genuai Bidigo nage tau sagasobo tonaluo.  
Bomo elama dolaluo, nago haliga sęę me igio.  
Awe, nago konealubo homu daų olama,  
tama te Genuai Bidigo nage tau sabo tonaluo.

## Salmo 28

*Te Devitgo aęani balia po me deli dao.*

Te bidigo gedu haluasa po weyu, te Godigo aga tau somainu yai

- 1 Genuai Bidi, nage da  
 te ena seselalubo bidi dao,  
 tama eno nageba i obao.  
 Eno gela wabo odao.  
 Te nago eno gedu haluasa po wabo  
 wei ponisiąyu da,  
 teda ena te isai we bidi dabe tiwai elama,  
 tama te isali bidi dabego pesageba paibao.
- 2 Te eno nageba i weyu,  
 nago ena tau sao wabo sogo,  
 te nago eno gela wabo odao.  
 Eno gedu haluasa po weyu,  
 tama eno nogo ugwaba siyu,  
 te nago wiegi yai be elalubo  
 madiba nogo dų yaibao.
- 3 Nago ena te dwai sę ebo bidi dabe  
 dali aiyaba me elalugio,  
 tama te dwai kolesaga ebo bidi dabe dali me,  
 te tama me tigio.  
 Augwali da te wiegi yai pusu yai pogo  
 homu bega sabo po wabo bidi dabe dao,  
 tiali goli augwali homude  
 te dwai sę ebo kolesaga paęanalubao.
- 4 Te augwa yali kolesagade usu nama,  
 te augwali dene mao.  
 Te dwai dene augwaliba wei ponao.  
 Te augwa yali sęęę tigidali usu nao.<sup>b</sup>
- 5 Augwaligo te Genuai Bidigo genuai sę  
 te homu konesiąyu,  
 tama agai ebo sę dabede homu konebeo.  
 Tama augwaligo tama tialigo da,  
 teda agai augwaliba te dene mayu,  
 tama augwali tigidali silimainu yaibao.
- 6 Eno te Genuai Bidigo nogi ugwaba sobao.

---

<sup>b</sup> 28:4 Ped 22:12

- Agai ena dali homu dene eyu, tama ena tau somainu,  
 eno agaba gela wali,  
 tama agai eno gela wabo odalio.
- 7 Godigo naga ena seselaluyu,  
 tama ena bobegela sai elalubo dao.  
 Tama tiyu, eno konealubo homu agaba muani da.  
 Genuai Bidigo ena tau sobaso,  
 tama eno wiegi yai homu pemene agaba ebao,  
 tama eno aga nogi ugwaba sabo balia po dabe obao.
- 8 God Genuai Bidigo te aga we bidi dabe seselalubo dao.  
 Aga te tudibadu daganalu,  
 tama aga sa muani king tau sabo dao.
- 9 Genuai Bidi God, naga we bidi dabe tau siyu,  
 tama naga te sa muani we bidi hani dabe  
 bugagia wiegi yai ilao.  
 Nage te augwali tonalubo bidi bidiyu,  
 tama augwali te bidada peyu,  
 bidada pabo sesemane sogo bugagia tonalua.

## Salmo 29

*Te Devitgo aseḗni balia po me deli dao.*

**Dago Godigo dogoni te genuai tulubage tulubode,  
 ma wali asobode, te dago odaibao**

- 1 Dage te boma pai ensel mobo bidi dabe,  
 dagego te Genuai Bidigo nogi ugwaba sao.  
 Te agai genuai nogide me bomode  
 te wiegi yai homu pemene yao.
- 2 Te Genuai Bidigo genuai nogi ugwaba sao.  
 Agai magi se isama, wiegi yai mu  
 bidiyu, tama dagego agaba lotu waiḗo.<sup>c</sup>
- 3 Genuai Bidigo po obadi,  
 tama augwaligo te tamu aḗ pedai  
 tigidali badu odobo dao.  
 God aga te genuai nogi me bomo elalu,  
 tama agai i bomonama wabo  
 te be kulukulu wabo tiwai ebo dao.

- Te agai po te genuai tamu ąi  
 tigidali badu pedaide te po wabo dao.
- 4 Te Genuai Bidigo i wabo bomo te genuai elalubao.  
 Tigidali bidigo Godigo i wabo odolama,  
 tama augwali agade wi ebo dao.
- 5 Te Genuai Bidigo i wabogo  
 te genuai ni sida dabe pedaibao,  
 tama agai te Lebanon bulu du dabede  
 ni sida dabe me peda sabo dao.
- 6 Agai te Lebanon bulu du dabe  
 te bulmakau wai te sasamano pabo tiwai ilibo dao,  
 tama te Hermon bulu du te ogwa bidi  
 bulmakau omai sasamano pabo tiwai yaibao.
- 7 Te Genuai Bidigo i wabogo te be sele elibo dao.
- 8 Te agai dogonigo te wa pai bulu te geḡ ilaibao.  
 Agai te Kedes hanu wa pai bulu te geḡ ilibo dao.
- 9 Te Genuai Bidigo i wabogo  
 te uni hasa dabego wai saḡanobo tiwai yaibao,  
 tama te tigidali ni yabe dabe sela saḡo dao.  
 Tama te Genuai Bidigo wiegi yai bede  
 tigidaligo te tiwai i weyu,  
 “Godigo genuai nogi elalubao,” te po wabo dao.
- 10 Genuai Bidi te king bidiyu,  
 tama te tigidali genuai tamu ąi tonalubao.  
 Aga te king sesemane sogo bidibao.
- 11 Genuai Bidigo bomo  
 te aga we bidi dabeba mabo dao.  
 Agai augwaliba te wiegi yai seḡ yabo  
 homu kolesaga menama,  
 tama augwali homu nagame elama, bidibao.

## Salmo 30

*Te Devitgo asḡani balia po me deli dao.*

**Bidi me deligo te Godiba usu da po olama, gedu haluasa po wai**

- 1 Genuai Bidi, nago ena ma selama,  
 tama nago ena te boi bidi dabego aiyaba  
 elaluama, te keḡe omainu me ebeo.  
 Tama tibaso, eno nago nogi te ugwaba mu sobao.

- 2 Genuai Bidi, nage eno God da,  
tama eno gedu haluasa po nageba olama,  
tama nago ena usu ma ilai dao.
- 3 Genuai Bidi, ena isibo bidi tiwai yai digi,  
tama nago ena ma hodolali.  
Ena te isai bidi dabego pesageba dulali.  
Tiali goli, nago enaba te bidibo ula ma mawai dao.
- 4 Dage te Genuai Bidi dali homu keę pai we bidi,  
dagego te aga nogi ugwaba sabo tęąbi po wao.  
Aga da, te dwai sę isąbo  
tedali gasagi yai God mu dao.  
Tama agade me, te agai yali sę tigidali homu koneama,  
tama agaba usu da po weyu, gedu haluasa po wao.
- 5 Magi baso meni, agai wado po  
te pęwadage sogo naga waibao.  
Tama agai homu wiegi yai daba elama,  
tama da bugagia wiegi yai ilaibao.  
Te tigidali sogo da tęde bidibo sogo te tama tibo dao.  
Te hulide eno gedu aę dulali, tiali goli te kigamu da,  
eno te wiegi yai homu pemene ma yaibao.
- 6 Polobadu te ena bugagia mu bidibaso,  
tama eno te tiwai po wali,  
“Te magi nai me deligo ena dwasianu degelainu ebaso,  
usu me egobeo,” wali.
- 7 Genuai Bidi, nago enaba wiegi yai sę mu eyu,  
tama ena te bomonama dolalumainu eyu,  
te bulu dude dolalubo bomai be tiwai gilama ilali.  
Tiali goli, nage geme duala sali sogo,  
te sogo ena wi elama, aiyaba mu dulai dao.
- 8 Tama Genuai Bidi, eno nageba i wali.  
Te nago ena tau somainu,  
te eno nageba bomonama usu da po weyu,  
gedu haluasa po wai dao.
- 9 Tama eno te po wai,  
“Te ena te isai madiba pobaso da,  
teda te mena wiegi yai nai pedelaibawe?  
Te ena gų pageba pobaso da,  
teda tebogo de tau sogowe?  
Te isali bidi dabego nago nogi ugwaba somainu  
te homu eba, agawe?  
Te augwaligo nageba pusuyu, te nago sesemane sogo

- augwali wiegi yai bugagia ilibo da  
 homu ebo po waiba, agawe? Menio.
- 10 Genuai Bidi God, nago eno  
 wabo po odao, tama te olo tau sabo  
 wiegi yai kolesaga enaba yao.  
 Genuai Bidi nago ena tau sao.
- 11 Nago eno homu seęę elaluali te sela sąnama,  
 tama nago ena te wiegi yai homu  
 pemene tęąbi po omainu yali.  
 Hasia ena te bidi isaide gela wabo bidi tiwai yali.  
 Tiali goli, nago eno gela wabo hasegelama,  
 tama eno homu pemene wiegi yai mu ilali.
- 12 Tama tialima, eno pedauwali me pania sogobeo.  
 Te eno nago nogi ugwaba sabo tęąbi po waibao.  
 Genuai Bidi, nage eno God da,  
 te eno sesemane sogo nageba usu da weyu,  
 gedu haluasa po waibao.

### Salmo 31

*Devitgo te balia aseąani. Augwaligo te balia po augwa te moni  
 lotu be tempel te Godiba mani sogo wai tiwai po dao.*

**Bidigo konealubo homu daę olama, te Godigo aga tau somainu yai**

- 1 Genuai Bidi, ena nageba asobaso, te nago  
 ena tonalua.  
 Nago ena tau sao, nago te boi bidi dabego  
 ena aiyaba elalumainu me igio.  
 Nage te doloba pai mu da, nago ena ma selama,  
 te ena me dolobeo.
- 2 Nago eno i wabo odolama, tama ena polo ma sao.  
 Tama tiyu, nage te ena duala sabo madi  
 te genuai masigi bulu du tiwai elalubao.  
 Tama nago ena bugagia bobegelalu,  
 te ena bugagia bidiyu, tama te boi bidi dabego  
 ena aiyaba me elalugobeo.
- 3 Mu tama, nage te ena geme  
 duala sabo pesage tiwai elama,  
 tama nago ena tonalubo dao.  
 Tama tibaso, nage ena asobodu poligi pelama,

- tama ena te wiegi yai sunumiba odasa pao,  
te nago polobadu te sę yaibao po wali gilama tiao.
- 4 Te boi bidi dabego ena tola somainu  
yabo bono gęą muani.  
Nago ena bugagia tonalubaso da,  
teda ena tede me dologobeo.  
Magi baso meni, nage naga te ena geme duala sabo  
pesage dao.
- 5 Ena te eno mobo nage nogoba mobao.  
Genuai Bidi, nage te mu kolesaga  
naga mu ebo God, nago ena ma sao.<sup>d</sup>
- 6 Nago te tibo god dabede lotu wabo bidi dabe  
te wei mu me isiąwai.  
Tiali goli, eno konealubo homu nageba daų wali.
- 7 Nago ena sesemane sogo  
homu dene yai, tama tiyu eno nageba  
wiegi yai homu pemene ebao.  
Nago eno te seęę suali, tama nago enaba  
te pedalubo dwai ebo kolesaga te koneanio.
- 8 Nago ena te boi bidi dabego  
kalabus emainu me ebeo.  
Nago ena bugagia tau siyu, tama ena  
te dwagi yai madigi bugagia bidibao.
- 9 Genuai Bidi, nago te olo tau sabo  
wiegi yai kolesaga enabolo yao.  
Ena te genuai sęę elalubao.  
Ena gela hauwa weyu, tama eno gedu bo dalio.  
Eno dili dabe te bomu kimi meni yani.
- 10 Te ena haliga seęęgo digi  
ena bidabo ula pęwadage ilali.  
Ena gela mu udu gebaso,  
tama tiyu, te ena sesabi elama me bidigobeo.  
Eno genuai sęę mu elalubao,  
tama tiyu, eno bomu silalio,  
tama eno dili tigidali dolobo sę ebao.

- 11 Te boi bidi dabego dwai posobo po enaba wali.  
Tama tibaso, te abagi dabego me enaba po dwai weyu,

---

<sup>d</sup> 31:5 Luk 23:46

- tama eno abagi dabego enade dwai wi mu yali.  
 Ena te sunumidu pobadi,  
   te bidi dabego ena sulama,  
   augwali wi peyu ebo dao.
- 12 Tigidali bidigo ena homu kone ebo tagalali,  
   augwaligo te isai bidi homu  
   kone isiąbo tiwai gilama yalio.  
 Ena te tųgo nigali sospen sene  
   alua pobaso sąbo tiwai gilama yai.
- 13 Eno odali, te boi bidi dabe hauwago  
   ena posobo po odali.  
 Augwaligo ena moni wi ilali.  
 Tama augwa deliba sisinama,  
   tama enaba dwai sę yabo po mia sai.  
 Augwaligo ena ela muabo po wai.
- 14 Tiali goli, tagalao.  
 Genuai Bidi, eno konealubo homu  
   nageba dąų wabo da.  
 Eno te tama wali, nage eno God da po wai.
- 15 Ena nago nogode sesemane sogo bidibao.  
 Nago enade te boi bidi ebo bidi me,  
   te ena pobeasa bilibo bidi dabego  
   nogode ma dobola sao.  
 Tiyu, augwaligo ena dolidalio.
- 16 Ena nago sę bidi da,  
   nago olo tau sabo wiegi yai  
   kolesagago ena tau sao.  
 Nago ena godolo mu ebo kolesaga te siligobeo,  
   tama tiyu, nago ena ma sao.
- 17 Genuai Bidi, eno nageba i wabo,  
   te nago ena tau somainu obao.  
 Nago ena te boi bidi dabego  
   aiyaba elalumainu me igio.  
 Tiali goli, te boi bidi dabe da, dolomainu yao.  
 Augwali isimainu elama, tama augwa pedauwali  
   te isibo bidi dabego pesagede pania sai  
   elalumainu yao.
- 18 Te bidi dabe augwaligo te hagoma eyu,  
   te posobo po weyu ebo da,  
   tama doloba pai bidi dabeba  
   po dwai weyu ebo dao.



Augwaligo tibo po naga wabo da.  
 Nago augwali dolama, tama augwa pedauwali  
 te mu pania somainu yao.

- 19 Nago te nage dologode bidibo  
 we bidi olo tau sabo  
 wiegi yai kolesaga hauwa tolalubo dao.  
 Nago te nageba konealubo homu ęaę wabo  
 we bidi bugagia tonalubo dao.  
 Nago te augwali tau sabo  
 te tigidali we bidi gedude umabo mu ebo dao.
- 20 Nago te konealubo homu ęaę wabo bidi dabe  
 te nage ęaba geme dualubo dao,  
 tama te augwali elainu te po mia sali bidi dabe,  
 augwali usu me egobeo.  
 Nago te nageba homu ęęaę pabo bidi dabe  
 geme bugagia dualama,  
 tama te boi bidi dabego tibo po kisilibo po wabogo  
 te augwali aiyaba me elalugobeo.
- 21 Genuai Bidigo nogi ugwaba sao.  
 Agai enaba dwagi yai sę umabo mu elama,  
 tama agai ena tau sabo wiegi yai sę yali,  
 te boi bidi dabego ena pobeasa biliyu,  
 dolainu yali sogo te ena tau sai.
- 22 Genuai Bidi, polobadu ena wi mu elama,  
 tama eno homugo te nago ena sela sęyu,  
 tama ena nage ęade ma bidigobe homu yalio.  
 Tiali goli, nago eno gela wabo odoyu,  
 tama nago ena tau sali, te eno nageba i olama,  
 enade homu dene eyu, tau sao po wali sogo  
 te tama tiai dao.
- 23 Te Godigo we bidi dabe,  
 dagego aga wei eyu, godolo mu yao.  
 Agai te aga wali asobo we bidi dabe  
 bugagia tonalubo da.  
 Tiali goli, agai te hagoma ebo  
 we bidi dabeba te dwai dene dolo wei ponobo dao.
- 24 Dage te Genuai Bidiba konealubo  
 homu ęaę wali we bidi tigidali,  
 dage bomo elama dolalu,

tama duga haliga sesemane bomo sao.

## Salmo 32

*Te Devitgo aęani balia po me deli dao.*

**Bidigo seęę te Godiba pusama, tama Godigo agai seęę sela sayu yai**

- 1 Te Godigo bidi me deligo  
     dwai seę yali seęę tagaliyu,  
     tama agai seęę sela saęo si da,  
     teda te bidi aga wiegi yai homu  
     pemene eyu, bugagia bidibao.
- 2 Te Genuai Bidigo te po weyu,  
     te bidigo seęę megi me elalubeo po weyu,  
     tama te bidigo te tibo po wabo kolesaga  
     wali me pabe da po obaso da,  
     teda aga wiegi yai homu pemene eyu,  
     bugagia bidibao.<sup>e</sup>
- 3 Te eno ena dwai seę yali po  
     te Godibolo pususiąbadi digi,  
     eno te giligade me hulide dwai gela wali.  
     Tama eno tigi bomo kimi mu meni yai.
- 4 Te giligade me hulide nago nogogo enaba dene mani.  
     Eno bomo tigidali te hagawali,  
     te genuai giliga tęba naniyu,  
     te tę wa pabo tiwai yai.
- 5 Nosali eno seęę te eno nageba pusali.  
     Eno ena yali dwai kolesaga geme me dualubeo.  
     Eno te homu yali, eno te bomai po bolali  
     kolesagade sali seęę tigidali  
     eno te Genuai Bidiba pusabo homu yali.  
     Eno hania pusula silibaso,  
     tama nago eno yali dwai seę me, eno seęę me,  
     sela saęwai dao.  
     Tama tiyu, nago ena tede nosali  
     elegobeo wali.<sup>f</sup>
- 6 Tama tibaso, nage wali asobo tigidali we bidi,  
     te augwaliba seęę pedalubo sogo,

---

<sup>e</sup> 32:2 Rom 4:7-8

te augwaligo gedu haluasa po nageba omainao.  
 Tama te seęę genuai mu pedaliyu,  
 tama te aı genuai asiyu,  
 tama te bidi sainu ebo tiwai gilama ebaso da,  
 teda te seęęgo augwali aiyaba me elalugobeo.

7 Nagede naga ena duala sabo pesage elalubao.  
 Nago ena tonalubaso,  
 tama te seęęgo ena aiyaba me elalugobeo.  
 Awe, nago ena te seęęde siyu yali,  
 tama tede te eno balia po genuai mu wabo dao.

8 Genuai Bidigo te tama po wai,  
 “Eno nage bugagia ola mayu, tama nage bilabo madi  
 te sunumi nageba ola mawaibao.

Te nago konemainu te nage eno ola mawaibao.

9 Nage te hos me donki tiwai pedelamuo.  
 Te augwali sigo kolesaga me elalubeo.  
 Nago te ain elalubo bobobage baklain  
 te augwali sigo pedauwaliba munama,  
 tama augwali si pabo ola mabo  
 te baklaingo kegeyu, ola mabo dao.  
 Te menibaso da, teda augwali sigo  
 te nago homu wali me pogobeo.”

10 Te seęę me dene hauwa  
 te dwai seę ebo bidi dabeba pedalaibao.

Tiali goli, Genuai Bidigo te  
 agaba homu keę pabo we bidiba  
 te olo tau sabo wiegi yai kolesaga elama,  
 tama augwali bugagia tonaluaibao.

11 Dage te doloba pai we bidi,  
 dage te bugai haliga elama,  
 tama te Genuai Bidigo wiegi yai seę tigidali yalide  
 te wiegi yai homu pemene yao.

Dage tigidali we bidi,  
 dage te God gedude doloba pai mu yali, dage  
 te wiegi yai homu pemene elama,  
 tama hae weyu, nogo eleyu yao.

## Salmo 33

### Te Godigo nogi ugwaba sabo balia po dao

- 1 Te doloba pai we bidi dabe,  
     dagego te Genuai Bidigo tigidali  
     sę yalide te wiegi yai homu pemene yao.  
   Dage te Godigo po wali pabo we bidi,  
     dagego te Godigo nogi ugwaba سیاو,  
     te dolo naga dao.
- 2 Te musik po kulelego weyu,  
     te Godigo nogi ugwaba sao.  
   Te nogo si string elalubo gita eliyu, te musik agaba wao.
- 3 Te gesi tęąbi po wao.  
   Te gita bugagia eliyu, tama wiegi yai musik mu weyu,  
     tama bomonama i dali wao.
- 4 Magi baso meni, te Genuai Bidigo  
     po da te mu po tama dao.  
   Agai te doloba pai kolesaga wali peyu,  
     te tigidali sę ebo dao.
- 5 Genuai Bidigo te wiegi yai kolesaga tigidali me,  
     tama te doloba pai kolesaga tigidali  
     te wei homu ebo dao.  
   Sesemane sogo Genuai Bidigo  
     te tęde we bidi tigidali wei eyu, godolo ebo dao.
- 6 Genuai Bidi Godigo te po naga obadi,  
     tama te giliga, me polua, me hę dabe  
     te dagalude pedelai.  
   Awe, agai po naga obaso, tama tigidali nai te ogwade  
     pedelai dao.
- 7 Agai te tamu ąi selama, te deliba naga sisinani,  
     te bidigo te deli sene suspende naga  
     te wę tabibo tiwai gilama yali.  
   Agai te tamu ąi page te aga pesagede  
     aiyadu mu elalumainu yai.
- 8 Te tigidali tęde bage te Genuai Bidide wi elama,  
     tama aga dologode bidimainu yao.
- 9 Magi baso meni, agai po naga obaso,  
     tama te tę pedelali.  
   Agai bomai po waligo, tama tigidali nai elalubao.
- 10 Genuai Bidigo te we bidi hani dabego

homu kolesaga te olo tama hagamainu yaibao.  
 Mu tama, te bidi dabego po miyu,  
     te magi nai me deli nigaiba wali,  
     tama agai augwaligo te se yabo paliyu,  
     tama te se mu egobeo.

11 Tiali goli, Genuai Bidigo te se yao po wali da,  
     teda agai po te sesemane bomo elaluaibao.

Agai te mena se me deli yabo  
     homu eyu da, tama te homu yali  
     te sesemane elalua peyu, elalua pabo dao.

12 Te hani dabe augwa God te Genuai Bidi bidibao,  
     augwa te wiegi yai homu pemene iyao.

Te bage te aga da olama sa muani bage,  
     te augwa wiegi yai homu pemene yao.

13 God te dagalude bidu, tama aiyaba tonalubao.  
     Agai te tigidali tode we bidi subo dao.

14 Aga te king aga pesagede bidibao,  
     tama te tigidali tode we bidiba  
     aiyaba tonalubo dao.

15 Aga digi te tigidali we bidigo  
     homu kolesaga pedalumainu ilibo dao,  
     tama te augwaligo ebo kolesaga  
     tigidali konebo dao.

16 Te hwibode te we bidi hanigo kingo  
     te boi bidi aiyaba elaluama,  
     tama te genuai ami dabede naga  
     te boi bidi dabe me sela sagobeo.

Te ami dabe augwa bomogo digi  
     te boi bidi aiyaba me elalugobeo.

17 Te hwibo hos dabego te ami dabe tau sobaso,  
     te hwibo aiyaba elaluainu ebaso, usu egobeo.

Tama te hosgo bomogo naga te ami  
     te hwibode hagabo ma sainu ebaso, usu me egobeo.

18 Tiali goli, odao.

Genuai Bidigo te aga dologode bidibo  
     we bidi tonalubo dao.

Awe, te agai te da godolo ebo kolesaga ebo siligobeo  
     homu ebo we bidi, te augwali agai  
     bugagia tonalubo dao.

19 Agai te we bidi dabe augwali tonalu,  
     te augwali me isigobeo.

Tama agai augwali te nasi ebo sogo nai mayu yaibao,

te augwali bidibo ula dali bidimainu yaibao.

- 20 Te da Genuai Bidigo tau sabo te dago tonalubao.  
 Genuai Bidigo naga da tau sabo da.  
 Aga te hwıbo sabele tiwai elama,  
 tama da agade duala sabo dao.
- 21 Dago konealubo homu agai  
 wiegi yai nogide daḡ obao.  
 Tama tiyu, dago agade  
 wiegi yai homu pemene yao.
- 22 Genuai Bidi, dago konealubo homu daḡ olama,  
 tama nago da tau sabo tonalubao.  
 Nago te olo tau sabo wiegi yai kolesaga  
 daba sesemane sogo yao.

### Salmo 34

*Devit te Abimelek dali bidiyu, tama Abimelekigo aga elidali weyu, aga te wabo pabo bidi tiwai bilibaso, tama te Abimelekgo aga sela saḡwani. Te Devit pelama, nosali tama te e balia po aḡai dao. 1 Sml 21:13-15 suao.*

**Godigo wiegi yai seḡ Devitba ebaso, tama agai Godigo nogi ugwaba sai**

- 1 Te eno Godiba usu da weyu,  
 gedu haluasa po weyu,  
 tama eno aga nogi sesemane sogo ugwaba sobao.
- 2 Te Godigo ena tau sali homu elama,  
 tama eno agaba wiegi yai homu pemene ebo dao.  
 Te seḡeḡe tolobo we bidi augwa te po odama,  
 tama augwa bugai homu mu emainao.
- 3 Dago te Godigo genuai nogide po pusubao.  
 Dago agai nogi ugwaba sao.
- 4 Eno te Genuai Bidiba usu da weyu,  
 te ena tau somainu gedu haluasa po wali,  
 tama agai eno gedu haluasa po wabo odali.  
 Agai te eno homude wi ebo tigidali sela saḡnama,  
 tama megi da, ena haliga nagame yai bidibao.
- 5 Te tigidali we bidigo seḡeḡe elaluali,  
 tiali goli te augwa Genuai Bidiba  
 konealubo homu daḡ weyu,  
 te augwa wiegi yai homu pemene yaibao.  
 Tama tiyu, te augwa konealubo homu

- daę wali te me dolobeo,  
augwali tede hale munu me egobeo.
- 6 Te seęę elalubo bidi dabego  
te Genuai Bidiba gedu haluasa po obaso,  
tama agai te augwaligo  
gedu haluasa po wabo odolama,  
tama augwa te tigidali seęęde  
te augwali tau sali.
- 7 Te Genuai Bidigo mobo bidi ensel  
te Genuai Bidi dologoba pelama  
bidibo we bidi dabe paęde bidiyu,  
tama agai augwali tau sobaso,  
te augwali me dologobeo.
- 8 Genuai Bidigo wiegi yai kolesaga  
dabolo ebo dao.  
Duga digi te usu bugagia selama, suięo,  
tama te dagego koneyu,  
te Genuai Bidi wiegi yai mu da waibao.  
Te Genuai Bidiba konealubo homu  
daę mu wabo bidigo da,  
aga te bugai haliga mu elama bidaibao.<sup>§</sup>
- 9 Te Genuai Bidigo we bidi dabe,  
dage te aga dologode bidao.  
Magi baso meni, te aga dologode  
bidibo bidi dabe da,  
te augwali magi nai deli me sęa pogobeo.
- 10 Awe, te boma pai ogwa bidi laion dabe me sogo  
te bulu hasa dabe sęa peyu,  
tama augwali nasi eyu, augwa bomo kimi isaibao.  
Tiali goli, te Genuai Bidi wali pabo we bidi dabe da,  
augwali te wiegi yai nai dabe me sęa pogobeo.
- 11 Te dage konea sabo homu ebo bage, dage aselama,  
tama eno poba olo bugagia muagasao.  
Eno dage ola menama,  
tama dage te Genuai Bidi dali wi eyu,  
aga dologode sesemane bidimainu yaibao.
- 12 Magi ebowe, te nago homugo  
te nago bidibo ula bugagia

- pedalumainu homu ebawe?  
 Tama nago homugo te nago bidibo ula  
 te sesabi elama bidimainu eyu,  
 tama nage te bugagia bidiyu,  
 te wiegi yai pemene yabo homu ebawe?
- 13 Te homu nago wei eyu, godolo ebaso da,  
 teda nago te po dwai me wagio,  
 tama nago tibo po me olamuo.
- 14 Tama nago te dwai kolesaga ebo te tudiba muao,  
 tama wiegi yai kolesaga naga wali pao.  
 Nage te gasa we bidi dabe dali  
 te bugagia bidabo sunumi gegeyu,  
 tama te sunumi naga dolo wali pao.
- 15 Genuai Bidigo te doloba pai bidi dabe tonalubao,  
 tama agai te augwaligo usu da weyu,  
 gedu haluasa po wabo odobo dao.
- 16 Tiali goli, agai te dwai se ebo bidi dabe wei isiąyu,  
 tudi ola mabo dao.  
 Tama agai te augwali ela muyu,  
 tama te we bidigo augwali homu  
 kone ma egobeo.<sup>h</sup>
- 17 Te doloba pai we bidi dabego  
 te Genuai Bidiba usu da weyu,  
 gedu haluasa po obaso,  
 tama agai augwaligo wabo po odobo dao.  
 Agai augwali tau siyu,  
 te seęęęo augwali me elalugobeo.
- 18 God te seęęę elalubo we bidi dabe paęde bidaibao.  
 Tama agai te we bidigo konealubo homu  
 daę wali te dolainu ebaso,  
 te augwali tau sabo dao.
- 19 Mu tama, te seęęę hauwa  
 te doloba pai bidiba pedelaibao,  
 tiali goli, te Genuai Bidigo aga tau siyu,  
 tama te seęęę dabego aga aiyaba me elalugobeo.
- 20 Genuai Bidigo aga mu tonaluaibao,  
 tama agai tigigo dili me deli me  
 togwa pogobeo.<sup>i</sup>

---

<sup>h</sup> 34:16 1 Pi 3:10-12 <sup>i</sup> 34:20 Jon 19:36



- 21 Te dwai sę ebo bidi dabego haniani  
 dwai kolesaga ebogo augwa digi isaibao.  
 Tama Genuai Bidigo te doloba pai bidi  
 dabeba dene mabo boi bidi dabeba  
 dwai dene mu ilibo dao.
- 22 Godigo te aga sę bidi dabe ma selama,  
 tama augwa bidibo ula dali bidaibao.  
 Tama tigidali we bidigo homu agaba kęą pelama,  
 te agai augwali tonalumainu eyu,  
 te augwali me hagagobeo. Mu menio.

## Salmo 35

*Te Devitgo asęani balia po me deli dao.*

**Te bidigo Godiba gedu haluasa po weyu, te aga tau somainu yai**

- 1 Genuai Bidi, nago te ena dali  
 wado yainu elalubo bidi dabeba  
 te nago wado ilao.  
 Te ena dali hwıbo bidi dabe dali te nago hwıao.
- 2 Nago te hwıbo doado bage,  
 me te sabele dali selama,  
 tama nago ena tau sagasao.
- 3 Nago te ene me hwą selama,  
 tama ena te pobeasa bilibo bidi dabe dali hwıao.  
 Nago te po enabolo wao,  
 te ena nage tau sabo bidi da wao.
- 4 Te bidi dabego ena ela muainu ebao.  
 Nago te hwıyu, augwali elaluama,  
 tama augwali hale ilao.  
 Augwaligo te ena dolabo po mia sali.  
 Nago augwali pobelama,  
 tama augwali kone tua pomainu mu yao.
- 5 Genuai Bidi, nago enselgo te dwai bidi dabe  
 sela sęmainu ilao,  
 te waligo te nosa kakali sela sębo tiwai yao.
- 6 Te nago enselgo te augwali pobeasa pelama,  
 tama augwaligo sunumi te hulıa selama,  
 tama dwai bedege mu pedalumainu ilao.

- 7 Eno dwai sę augwaliba me isiąwai, tiali goli tagalao,  
te augwaligo ena dolabo bono  
gąą dualali elalubao.  
Tama augwaligo ena tulalumainu yabo  
tą dedage me deli nigai dao.
- 8 Tiali goli, te augwaligo konesiąwai sogo,  
te augwaligo ena dolomainu te muani bono gąągo,  
nago te augwa digi polo dolomainu ilao.  
Tama augwa digi augwa te nigali  
dedageba tolalumainu yao.
- 9 Genuai Bidigo te tama tibaso,  
tama te eno wiegi yai homu pemene agaba yaibao.  
Te agai ena tau sobaso,  
te eno bugai homu agaba yaibao.
- 10 Tama te eno usu da po mu te Godiba waibao,  
“Genuai Bidi, te nage tiwai me deli elalubeo.  
Nago te bomu meni yai bidi dabe bugagia tau sabo dao,  
tama te bomu mu ebo bidi dabego  
augwali dolainu ebo te usu me egobeo.”
- 11 Te tibo po wabo bidi dabego enaba  
te eno isiąwani dwai sę meba po  
enaba kisilama wali.
- 12 Eno wiegi yai kolesaga augwaliba ebadi,  
tama augwaligo dwai kolesaga enaba wei ponani.  
Tama tibaso, eno haliga sęę mu yai.
- 13 Tiali goli, eno augwaliba  
te tiwai sę me ebeo. Mu menio.  
Te augwali gasi elalubaso, eno homu dene mu elama,  
tama eno ugwa dwai gudali.  
Eno te nai tubo me habu selali,  
tama tego digi enaba sęę mani.  
Tama eno usu da weyu, gedu haluasa po  
te nago augwali tau somainu wali.
- 14 Te eno abagi me ama teba  
homu sęę ebo tiwai yali.  
Ena te ida isaide te homu dene eyu,  
gela wabo bidi tiwai bilali.  
Ena te haliga sęę mu elama, tama ena te gela weyu,  
homu dene dali bidali.
- 15 Tiali goli, te sęęgo ena gegebo sogo,

augwali sisinama, te wiegi yai homu pemene yai.  
 Augwali sisinama, ena elaluainu yali.  
 Te eno konesiawani bidi meba,  
 augwaligo enaba te dwai po  
 kisilibo seḡ te toma me nabeo.

16 Augwaligo posobo po umabo mu weyu,  
 tama enaba seḡḡ mani.  
 Augwaligo ena wei me isiama,  
 tama augwaligo enade gebo hulua sali.

17 Genuai Bidi, te nisu naga sogo  
 nago augwali sula tagalogowe?  
 Nago ena ma siyu,  
 tama augwaligo ena me dologobeo.  
 Augwaligo te laiongo ena ela muainu ebo tiwai ebao,  
 tama ena nago te augwali nogode ma sao.

18 Te nago tama tibaso da,  
 te eno nageba usu da wabo po  
 te hauwa we bidi sisinibo tomode te po waibao.  
 Mu tama, te eno nago nogi te genuai hani  
 we bidi tomode ugwaba saibao.

19 Te bidi mebago ena dali odolali boi bidi ebao.  
 Tiyu, augwaligo ena aiyaba elalu,  
 te keḡḡ wabo te nago sula me tagaligio.  
 Augwaligo odolali ena dali dwai homu ebao,  
 tama tiyu, nago eno seḡḡede  
 te wiegi yai pemene emainu sula me  
 tagaligio.<sup>j</sup>

20 Augwaligo te gasa bidi dabe dali  
 bugagia bidabo po dwasianu me migobeo.  
 Augwaligo te bidibo bulude bugagia bidibo bidi dabe  
 dolabo po weyu ebo dao.  
 Augwa te wiegi yai bidi dabe tibo po ola mayu,  
 dolabo po sisinama mibo dao.

21 Augwaligo enaba po kisilama,  
 te genuai po daḡa weyu, te tama po wabo dao,  
 “Mu tama, dago te nago dwai kolesaga  
 meba te ebo gedugo sualio,” te po wabo dao.

<sup>j</sup> 35:19 Tib 69:4; Jon 15:25

- 22 Tiali goli, Genuai Bidi, nago  
 te bidi dabe augwali سوالو.  
 Tama tiyu, nago pedauwali panialuamuo.  
 Genuai Bidi, nage enade  
 te digibulu me bidilamu dao.
- 23 Nage God, me eno Genuai Bidi,  
 nage hogodama, te ena tau sagasao.  
 Nago ena hasegelama,  
 tama ena tau sabo po hanilama pusao.
- 24 Genuai Bidi, eno God,  
 nago te doloba pai kolesaga ebo dao.  
 Nago ena tau sabo te boi bidi dabego koneama,  
 eno te doloba pai kolesaga wali pabo da po omainao.  
 Te ena dolomainu eyu, augwaligo te kęnę wabo te nago  
 sula me tagaligio.
- 25 Nago te augwade digi augwa po  
 mia siyu, te tama po wali,  
 “Wiegi yai mu da,” te po wabo  
 nago sula me tagaligio.  
 “Te dago yainu yali sę, megi da te sę yalio.”  
 Nago te po augwaligo omainu me igio,  
 “Dago aga dolali dao.”
- 26 Augwaligo te enaba pedelali sęęęde  
 wiegi yai homu pemene yali.  
 Tama tiyu, nago augwali dwai hale emainu elama,  
 tama augwaligo homu kone mu tuą pomainao.  
 Augwa digi augwa nogi ugwaba siyu,  
 te ena aiyaba elaluainu yali,  
 tama tiyu, nago augwali  
 te hale dwai mu emainu elama,  
 tama augwaligo nogi te aiyaba elaluao.
- 27 Tiali goli, te gasa bidi dabego  
 homugo nago ena te doloba pai bidi  
 nogi emainu homu eyu,  
 augwa wiegi yai pemene elama i weyu,  
 tama bugai haliga elama bidimainu emainao.  
 Sesemane sogo augwa te po omainao,  
 “Genuai Bidi te polalubo bidi mu da,” waibao,  
 “agai te aga sę bidi bugagia bidimainu  
 godolo ebo dao,” omainao.

28 Tama tiyu, te eno nago doloba pai  
 kolesagade po hanilama weyu,  
 tama nago nogi tigidali sogo  
 giligade me, hulide me ugwaba saibao.

## Salmo 36

*Te Devitgo aṣṣani balia po me deli dao.*

**Te dwai kolesaga ebo bidi dabede wali po dao**

- 1 Agai dwai seḗde sali seḗḗ te dwai bidigo  
 haligade elalubao,  
 tama te po meba agabolo mabo dao.  
 Te bidigo te Godide wi me egobeo.  
 Mu menio. Agai aga tudiba muaibao.<sup>k</sup>
- 2 Agade digi aga hagoma eyu, te homu ebo da,  
 “Ena te polalubo bidi mu da,” waibao.  
 “Tama tibaso, Godigo te eno ebo dwai seḗ dabe  
 te me gegegobeo elama,  
 tama agai ena po tu me iligobeo,” wabo dao.
- 3 Sesemane sogo agai te dwai seḗ yabo po,  
 me te gasa bidi tibo po ola mabo po weyu yaibao.  
 Agai te wiegi yai kolesaga yabo homu  
 te agade me elalubo menio.
- 4 Aga te betide pila mudu,  
 tama te dwai seḗ yabo kolesaga te  
 homu kone paludaibao.  
 Agai te dwai seḗ ebo sunumi naga wali pidu,  
 tama te dwai seḗ ebo kolesaga tudiba me mugobeo.

**Godigo wiegi yai kolesaga ebo dao**

- 5 Genuai Bidi, nago te we bidi  
 godolo ebo kolesaga te dwasianu meni,  
 te godolo ebo daḗ te dagaluba usu nigi pali.  
 Nago te mu kolesaga naga wali pabo,  
 tama te me te dwasianu menio.  
 Te daḗ te ugwadu mu elalubo poba usu nigi palio.
- 6 Te nago doloba pai kolesaga te genui mu elalubao,  
 te bulu du dabe tobage tiwai elalubao.

<sup>k</sup> 36:1 Rom 3:18

Dago nago te doloba pai po tų ebo page koneainu ebaso,  
te usu me egobeo.

Te aiyanu mu dulali,  
te tamu ąi aiyanu mu ebo tiwai yai.

Genuai Bidi, nago te bidi dabe  
me te hasa dabe bugagia tonalubaso,  
te augwali bugagia bidibo dao.

<sup>7</sup> God, nago te da godolo ebo kolesaga te siligobeo,  
tama te wiegi yai mu yai, dago wei homu mu ebao.

Tama te we bidi dabe  
te nageba pelama, duala sabo da,  
te kakaruk wai dabe te aga idago  
bogo dologoba duala sabo tiwai gilama ebo dao.

<sup>8</sup> Nago bede te nai hauwa elalubao,  
tama tiyu, te we bidi dabe te nai me  
sqą pabo menio.

Te nago wiegi yai nai te umabo mu elalubao,  
te soabo genuai wę tiwai eyu,  
tama nago da te wę tumainu mabo dao.

<sup>9</sup> Magi baso meni, nage te tigidali  
naigo bidibo ula page bidi dao.

Tama nage te ulago page da.  
Dago te nagede naga ula siyu,  
tama da bugagia bidibao.

<sup>10</sup> Sesemane sogo nage konebo  
we bidi te nago augwali wei eyu,  
godolo mu idu geao.

Nago te doloba pai bidi dabe tau siyu,  
te augwali bugagia bidimainu tau sidu geao.

<sup>11</sup> Nago ena te hagoma bidi dabego  
sągągo agamainu me elamuo.

Tama ena te dwai bidi dabego sela sąmainu me igio.

<sup>12</sup> Suao. Te dwai sę ebo bidi dabe  
te tųba tulaluama, te pila mubao.  
Augwali te ma hodalugobeo.

## Salmo 37

Magi nai te wiegi yai bidide, me dwai bidide pedalubo po wai

- 1 Abagi, nago te dwai sę ebo bidi dabego te  
wiegi yai nai dabe sabode  
te nago homugo pesa me elamuo.  
Nago te dwai kolesaga ebo bidi dabego  
naide haliga dwai me elamuo.
- 2 Te dwasianu sogo naga tama,  
te dwai sę ebo bidi dabe dolaibao,  
te nosa wa pabo tiwai eyu,  
me te ni yabe wa pabo tiwai yaibao.
- 3 Nago konealubo homu Godiba munama,  
tama wiegi yai kolesaga yao.  
Nago tama tiali da, tama nage te naga tęde sesabi  
elama bidaibao,  
tama magi nai me deligo nage me dologobeo.
- 4 Nago Genuai Bidiba wiegi yai pemene yao,  
tama agai te nago godolo homu ebo  
nai dabe mawaibao.
- 5 Nago te naga bidibo ula te Genuai Bidi nogoba muao.  
Te konealubo homu agaba daę weyu,  
te agai nage tau saibao.
- 6 Tama tiyu, te agai nago wiegi yai kolesaga  
te hania pepeli diliba pedalumainu ilama,  
te giliga ula pedalubo tiwai yaibao.  
Tama agai te nago doloba pai kolesaga  
te bidi dabego gedude te pepeli diliba haniliyu,  
te nai tubode te giliga tomo yagasu  
ula ebo tiwai yaibao.
- 7 Nage dua digi te Genuai Bidi pąba pelama, bidao.  
Te dua digi bidiyu, te agai nage tau sabo tonaluao.  
Te bidi dabego augwa ebo kolesagade  
te wiegi yai nai dabe sabode te  
nago homugo pesa me elamuo.  
Mu tama, te haniani dwai kolesaga yabo  
homu ebo bidi dabego ebo homude  
nago homu kekeli eyu, tama te tiwai sę eyu,  
pedelabo homu me elamuo.

- 8 Nago wado po me wasiaųu,  
 tama nago te haliga sębę ebo kolesaga me tagalao.  
 Nago homu te nai dabede kekeli elama,  
 homugo pesa me elamuo.  
 Te kolesagago nage kekelama,  
 te dwai kolesaga emainu yaibao.
- 9 Te dwai sę ebo bidi dabe mu dolaibao.  
 Tiali goli, te konealubo homu daų olama  
 bidibo we bidi dabego  
 te Genuai Bidigo augwali tau somainu  
 tonaluali we bidi dabe da,  
 te augwali te augwa tęde bugagia bidaibao.
- 10 Te pade tama digi sogo,  
 te dwai sę ebo bidi dabe mu hagawaibao.  
 Te nago augwa pesagede te augwali gegebo sę yaibao,  
 tiali goli nago augwali me sugobeo.
- 11 Tiali goli, te augwa digi augwa  
 aiyaba elalubo we bidi dabe,  
 te augwali te tęde bugagia bidaibao.  
 Te augwali wiegi yai mu bidiųu,  
 tama wiegi yai pemene elama, bidaibao.<sup>1</sup>
- 12 Te dwai sę ebo bidigo  
 te wiegi yai bidi dolabo homu eyu,  
 te wado po wabo dao.
- 13 Tiali goli, Genuai Bidigo te sogo me deli  
 te bodolu pedalubo koneyu, tama te sogo  
 te dwai sę ebo bidi dabe dolaibao.  
 Tama tiųu, Genuai Bidigo augwaliba gisugu mabo dao.
- 14 Te dwai sę ebo bidi dabego te bainat hwą dią siųu,  
 tama te enesigi kegelama,  
 te nai meni yai bidi dabe,  
 me te magi doado bage sęą pabo  
 bidi dabe enainu yaibao.  
 Augwaligo te doloba pai kolesaga  
 wali pabo we bidi dabe ela muabo homu ebo dao.
- 15 Tiali goli, te augwa bainatgo  
 te Godigo augwali isilaibao,  
 tama Godigo te augwaligo enesigi togwa paibao.

---

<sup>1</sup> 37:11 Mat 5:5



- 16 Te doloba pai bidigo te dwasianu naigo  
te tigidali dwai bidigo nai hauwa  
te aiyaba elalueibao.
- 17 Magi baso meni, Genuai Bidigo  
te dwai bidi dabego bomo silama,  
tama agai te doloba pai bidi dabe tonalueibao.
- 18 Genuai Bidigo te aga po wali pabo  
we bidi bugagia tonalueibao.  
Tama te Godigo augwali mani doado bage,  
te augwa sesemane sogo tolalueibao.
- 19 Te dwai sogode te seęęęo augwali me gegegobeo.  
Tama te nasi ebo sogo, te augwa nai hauwa elalu,  
te augwali nai me sqą pogobeo.
- 20 Tiali goli, te dwai se ebo bidi dabe,  
augwali da, mu dolaibao.  
Te Genuai Bidigo boi bidi dabe augwali te hagawaibao,  
te wiegi yai plauago, me nosaigo au tęba tegaluama,  
te hagabo tiwai gilama yaibao.  
Mu tama, te augwali te sia hano  
te dwasianu sogo naga elaluama,  
tama te hano pela silibo tiwai gilama ebo dao.
- 21 Te dwai se ebo bidigo te nai dabede negeli selama,  
tama agai te negeli sali wei me ponogobeo.  
Tiali goli, doloba pai bidigo te wiegi yai kolesaga eyu,  
tama agai te gasa bidi dabeba te nai olo mabo dao.
- 22 Te Genuai Bidigo wiegi yai po  
augwaliba wabo we bidi da,  
te augwali te bugagia tęde bidaibao.  
Tiali goli, te Genuai Bidigo te dolomainao po wali  
we bidi dabe da, teda agai augwali sela saęwaibao.
- 23 Genuai Bidigo te we bidi  
bilibo dodolobo se ebo dao.  
Te agai bidi me deligo kolesaga  
wei eyu, godolo ebaso da,  
agai te aga dolasa bilimainu daę walaibao.
- 24 Tama te bidi tulalubaso, tagalao,  
aga te mu dologobeo.  
Magi baso meni, Genuai Bidigo  
te aga nogo tola selama,  
tama aga ma dolugulumainu ebo dao.

- 25 Polobadu ena gesi ogwa bidi bidali,  
 tama megi da ena monu dabe yalio,  
 tiali goli te Godigo doloba pai bidi  
 me deli tudiba mubo te eno me subeo.  
 Tama te doloba pai bidi dabego  
 wai dabe te nai sęą pabo te eno me susiayıu,  
 tama te gasa bidigo augwali  
 tau somainu i me wabeo. Mu menio.
- 26 Te sesemane sogo  
 te doloba pai kolesaga  
 ebo bidigo te olo mu tau sabo  
 wiegi yai kolesaga eyu,  
 tama te gasa we bidi dabeba nai  
 hauwa mayu ebo dao,  
 tama augwa wai dabego  
 te aya ida wiegi yai homu  
 pemene ilibo sę ebo dao.
- 27 Nago te tigidali dwai kolesaga tudiba munama,  
 tama wiegi yai kolesaga naga yao.  
 Te tiwai nago ebaso da,  
 teda nago nosali pedalubo hani bage  
 augwaligo te tęde sesabi elama,  
 bugagia bidada paibao.
- 28 Magi baso meni, Godigo te doloba pai kolesaga ebo  
 we bidi wei eyu, godolo mu ebo dao.  
 Agai te aga we bidi hagamainu me egobeo.  
 Sesemane sogo Genuai Bidigo te  
 we bidi dabe dolasa bilimainu tonalueibao.  
 Tiali goli, te dwai bidi dabego  
 wai dabe da, te mu dolaibao.
- 29 Tiali goli, te doloba pai bidi dabe da,  
 te Godigo augwa mani tę saibao,  
 tama augwa tede sesemane sogo bidada paibao.
- 30 Doloba pai bidigo te wiegi yai  
 kolesaga koneani elalu,  
 tama wiegi yai po naga pusaibao.  
 Agai te doloba pai kolesagade po mibo dao.
- 31 Te Godigo bomai po aga homude elalu,  
 tama agai God wali peyu,  
 tama te bomai po me tagalogobeo.

- 32 Te dwai se ebo bidi geme dualalu,  
tama te doloba pai bidi tonalueibao,  
tama aga ela muabo sunumi gegeyu tebo dao.
- 33 Tiali goli, Genuai Bidigo te doloba pai bidi  
te dwai bidigo ela mumainu me tagalogobeo. Mu menio.  
Tama te dwai se ebo bidigo  
te doloba pai bidi po tu ilibaso da,  
teda Genuai Bidigo agai te doloba pai bidi  
te po tuḡe aiyaba elalumainu me  
sula tagalu me gogologobeo.
- 34 Nago konealubo homu Genuai Bidiba ḡu olama,  
tama agai po dolo wali peyu,  
tama agai kolesaga wali pao.  
Nago te tiwai eyu da, teda agai nageba  
te genuai nogi mayu,  
tama nago te agai nageba mani tu tolalu bidaibao.  
Tama agai te dwai se ebo bidi dabe  
dolobo te nago sueibao.
- 35 Eno suali, te dwai se ebo bidigo  
genuai bomo elalubao, tama agai te we bidi dabe  
aiyaba elalu, te Lebanonde elalubo  
te moni ni sidago te gasa ni dabe aiyaba elalubo  
tiwai gilama ebo dao.
- 36 Tiali goli, nosali ena te badu ma pali,  
tama aga te munu ma elalubeo.  
Eno aga gegebo se yali,  
tiali goli eno aga me subeo. Mu menio.
- 37 Nago te magi dwai se me deli isawai  
bidide homu kone paliyu,  
tama te doloba pai bidi suabo homu yao.  
Te gasa we bidi dabe dali  
dua digi bidibo bidi yaibaso da,  
teda aga hani te sesemane sogo bidaibao.
- 38 Tiali goli, Genuai Bidigo  
te dwai se ebo bidi dabe te mu dolaibao.  
Te augwa hani wai nuḡ dabe  
augwali nosali te mu menia saibao.
- 39 Genuai Bidigo digi te doloba pai dabe ma sabo dao.  
Te seḡe augwaliba pedalubo sogo,  
augwali te udulama, agaba pobaso,

- tama agai augwali tonalubo dao.  
 40 Augwaligo konealubo homu agaba daę wai.  
 Tama tiyu, agai augwali tau siyu, tama agai augwali  
 te dwai bidi dabego nogode dobola selama,  
 tama augwa bugagia bidibo dao.

## Salmo 38

*Te Devitgo aęani balia po me deli dao.*

**Te seęę elalubo bidigo gedu haluasa po wai**

- 1 Genuai Bidi, nago wado yabo homu elalubao,  
 tiali goli nago enaba wado me iligio.  
 Nago haliga seęę yai,  
 tiali goli nago enaba dene me magio.
- 2 Nago ene dabego nago ena mu enama,  
 tama naga nogogo nago ena aiyaba elaluali.
- 3 Nago enaba wado ebaso, tama ena dwai gasi yai.  
 Eno seęę elalubaso,  
 tama eno tigi bomu mu meni yai.
- 4 Te ena seęę dabego te ena mesegelama,  
 tama te seęę dabe te eno walu tolai  
 seęę tiwai elama, tama seęę mu ebo dao.
- 5 Te eno tigide elalubo kenide  
 te keni bole hauwa elalu, tama te kugumini mu ebao.  
 Eno te geda mubo kolesaga mu eyu,  
 tama te seęę enaba pedelai.
- 6 Eno haligade te genuai seęę mu elama,  
 tama ena dolobao.  
 Te tigidali side ena homu dene eyu,  
 tama gela naga wabo dao.
- 7 Eno tigi te posolo mu eyu, te siago dabo tiwai ebao,  
 tama ena genuai gasi mu elalubao.
- 8 Ena mu dolama, tama ena dwai bidali,  
 te magi nai me deligo ena bomonama agabo tiwai  
 gilama yali.  
 Eno haligade te dwai homu mu yali,  
 tama ena te genuai denede i me weyu yali.
- 9 Genuai Bidi, nago te eno bomai homu  
 wei ebo koneani.

- Eno haligago dwai gela wabo,  
tama nagede tebo te geme me  
dualalubeo.
- 10 Te eno hoboludu sę bomu mu ebaso,  
tama eno bomu te mu sia salio.  
Te eno gedu hulua selama,  
tama eno bugagia ma tonosiąbo dao.
- 11 Te eno abagi, me hai namu dabe,  
te augwali ena pąba asabo homu isąwai.  
Augwaligo te eno keni suabo homu isąwai.  
Tama ena hani sibi dabe augwali te digibulu bidibao.
- 12 Te ena ela muainu ebo bidi dabe,  
augwaligo te ena tola somainu yabo  
bono gągą sisi elama, muani.  
Te ena dolainu ebo bidi dabe,  
augwaligo te enaba dwai sę yabo po miani.  
Tama sesemane sogo augwaligo enaba  
dwai sę yabo homu kolesaga ebo dao.
- 13 Tiali goli, ena te olo degai bidi tiwai elama,  
tama eno augwaligo wabo po me odobeo.  
Ena te pedauwali pania sai tiwai elama,  
tama eno pedauwali me a me wabeo.
- 14 Ena te po odisąbo bidi me deli  
tiwai gilama yali, tama eno augwaliba  
te po wei me ponobeo.
- 15 Tiali goli, Genuai Bidi,  
eno konealubo homu nageba dąų wali.  
Genuai Bidi, nage eno God da,  
te naga digi enaba te po  
wei ponomainu yaibao.
- 16 Eno te tama gedu haluasa po wali,  
“Nago te boi bidi dabego ena aiyaba elaluama,  
tede kęnę omainu me elamuo,” wali.  
“Te ena dwasianu tula mubo sogo,  
nago te augwali hagoma eyu,  
wiegi yai homu pemene emainu me igio,” wali.
- 17 Magi baso meni, te pąde ena tulaluainu eyu,  
tama ena sesemane sogo dene ebo dao.
- 18 Eno dwai sę yali po nageba pusali,  
tama ena yali sęgęde ena homu dene yai.

- 19 Te eno boi bidi tigidaligo te bomo mu ebao.  
 Te bidi hauwa umabogo  
 te enaba odolali boi bidi ebao.
- 20 Eno dwagi yai kolesaga augwaliba ebadi,  
 tiali goli augwaligo enaba  
 dwai kolesaga wei ponoyu yai.  
 Eno te wiegi yai kolesaga wali pobadi,  
 tama tede augwaligo homu koneama,  
 tama enade augwa boi bidi pedelali.
- 21 Genuai Bidi, nago ena me tagaligio.  
 Eno God, nage te enade digibulu me bidigio.
- 22 Genuai Bidi, nage da ena ma dobola sabo bidi da.  
 Nago ena polo tama tau sao.

## Salmo 39

*Te Devitgo aseąani balia po me deli dao.*

### Te seęę elalubo bidigo po wali

- 1 Eno po te tama wali,  
 “Eno te ena ebo kolesaga tigidali te bugagia  
 tonalueibao,” po wali.  
 “Tiyu, te ena wali pode seęę sidalio.  
 Te dwai seę ebo bidi dabe ena paęe bidibo sogo da,  
 teda eno po deli me wagobeo,” wali.
- 2 Tialima, eno pedauwali pania selama,  
 tama eno po deli me wabeo.  
 Tama eno te wiegi yai naide me po me deli me wabeo.  
 Tiali goli, eno haliga seęę te genuai mu pedelalio.
- 3 Tama eno moni homu mu yai.  
 Eno homu kone palubo seę idubadi,  
 tama eno haliga te mu dwai yali.  
 Tialima, megi da, eno pedauwali  
 pania sobaso, usu egobeo. Menio.
- 4 Eno Godiba te tama po hanalu wai,  
 “Genuai Bidi, te ena bidabo ulade  
 te nisu naga kibu be elalubawe?  
 Te mena sogo ena isigowe?  
 Te eno bidabo ula te peęwadage sogo  
 naga elalubo homu ebao.  
 Nago enabolo pusa mao,” po wali.

- 5 Nago ena bidabo bodolu  
 te pęwadage sogo mu muani elalubao.  
 Te nago gedude ena te bidabo bodolu muani,  
 te olo bage tiwai yali.  
 Tigidali bidi te wali tiwai eyu,  
 te bidi me deligo te pedauwalide  
 ponobo tiwai gilama ebo dao.
- 6 Tigidali bidi te ni noma te giligade elalubo tiwai ebao.  
 Augwa te doado bage hauwa sabo sę dene ebadi,  
 tiali goli, augwa te sę dene odolali hagayu yai.  
 Te bidi dabego doado bage hauwa sisinani,  
 tiali goli, augwali isibo si,  
 dego sogowe, te augwaligo me konebeo.
- 7 Tiali goli, Genuai Bidi, megi eno magi nai  
 tonalubowe? Menio.  
 Eno konealubo homu nageba daę weyu,  
 tama nago naga ena tau sabo tonalubao.
- 8 Nago ena ma selama,  
 tama eno sęęę tigidali sela sayao.  
 Nago te kolesaga gedu mubo bidi dabego  
 te enaba posobo po omainu me elamuo.
- 9 Tiali goli, eno da po me wagobeo.  
 Eno pedauwali pania saibao.  
 Magi baso meni, nago digi te dene mabo sę enaba yali.
- 10 Nago ena me dolamuo dao.  
 Nago ena dene mu menama,  
 tama pade ena isainu ebao.
- 11 Nago te bidi me deliba wado eyu,  
 tama aga yali sę wei ponoyu ebo dao.  
 Tama nago te agai godolo ebo nai te mu siliyu yaibao,  
 te asobago te ugwa togobo tiwai eyu,  
 tama te ugwa dolobo tiwai ebao.  
 Mu tama, tigidali bidi pedauwalide  
 te po mobo wali asobo tiwai ebo dao.
- 12 Genuai Bidi, nago eno gedu haluasa po odao.  
 Nago te eno i waboba olo bugagia muao.  
 Te eno nageba i wabo sogo, nago olo pania selamuo.  
 Nago koneani, ena te dwasianu sogo  
 nage dali te tode bidaibao.  
 Ena te ena wai nęę dabe tobage tiwai dao,

- augwali me te pęwadage sogo naga te tęde bidai dao.  
 13 Nago enaba te dene mabo sę me elamuo.  
 Enabolo sula tagalu, te ena haliga wiegi yai  
 ma emainu yao.  
 Tama nosali ena isibaso, te tę mu taga paibao.

## Salmo 40

*Te Devitgo aęani balia po me deli dao.*

**Te God nogi ugwaba sabo tęąbi po dao**

- 1 Ena dua digi bidiyu,  
 tama eno te Genuai Bidigo ena  
 tau sabo tonalu bidai.  
 Tama agai te olo tau sabo wiegi yai kolesaga enaba eyu,  
 tama eno gedu haluasa po wabo odali.
- 2 Ena te aiyaba mu igulai genuai dedage  
 tomode bidibo bidi tiwai bidiyu,  
 tama ena dolainu ebaso,  
 tama Genuai Bidigo ena kegelama,  
 tama ena ugwaba holali.  
 Ena te pu węde mu dą olama,  
 tama tego ena tola sai elalu,  
 tama Genuai Bidi agai ena tedu gudulama,  
 tama ena te masigi elalubo madiba dodolama,  
 tama ena bomonama ma pai dao.
- 3 Agai te gesi tęąbi po me deli enaba mani,  
 te agaba konealubo homu dą wabo  
 God nogi ugwaba sabo tęąbi po dao.  
 Te bidi hauwago te agai enade yali sę  
 po odolama, tama augwa wi elama,  
 tama augwa te Genuai Bidiba  
 konealubo homu dą omainu yaibao.
- 4 Bidigo konealubo homu te  
 Genuai Bidiba dą wabo bidi da,  
 te aga wiegi yai homu pemene yao.  
 Te hagoma ebo bidi dabe wali pisąbo bidi tiwai,  
 tama te Genuai Bidi me tagalisiąma,  
 tama te tibo god dabeba lotu po me wagobeo.  
 Mu menio.
- 5 Genuai Bidi, eno God,



nago te da tau sabo sę wiegi yai hauwa yali.  
 Te nage tiwai bidi me elalubeo.  
 Nago augwali aiyaba mu elaluali.  
 Eno te bidi dabeba po pusuyu,  
 tama nago sę me homude po weyu da, ya tegobao!  
 Te umabo umabo mu yaibao.  
 Eno nedebaso, usu me egobeo.

- 6 Nago te augwaligo elama ofa ebo  
 kibu dabe te wei ebeo.  
 Te tobage augwaligo  
 te siaba tigidali ulama domainu  
 te sęęę sela sębo ofa, te me nago wei me isiųwai.  
 Tiali goli, nago eno homu hodolobaso,  
 tama eno nago po wali pabo dao.
- 7 Tialima, megi eno e tama obao,  
 “Suao. Ena asalio.  
 Te nago bomai po elalubo bukude nago homugo  
 te eno emainu yabo sę asęanio.
- 8 Eno God, eno te nago  
 homu wali pabo wei mu ebao.  
 Te nago bomai po te ena haliga tomode  
 elalubao.”<sup>m</sup>

- 9 Genuai Bidi, eno te nago bukude po pusubo sę  
 te nago we bidi dabe sisinibo tomode wai dao.  
 Eno te tama po wai,  
 “Genuai Bidigo te da ma sabo dao.”  
 Genuai Bidi, nago koneani,  
 eno te po sesemane pusaibao.  
 Eno pedauwali me pania sogobeo.
- 10 Nago ena tau selama, tama ena ma sali,  
 tama te eno me geme dualubeo.  
 Te nago naga mu po te wali pelama,  
 tama te nago da ma sabo da po eno pusalio.  
 Nago te tigidali we bidi wei mu eyu,  
 tama nago mu kolesaga wali pobaso,  
 tama eno te lotu wainu sisinibo  
 we bidi dabeba eno me dualubeo.  
 Menio, eno augwaliba wai dao.

- 11 Genuai Bidi, eno koneani,  
 te nago homu dene eyu,  
 tau sabo sę ebo te palia sogobeo.  
 Menio, nago ena sesemane sogo homu ebo dao.  
 Nago ena wei eyu, tama naga mu po te wali peyu,  
 tama tebo kolesagade te nago  
 ena sesemane sogo tonalubo dao.

**Agai te Godiba gedu haluasa po weyu, aga tau somainu yali**

- 12 Te sęę hauwa enaba pedelali,  
 tama te augwali eno nedebaso, usu egobeo.  
 Te dwai kolesaga dabe eno yali,  
 tego ena aiyaba elalualio,  
 tama eno bugagia me tonono me ebeo.  
 Te dwai kolesaga hauwa mu pedelama,  
 tama te eno tobolude elalubo  
 tobolu nisi namba te aiyaba elalui.  
 Eno homu kolesaga tigidali tuloluai,  
 tama ena bomo meni yai dao.
- 13 Genuai Bidi, ao, te nago ena ma sao.  
 Genuai Bidi, te nago ena polo tau sao.
- 14 Te bidi mebago ena ela muainu ebao.  
 Nago augwali elalu,  
 tama augwali homu kone mu tuą palama,  
 te augwali dwai hale somainao.  
 Te bidi dabego eno sęęde wiegi yai pemene ebao,  
 nago augwali ma sela sęnama,  
 tama augwali te elaluo.
- 15 Te bidi dabego enaba posobo po weyu, kęę wali.  
 Nago augwali te hale mu elalumainu yao,  
 te augwa yali kolesagade  
 dwai midigi mu somainu yao.
- 16 Tiali goli, eno homugo te nage koneani bidi dabego  
 da, augwa te nageba wiegi yai pemene eyu,  
 tama bugai homu elama bidaibao.  
 Te nage godolo mu idubo we bidi dabe,  
 te nago augwali ma sao, augwa te po omainu yao,  
 "Genuai Bidi te polalubo bidi mu da," omainao.
- 17 Tiali goli, ena te bomo meni yai bidi,  
 tama ena te tigidali doado bage sęą pai elalubao.  
 Tama nage, Genuai Bidi, nago ena homu koneani.

God, nago digi nago ena tau sabo bidi da,  
 tama nago ena ma sabo dao.  
 Nago me tonalugio, nago ena polo tau sao.

## Salmo 41

*Te Devitgo aęani balia po me deli dao.*

**Gasi yai bidigo te Godiba gedu haluasa po weyu,  
 te Godigo aga usu ma ilimainu yai**

- 1 Bidigo te magi doado bage meni yai bidiba  
 homu kone palama,  
 tama augwali tau sabo bidi da,  
 te bidigo homu wiegi yai pemene yao.  
 Te seęę agaba pedalubo sogode,  
 te Genuai Bidigo aga tau saibao.
- 2 Godigo te aga tonalu,  
 tama aga bidibo ula daę walaibao.  
 Tama Genuai Bidigo te aga pesagede  
 bugagia bidimainu ilaibao.  
 Tama te Genuai Bidigo te boi bidi dabego  
 aga dolomainu me iligobeo.
- 3 Te bidi aga gasi elalubo sogo,  
 te Genuai Bidigo aga tonalubao.  
 Agai te aga gasi usu ma ilama,  
 tama aga bomo ma somainu ebo dao.
- 4 Tiali goli, ena digi eno te po wali,  
 “Genuai Bidi, eno nageba dwai seę yali,” po wai.  
 “Tiali goli nago te olo tau sabo  
 wiegi yai kolesaga enaba eyu,  
 tama eno gasi silao,” wali.
- 5 Te eno boi bidi dabego enade dwai haliga eyu,  
 tama augwa te po wai,  
 “Te aga polo isibaso, te dago homu kone agade ebo  
 tagalaibao.”
- 6 Te bidi mebago ena suagasu,  
 tama augwa enade odolali po miani.  
 Augwaligo te ena gasi dwai ebo po odainu yali.  
 Tama nosali augwa buluba dię soyu,  
 tama augwaligo ena te gasi ebo po

- te tigidali habude te po pusubo dao.
- 7 Tigidali bidigo ena wei me isaęu,  
te augwaligo eno gasi po geme wabo dao.  
Augwaligo homugo te dwai nai mugo  
ena dolomainu homu ebo dao.
- 8 Augwa te tama po wai,  
“Te dwai naigo aga salio,” wali.  
“Te aga ma hodalubaso, te usu egobeo.  
Te aga isaibao,” wai.
- 9 Eno abagi me deli elaluai,  
aga te eno hai namu mu tama,  
tama aga te ena dali nai tuyu yai.  
Tiali goli, aga me te eno boi bidi pedelali.<sup>n</sup>
- 10 Genuai Bidi, nago te olo tau sabo  
wiegi yai kolesaga enaba eyu,  
tama e gasi silimainu yao,  
tama te eno te bidi dabe augwa yali  
kolesaga wei ponaibao.
- 11 Te boi bidi dabego ena dolisaębaso da,  
teda eno koneyu,  
te nago ena godolo eba homu yaibao.
- 12 Nago suali, te ena dolo bilibasos,  
tama nago ena tonaluali,  
tama nago ena te naga paęde sesemane dolaluaibao.
- 13 Dago te Genuai Bidi nogi ugwaba sao,  
aga te da Israel dabego God dao.  
Tama te nosali pedalubo hani  
augwa te tama naga tiaibao.  
Te mu dao.<sup>o</sup>

---

<sup>n</sup> 41:9 Mat 26:23; Mak 14:20; Luk 22:21; Jon 13:18    <sup>o</sup> 41:13 Tib 106:48

**Buku 2**

(Tib 42-72)

**Salmo 42**

*Polobadu mu te dago megi wabo Tib 42 dali, Tib 43 dali te balia po me deli naga elaluali. Tiali goli, nosali augwaligo te balia po pedama, tama megi dago te balia po si badu elalubao. Tama te balia side elalubo po page te deli page dao, te bidi aga page bulude homu dene mu eyu, tama Genuai Bidi Godibolo aga gedu haluasa po obao. Te Kora hani dabego asęani balia po me deli dao.*

**Te aga bulu digibulu bidibo bidigo gedu haluasa po wali**

- 1 Uni hasa te węde nogene eyu,  
tama te tubo dwasianu węba  
udua pabo dao.  
Tama te tiwai naga, God, eno homu wei eyu,  
te nage pąde bidabo homu ebao.
- 2 God, nage te bidibo ula elalubo God da,  
tama eno nage wei homu mu ebao,  
te bidi aga dogoni wa pobaso,  
te wę tuainu ebo tiwai yaibao.  
God, mena sogo te ena nageba aselama,  
tama te moni lotu be tempelde  
nageba lotu wagowe?
- 3 Sesemane sogo te bidi dabego enaba te tama po wali,  
“Te nago God mena bidibawe?”  
Tama tibaso, ena sesemane sogo gela udubo sę yali.  
Te eno gedu ąi te eno siade me hulide  
nai tubo tiwai gilama yali.
- 4 Eno te polobadu wiegi yai homu elaluali sogo  
homu kone palama,  
tama eno haliga sęę mu yali.  
Polobadu ena te hauwa we bidi dali bilali,  
tama ena poligi pelama,  
tama augwali te Godigo beba odasa pai.  
Da pelayu, tama wiegi yai pemene ebo i me wali,  
tama Godiba usu da wabo tęąbi po wali.  
Te sogo da tigidali te olo bidibo side sisinani.
- 5 Magi baso ena sesemane sogo  
te haliga sęę ebawe?  
Magi baso eno haliga midigi ebawe?

- Eno konealubo homu te Godiba daę olama,  
 tama agai ena tau sabo tonalueibao.  
 Aga te eno God da, tama ena tau sabo da.  
 Tama tiyu, eno aga nogi ugwaba ma saibao.
- 6-7 Te boi bidi dabego ena te augwa  
 buluba odasa asobaso,  
 tama megi eno page bulu te digibulu mu elalubao.  
 Tama tibaso, eno haliga seęę mu ebao.  
 Tama tiyu, God, eno homu kone nageba ebao.  
 Nago te enaba te haniani genuai seęę menama,  
 tama augwaligo ena mesegelali,  
 te moni soabo aę tiwai dao.
- Tama te masigi yai madi soabo weę  
 te aiyaba sabo duluyu,  
 te weęo kulukulu umabo mu wabo dao.  
 Te tiwai me te enaba pedelali seęę dabego  
 te eno homu kone tuę pali.
- Nago te biksi peda pomainu elama,  
 tama pepeda pomainu yali,  
 tama te nambisde tọ mesegebo dao.
- Tama te tiwai naga nago enaba  
 te muani seęę tigidaligo te ena mesegelibo dao.
- 8 Tiali goli, eno homugo te Genuai Bidigo enabolo  
 te olo tau sabo kolesaga te giligade emainu yali.  
 Tama te hulide eno te agaba usu da weyu,  
 gedu haluasa po wabo tęąbi po waibao,  
 tama te ena bidabo ula mabo Godiba te usu da po  
 wabo gedu haluasa po waibao.
- 9 God da, te ena seselalubo bidi mu dao,  
 tama eno agaba te tama po obao,  
 “Magi baso nago enaba homu kone ebo tagalubawe?  
 Magi baso nago ena te boi bidi dabego elalumainu eyu,  
 tama ena te haliga seęę emainu ebawe?”
- 10 Te sesemane sogo te boi bidi dabego  
 enaba te tiwai keęę po weyu,  
 “Te naga God mena bidibawe?” po wabo.  
 Te pogo te ena tigide te ene enama,  
 tama ena isainu ebo tiwai yai.
- 11 Magi baso ena haliga seęę sesemane sogo ebawe?  
 Magi baso eno haliga midigi ebawe?  
 Ena te Godiba konealubo homu daę olama,  
 tama agai ena tau sabo tonalueibao.

Aga te eno God da, tama ena tau sabo dao.  
Tama tiyu, eno aga nogi ugwaba ma saibao.

### Salmo 43

**Aga bulu taga pelama, digibulu bidibo bidigo gedu haluasa po wai**

- 1 God, te bidi dabego nage tudiba muyu,  
te augwaligo ena aiyaba elaluainu  
homu ebao.  
Nago ena tau selama,  
tama augwaligo te dwai po wabo togolama,  
tama augwaliba eno ebo  
wiegi yai kolesaga naga ola mao.  
Augwali te tibo po wabo bidi dabe da,  
tama augwaligo kolesaga te dolo me isąwai.  
Nago ena tau selama,  
tama augwali nogode ena ma dobola sali.
- 2 Magi baso meni, nage naga, nage eno God da.  
Ena nageba aselama,  
tama te dwai bidi dabede geme duala sali.  
Tialima, magi baso nago  
ena homu ebo gegeda palubawe?  
Magi baso te boi bidi dabego ena aiyaba elaluama,  
tama ena haliga seęę  
dwai mu iduaibawe?
- 3 Nago te naga mu po ola toliyu,  
tama nago ula me asiyu,  
tama enabolo sunumi ola mobaso da,  
teda ena te naga tedali bulu du dolo  
te Saionba pelama digi,  
tama te nage bidibo lotu be tempelba  
paibao.
- 4 Tama tialima, ena te God, nago alta sai teba paibao.  
Magi baso meni, nago ena wiegi yai  
haliga iliyu, te pemene ilibo dao.  
Nage eno God da, te eno gita selama, te musik weyu,  
tama nago nogi ugwaba sabo tęąbi po naga waibao.
- 5 Magi baso ena haliga seęę sesemane sogo elalubawe?  
Magi baso eno haliga dwai midigi sobawe?  
Eno konealubo homu Godiba daę weyu,  
tama te agai ena tau sabo tonalueibao.

Aga te eno God da, tama ena tau sabo dao.  
Tama tiyu, eno aga nogi ugwaba ma saibao.

## Salmo 44

*Te Kora hani dabego aęani balia po me deli dao.*

**Te Israel dabego te Godigo augwali tau somainu hanalu wali**

- 1 God, te dago wai nõ dabego te nago  
polobadu bomai se yali po te dabolo pusali,  
te augwali tõde bidali sogo.  
Tama dena digi te po wabo odai dao.
- 2 Nago digi te Israel hani isawai bage  
te augwa tõde sela sanama,  
tama nago te tõ te da Israel bagego  
wai nõ dabeba mani,  
tama augwali tede bomo elalu bidali.  
Nago te gasa hani dabego yali  
dwai kolesaga wei ponani,  
tiali goli nago te dena wai nõ dabe  
te bugagia bidimainu elama,  
tama hauwa umabo we bidi pedalumainu yai dao.
- 3 Te wai nõ dabego hwiani,  
tiali goli augwaligo te tõ te hwinama me sabeo.  
Te augwa digi augwa bomogo te hwibo tau selama,  
te boi bidi aiyaba me elalubeo.  
Menio. Nago augwali wei mu yali,  
tama tiyu, nage augwali dali bidiyu,  
tama augwaliba ula mani.  
Tama nago bomogo digi te boi bidi  
aiyaba elalui dao.
- 4 Nage eno king me eno God dao.  
Nago po obaso, tama te Jekopgo hanigo  
te boi hwibode  
te boi bidi dabe aiyaba elalubo dao.
- 5 Te nago bomogo naga dago  
te boi bidi dabe sela sayu ebo dao.  
Mu tama, nage da dali bidiyu,  
tama dago te da dali hwibo bidi dabe  
aiyaba elaluyu, sağago agabo dao.
- 6 Eno enesigi me ene elalubao,



tiali goli eno homugo eno te hwɨbode  
te nai dabego ena tau sabo homu me ebeo.

Eno te bobobage bainat hwɨ elalubao,  
tiali goli tego me ena te hwɨbode tau me sogobeo.

7 Menio. Nago naga da tau sobaso,  
tama te boi bidi dabego da aiyaba me elalubeo.

Te bidi dabego da wei me isɨbadi,  
tiali goli nago augwali dali hwɨnama,  
tama nago augwali aiyaba elaluai dao.

8 God, sesemane sogo dago nago nogi ugwaba sobao.  
Tama dago nageba usu da weyu,  
geda haluasa po sesemane sesemane sogo wabo da.

9 Tiali goli, megi da, magi yaliwe?  
Nago da tudiba munama,  
tama nago dago nogi aiyaba muani.  
Tama nage te dago ami bidi dabe dali  
te hwɨboba me pabeo.

10 Nago tama tibaso,  
tama da te boi bidi dabede wi sobadi,  
tama augwaligo te dago doado bage salio.

11 Nago da te augwaligo ela muabo  
kibu sipsip tiwai pedalumainu ilali.  
Tama nago da te dena tɔde bidali sela sɨbaso,  
tama da tedela pelama, te gasa hani bage tomoba  
bidigi pai dao.

12 Nago te naga we bidi te gasa haniba tagala palama,  
tama nago augwalide dwasianu mone mu sai.  
Nago te augwalide gasa ugwadu  
daganobo profit mone me sabeo.

13 Nago dade te tiwai yali,  
tama te da pɨde bidali hanigo  
te posobo po daba wali.  
Te we bidi dabego dwai gisugu mayu,  
tama dabolo hale ebo po wali.

14 Nago te hani bage dabe homu hodolubaso,  
tama augwaligo dago nogide hale yabo po wabo dao.  
Te daba pedalubo sɨde augwaligo  
dwai gisugu mabo sɨ ebao.

15-16 Te bidi dabego posobo po,  
me dwai po enaba wali,

tama te boi bidigo me te bidi dabego  
 te dwai sę enaba wei ponobo eno suali.  
 Tama ena sesemane sogo homu sęę  
 elalu, tama ena hale mu yai dao.

- 17 God, dago nage homu kone palubo  
 me gegeda palisiąyu,  
 tama dago nago daę walali bomai po  
 te me sela sąyu ebeo.  
 Tiali goli, te sę dabe daba pedalubao.
- 18 Dago nage tudiba me musiąyu,  
 tama dago nago sunumi wali asobo me tagalubeo.
- 19 Tiali goli, nago da te uni hasa dabego  
 pesagede dolomainu ebao.  
 Tama nago da te be hulua sai dwai  
 madi mu te mesegelibo tiwai ebao.
- 20 Dago God, te dago nageba homu kone me isiąyu,  
 tama dago te tibo godiba  
 gedu haluasa po obaso da, teda nago koneaibao.
- 21 Nago te bidi dago haligade geme elalubo homu  
 te tigidali konea pai elalubo dao.
- 22 Dago te nage naga wali pobaso,  
 tama te tigidali sogo augwaligo da ela mubo dao.  
 Augwaligo homugo te da  
 ela muabo sipsip tiwai homu naga ebo dao.<sup>p</sup>
- 23 Genuai Bidio, nage hodalua.  
 Magi baso nage pila mubawe? Nage hodalua.  
 Nago te sesemane sogo da tudiba mudamuo.
- 24 Magi baso nage dade geme duala sobawe?  
 Te bidi dabego da dwai mu ilama,  
 tama da te genuai sęę mu tolobao.  
 Nago dago te sęęde homu kone me gegeda paligio.
- 25 Da te tęba tula munama,  
 tama dago tigi te isai bidigo tigi  
 pila mubo tiwai elalubao.
- 26 God, nage hogodama, te da tau sagasao.  
 Te nago da godolo ebo kolesaga te me elalua paibao.  
 Tama nago tede homu koneama, tama da ma sobaso da,  
 teda da me isigobeo.

## Salmo 45

*Te Kora hani dabego aęani balia po me deli dao.*

**Te kingo we sabo sogo wabo tęąbi po**

- 1 Te wiegi yai po hauwa eno homude elalubao.  
 Eno te tęąbi po aęnama,  
 te kingba mawainu yali.  
 Eno pedauwali da, te wiegi yai kuskus  
 bidigo te po aębo hoda pen tiwai dao.
- 2 King bidi, nage te gasa sawi yai bidi mu dao.  
 Te gasa bidi nage tiwai me menio.  
 Nago po te wiegi yai naga elalubo.  
 Tama te sesemane sogo Godigo nageba  
 te wiegi yai homu ebo yai.
- 3 Nage te bomai king da.  
 Nago au dobage te hauwa elalubao,  
 tama nago genuai nogi te ugwanu mu yai.  
 Nago te bainat hwą dią selama, te hwįabo sisi elaluao.
- 4 Nage te genuai nogi elalu, te polalubo king dao.  
 Nage te hosde dugulasa, tama te hwįboba pelama,  
 tama te hwįbo bage aiyaba elaluao.  
 Nago hwįainu da, te bidi dabego  
 nago po te aiyaba me elalugobeo.  
 Tama nago hwįbo te bidi dabe dolasa  
 bilimainu tau siyu hwįani.  
 Te nago hwįbo te bomo yai pedelaibao,  
 tama te dwai bidi dabe nagede  
 wi mu emainu ebo dao.
- 5 Te nago ene dabe te mu poa pelama,  
 tama te boi bidi dabe mu eneyu ebo dao.  
 Nago hwįyu, te gasa hani dabe aiyaba elaluama,  
 tama augwali te nage dologode bidibao.
- 6 Godigo nage te king nigilama,  
 tama nage te king sesemane  
 bidada peyu, bidada paibao.  
 Nago te naga we bidi dabe  
 te doloba pai kolesagade naga tonalubo dao.
- 7 Nago te doloba pai kolesaga wei eyu,  
 tama nago te dwai kolesaga te  
 wei isiąyu, hagela mu ebo dao.  
 Tama tibaso, naga Godigo digi, agai te nage sa muyu,

- tama agai nago nogi ugwaba mu muyu,  
 tama nago nogi te gasa king dabego  
 nogi aiyaba elalubo dao.<sup>9</sup>
- 8 Te nago gudubo bobage ugwade  
 te wiegi yai denami ebo haniani nai,  
 te sanda tiwai mea, me kasia te denami elalubao.  
 Augwaligo te kingo be te haniani  
 au ilibo naigo te au ilali,  
 augwa te elefan kelego nigali,  
 tama augwa te nage wiegi yai homu  
 pemene ilibo musik weyu ebo dao.
- 9 Te gasa tų pedai kantri tonalubo king  
 dabego wegi dabe,  
 te genuai nogi elalubo we dabe dali,  
 te nago bede bidibao.  
 Kwin we te nago dolo nogo badu dolalubao.  
 Augwa te bulu Ofirde sali wiegi yai  
 golgo nigai au ilibo naigo  
 te agai au elama, bidibao.
- 10 Nage te gesi wegi te king dali bidi painu,  
 nago te eno po odolama,  
 tama tede homu kone palao.  
 Nago te naga bulude bage  
 te homu kone ebo gegeda palama,  
 tama naga deli kaneme bage me  
 te homu kone ebo tagalao.
- 11 Nago tama tebo te kingo subaso da,  
 te nage sawi yai we da weyu,  
 tama te nage godolo mu yaibao.  
 Aga te nago genuai bidi da,  
 tama tiyu, nago agai po wali pao.
- 12 Te Tair bulu we bidi augwaligo  
 te nageba wiegi yai homu ilibo nai dabe sesaibao,  
 tama te mone hauwa elalubo  
 bidi dabego me te nageba  
 wiegi yai homu ebo nai dabe mawaibao.
- 13 Te kingo gesi we te aga be habude bidibao,  
 tama aga te gasa sawi yai mu.

---

<sup>9</sup> 45:7 Hib 1:8-9

- Agai te ugwa augwaligo te nigilama,  
tama te golgo nigai hobigo au ilai ugwa muai.
- 14 Agai te ugwa kala te dodobolo pali  
te hauwa elalubao.  
Megi da, augwaligo te we te kingba odasa pobao.  
Tama te gesi wegimani te aga hai namu dabe  
augwali te aga wali pali.
- 15 Augwali te wiegi yai haliga pemene elama,  
tama augwa te kingo wiegi yai  
genuai be tomoba palio.
- 16 Tama king, nago da, te nago wai ogwa  
te hauwa elaluaibao,  
tama augwaligo te nago wų̄ nų̄ dabe  
bidali pesage hasegeliyu,  
tama king dabe pedelaibao.  
Te nago augwaliba genuai namba mayu,  
tama augwaligo te tigidali bulu  
tų̄ pedai we bidi dabe tonaluaibao.
- 17 Te nago genuai nogide po eno hanilama pusuyu,  
tama te nosali pedalubo hani tigidaligo  
te nage sesemane sogo homu kone paibao.  
Tama tiyu, te me badu we bidi dabego  
te nago nogi sesemane sogo  
ugwaba siyu yaibao.

## Salmo 46

*Te Kora hani dabego aşani balia po me deli dao.*

### God da dali bidibao

- 1 God aga te da seselalubo bidi da, tama agai  
sesemane sogo da bomu mabo dao.  
Aga te pade bidiyu,  
te dago genuai seęę sabo sogo  
tau sainu sisi elalubo dao.
- 2 Tama tiyu, te haniani seę dabe pedalubo side,  
te dago wi me elamuo.  
Tų̄ te mali eyu aluaibao, tama te bulu du dabe te  
tamu aų̄ tomoba degasa dulaibao.
- 3 Tama genuai tamu aų̄ te bomonama, kulukulu weyu,  
tama pepeda pelama, tama te dini pedaliyu,

tama genuai tamu ąi bęi samanu,  
 tama te bulu du dabe degelaibao.  
 Te tobage genuai sę pedalięi sogo da,  
 teda da wi munu me igi meni.

4 Te Godigo hanu da, te magi dwai sę meni yai  
 wiegi yai bulu,

te Ugwadu Mu Bidibo Godigo hanu dao.  
 Te genuai soabo wę me deli te tomode elalubao,  
 tama te węde te we bidi dabego  
 wiegi yai pemene ebo dao.

5 God te taunde bidibao,  
 tama tiyu, te taun munu me dologobeo.  
 Te be posiąbadi, tama te Godigo aga tau saibao.

6 Te haniani tę pedai kantri we bidi hani dabe  
 augwali dwai midigi selama,  
 tama hwięyu dali yai, tama te king dabe dali,  
 te augwa we bidi dabe me,  
 te augwali dolaibao.

Godigo genuai po dąę mu obaso,  
 tama tę te olo wę tiwai pedelaibao.

7 Te Tigidali Bomo Elalubo Genuai

Bidi aga te da dali bidibao.  
 Te Jekopgo God aga te dago duala sabo pesage elalubao.

8 Ae, tegobao!  
 Dagego te Genuai Bidigo yali sę suagasao.  
 Te dagego haliga te agai  
 te tęde gasa tobage bomai sę hauwa  
 ebaso, midigi saibao.

9 Agai te tigidali tę pedai badu  
 te hwiębo togolobo dao.  
 Agai te tigidali enesigi me ene togolama,  
 tama te sabele dabe te siaba ulubadi ebo dao.

10 Agai te po wai,  
 "Dage munu ma hwięnamuo," wali.  
 "Dagego ena bugagia koneiąo, ena God mu dao.  
 Ena ugwadu mu elalu,  
 tama te tigidali tę pedai kantrigo  
 we bidi hani dabe ena dologode bidibao.  
 Te tigidali bulu pedai tęde

ena te polalubo bidi bidibo dao.”

11 Te Tigidali Bomo Elalubo Genuai

Bidi da dali bidibao.

Te Jekopgo God aga te da seselalubo bidi mu da.

## Salmo 47

*Te Kora hani dabego aseḗani balia po me deli dao.*

**God te tigidali tḗde we bidigo king bidibao**

1 Dage tigidali we bidi,

te wiegi yai pemene elama, nogo elao.

Dagego wiegi yai pemene ebo i weyu,

tama Godigo nogi ugwaba sabo teḗbi po wao.

2 Dago te Genuai Bidide wi yao,

aga te Ugwade Mu Bidibo God dao.

Agaga te tigidali tḗde we bidi tonalubo polalubo king dao.

3 Agai te tigidali Israel hani isḗwai we

bidi aiyaba elaluama,

tama da Israel bage te augwali daide

ugwadu bidibao.

Agai te gasa hani dabe te da dologode bidimainu ilali.

4 Godigo digi te tḗ me deli daḗ ilama,

tama dabolo mawai dao.

Da te Jekopgo hani da, Godigo da godolo mu eyu,

tama dago te dena tḗde wiegi yai pemene ebo dao.

5 God te dagaluba pali.

Te Genuai Bidi ugwaba holali sogo,

te we bidi dabe wiegi yai homu pemene elama,

tama bomonama i weyu,

tama biugel bu weyu dali yai.

6 Ae, tegoba, dago te God nogi ugwaba sabo

teḗbi po hodolama, waiḗo.

Dago te teḗbi po hodolama weyu,

tama agaba wiegi yai pemene inao,

aga te dago king dao.

7 God te king bidiyu, tama tigidali tḗ pedai tonalubao.

Dago te aga nogi ugwaba sabo teḗbi po wao.

8 God te king bidiyu, te tigidali hani we bidi tonalubao.

God te aga sia kingde dulaluyu,  
 te aga magi seḡ meni yai wiegi yai mu bidibo dao.  
 9 Te haniani we bidi hanigo te tobolu bidi dabe  
 augwali te Abrahamgo God  
 wali pabo we bidi dabe dali sisinama, bidibao.  
 Godigo bomogo te tigidali ami  
 dabego bomo aiyaba elalubo dao.  
 Aga te polalubo king dao.

## Salmo 48

*Te Kora hani dabego aseḡani balia po me deli dao.*

**Saion taun te genuai nogi elalu, te au wiegi yai elalubao**

- 1 Genuai Bidigo genuai nogi elalubao.  
 Da te Godigo bulu duba holinao,  
 tama agai taun tomoba pelama,  
 tama dago agai nogi ugwaba mu sinao.
- 2 Godigo te bulu du te wiegi yai mu,  
 tama te ugwanu mu elalubao.  
 Te tigidali tḡde we bidi augwaligo  
 te Saion bulu du godolo mu ebo dao.  
 Te bulu du te not badu elalubao,  
 tama te polalubo kingo taun dao.<sup>r</sup>
- 3 God te taun tomode bidiyu,  
 tama agai te we bidi dabego  
 hwḡbo sogo tau siyu yai.  
 Tama tiyu, augwali bugagia bidai.
- 4 Polobadu te king dabego te Saionba hwḡgi painu yai.  
 Augwali te deliba sisinama, tama te taun paḡa asai.
- 5 Tiali goli, augwaligo te taun sulama,  
 tama augwali polo tama dwai midigi sali.  
 Tama augwali wi umabo mu ebaso,  
 tama augwali wi pai dao.
- 6 Augwali te dwai noma mu selama,  
 tama augwali genuai dene sali,  
 te wego wai ame nayu ebo dene tiwai gilama yai.
- 7 Godigo te genuai wali  
 te giliga asobo badu asomainu elama,

<sup>r</sup> 48:2 Mat 5:35



tama te Tasis hanu bidi dabego  
 genuai sip dabe dolali.

8 Te sę te polobadu Godigo yali po odolama,  
 tama megi dago subo me agai te tiwai ma yai.  
 Da te Genuai Bidigo taunde bidibao.  
 Dago God, te Tigidali Bomo Elalubo God dao,  
 tama agai te sę ebo dago suai.  
 Godigo te aga taun daę walama,  
 tama te taun sesemane sogo  
 elalua pomainu yai dao.

9 God, da te nago tempel bede bidibao,  
 tama dago te nago da sesemane  
 godolo ebo kolesagade te homu kone palubo dao.

10 Te tigidali tę habu badu  
 te we bidi dabe augwaligo  
 te nago nogi ugwaba sabo dao.  
 Te tigidali habu badu we bidi dabego  
 te nago genuai nogide wiegi yai pemene ebo dao.  
 Nago te tigidali bage te doloba pai kolesagade naga  
 tonalubao.

11 Tama tialima, te Saion bulu dude  
 bidibo we bidi tigidaligo te augwa  
 wiegi yai pemene yao.  
 Nago te tigidali we bidigo ebo kolesaga  
 te dolo dagalubo dao.  
 Tama tibaso, eno homugo te Juda taun we bidi dabe  
 augwa te wiegi yai pemene mu emainao.

12 Dage we bidi, dage te Saion bulu dude biliyu,  
 tama te taun obo baguliyu,  
 tama tede elalubo bobobage be taua dabe nedao.

13 Dagego te Saion bagulali  
 obode bugagia homu kone palao,  
 tama agai te bomai be dabe bugagia suięo.  
 Tama tiyu, dagego te nosali pedalubo  
 hani dabeba te po pusagameo.

14 Dagego augwaliba te tama waiyagameo,  
 “Te Godigo da tonaluai da,” po wao,  
 “Aga te dago sesemane sogo  
 bidada peyu, bidada pabo God dao.  
 Tama sesemane sogo te aga poligi soyu,

tama dabolu te sunumi ola mawaibao,” te po wao.

## Salmo 49

*Te Kora hani dabego aęani balia po me deli dao.*

**Bidigo homu masigi dali, genuai walu dali, teba  
homu mubo bidi, te bidigo kolesaga menio**

- 1 Dage tigidali we bidigo, odao.  
Dage tigidali tęde bidibo we bidigo,  
eno wabo poba olo bugagia muao.
- 2 Dage nogi yai bidi me, dage olo bidi me,  
dage masigi hauwa munalubo bidi me,  
dage magi nai meni yai bidi me,  
dagego te po odao.
- 3 Eno homu kolesagade wiegi yai kolesaga koneama,  
tama eno dwagi yai po dagego  
konemainogo pusubao.
- 4 Eno po digi po begelama, hasia meba pusaibao.  
Tama eno dwagi yai tęąbi gita dali elama,  
tama dagebolu te po begelama wali po page pusaibao.
- 5-6 Bidi dabe augwaligo masigi hauwa munalubo,  
te homugo augwali dąą omai te homu elama,  
tama augwa digi genuai po dąą ola bilibo dao.  
Augwaligo nai hauwa munalubo homu elama,  
te bidi dabe augwaligo ena dolainogo bobegelali.  
Tialima, eno augwali dali wi egobeo.
- 7 Dago koneai, bidi mego aga masigigo  
aga digi aga ma abelama, ma dobola sabo menio.  
Tama agai Godibolu aga bidabo ula abeliyu,  
mone masigi Godibolu magobeo. Mu menio.
- 8-9 Bidigo mone masigigo God abelama,  
tama Godigo aga te bidibo ulade bidao omainogo,  
tama aga isidali weyu,  
dago tama tiali usu munu me egobeo.
- 10 Da tigidaligo koneai, kolesaga  
koneai bidi, augwali me isibo dao.  
Tama dwai kolesaga ebo bidi,  
te kolesaga meni yai bidi me, augwali isibo dao.  
Te bidi dabe augwaligo walu me  
mone masigi tigidali nai isu, taga peyu,

- tama gasa bidi dabego te nai sabo dao.
- 11 Hasia te bidi dabe augwaligo tọ me elalui,  
tialima megı te gų page augwaligo tọ tiwai elama,  
augwali tede sesemane sogo bidada peyu,  
bidada pabo dao.
- 12 Dago genuai nogi sabo tego dago  
te isibo tų daų wagobeo. Menio.  
Da te hasa dabe isibo tiwai yaibao.
- 13 Te sę ebo te bidi dabe augwa digi  
tọde tigidali nai homugo  
daų wabo bidide pedelebo dao.  
Tiwai bidi dabego dwagi yai homu kolesaga menio.  
Te bidi dabe augwaligo e tọde tigidali nai  
dali osogo dwagi yai elama, tama augwali isibo dao.
- 14 Godigo agai bodolu muyu,  
augwali te kibu sipsip isibo tiwai elama,  
augwali te isali bidigo buluba paibao.  
Tama te isibo tego augwali tonalubo bidi tiwai bidai.  
Augwaligo tigi tigidali polo damua pabo si,  
tama augwali te isibo bidigo bulude  
augwaligo be tiwai elama bidaibao.  
Tama te dwagi yai doloba pai we bidigo  
augwali aiyaba elaluama, tonalueibao.
- 15 Tiali goli, Godigo ena ma saibao,  
tama isibo bidigo bulude  
te agai bomogo ena daų wabo usu egobeo.
- 16 Niwai bidi me agai masigi hauwa selama,  
tama genuai be sęnama,  
tama te bede dwagi yai nai hauwa elalui,  
tagalao, nago te nai sulama, godolo igio.
- 17 Nago koneai, nosali te bidi aga isibode,  
tama agai te tigidali nai me sela pogobeo.  
Be me, te au ebo nai me, masigi me,  
te nai tigidali aga dali te isibo bidigo buluba  
selasa pogobeo.
- 18 Tama aga e tọde bidibo sogo  
te bidi agai te tigidali nai dali dwagi yai homu yai.  
Agai sę bomo elama, nai hauwa sai,  
tama bidi augwaligo te po wai,  
“Aga dwagi yai bidi dao.”
- 19 Tialima, aga isilama,

tama te hasia isali wąi dabe  
 augwali dali te giliga ula isąwai bulude bidada peyu,  
 bidada paibao.

- <sup>20</sup> Dago genuai nogi siyu da,  
 tego dago isibo tų daų wagobeo.  
 Menio. Da te bulu hasa dabe isibo tiwai yaibao.

## Salmo 50

**Godigo te we bidi dabego kolesaga dagalaibao po wai.**

- <sup>1</sup> Te Tigidali Bomo Elalubo God,  
 aga te dago Genuai Bidi da,  
 megi da agai po weyu, tama te giliga pedaluboba,  
 me te giliga dega siguluboba  
 usu nama, te tigidali we bidiba i obao.  
 Agai te tigidali bulu tų we bidiba i wabo dao.
- <sup>2</sup> God te Saionde bidiyu,  
 te taun te polalubo taun mu,  
 tama te gasa sawi yai mu elalubao, tama Godigo ula  
 te pepeli diliba pedelali.
- <sup>3</sup> Dago God aga megi da te asobao.  
 Tama pedauwali me pania sabeo. Mu menio.  
 Te tigidali nai dabo sia bogoli  
 te aga asobodu polasa paibao,  
 tama genuai wali me, tulubagego me,  
 aga bagulama, elalubo dao.
- <sup>4</sup> Agai te dagalu me tų asomainu i olama,  
 augwali sigo agai te aga we bidi dabego ebo  
 kolesaga te bugagia dagalobo suagasamainu eyu,  
 agai augwali si i obao.
- <sup>5</sup> Godigo te tama po obao, “Te eno we bidi dabe,  
 dagego ena dali te bomai po daų walali,  
 tama dagego te daų walali po daų waliyu,  
 te kibu hasa dabe ofa yai.  
 Dage te ena dali deliba sisinagasao,” po wai.
- <sup>6</sup> Te dagalugo digi te tama po obao,  
 “God te doloba pai mu dao.  
 Aga digi te po tų odobo bidi jas bidibao,” wabo.
- <sup>7</sup> Godigo te po wali, “Dage te eno we bidi da, odao.

Eno po elalubao.

Dage Israel dabe, eno dage po tų ilaibao.

Ena naga, ena te God mu da,  
tama ena te dagego God dao.

8 Eno te dagego yali ofade  
te eno dageba wado po weyu me wabeo. Menio.

Te sesemane sogo dagego te ofa  
te siaba tigidali ulubo te eno suai dao.

9 Tiali goli, eno te dagego obo tomode  
te omai bulmakau, me ma meme omai te dagego  
ofade sabo homu ebo meni.

10 Magi baso meni, te tigidali buside bidibo uni hasa,  
tama te tigidali bulu dude bidibo bulmakau me,  
te tigidali te eno naga dao.

11 Te tigidali ba, me te busi hasa dabe  
me, te kala nosa bulude bilibo ba sibi me, te tigidali  
eno muai nai naga dao,”

Godigo te po wai.

12 “Ma, te ena nasi ebaso,  
te eno dageba po me wagobeo.  
Magi baso meni, te tų dali, tigidali elalubo nai,  
te eno naga dao.

13 Te eno omai bulmakau mi tubo  
homu ebawe?

Eno te meme kaneme tubo homu yaiba, agawe? Menio.”

14 “Te dagego enaba usu da mu waiya,  
tebo te dagego yabo ofa tiwai tama.  
Te dagego te enaba olo mabo  
tigidali nai maiyabo po wali,  
te Ugwadu Bidibo God Mu te enaba dagego maiya.

15 Dagego tama tibo si,  
tama te seęę pedalubo sogo, dagego enaba i waiya,  
tama te eno dage tau mu siyu,  
tama dagego eno nogi ugwaba sgameo,” po wali.

16 Tiali goli, Godigo te dwai seę ebo  
bidi dabeba te tama po wali,  
“Magi baso te dagego eno bomai po  
tigidali nogibo dawę?  
Tama magi baso te dagego eno daų wali bomai pode  
te po mibo dawę?

- 17 Te eno dage dodolobo te dagego hagela homu eyu,  
tama dagego eno po sesemane sela sębo sę ebo dao.
- 18 Dagego te nai wi sabo bidi dabe sulama,  
tama dage augwa abagi pedelali.  
Tama dage te we sabo sę dolama,  
tama te penani sę ebo we bidi dabe  
dali munasa, biliyu yai.
- 19 Dagego te dwai po,  
me te tibo po sesemane sogo wabo sę ebo dao.
- 20 Tama dagego te duga ama dabe  
po tų ilibo sę eyu,  
tama dagego augwaliba te posobo weyu ebo dao.
- 21 Dagego te tiwai yali,  
tama eno po deli me wabeo.  
Tama dagego te ena te dage  
tiwai tobage da homu yai.  
Tiali goli, mu menio.  
Megi eno dageba wado po olama,  
tama dage te pepeli diliba sela munama,  
te po tų ilaibao,” wali.
- 22 “Te ena tudiba mubo we bidi, dagego odao.  
Te dage te tiwai tama bididubaso da,  
teda eno dage dolaibao, tama te bidi me deligo dage  
ma sainu ebaso, te usu me egobeo.
- 23 Te enaba usu da weyu, gedu haluasa po weyu,  
te enaba ofa mabo tiwai ebo bidi,  
agai te eno nogi ugwaba sobao.  
Tama eno te po wali pabo bidi dabe  
te eno ma dobola saibao,” po wai.

## Salmo 51

*Te Devitgo aęani balia po me deli dao. Agai te gasa bidigo we nogi Batseba dali penani yai, tama te profet bidi Natan aselama, “Nago dwai sę yalio,” te tobage po wali. Tama Devitgo ge neyu, e balia po weyu aęani.*

*2 Samuel Dąj 11, 12:1-15 suao.*

**Bidigo gedu haluasa po Godibolo weyu da, te bidigo sęęę sela sęwaibao**

- <sup>1</sup> God, nage hobede ebo page bidi,  
nago ena olo mabo sęgo ena tau sao.  
Nago olo mabo sę hauwa mu elalui,

- tama eno homugo nago eno  
dwai kolesaga tigidali sela sayao.
- 2 Nago ena tigidali aḗ telayao,  
tama dwai kolesaga enade ma elaludalio.  
Eno seḡeḡ sela sanama,  
ena dwagi yai pedelama bidaio.
- 3 Eno koneai, eno dwai seḡ yai.  
Tama ena yali seḡeḡe eno homugo konealubo tagalobeo.
- 4 Eno dwai seḡeḡ nage deli dali naga yai.  
Eno dwai kolesaga nago gedude yai.  
Tama nago ena po tuḡ ela menama,  
tama nago doloba pai kolesaga naga yao.  
Nago eno seḡeḡ wei siyu, tama nage da,  
dwai seḡ isiḡwai bidi.<sup>s</sup>
- 5 Nago koneai, idago ena ame nani sogo,  
ena dwai seḡ ebo bidi pedelai.  
Mu tama, ena idago haligade bidibadi,  
ena seḡeḡ sai bidi dao.
- 6 Nago homugo te eno nage dolo naga wali asiyu,  
tibo kolesaga igio homu ebao.  
Tama tibaso, nago ena dwagi yai  
homu kolesaga ola mao.
- 7 Nago eno seḡeḡ sela sanama,  
ena meda meni yai pedelaio.  
Nago ena aḗ tedelama,  
ena meda isiḡwai mu pedelaio,  
tedela yai kedau ebo nai sno te tiwai pedelaibao.
- 8 Nago eno homu dwagi yai ma ilao.  
Mu tamao, nago ena aiyaba elaluai,  
tama nago eno seḡeḡ wei ponai,  
tialima, megi eno dwagi yai homu ma yaibao.
- 9 Nago eno dwai seḡ yaliba ma tonono igio.  
Tama eno homugo nago eno dwai seḡ yali  
te nago tigidali sela sayao.
- 10 God, nago eno homu kolesaga  
tomode meda meni yai dwagi yai  
gesi kolesaga ilibo seḡ ma yao.  
Awe, ena nage dali homugo keḡ pai bidi  
pedalumainu yao.

---

<sup>s</sup> 51:4 Rom 3:4

- 11 Nago ena sela sayu,  
tama ena nage digibulu bididalio.  
Nago ena dali bidibo mobo bidi naga ma sidalio weyu.
- 12 Polobadu nago ena ma sobaso,  
te ena dwagi yai homu yai, nage dali.  
Tama megi eno te homu yai,  
nago ena te dwagi yai homu  
kolesaga enabolo ma mao.  
Nago eno homu kolesaga hodolama,  
tama nago po eno wali paibao.  
Eno tama homu kolesaga emainogo  
nago ena dą walagameo.
- 13 Tama eno nago kolesaga  
te seęę sai we bidi augwalibolo ola mawaibao,  
tama te we bidi augwali  
nage bidibo digi ma asaibao.
- 14 God, nage te God nago ena ma sabo bidi dao,  
nago ena dali olo mabo seę tigidali dwagi yai eyu,  
tama nago ena ma elegio.  
Tama eno nago nogi ugwaba siyu,  
nagebolo tęąbi hauwa waibao,  
nago doloba pai kolesaga naga ebo dao.
- 15 Genuai Bidi, nago ena tau siyu,  
mu po dolo hanilama, enabolo wao,  
tama eno nago nogi ugwaba saibao.
- 16 Ma, te nago eno yali dwai seę sela sąmainu eyu,  
eno te kibu sipsip nagebolo ofa mobaso,  
nago sogobeo.  
Nago te sabo homu igi sogo da,  
teda eno te ofa magasigi da.  
Eno kibu sipsip me elama, siaba ulama,  
tigidali mu dela peyu da,  
te nago te ebo seęde dwagi yai homu egobeo.
- 17 Tialima, God, ena digi ena aiyaba elaluama,  
nage dologode ena bidaibao.  
Te tobage kolesaga ebo da,  
te nago gedude te nago sabo ofa mu tiwai dao.  
Eno koneai, bidi aga yali dwai seęde aga ma koneyu,  
aga digi aga aiyaba elaluai magi basowe?  
Aga te yali dwai seęde homu dene eyu, tebo dao.



Te tobage kolesaga ebogo te nagebolo ofa mabo se  
hasegelama, te nago gedude te usu mu dao.

- 18 Naga homu kolesagago digi,  
te Saion we bidi dwagi yai homu ma ilao.  
Naga digi Jerusalem genuai hanu  
moni masigigo nigali obo ma dodolao.
- 19 Tama te sogo nago dwagi yai doloba pai  
te usu da olama, ela mabo  
kibu sipisip ofa nago godolo yaibao,  
tama meba siago tigidali dela pabo nai dabe.  
Tama dago bulmakau omai selama,  
nagebolo usu da olama, siaba tigidali ulama,  
tama siago tigidali dela paibao,  
te nagebolo nai ula ofa mabo  
sawali sai altade te se yaibao.

## Salmo 52

*Devitgo te balia po aseani, te dago homu konemainogo yai. Hasia bolo te  
Idom bidi Doek te Solba pelama, tama agabolo te tama po walali, "Devit  
te Abimelekgo bede bidibao," po wai. Tama tede Devitgo homugo ma kone  
palama, te balia po aseani. 1 Samuel 21:7, 22:9-10 tede elalubo po suao.*

**Te dwai kolesagade wiegi yai pemene ebo bidi,  
aga te wabo pabo bidi tiwai ebao**

- 1 Nage te bomai bidi, te magi baso nago  
te genuai po daęę weyu,  
tama nago te Godigo we bidi  
augwaliba dwai kolesaga elama,  
tama tede nago odolali te wiegi yai homu  
pemene ebo dawę?
- Te sesemane sogo Godigo te olo tau sabo  
wiegi yai kolesaga augwaliba ebo dao.
- 2 Nage te tibo po wabo bidi da,  
te nago po te resa te mu poa pai tiwai elalu,  
tama nago po wabogo te gasa bidi dolobo dao.  
Tigidali side nago te gasa bidi dolabo homu elalubo dao.
- 3 Nage te wiegi yai kolesaga wei me isięyu,  
nago te dwai kolesaga naga wei ebo dao.  
Nago te mu po wabo kolesaga wei meni yai.

- Nago te tibo po wabo kolesaga naga wei ebo dao.  
 4 Nage te tibo po wabo bidi dao.  
 Nago te gasa bidi dolabo homu ebo  
 po wei mu ebo dao.
- 5 Tiali goli, odao.  
 Godigo te nage mu doloyu,  
 tama nage te tiwai elalua paibao.  
 Agai te nage pageabi elama,  
 tama naga bede te nage sela sąwaibao.  
 Tama nage mu sia somainu ilama,  
 tama nage te tęde ma bidimainogo me elalugobeo.
- 6 Te doloba pai bidi dabego te tiwai  
 pedalubo sulama, te augwali wi yaibao.  
 Te augwaligo nage gisugu mayu,  
 te tama po waibao,
- 7 “Suao. Te bidi te Godigo aga  
 tau sabo homu wei isiąyu,  
 te aga daą me walobeo.  
 Agai te aga mone, me doado bage  
 hauwade teba homu munama,  
 tama aga homugo te dwai kolesagago  
 aga bugagia bidimainu ilaibao,  
 te homu yali,” te po waibao.
- 8 Tiali goli, eno te tiwai me ebeo.  
 Ena te Godigo be paęde elalubo ni oliv tiwai dao.  
 Eno konealubo homu Godiba munama,  
 te Godigo olo tau sabo wiegi yai kolesaga te  
 sesemane bidada peyu,  
 bidada pabo sogo te enaba  
 te kolesaga emainu ebo dao.
- 9 God, nago ena tau sali, tama tiyu, eno sesemane sogo  
 nageba usu da weyu, gedu haluasa po wabo dao.  
 Tama te nago we bidi dabego gedude  
 te eno nago nogi ugwaba siyu,  
 tama eno te po waibao,  
 “Godigo te wiegi yai kolesaga enaba  
 ebo da,” po waibao.

## Salmo 53

*Te Devitgo aṣani balia po me deli dao.*

**Te kolesaga geda mubo, me te dwai ṣe ebo  
bidi dabego kolesagade po wai**

- <sup>1</sup> Te kolesaga meni yai  
dwai ṣe ebo bidi dabego  
augwa digi te tama po wabo dao,  
“Te God me bidibeo,” wabo da.  
Te bidi dabe te augwali bidi dwai naga dao.  
Augwaligo kolesaga te dwai mu ebo dao.  
Te bidi me deligo wiegi yai kolesaga me ebo menio.  
Mu menio.
- <sup>2</sup> God te dagalude bidiyu,  
te we bidi dabe bidalubo madi aiyaba tonalubo dao.  
Agai te kolesaga koneai bidi me deli gegeyu,  
te God gegebo ṣe ebowe naga suainu tebo dao.
- <sup>3</sup> Tiali goli, menio.  
Tigidali mugo te sunumi tagalalio.  
Tigidali te deli tobage tiwai naga elalubao,  
augwali te dwai bidi dabe mu elalubao.  
Te bidi me deligo wiegi yai kolesaga  
me ebeo. Mu menio.<sup>t</sup>
- <sup>4</sup> Godigo te tama po wali,  
“Te bidi dabego te dwai kolesaga ebao,  
te augwaligo kolesaga koneai me  
elalubo homu meni da, agawe?  
Augwaligo te eno we bidi dabe  
te augwaligo te bret tubo  
tiwai gilama te mu silibao.  
Tama augwaligo enaba gedu haluasa  
po wabo menio,” wali.
- <sup>5</sup> Tiali goli, te augwali wi umabo mu yaibao.  
Polobadu augwa te tiwai wi me ebeo.  
Mu menio. Magi baso meni,  
te Godigo dagego boi bidi tigidali silimainu yaibao.  
Agai augwali ela munama,  
tama agai augwaligo dili dabe ṣa ṣa paibao.

<sup>t</sup> 53:3 Rom 3:10-12

6 Eno homugo Godigo te Saion  
 bulu bidi me deli tagala palumainu elama,  
 te Israel dabe ma sagasomainu homu yai.  
 Nosali Godigo te aga bage tau selama,  
 tama augwali bugagia ma bidimainu yaibao,  
 teda te Israel hani augwali wiegi yai pemene yaibao.  
 Ae, te Jekop aga hani augwali bugai haliga mu yaibao.

## Salmo 54

*Devitgo te balia aşani, te Sifde se yali bidi dabego te Solba po waligi peyu, te Devit augwali tomode geme dualalubo po waligi pai, te seęde agai homu kone ma paliyu, e balia po aşai dao.*

*1 Samuel 23:19, 26:1 tede elalubo po suao.*

**Bidigo gedu haluasa po weyu, te Godigo aga tau somainu yai**

- 1 God, te nago bomogo,  
 nago ena te dwai bidi dabego nogode ma sao.  
 Te nago genuai bomogo nago ena  
 te olo mu bidimainu ebo bidi pedalumainu ilao.
- 2 God, eno homugo nago eno  
 gedu haluasa po wabo odomainu homu ebao.  
 Eno homugo nago eno wabo poba  
 olo mumainu homu ebo dao.
- 3 Te hagoma ebo bidi dabe aselama,  
 te augwaligo ena dali hwjainu ebao.  
 Te homu dene isiabo bidi dabe  
 augwaligo ena ela muainu ebao.  
 Te bidi dabe augwaligo homugo  
 te God olo nai tiwai da homu ebo dao.
- 4 Tiali goli, Godigo digi ena tau sabo bidi dao.  
 Mu tama, Genuai Bidigo te ena tonalubaso,  
 tama ena bugagia bidibo dao.
- 5 Te Godigo eno boi bidi dabeba  
 te tiwai dene mawaibao.  
 Te augwaligo enaba ebo kolesagade,  
 tego augwa digi dolaibao.  
 Godigo ena me tagalogobeo,  
 tama tiyu, agai te boi bidi dabe mu silaibao.

- 6 Genuai Bidi, eno te nageba ofa  
 maiyabo homu wei ebao.  
 Nage te wiegi yai mu da,  
 tama tiyu, eno nageba gedu haluasa  
 pode usu da mu obao.
- 7 Nago ena tau selama, tama enaba  
 te pedelali tigidali seḡeḡo te ena aiyaba me elalubeo.  
 Tama eno suali, te nago eno  
 boi bidi dabe aiyaba elalubo subo dao.

## Salmo 55

*Te Devitgo aṣḡani balia po me deli dao.*

**Bidigo abagigo aga dali dwai seḡ ebaso, agai gedu haluasa po wai**

- 1 God, nago eno gedu haluasa  
 po wabo odao.  
 Nago eno gela wabode olo me pania sigio.
- 2 Ae, nago eno gedu haluasa po bugagia odolama,  
 tama enaba po wei ponao.  
 Te seḡeḡo ena mu dolainu ebo dao.
- 3 Te boi bidi dabego ena dolabo po bomu mu yai.  
 Te dwai bidi dabego ena aiyaba mu elalu yali.  
 Tama tiyu, eno haliga te dwai seḡeḡ mu yai.  
 Augwaligo te seḡeḡ hauwa enaba muyu,  
 te wado po dali weyu yai,  
 tama augwaligo enaba boi bidi mu ebao.
- 4 Ena te augwalide wi umabo mu eyu,  
 tama ena isabo homu elama,  
 tama tego ena haliga seḡeḡ mu ilibo dao.
- 5 Awe, ena wi mu elama,  
 tama eno tigi te didibili dwai mu ebao.  
 Te wigo ena aiyaba mu elaluai.
- 6 Tialima, eno te tama po wali,  
 “Hobede ya, te eno homugo  
 te ba dabego bogo tiwai sigi da homu yai.  
 Tama ena bola pelama, te toma nabo  
 pesage me deli gegelama,  
 tama ena tede dugulalu dabo homu ebao,” wali.
- 7 “Te ena digibulu mu bola pelama,  
 tama ena te bidi meni yai pesageba

mu bidigi paibao,” wali.

- 8 “Te ena asesa bola peyu,  
tama geme duala sigi pelama,  
bidabo pesage me deli gegelama, bidainu yaibao,  
tama ena te bomai walide me tulubagede  
geme duala selama, bidaibao,” wali.
- 9 Eno suali, te bidi dabego te taun tomode hwıbo suali.  
Tama tialima, Genuai Bidi, nago  
augwaligo po kone tuą palumainu elama,  
tama augwali mu silimainogo yao.
- 10 Te giligade me hulide augwali  
te taun bagulali obo dąjde bilalu ebo dao.  
Tama te taun we bidi dabego te  
dwai seęę sabo kolesaga ebo se hawu eyu ebo dao.
- 11 Te taun pedai tigidali badu te  
bidi dabego gasa bidi dabe me,  
doado bage dabe me doloyu ebao.  
Te sunumi sesegede,  
me te bidi sisinibo pesagede,  
te bidi dabego te gasa bidi dabe aiyaba elalu ebao,  
tama augwali tibo po ola mayu,  
te augwaligo doado bage sainu ebo dao.
- 12 Te boi bidi me deligo po dwai  
enabolo wagi sogo da, tagalao,  
eno te agai wabo pogo seęę bugagia toligi da.  
Ma, ena wei isiąwai bidigo enaba  
keęę po wagi sogo da,  
teda ena agade geme duala sabo usugi da.
- 13 Tiali goli, menio. Te nage naga dao.  
Nage te eno polalubo abagi da,  
tama nage te eno hai namu mu da.  
Nago digi te dwai po wabo kolesaga ebo dao.
- 14 Polobadu da si hodobo biliyu,  
tama po dali bugagia miyu, ela bilai,  
tama te Godigo moni lotu be  
tempelba te gasa bidi dabe dali peyu yali.
- 15 Eno homugo te eno boi bidi dabego  
haligade me, te augwa bede me,  
te dwai kolesagago paęanalua.  
Tialima, eno homugo

- te augwali polo isimainu homu yai.  
 Te augwali bidibo elalubadi,  
 tama augwali te isibo bidi dabego  
 pesageba pomainu ebao.
- 16 Tiali goli, te Godigo ena tau somainu  
 te gedu haluasa po obao.  
 Tama aga digi ena ma saibao.
- 17 Te kigamude me,  
 te genuai giliga nanobode me,  
 te hulide me, te seḡe dabego ena dolobaso,  
 tama eno agaba gela wabo da.  
 Tama agai eno gedu haluasa po odoyu yaibao.
- 18 Te bidi hauwago ena dali hwɨbao.  
 Tiali goli, ena me dolobeo.  
 Magi baso meni, Godigo ena tonaluyu,  
 tama ena ma odasa asaibao.
- 19 Polobadu mu God king bidali,  
 tama megi me aga te king bidibao.  
 Te aga digi eno gedu haluasa po wabo odama,  
 tama agai te boi bidi dabe  
 te hwɨbode aiyaba elaluaibao.  
 Augwali te agade wi me isaḡwai,  
 tama tiyu, augwaligo te dwai se ebo  
 kolesaga tagalogobeo.
- 20 Eno te abagigo agai te  
 aga abagi dabe dali digi hwɨjani.  
 Tama agai te augwali dali polobadu  
 te daḡ walali bomai po bolalio.
- 21 Te pedauwalide agai pusai po wali,  
 tiali goli te haligade agai te boi bidi enade elaluali.  
 Te agai pogo dago tabi nagame ilama bidibao.  
 Tiali goli, te po te bobobage bainat hwaḡ  
 tiwai mu poa pelama, tama da togobao.
- 22 Tigidali seḡe nago tolobao,  
 te nago Genuai Bidiba mao.  
 Te agai tolama,  
 tama te agai nage daḡ walaibao.  
 Te agai te magi nai me deligo  
 te doloba pai bidi dabe dolomainu me iligobeo.

23 Tiali goli God, te nago te bidi  
 ela mubo bidi dabe sela sąyu,  
 tama te tibo po wabo bidi dabe me sela sąyu elama,  
 tama augwali te dwai pesageba pelama,  
 tama augwali hagawaibao.  
 Te augwaligo bidabo sogo bodolu  
 te me elalubadi, tama te augwali isaibao.  
 Tiali goli, ena digi, teda eno konealubo homu nageba  
 mu sesemane kęą paibao.

## Salmo 56

*Te Filistia dabego Devit te Get taunde pageabi elama, tola sobaso, tama Devitgo te gedu haluasa po weyu, te Godiba gela wali. 1 Samuel 21:10-15 tede elalubo po suao.*

**Te Godiba konealubo homu daų wabo bidigo gedu haluasa po wai**

- 1 God, nago te olo tau sabo  
 wiegi yai kolesaga enaba yao.  
 Te bidi dabego ena pobeasa biliyu,  
 tama ena dali hwįyu ebao.  
 Te boi bidi dabego sesemane sogo dwai enaba ebao.
- 2 Tigidali sogo giligade  
 te boi bidi dabego ena dali hwįai.  
 Te bidi hauwago enaba boi bidi ebo dao.
- 3 Te Tigidali Bomo Elalubo God Mu,  
 te ena magi nai me delide wi ebo sogo,  
 eno konealubo homu nageba daų mu wabo dao.
- 4 Eno konealubo homu Godiba kęą pelama,  
 tama eno agai mu poba homu konealubao.  
 Tama tiyu, eno agai nogi ugwaba sobao.  
 Eno konealubo homu Godiba munama,  
 tama ena te magi nai mede wi me egobeo.  
 Te bidi dabego mena sę enaba yaibawe? Menio.
- 5 Tigidali sę eno yainogo ebadi goli,  
 te boi bidi dabego dolobo sę yai.  
 Te sesemane sogo augwaligo homugo  
 te ena dolabo sunumi gegebo sę yai.
- 6 Augwa deliba sisinagaselama, geme dualalubo dao.  
 Te augwaligo ena bilibo bugagia tonalu,



tama ena augwaligo ela muabo  
 homu eyu, te tama tibo dao.

<sup>7</sup> God, nago te augwa ebo kolesagade dwai dene mao.  
 Nago augwalide haliga seęę eyu,  
 tama augwali mu dolama, aiyaba mu elalua.

<sup>8</sup> Nago ena te seęę toliyu,  
 tama ena te dwai dene me eyu,  
 tama ena te gela udubo te nago koneai.  
 Tialima, nago tede homu konealu elama,  
 tama te naga bukude te nago aseęai dao.

<sup>9</sup> God, eno nage koneanio.  
 Nago ena tau sainu yai.  
 Tama tialima, nosali eno nageba  
 gedu haluasa po waibao,  
 te nago te boi bidi dabe pobebaso,  
 tama augwali wi paibao.

<sup>10</sup> Eno te Godiba homu konealu,  
 tama eno agai daę wali poba homu konealuai.  
 Tama tiyu, eno agai nogi ugwaba sabo dao.  
 Mu tama, eno te Genuai Bidigo  
 daę walali poba homu kone palama,  
 tama eno aga nogi ugwaba sabo dao.

<sup>11</sup> Eno konealubo homu te Godiba daę obaso,  
 tama tiyu, te eno magi naide wi me egobeo.  
 Te bidi dabego mena seę enaba yaibawe? Menio.

<sup>12-13</sup> God, te polobadu eno yaiba  
 olama po daę wali seę, te seę eno yaibao wali.  
 Nago ena ma dobola saligo tama, ena me isibeo.  
 Nago ena tau saligo  
 te boi bidi dabego ena me aiyaba elalubeo.  
 Tama tialima, God, ena te nage dali  
 sesemane sogo bilibao,  
 tama ena te nago ulade bilidubadi,  
 te ena isiboba usu naibao.  
 Tama eno nageba usu da mu weyu,  
 tama eno te usu da wali po daę iliyu,  
 te eno ofa me deli yaibao.

## Salmo 57

*Devit te Solde wi pelama, tama te bulu du odua beba bidigi pai.*

*Te 1 Samuel 22:1; 24:1-3 tede elalubo po suao. Agai te dabolo*

*kolesaga konemainu ola mayu, te balia asęai dao.*

**Te bidigo gedu haluasa po weyu, te Godigo aga tau somainu wai**

- 1 God, nago te homu dene eyu,  
tau sabo kolesaga enaba yao.  
Magi baso meni, nago ena tonalumainu  
eyu, ena nageba asobao.  
Ena nage dali bidibaso, te ena bugagia bidibao,  
te ba kakaruk wai dabe te aga idago bogo dologode  
bugagia geme dualalubo tiwai gilama ebao.  
Ena te tiwai tama bididu, te ena dolainu yali nai tigidali  
silibo sogoba usu nigi paibao.
- 2 Eno te Ugwadu Mu Bidibo Godigo  
te ena tau somainu i wabo dao.  
Tama agai te ena sęą pabo nai tigidali mabo dao.
- 3 Aga te dagalude bidiyu,  
tama agai eno gedu haluasa po wabo odama,  
tama ena ma dobola saibao.  
Agai te ena dolainu ebo bidi dabe te aiyaba elalueibao.  
Godigo te sesemane sogo  
ena wei mu eyu, godolo elama,  
tama agai ena munu me tagalugobeo. Mu menio.
- 4 Te dwai hasa laion tiwai bidi dabe  
augwaligo ena bobegelali,  
tama augwaligo te we bidi dabe tuainu sisi yali.  
Te augwaligo kele te ene me sesemone poa pai mu  
tiwai elaluali.  
Te augwaligo hamena te bainat hwą poa pai mu  
tiwai elaluai dao.
- 5 God, nago magi sę me deli te dagalude  
te tigidali we bidiba te tiwai ola mao,  
naga digi te polalubo bidi mu da olama,  
tama nage te augwali daide ugwadu bidibao.  
Te nago bomo te tigidali bulu tę pedaide  
pepeli diliba hanilama, pedalumainu yao.
- 6 Te boi bidi dabego ena tola somainu

ebo bono gaga muani.  
 Tama tiyu, genuai seęęgo ena aiyaba mu elaluai.  
 Augwaligo eno sunumide te tę dedage dogolama,  
 teba ena tula mumainu yai.  
 Tiali goli, ena tula mubeo.  
 Augwa digi te dedageba ma tulaluali.

- 7 God, te eno haligade da,  
 eno konealubo homu nageba daę wali.  
 Awe, eno konealubo homu nageba mu mubao.  
 Tama tibaso, te eno nago nogi ugwaba  
 sabo tęąbi po waibao.
- 8 Te ena pila mubo tagalama hodaluai.  
 Eno te gita me, kulelego me, te musik waibao.  
 Te be posa pabode, teda eno te musik waibao.
- 9 Genuai Bidi, te eno nageba usu da wabo po  
 te gasa hani tomode waibao.  
 Te ena tigidali tęde bidibo we bidiba pelama,  
 te nago nogi ugwaba saibao.
- 10 Magi baso meni, nago da sesemane  
 godolo ebo umabo mu ebao.  
 Te dago usu sainu ebaso da, teda te daę te dagaluba  
 usu nigi paibao.  
 Nago da tonaluabo po daę walama,  
 tama nago da me tagalubeo.  
 Te nago da tonalubo sogo tigidali te dago nedebaso da,  
 teda daę te dagaluba usu nigiluaibao.
- 11 God, nago magi seę me deli  
 te dagalude te tigidali we bidiba te tiwai ola mao,  
 naga digi te polalubo bidi mu da olama,  
 tama nage te augwali daęde ugwadu bidibao.  
 Te nago bomo te tigidali bulu tę pedaide  
 te pepeli diliba hanilama, pedalumainu ilao.

## Salmo 58

*Te Devitgo aseani balia po me deli dao.*

Te Godigo te dwai seę ebo bidi dabeba dwai dene  
 mawainogo eyu, te bidigo gedu haluasa po wai

- 1 Dage te tobolu bidi dabe,

- dagego te doloba pai po  
 te po tųde wabo da, agawe?  
 Te dagego tigidali bidigo po  
 bugagia dagalubo da homu eba, agawe?
- 2 Mu menio. Te dagego homu  
 te dwai kolesagaba naga kęą pai elalubao.  
 Tama dagego te tigidali badu  
 te bidi dabe dolobo sę ebao.
- 3 Te dwai sę ebo bidi dabe te  
 augwa tigidali sogo bilibode  
 te wiegi yai sunumi tagalali.  
 Te augwali wąi bųde digi gagalali,  
 te augwa monu dabe eboba usu nigi peyu,  
 te augwaligo tibo po wabo sę naga yalio.
- 4 Te augwaligo wabo po te bidi gąų kelebo hasamanigo  
 kelede elalubo te bidi isibo nabi tiwai dao.  
 Augwa olo pania siyu yali, te hasamanigo ebo tiwai,  
 te aga olo pania selama, te aga po te me odobeo.
- 5 Te hasamanigo te kolesaga koneai  
 bidigo po me odisiąwaibao,  
 te agai musik wabo sogo te hasamani hodaluama,  
 tęąbi emainu yai.  
 Te agai ona elaidu geani,  
 tama te hasamanigo me odogobeo.
- 6 God, nago te dwai bidi dabe dolao.  
 Genuai Bidi, te augwali  
 te dolama hwįbo laion tiwai ebao,  
 tama tialima, nago augwali kele togolama,  
 tigidali guda sąyao.
- 7 Augwali te wę pelama,  
 tama te tųde odolali menia siyu,  
 hagabo tiwai emainao.  
 Nago augwali agayu, tama te bidigo nosa agalama,  
 te isibo tiwai gilama emainao.
- 8 Eno homugo augwali te ma damubo  
 tiwai gilama emainao,  
 moni dwai kukumini emainao.  
 Tama augwali te wai idago haligade  
 isibo tiwai emainao.  
 Nosali idago aga ame nenama,  
 tama te waigo giliga susiąbo tiwai emainu yao.

- 9 Te polo mu tama, Godigo augwali dolaibao,  
 te bidigo dwasianu ni gelibo tiwai gilama yaibao.  
 Augwali te bidibo ula elalubadi,  
 tama Godigo augwalide haliga sębę mu elama,  
 tama agai augwali te pobele bage  
 sębo tiwai gilama ebo dao.
- 10 Te doloba pai bidi dabego  
 te Godigo te dwai sę ebo bidi  
 dabebolo te dwai dene mabo subo si,  
 te augwali wiegi yai pemene yaibao.  
 Te doloba pai bidi dabego sęą  
 te dwai bidi dabego kanemego sęą wę telaibao.
- 11 Tama gasa bidi dabego te tama po waibao,  
 “Mu dao, Godigo te doloba pai bidi dabeba  
 wiegi yai sę wei pona mawai.  
 Mu tama, God bidibao, tama agai te tigidali bage  
 te doloba pai po tųgo dagalaibao,” waibao

## Salmo 59

*Polobadu Solgo bidi meba tagala palama, te Devitgo beba tonalugi pai.  
 Augwaligo aga ela muainu yai. Te 1 Samuel 19:11 tede elalubo po suao.  
 Tialima, Devitgo megi te balia aseyu, te dabolo bugagia ola mawai.*

**Te bidigo gedu haluasa po weyu, te boi bidigo aga me dolidali olama wai**

- 1 Eno God, nago ena te boi bidi dabego  
 nogode ma dobola sao.  
 Nago ena bugagia seselalubaso,  
 te augwaligo ena me dolisiąwaibao.
- 2 Nago ena te dwai bidi dabego  
 nogode dagala sao.  
 Tama ena ela muainu ebo bidi dabede  
 nago ena ma dobola sao.
- 3 Augwali suao. Augwali geme dualalu,  
 te ena ela muainu ebao.  
 Augwali te dwai hwıbo bidi dabe,  
 tama augwali sisinama, te ena dali hwıainu ebo dao.
- 4 Genuai Bidi, augwali dali eno dwai sę me isiąyu,  
 tama eno nago bomai pode hagoma me ebeo,

- tama eno magi nai me delide magi dwai sę me ebeo.  
 Tiali goli, augwali asesu pelama,  
 te ena dali hwjainu pąba bidagasai elaluali.
- 5 Genuai Bidi, nage te Tigidali Bomo  
 Elalubo God dao.  
 Nago polo tama ena tau sagasao.  
 Nage te Israel dabego God, te bidi dabe suo.  
 Nage polo aselama, tama te Israel hani isąwai we bidiba  
 dwai dene magasobo sę yagasao.  
 Nago augwalide homu dene me elamuo.  
 Te bagego wiegi yai kolesaga yaiba po wali,  
 tiali goli, augwaligo te dwai kolesaga  
 yabo homu naga elalui.  
 Te augwali wei ponobo sę nago mu yao,
- 6 Te hulide augwali te genuai hanuba ma aselama,  
 tama augwali te taun bobegelali obo  
 sesege badu bagula biliyu,  
 tama te yowi dabego wabo tiwai i ola bilai.
- 7 Odao. Te augwaligo po te dwai mu weyu,  
 te bainat hwą poa pai mu tiwai yali.  
 Tiali goli, augwaligo te po wali,  
 “Dego dago te po odomainu yagawe?”
- 8 Tiali goli, Genuai Bidi,  
 nago augwaliba dwai gisugu mu mabo dao.  
 Nago te tigidali Israel hani isąwai we  
 bidi haniba te kęnę po wabo dao.
- 9 Nago naga ena dąų waliyu, tama ena tonalubao.  
 God, ena te nageba naga pelama,  
 tama ena te boi bidi dabede geme duala sabo dao.
- 10 Te eno God agai ena wei eyu, godolo mu elama,  
 tama aga aselama, ena tau sagasali.  
 Godigo te agai eno boi bidi dabe te  
 aiyaba elalubo te enabolo sumainu yaibao.
- 11 God, te nago augwali ela mugio.  
 Magi baso meni, te eno hani bage augwaligo  
 te naide homu kone ebo tagalidalio.  
 Genuai Bidi, nage da tonalubo bidi dao.  
 Te nago bomogo naga,  
 nago te boi bidi dabe sela sąnama,  
 te augwali tedela pomainao.

- 12 Sesemane sogo augwaligo  
 te dwai sę yabo po naga weyu ebo dao.  
 Te augwa hagoma ebo kolesagade  
 te augwa dolomainu sula tagalao.  
 Augwaligo te nago nogide po dwai weyu,  
 tama sesemane sogo tibo po wabo dao.
- 13 Tama tialima, te nago haliga sębę  
 augwalide eyu, te augwali elao.  
 Te dwai sę ebo bidi dabe mu silao.  
 Nago te tibaso da,  
 tama te we bidi dabego koneama,  
 nage te God, nage te da Israel dabego king bidi me,  
 tama nage te tigidali bulu tęde  
 bagego king da olama,  
 te augwaligo konemainao.
- 14 Tama hulide te eno boi bidi dabe  
 te taunba ma aselama,  
 tama augwali te bagula biliyu,  
 tama te yowi dabego go wabo tiwai ebo dao.
- 15 Augwali te yowi tiwai biliyu, te uga peyu, eda asiyu,  
 te nai gegebo ebao,  
 tama te augwali haliga paęąsiąbaso,  
 augwali te i dwai mu weyu ebo dao.
- 16 Tiali goli, eno te nago genuai  
 bomode te tęąbi weyu yaibao.  
 Te tigidali sogo kigamude te eno tęąbi genuai weyu,  
 te nago ena sesemane sogo godolo ebode  
 te homu paliyu tiaibao.  
 Magi baso meni, te haniani sęęę dabe  
 polobadu enaba pedelali,  
 tama nago ena bugagia tonalu,  
 tama nage te eno obo tiwai elalubo dao.
- 17 God, nage naga te ena seselalubo bidi dao.  
 Eno te nago nogi ugwaba sabo tęąbi po wainogo ebao.  
 God, nago ena godolo mu ebao,  
 tama nage te eno bomai obo elalubao.

## Salmo 60

*Devitgo te da ola mayu yai. Agai te polobadu te Mesopotemiatęde bidali bage, me Soba tęde bidali bage, te Siria dabe dalihwįani sogo, te hani kone ma palali. Tama agai te bidi Joapte ma geasa asiyu, tama te Tamu Elalubo Tę Malude bidali, te Idom bidi dabe te 12,000 bidi ela muani, teba agai homu konema palama, te balia po aęai dao. Te 2 Samuel Dąj 8; 1 Stori Dąj 18, tede elalubo po suao.*

**Bidigo te gedu haluasa po weyu, te Godigo augwali ma somainu yali**

- 1 God, nago da tagalama,  
tama da te hwįbode aiyaba  
elalumainu sula tagalalio.  
Nago dade wado homu elalu, tama nago te tiwai yali.  
Tiali goli, megi te nage ma asiyu,  
te da ma tau sagasao.
- 2 Nago dago tę mali emainu ilama,  
tama nago te alumainu elama,  
tama genuai tę dedage pedelalio.  
Megi da, te tę mu dolainu ebao.  
Tialima, nago ma dodolao.
- 3 Nago te seęę hauwa te naga we bidi dabolo mawai.  
Tama nago dabolo te wain aį menama,  
tumainu ebo tiwai yai.  
Dago tulama, tama da te umuna pai mu pedelali.
- 4 Nago te wi pao po te nageba  
lotu wabo we bidiba pusai,  
te boi bidi dabego augwali dolidali weyu,  
augwali wi pomainogo yali.
- 5 Da te nago bomogo ma sao,  
magi baso meni, te nago da godolo mu ebo dao.  
Tama tibaso, nago dago gedu haluasa po wabo odolama,  
tama da te boi bidi dabego nogode ma sao.
- 6 God te aga wiegi yai bulude bidiyu,  
tama aga te po wai dao,  
“Te eno hwįbo boi bidi dabe aiyaba elaluama,  
tama eno wiegi yai pemene mu yaibao.  
Megi da, eno te Sekem bulu tę pedaibao,  
tama te Sukot tę malu bulu pesagede me, tama eno  
te ena we bidi dabeba dobawaibao.
- 7 Te Gileat tę pedaide bidibo we bidi  
me, te Manase hani dabe me, te eno bage dao.  
Te Efraim hani we bidi te eno kapago



nigai tobolu madi tiwai elalubao,  
tama eno king te eno bage Judade munama,  
elalubao.

- <sup>8</sup> Te eno te Moap dabe te eno se yabo bidi  
pedalumainu elama, tama eno te Idom dabe  
te eno se olo ebo bidi dabe nigilaibao,” wali.  
“Te eno te Filistia dabe te hwina, aiyaba elalubaso,  
tama eno homu pemene eyu,  
tama i waibao,” po wai.
- <sup>9</sup> God, dego ena te Idomba odasa pogowe?  
Tama dego ena te bomai obo elalubo  
taunba odasa pogowe?
- <sup>10</sup> God, te nago da  
te tudiba muani homu eba, agawe?  
Nage te dago ami dabe dali pisama eba, agawe?
- <sup>11</sup> Nago da tau sobaso,  
tama dago te boi bidi dabe dali hwiaibao.  
Magi baso meni, te bidi dabego naga da tau sobaso da,  
te olo nai tiwai naga dao.
- <sup>12</sup> Tiali goli, te God da dali bidibaso da,  
teda dago te hwibode te boi bidi dabe elaibao.  
Mu tama, Godigo te dago boi bidi dabe  
aiyaba elaluaibao.

## Salmo 61

*Te Devitgo aseani balia po me deli dao.*

**Te bidigo gedu haluasa po weyu, te Godigo aga seselalumainu wai**

- <sup>1</sup> O God, te eno nageba i wabo te nago odao.  
Te nago eno gedu haluasa po waboba  
bugagia olo muao.
- <sup>2</sup> Ena te ena bulu pesage digibulu bidibao,  
tama eno haliga te sege mu eba.  
Tama tibaso, te eno nageba i weyu,  
te nago ena tau somainu ebo dao.  
Nago ena te geme dualabo  
pesage me deliba odasa pobaso da,  
teda te boi bidi dabego ena me dologobeo.
- <sup>3</sup> Magi baso meni, nago naga ena  
te bugagia seselalubo dao.

Nage naga te eno bomai obo elalubao,  
tama tiyu, te boi bidi dabego  
ena me dolainu ebaso, te usugobeo.

<sup>4</sup> Eno homugo te godolo mu eyu,  
ena te nago bede bididubadi,  
te ena isibo sogoba usu nabo homu ebao.  
Tama ena nage pąde bugagia bidiyu,  
te kakaruk wai te aga idago bogo  
dologode bugagia bidibo tiwai gilama yaibao.

<sup>5</sup> God, te tigidali naide eno nageba  
te po daų walali, te nago odalio.  
Tama nago te nai dabe enabolo mawai,  
te nago nogi ugwaba sabo we bidi  
augwaliba mabo tiwai gilama yalio.

<sup>6</sup> Nago te king te bidibo ula dali  
te hauwa kibu be bidimainu yao.  
Nago aga te tąde sesabi elama, bidimainu yao.

<sup>7</sup> God, nago gedude te aga sesemane sogo  
te king bidimainu ilao.  
Nago aga sesemane godolo mu ebaso,  
tama te nago aga sesemane sogo bugagia tonalualo.

<sup>8</sup> Nago tama tibaso da,  
teda te tigidali side te eno polobadu  
te po nageba daų walali po, te eno wali peyu,  
tama eno nago nogi ugwaba sabo tęąbi po  
te sesemane bidada pabo sogo udaibao.

## Salmo 62

*Te Devitgo asęani balia po me deli dao.*

**God deligo naga da tonalubo dao**

<sup>1</sup> Mu tama, eno konealubo homu te God deliba  
naga daų weyu, tama sagia siyu,  
tama eno te agai ena tau sabo tonalubo dao.  
Aga deligo naga te ena ma selama,  
tama ena bidibo ula dali bidibo dao.

<sup>2</sup> Agai deligo te ena tonalu, tama ena tau siyu ebao.  
Tama aga deli naga eno bomai obo elalubao.  
Tama tiyu, te hwıbo side ena me hagagobeo. Mu menio.

- 3 Ena dali boi homu ebo bage, nisu naga sogo dagego  
 ena dali hw̄iyu, te ena dolainu ebawe?  
 Dagego homugo ena te obo tomage  
 me deli te tulaluama,  
 te mu togwa pabo tiwai gilama emainu ebao.
- 4 Eno genuai nogi elalubadi,  
 tiali goli, te dagego eno genuai nogi dolainu ebao.  
 Dagego te tibo po wabo  
 godolo homu mu ebo dao.  
 Dagego te Godigo enaba wiegi yai sę̄ yabo po pusai,  
 tiali goli dagego haligade dagego  
 te tama weyu wali, “Dago homugo te Godigo  
 aga dolomainu homu ebao,” po wali.
- 5 Eno konealubo homu te God deliba  
 naga dāu wabo dao.  
 Tama eno te agai deligo ena tau sabo tonalubo dao.
- 6 Agai deligo naga ena tonalu, te ena tau sabo dao.  
 Tama aga deli naga eno bomai obo elalubao.  
 Tama tiyu, ena te hw̄ibo side me  
 hagagobeo. Mu menio.
- 7 God deligo naga ena ma sali,  
 tama aga digi enaba te genuai nogi mani.  
 Aga te ena tonalubo bomai bidi te bidibao.  
 God aga digi aga te eno bomai obo elalubaso,  
 tama te boi bidi dabego ena me dologobeo.
- 8 Eno hani dabe, sesemane sogo dagego  
 te Godiba konealubo homu dāu waiyāo.  
 Dagego te duga tigidali sę̄ę̄ me,  
 te tigidali homu te agaba pusao,  
 awe, bidigo te wę̄ gelibo tiwai eyu yao.  
 Magi baso meni, da te agaba pelama,  
 bugagia bidainu te tama tiao.
- 9 Te we bidi da, augwali e tiwai dao.  
 Te olo we bidi dabe te pedauwalide  
 olo mobo pedalubo tiwai te ebao.  
 Tama te genuai namba elalubo bidi dabe  
 augwali me, te olo nai tiwai naga yai.  
 Te augwali dago dagalobaso da,  
 teda augwali te sę̄ę̄ mu elalusią̄bo  
 te dago me suaibao.  
 Te augwaligo sę̄ę̄ te pedauwalidu

- pedalubo mobogo seęę dali usu egobeo.
- 10 Tama tibaso, dagego te tama homu igimio,  
 “Te hwįbo kolesaga me,  
     te nai dabe wi sabo kolesaga me,  
     te wiegi yai kolesaga da weyu,  
     tama da te mone bidi pedalubaso,  
     te usu yaiba,” homu me igio.  
 Ma, te dagego mone me doado bage  
     te hauwa pedalubaso da,  
 teda dagego te nai dabeba naga duga  
     homu mugio. Te usu egobeo.
- 11 Godigo te tama po wabo te eno odali,  
 “Ena God, eno te genuai bomo elalubo dao,” wali.  
 Me ma, e tama po wabo eno hauwa sogo odali,
- 12 “Tama sesemane sogo eno te  
     tigidali we bidi godolo mu ebao.”  
 Te po wabo si eno mu odalio.  
 Genuai Bidi, nago te da tigidali  
     we bidigo ebo kolesagade usu nama,  
     te seę wei si ma ilibo dao.”

### Salmo 63

*Devitgo te balia aseęani, te aga te Juda bagego te bidi meni yai bulude bidali sogo, teba kone paliyu, te balia aseęai. Te 2 Samuel 15:23-28, tede elalubo po suao.*

#### Te bidigo homugo te God aga dali bidimainu homu eyu, gedu haluasa po wai

- 1 O God, nage eno God dao.  
 Eno nage gegebo seę bomo ebao.  
 Te eno homu ogwa waigo te nage dali  
     bidabo homu godolo mu ebao.  
 Eno tigię me, te nage dali bidabo homu godolo yali,  
     te bidi te weę meni yai wa pai bulude  
     te weę nogoneęo sabo tiwai gilama yai.
- 2 Eno nage te naga mena wiegi yai bede  
     mu suabo homu elama,  
 tama eno homugo te nago genuai  
     bomo te enabolo ola momainu

<sup>u</sup> 62:12 Jop 34:11; Jer 17:10; Mat 16:27; Rom 2:6; Ped 2:23

- homu yali, tama nago genuai  
nogi yai ula me te ola momainu yai.
- 3 Te e tęde bidibo ula te wiegi yai yai,  
tiali goli nago te da sesemane  
godolo ebo wiegi yai kolesaga te polalubo dao.  
Tama tiyu, eno nago nogi ugwaba sabo dao.
- 4 Te eno nageba usu da weyu,  
tama nago nogi ugwaba sidubadi,  
te ena isibo siba usu naibao.  
Te eno nogo ugwaba selama,  
tama nageba gedu haluasa po waibao.
- 5 Te eno homu ogwa wai mobo  
te wiegi yai mu elalubao,  
te bidigo wiegi yai nai dabe tulama,  
tama te usu yai tiwai gilama yai.  
Tama ena wiegi yai pemene elama,  
tama nage nogi ugwaba sabo dao.
- 6 Te ena betba pigilubo sogo,  
te eno nageba homu kone palu ebo dao.  
Te hulide eno homu kone nageba naga ebo dao.
- 7 Magi baso meni, nago ena sesemane sogo tau sali.  
Ena nage pęde bidali,  
te kakaruk wai te aga idago bogo  
dologode bidibo tiwai gilama eyu,  
tama eno te wiegi yai pemene ebo balia po wali.
- 8 Ena nage dali bilibaso,  
tama nago ena bugagia tonalubo dao.
- 9 Tama te ena ela muabo homu ebo  
bidi dabe, teda augwali  
te isibo bidi dabego pesageba dulaibao.
- 10 Te hwębo side augwali isibaso,  
tama te uni yowi dabego augwaligo  
tigi te pesela tuaibao.
- 11 Tiali goli, ena king da, te eno wiegi yai pemene  
te nage Godiba yaibao.  
Te bidi dabego nogo guni sisu muyu,  
tama nago nogi weyu, tama augwa  
po dę wabo bidi dabe,  
te augwaligo nage wali pabo bidi dabe,  
augwa te wiegi yai pemene mu emainao.  
Tiali goli, nago te tibo po wabo bidi dabego

pedauwali pania somainu yaibao.

## Salmo 64

*Te Devitgo așani balia po me deli dao.*

**Bidigo te gedu haluasa po weyu, te Godigo aga tonalumainu yali**

- 1 O God, eno sęę te genuai elalubao.  
Nago eno gedu haluasa po wabo odao.  
Ena te boi bidi dabede wi ebao.  
Nago ena tau sobaso da,  
te ena augwaligo ela muainu ebaso,  
te usu me egobeo.
- 2 Te dwai sę ebo bidi dabego te  
ena ela muabo sunumi gegebao,  
tama augwali sisinama, te elainu ebao.  
Tama te nago ena seselalubaso da,  
teda augwaligo enaba te dwai sę me egobeo.
- 3 Te bidi dabego po te mu poa pelama,  
tama te bainat hwągo ena togobo tiwai ebao.  
Te augwaligo dwai pogo enaba ponama wali,  
te bidigo enesigiba ene nanama,  
te bidi usu sabo tiwai gilama ebo dao.
- 4 Augwali te geme duala selama,  
tama te wiegi yai bidiba enego enani.  
Augwaligo te gagamua siyu, te wi me isiąma,  
tama augwaligo polo eneyu ebo dao.
- 5 Augwaligo augwa digi daų waliyu,  
tama te dwai kolesaga ebo dao.  
Augwaligo te gasa bidi tola somainu yabo  
te bono gągą muabo po miani.  
Tama augwa te tama homu yali,  
“Te mena bidi me deligo te da me sugobeo,” wai.
- 6 Augwaligo te dwai kolesaga meba  
yabo po mia selama, tama augwa te po wai.  
“Dago yabo te dwai kolesaga me deli  
te homugo koneanio, tama te dago yainu ebo sę  
te bidi me deli gegeyu,  
koneainu ebaso, usu egobeo,” te po wai.  
Dago te bidi dabego haligade elalubo  
homu kolesaga te koneabo usu egobeo,  
te geme mu dualalubao.

- 7 Tiali goli, te Godigo augwali  
te agai enego enebaso da, tama polo mu tama,  
te genuai keni pedelaibao.
- 8 Augwaligo te gasa bidi dolabo po wai,  
tama tibaso, te Godigo augwali dolaibao.  
Te augwali subo bidi dabego  
te augwaliba te augwaligo dwai gisugu mu mayu,  
tama tobolu peme yaibao.
- 9 Te tigidali we bidigo Godiba wi yaibao.  
Tama augwaligo Godigo  
te yali seḡ dabede po mimi peyu,  
tama tede sesemane homu kone palaibao.
- 10 Te tigidali doloba pai we bidi augwaligo  
te Genuai Bidigo yali seḡde  
wiegi yai pemene yaibao,  
tama augwali agaba pelama,  
te dwai seḡde geme wi duala sigi paibao.  
Tama te tigidali doloba pai we bidi augwaligo  
te Genuai Bidigo nogi ugwaba saibao.

## Salmo 65

*Te Devitgo aseḡani balia po me deli dao.*

**Augwa wiegi yai pemene elama, te Godiba  
usu da weyu, gedu haluasa po wai**

- 1 O God, da te Saionba pelama,  
tama nago nogi ugwaba saibao.  
Te kolesaga ebo te usu mu yaibao.  
Tama dago te po daḡ waliyu,  
te polobadu yaiba wali seḡ tigidali usu nama yaibao.
- 2 Nago dago gedu haluasa po wabo odobo dao.  
Tama tibaso, da tigidali we bidi te nageba asobao.
- 3 Dago te dena yali dwai seḡde homu  
kone palu tama tiali.  
Te dena dwai seḡo da aiyaba mu elaluali,  
tiali goli, dago koneani, te nago dago dwai seḡ  
te dagala saḡwaibao wabo dao.
- 4 Te nago sa munama,  
tama nago paḡa odasa pabo bidi  
dabe, augwa te wiegi yai pemene emainao.  
Te tigidali wiegi yai seḡ yabo kolesaga

nago dabolo te moni lotu be tempelde,  
 te nago wiegi yai tedali bede mawai,  
 tego da mu usu naibao.

- 5 God, nago naga te nago da  
 te boi hwı̄bode ma selama,  
 tama da bugagia bidibo dao.  
 Nago dago gedu haluasa po wabo odao.  
 Te nago da ma sainu yali sę te sę mu yai.  
 Te dade te digibulu mu  
 te tigidali tọ habude bidibo bage dabe,  
 tama te augwa pesageba sabolainu,  
 te tamu ą̄i nogeali,  
 augwaligo konealubo homu nageba  
 daų mu wabo dao.
- 6 Te nago bomogo te bulu du dabe pedalumainu elama,  
 tama augwali te augwa pesagede elalubao.  
 Nago bomo te genuai mu dao.
- 7 Nago naga te tamu ą̄i moni dini ebo,  
 te wę kulukulu wabo me isimainu ilibo dao,  
 tama nago te bidi dabego  
 hwı̄bo me togolobo dao.
- 8 Te tigidali tọde bidibo we bidi dabego  
 nago te ebo sę dabe sulama,  
 tama tigidali te nagede wi ebao.  
 Te giliga pedalubo badu, me te giliga dega sigilubo badu  
 bidibo we bidi augwaligo  
 te nago ebo sę tigidalide homu kone palama,  
 tama augwaligo te wiegi yai homu pemene elama,  
 te nageba i wabo dao.
- 9 Nago te tulubage tagala palu,  
 te tama tebogo naga nago te tọ bugagia tonalubao.  
 Tama nago te tọ ili hauwa pedalumainu ilama,  
 tama te nai bugagia holobao.  
 God, nago te wę dabe tigidali badu muai elalubao,  
 tama augwali te me sula sabeo.  
 Tego te nai hauwa pedalumainu ilama,  
 tama te we bidi dabego sobao.  
 Te sę nago digi ebo dao.
- 10 Nago te tulubage hauwa  
 te tigidali giba tulumainu elama,  
 tama wę te tọ tomode elalubao.



Węgo te tę nagame ilibaso,  
tama nai bugagia holobo dao.

11 Nago wiegi yai sę daba eyu,  
tama nago te nai hauwa pedalumainu yai.

Te nage gasa me deli pobaso me,  
nago tede me te nai wiegi yai hauwa  
pedalumainu ebo dao.

12 Te tigidali bulu pesagede te bulmakau me  
sipsip dabego tuabo nosa te paęanaluali.

Tama te dwasianu bulu du dabede  
te gigo paęawai elalubao.

13 Te sipsip hauwa mu te nosa elalubo  
pesagede mu paęanalubao.

Te bulu dabe odogo tomode te wit nai mu  
paęanalubao.

Tama tigidali nai te wiegi yai pemene ebo dao.

## Salmo 66

Augwaligo te wiegi yai pemene elama, tama  
Godiba usu da po weyu, balia po wai

1 Te tigidali tęde we bidi,  
dago wiegi yai pemene elama,  
tama bomonama i weyu,  
tama Godigo nogi ugwaba sao.

2 Te balia po weyu,  
te agai genuai nogide po pusao.  
Te agai genuai nogi te ugwaba mu sao.

3 Dago te tama po Godiba wainao,  
“Te nago ebo sę tigidali te wiegi yai mu ebao.  
Te nago bomo genuai ugwanu mu igulai elalubao,  
tama nago boi bidi dabe te wi mu elama,  
tama augwali te nago gesabidiba pibia sagaselama,  
te kidu sugunagasobo dao.”

Te tobage po wainao.

4 Te tęde we bidi tigidaligo nageba lotu waibao.  
Augwa te balia po weyu, nago nogi ugwaba sabo dao.

5 Dage aselama, te Godigo yali sę suięo.  
Te genuai genuai sę dabe agai  
te we bidi dabe tomode yai dao.

- 6 Agai te tamu ąigo pesage  
 te wa pai pedalumainu ilama,  
 tama dago wąj nõę dabe tedu pelayu,  
 tama te wę nogegi pai.  
 Tede te augwaligo Godiba wiegi yai  
 homu pemene yai dao.<sup>v</sup>
- 7 Agai te genuai bomo elalu, tama aga te king sesemane  
 bidada peyu, bidada pobao.  
 Tama agai te we bidi hani tigidaligo  
 ebo sę tigidali te bugagia subao.  
 Tama tiyu, te meba hanigo te Godide hagoma yabuo.
- 8 Dage tigidali hani, dagego  
 te dena God nogi ugwaba سیاو.  
 Dagego te God nogi ugwaba sabo,  
 tama te we bidi dabego odaibao.
- 9 Agai da tonalubaso,  
 tama da te bidibo ula dali bidibao,  
 tama agai da te dwai sęęęba  
 tulalumainu me sula tagalubeo.
- 10 God, nago da usu siyu, te bidi dabego  
 te wiegi yai kapa silva te siago ulama,  
 tama te hogomu kakali sela sąbo tiwai ebo dao.
- 11 Nago da te bono gąęęgo tola selama,  
 tama nago genuai sęęę daba muani.
- 12 Nago te boi bidi dabego da mu agala somainu ilali.  
 Tama da te sia dobadi te sia dabo  
 tomodu bilali tiwai eyu,  
 tama te asobo wę tomodu pabo yali.  
 Tiali goli, megi nago da te wiegi yai  
 pesageba odasa aselama, bidibao.
- 13-14 Polobadu te sęęę enaba pedalubaso,  
 tama eno nageba po daę weyu,  
 te siaba tigidali ulama, domainu ebo ofa  
 mawaiba po wai.  
 Eno te daę walali po me konealuyu,  
 tama tialima, eno te ofa dabe nageba selasa asaibao.  
 Te eno nago tempel beba te hasa dabe sela aselama,  
 te siaba ulumainu yaibao.

---

<sup>v</sup> 66:6 Sai 14:21; Jos 3:14-17

- 15 Te eno te nisali kibu hasa dabe te altade ulama,  
 tama eno nageba te ofa mawaibao.  
 Awe, eno te omai sipsip dabe ulama,  
 tama nago te ofago te denami ebo  
 te wiegi yai odaibao.  
 Tama eno te omai bulmakaugo,  
 me te omai memego te ofa yaibao.
- 16 Dage te God dologode bidibo  
 we bidi dabe, dage aselama, te eno po odagasiąo.  
 Te eno dagebolo te tigidali sę po  
 te Godigo ena tau selama, yali sę po waibao.
- 17 Polobadu te eno agaba i weyu,  
 te ena tau sao olama,  
 tama eno aga nogi ugwaba sabo  
 balia po wainu sisi ilali.
- 18 Tiali goli, eno homugo te eno dwai  
 sę ebo kolesaga te olo nai tiwai da  
 wagi sogo da, teda Genuai Bidigo  
 te eno gedu haluasa po wabo  
 te me odogi menigi dao.
- 19 Tiali goli, Godigo eno wabo po odalio.  
 Mu tama, agai eno gedu haluasa po wali odai dao.
- 20 Eno God nogi ugwaba sobao.  
 Magi baso meni, agai eno gedu haluasa po  
 te tudiba me musiąwai,  
 tama agai te enade godolo mu  
 sesemane ebo te me dagala sabeo.

## Salmo 67

**Te Godiba wiegi yai pemene eyu, wabo tęąbi po e dao**

- 1 God, nago te olo tau sabo  
 wiegi yai kolesaga dabolo elama,  
 tama daba te wiegi yai sę yao.  
 Nago daba homu kone palama, tama da tau sao.
- 2 Tama tiyu, te tigidali we bidigo  
 nago kolesaga te konemainu elama,  
 tama tigidali hanigo te nago  
 augwali ma saiba weyu,

te augwaligo konemainao.

3 God, eno homugo te tigidali bagego  
nageba wiegi yai pemene elama,  
tama nago nogi ugwaba somainu yao.

4 Tigidali hani we bidi te bugai haliga elama,  
tama wiegi yai pemene ebo tęąbi emainu yao,  
magi baso meni, te nago tigidali  
we bidigo kolesaga te doloba pai  
po tų ebogo dagalaibao,  
tama nago te we bidi hani dabe  
te wiegi yai sunumidu bugagia  
bilimainu dodolobo dao.

5 God, eno homugo te tigidali bagego  
te nageba wiegi yai pemene elama,  
tama nago nogi ugwaba somainu yai dao.

6 Te wiegi yai nai hauwa dago tųde pedelalio.  
God, aga te dago God, agai  
te dabolo wiegi yai sę bugagia mu yai.

7 Mu tama, Godigo te wiegi yai sę dabolo bugagia yai.  
Te tigidali tųde we bidite aga dologode bidaluao.

## Salmo 68

**Te Israel dabe augwali te Godigo tau sobaso, wiegi yai pemene yali**

1 God te polo asomainu elama,  
tama aga boi bidi dabe  
sela sęmainu yai.

Te Godiba boi bidi ebo bidi dabe,  
augwali te agade wi pabo dao.

2 Waligo te hano sela sębo dao,  
te tama tiwai gilama naga Godigo  
te boi bidi dabe sela sęyu tiaibao.

Siago te kandel ili posolo ilibaso,  
tama ili te wę tiwai pedelaibao.  
Te tama tiwai naga te dwai sę ebo we bidi dabe  
te augwali God gedude dolaibao.

3 Tiali goli, te doloba pai bidi dabe da,

te wiegi yai pemene elama,  
 tama augwa te God gedude  
 bugai haliga yaibao.  
 Augwa te wiegi yai pemene umabo mu yaibao.

4 Dago te Godigo nogi ugwaba sabo tęąbi po wao.  
 Aga te pọ dabede dugulasa, tama pabo dao.  
 Agai sunumi dodolao.  
 Aga nogi te Genuai Bidi dao.  
 Dago aga gedude wiegi yai pemene yao.

5 God te aga gasa wiegi yai bede bidiyu,  
 tama agai te aga aya ida isai  
 wai puluba dabe tonalubao.  
 Tama agai te wilawe we dabe, te agai tau sabo dao.

6 Agai te bidi me we agaduba deli  
 bidibaso, te be menama,  
 tama augwa tede bugagia bidimainu ebo dao.  
 Tama agai te kalabus bidi dabe  
 augwa te kalabus silimainu elama,  
 tama augwa pesagede te bugagia bidimainu ebo dao.  
 Tiali goli, te seę hagoma ebo bidi dabe,  
 teda dwai pesageba mu bidigi paibao.

7 God, polobadu te naga  
 we bidi dabede nage poligi sulama,  
 tama nago augwali odasa asiyu,  
 tama nage te magi nai meni yai  
 te tọ wa pai bulude bilali.

8 Te sogo te tọ geę elama,  
 tama tulubage genuai aiyaba tulali,  
 magi baso meni, God, nage asalio.  
 Mu tama, te da Israel dabego God nage asobaso,  
 tama te Sainai bulu du geę  
 umabo mu yai dao.<sup>w</sup>

9 God, nago te moni tulubage te  
 naga tọba tulumainu elama,  
 tama nago te e tọ dwali te  
 wiegi yai ma pedalumainu ilai dao.

10 Te naga we bidi augwali bidabo pesage

---

<sup>w</sup> 68:8 Sai 19:18

- te tęde nigilama, bidai.  
 Nage te wiegi yai mu,  
 tama te nago te magi nai doado bage  
 meni yai bidi dabe te nai mayu yai dao.
- 11 Genuai Bidigo te aga we bidi dabeba po mawai,  
 tama we hauwago te po pusugi pai.
- 12 Te po e tama wali, "Te king dabe dali  
 te tigidali ami dabe me, tigidali te wi palio," po wai.  
 Tama te augwa bidali pesagede bidali we dabego  
 te augwa bidi dabego hwįyu sali  
 doado bage te dobayalio.
- 13 Te we dabe te silvago, me golgo  
 te gasagi yai au mu elama,  
 tama augwa te tonani te gasa  
 wiegi yai ba sawi yai tiwai yali,  
 tama aga te silvago ula tiwai yali,  
 tama aga bogo te golgo gegemani ebo tiwai ebao.  
 Tiali goli, magi baso bidi meba  
 te sipsipgo obo tomode bidibawe?
- 14 Te Tigidali Bomo Elalubo Godigo  
 agai te king dabe te Salmon bulude  
 sela sanama, wi pelawali sogo,  
 teda agai te talua ge ais tulubage  
 te bulu duba tulumainu yai dao.
- 15 Te Basango bulu du te moni bage mu dao.  
 Aga te sau pado hauwa mu elalubao.
- 16 Nage te sau pado hauwa dalubo bulu du da,  
 magi baso nago te God aga  
 dugulaluainu ebo bulu du sulama,  
 tama nago homugo  
 te olo nai tiwai da homu ebawe?  
 Genuai Bidi da, te bulu dude  
 bidada pidu, bidada paibao.
- 17 Genuai Bidi te hwįbo bomai hauwa  
 tausen karisde dugawali ami bidi dabe dali asaibao.  
 Aga te Sainai bulu duba aselama,  
 tama aga te gasa wiegi yai be mu  
 tomoba bula sagasaibao.
- 18 God te ugwanu mu yai bulu duba holama,  
 tama agai te kalabus bidi hauwa sela pai.

Agai te hagoma ebo bidi dabego  
 te aga dali hwįani bagego nogode  
 te haniani wiegi yai nai sela peyu, aga dali pali.  
 God, Genuai Bidi, te bulu dude bidaibao.<sup>x</sup>

19 Dago te Genuai Bidi nogi ugwaba sao.  
 Tigidali side agai dago seęęe tolobo dao.  
 God deligo naga da ma siyu ebo dao.

20 Dena Godigo digi te da tau siyu,  
 tama da bugagia bidibao.  
 God, dena Genuai Bidigo,  
 te da tau sobaso, tama da me isibeo.

21 Mu tama, Godigo te aga boi bidi dabe mu dolaibao,  
 te dwai kolesaga sesemane wali pabo  
 bidi dabe te tama tiaibao.

22 Genuai Bidigo te tama po wali,  
 “Te eno dagego boi bidi dabe te Basande  
 selama, ma odasa asaibao,” wali.  
 “Tagalao te tamu ąi dologode mu bidibo,  
 tede eno augwali ma odasa asaibao,” wai dao.

23 “Te dagego duga boi bidi dabeba  
 te dwai dene mobaso,  
 tama dage bugai haliga yagameo.  
 Tama duga yowi dabego te boi bidi  
 dabego kaneme te homu usu nama  
 wali peyu, te kaneme tuaibao.”

24 God, me eno king, tigidali we bidigo suali,  
 nago te hwįbode ugaba ela holama,  
 tama nage wiegi yai pemene dali asobo suali.  
 Tigidaligo nage te naga gasa tedali  
 wiegi yai be tomoba soabo suai.

25 Te tęąbi wabo bidi dabe augwali poligi soali,  
 tama te musik elibo bidi dabe  
 augwali nosali asali,  
 tama te dwasianu habidi elibo gesi  
 wegi ogwa we dabe, augwali te tomodu palio.

26 Augwaligo tęąbi po te tama tiwai po wai,  
 “Da Godigo we bidi, da sisinanio,

---

<sup>x</sup> 68:18 Ef 4:8

- tialima, dago te Godigo nogi ugwaba sao,” po wai.  
 “Da te Israel hani dabe, dago te Genuai Bidi nogi  
 ugwaba sao,” wai dao.
- 27 Te Benjamingo dwasianu hani dabe  
 augwali polasa pai.  
 Tama te Juda tobolu bidi dabe dali,  
 te Juda we bidi dabe dali,  
 augwali te Benjamin wali pai.  
 Tama te Sebulungo tobolu bidi dabe me,  
 te Naptaligo tobolu bidi dabe me,  
 te augwali nosali pali.
- 28 God, nago te naga bomo dabolo ola mao.  
 Polobadu nago te bomogo naga da tau sai dao.
- 29 Te king dabe nageba te wiegi yai  
 olo maiyabo nai presen dabe seselama,  
 tama nageba menama,  
 te nago moni lotu be tempel  
 te Jerusalemba mawai dao.
- 30 Nage te naga tempel bede bidiyu,  
 tama nago te Isipba wado ilao,  
 te uni hasa te wę pude bidibo tiwai ebao.  
 Nago te we bidi hani dabe wado ilama,  
 augwali te omai kibu bulmakau  
 te augwa wai puluba dabe dali bidibo tiwai ebao.  
 Te augwaliba wado iliyu,  
 te augwaligo nageba kidu sugunama,  
 tama augwa silva dabe te nageba momainao.  
 Nago te hwjabo homu ebo we bidi dabe  
 te sela sayu, ela gudulao,  
 tama augwa wi tedela pomainao.
- 31 Te Isip kingo te polalubo bidi dabe  
 te Jerusalemba tagala palama,  
 te nago po odomainu yaibao.  
 Tama te Itiopia dabego nogo ugwaba siyu,  
 tama nageba gedu haluasa po waibao.
- 32 Dage te gasa hani we bidi dabe,  
 dagego te tęąbi po dabe te Godiba weyu,  
 te aga nogi ugwaba sao.
- 33 Agai te dagalude bilibao,  
 tama te dagalu polobadu digi elaluai.  
 Odao. Godigo te be kulukulu wabogo



- i bomonama mu wabo dao.  
 34 Dage tigidali we bidigo te Godigo  
     genuai bomode po haninama pusao.  
     Aga te Israel dabego king dao.  
     Dago agai genuai bomo te dagalude subo dao.  
 35 Te Israelgo God te aga wiegi yai tedali bede bidibao,  
     tama dago te Godide wi yao.  
     Agai te aga we bidi dabeba te genuai bomo mobao.  
     Te God nogi ugwaba sao.

## Salmo 69

### Bidigo te Godiba hanalu, aga tau somainogo yali

- 1 God, ena tau sao.  
     Wę te pedelama, te eno dogoniba usu igulalio.  
 2 Ena te genuai aę pu tomoba hoa sigiluai.  
     Te ena doligiluabo madi te tę dili yai me elalubeo.  
     Ena te wę ge bo delama,  
         te aiyanu mu igulai madi bilibao,  
         tama te ge bo dali węgo  
         ena mesegelainu mu ebo dao.  
 3 God, eno nageba te i wedu wedu gebo sę edubadi,  
     tama eno bomo te silalio.  
     Tama eno dogoni wa pelama,  
     tama eno gedu dene yai,  
     magi baso meni, eno te sesabi elama  
     gana nago ena tau sabo tonaluai.  
 4 Te enaba odolali boi bidi ebo  
     bidi dabe, augwali te hauwa umabo mu dao,  
     te eno tobolu nisigo namba  
     te augwalide usu isąwai.  
     Te boi bidi dabego enaba dwai sę yainu yali,  
     tama augwaligo te ebo kolesaga pagede tibo po wali.  
     Te bidi dabego bomo mu elama,  
     te ena ela muabo homu yali.  
     Eno te augwaligo nai doado bage me deli  
     te eno wi me sabe, tiali goli augwaligo  
     te po hauwa enaba kisilama wali.  
     Tama tialima, eno ena doado bage digi  
     te augwaliba mawai.ʸ

- 5 God, nago ena koneanio, ena te kolesaga  
geda mubo bidi naga dao.  
Te eno dwai sę yali dabe  
te nago gedude geme me duala sabeo.
- 6 Genuai Bidi, nage te Tigidali Bomo  
Elalubo God da, nago eno te kolesaga meba  
emainogo eyu,  
te konealubo homu daę wali  
bidi dabe hale somainu elamuo.  
Te da Israelgo God, nago eno te  
kolesaga meba emainu eyu da,  
te bidi dabego te nageba lotu po wabo  
we bidi dabeba te po dwai omainogo elamu dao.
- 7 Eno nage wali pobaso,  
tama te bidi dabego posobo po enaba weyu,  
tama augwaligo ena hale emainu ebo dao.
- 8 Te eno ama dede augwaligo ena  
te gasa hani bidi tonobo tiwai yai.  
Tama ena hani we wai sibigo ena  
te augwaligo digibulu bidi tonobo  
tiwai gilama yai dao.
- 9 Eno te nago tedali wiegi yai be te godolo mu elama,  
tama eno te be wiegi yai bugagia  
elalumainu, te sę bomo ebao.  
Te bidi dabego nageba wabo dwai po,  
tama te po enaba me boaga sobao.<sup>z</sup>
- 10 Eno te nai me habu seliyu elama,  
tama te kolesaga ebogo te nago gedude ena digi  
te ena aiyaba elalubao.  
Tiali goli, te we bidi dabego enaba po dwai wai.
- 11 Eno te homu dene ebo ugwa gudali,  
tiali goli, te bidi dabego enaba dwai po weyu,  
tama posobo po enaba wai dao.
- 12 Te bidi dabe sunumiba sisinama,  
tama enade po miani.  
Tama te wain wę tulama, te gęę ebo bidi dabego  
te balia mebade te dwai po enaba weyu yali.
- 13 Tiali digi tagalao, eno te nage  
Genuai Bidiba gedu haluasa po waibao.

---

<sup>z</sup> 69:9 Jon 2:17; Rom 15:3

God, te me sogo deli nago digi te sa muani sogo,  
 nago te eno gedu haluasa po wali wei ponao.  
 Nago tama tiaibao, te magi baso meni,  
     nago te ena godolo mu elama,  
     tama nago ena ma sabo po daų walali,  
     tama nago tibo po me wagobeo. Mu menio.

14 Nago ena te wę pude ma sobaso da,  
     teda ena te tomoba hoa selama,  
     tama tede me hagagobeo.  
 Nago ena tonalubaso, te boi bidi dabego  
     ena me dologobeo,  
     tama te pu aiyanu igulali węgo  
     te ena me mesegeligobeo.

15 Nago ena te ge bo dali węgo somainu me elamuo.  
 Tama nago ena te wę ge bo aiyanu igulali  
     węde hagamainu me elama,  
     te isibo gų pagego ena elalumainu me elamu elao.

16 Genuai Bidi, sesemane sogo  
     nago ena godolo mu ebo tama te wiegi yai mu da,  
     tama tiyu, te nago eno gedu haluasa  
     po wali wei ponao.  
 Nago te olo tau sabo wiegi yai kolesaga  
     umabo mu enaba eba wida,  
     teda nago ena tau sagasao.

17 Ena naga sę bidi da,  
     tama tiyu, nago enade geme me duala selamuo.  
 Eno seęę genuai elalubao,  
     tama tiyu, nago asesa polo tama  
     te eno gedu haluasa po wali wei ponao.

18 Nage ena pąba aselama, tama ena ma sagasao.  
 Nago ena te ena boi bidi dabego nogode ma sao.

19 Te bidi dabego enaba po dwai wabo  
     te nago koneanio.  
 Tama augwaligo te ena hale emainu eyu,  
     tama ena nogi aiyaba elalubo me,  
     te nago koneai dao.

20 Te po dwai wabogo eno homu kolesaga dolama,  
     tama ena haliga seęę umabo mu elalumainu yai.  
 Tama eno bomo meniyu, me elalubeo.  
     Eno homugo te bidi mebago  
     ena homu dene yaiba homu yali,

- tiali goli me deli meni yai.  
 Tama eno homugo te bidi mebago  
     te enabolo te haliga daų walobo wiegi yai po  
     meba mayu, waiba homu yali,  
 tiali goli, te menio.
- 21 Te eno nasi ebo sogo,  
     augwaligo te dwai marasin ena mani.  
 Te ena dogoni wa pobaso,  
     tama augwaligo te ha ebo aų nogi  
     viniga naga ena mayu yai dao.<sup>a</sup>
- 22 Tialima, nosali augwali  
     te genuai nai tuboba sisinani sogo,  
     eno homugo tego augwali dolomainu yao.  
 Tama augwaligo te ofa me nai dabe sesebaso da,  
     teda tego te augwali tulaluama,  
     hagamainu emainao.
- 23 Te augwali gedu hulua somainu elama,  
     te augwaligo ma tonono yainu ebaso,  
     te usu munu ma egobeo.  
 Te augwali tudi dili dolobaso da,  
     te augwali bomo elama dolalubaso,  
     te usu me egobeo.<sup>b</sup>
- 24 Nago augwaliba te wado umabo mu eyu,  
     tama augwaliba dwai dene mao.  
 Tama nago haliga sębęgo te augwali selama,  
     tama augwali hagamainu yao.
- 25 Te augwali bidalubo pesage te olo elalumainu elama,  
     tama nago augwali me deli te bede  
     bidibo ula dali bidimainu me elamuo.<sup>c</sup>
- 26 Te bidi mebabolo nago hasiabolo  
     te augwa yali dwai sę wei ponani bidi dabe,  
     te dwai sę ebo bidi dabego  
     augwaliba dwai dene mabo sę idubao.  
 Nago te bidi meba tigiwali togolama,  
     te augwaliba dene mani bidi dabe,  
     tama te dwai sę ebo bidi dabego posobo po weyu,  
     tama augwaliba sęę mayu ebo dao.
- 27 Nago te dwai sę ebo bidi dabego dwai sęde  
     te homu kone ebo me gegeda paligio.

<sup>a</sup> 69:21 Mat 27:48; Mak 15:36; Jon 19:28-29   <sup>b</sup> 69:23 Rom 11:9-10   <sup>c</sup> 69:25 Tpi 1:20

- Tama nago te naga hani tomoba asomainu me igio.  
 28 Nago augwali nogi  
     te bidabo ula elalubo bukude  
     elalubo nogi sela sayao.  
 Tama nago te augwali nogi te  
     doloba pai we bidi dabego nogi dali  
     elalumainu me elamu dao.<sup>d</sup>
- 29 Tiali goli, ena te genuai seęę me dene tolali.  
 God, nago ena ma selama, tama ena usu ma ilao.
- 30 Te eno tęąbi weyu, tama God nogi ugwaba sai,  
     tama te eno agaba usu da po weyu,  
     tama agai genuai nogide po hanilama pusaibao.
- 31 Tama Genuai Bidigo te kolesaga wei mu ebao.  
 Agai te bulmakaugo ofa ebo te wei eyu, godolo me ebeo.
- 32 Te seęę tolali we bidi dabe augwaligo te sulama,  
     tama wiegi yai pemene yaibao.  
 Tama te Godiba lotu wabo we bidi dabe,  
     augwaligo te bomo ma saibao.
- 33 Genuai Bidigo te doado bage  
     sqą pabo we bidi dabego  
     gedu haluasa po wabo odali,  
 tama agai te aga we bidi dabe te kalabuside bidibo bage  
     te homu kone ebo me tagalugobeo.
- 34 Dagalu dali, tọ dali, tamu ąi,  
     me te tamu weęde elalubo tigidali  
     suęų dabe, dage tigidaligo te God nogi ugwaba sao.
- 35 Magi baso meni, Godigo te Saion  
     we bidi dabe te boi bidi dabego  
     nogode ma dobola selama,  
     tama agai te Juda dabego taun ma nigaibao.  
 Agai tama tiyu, tama te Godigo  
     hani bage augwa te taunde bugagia bidiyu,  
     tama te tọ tigidali somainu yaibao.
- 36 Te Godigo seę bidi dabego wai te nų dabego  
     te tọ te augwaligo saibao,  
     tama te God godolo mu elama,  
     wei ebo we bidi dabe da,  
     teda augwali te tọde sesemane sogo  
     bidada peyu, bidada paibao.

<sup>d</sup> 69:28 Sai 32:32; Ped 3:5; 13:8; 17:8

## Salmo 70

*Devitgo te balia po aseai. Te Godigo olo tau sali wiegi yai kolesaga yalide, te augwaligo homu kone ma palubo sogo da, teda augwaligo te balia wai dao.*

**Bidigo te Godigo aga tau somainu gedu haluasa po wali**

- 1 God, nago ena ma sao.  
Genuai Bidi, nage polo aselama,  
ena tau sagasao.
- 2 Bidi mebago ena ela muainu ebao.  
Tama tialima, nago augwali homu puna palama,  
tama augwali aiyaba mu elalua.  
Tama bidi mebago eno seęęde wiegi yai pemene yali.  
Nago augwali ibaba ma kilasa pomainu elama,  
tama dwai hale somainu yao.
- 3 Bidi mebago enaba posobo po wali.  
Tialima, nago augwali mu dwai ilama,  
tama augwali hale mu emainao.
- 4 Tiali digi, te nageba asobo we bidi  
augwali da, augwa te bugai haliga elama,  
tama nageba pemene emainu yao.  
Te tigidali we bidi nago augwali ma sali,  
tama te nago augwaliba yali seęde  
te augwaligo wei mu yai,  
augwa te tiwai po omainu emainao,  
“Godigo nogi ugwanu mu elalubao.”
- 5 God, eno bomo meniama, tama ena digi  
ena ma tau sabo usu isąwai.  
Tama tialima, nage polo enaba asao.  
Genuai Bidi, nago naga nago ena tau selama,  
ena ma sali bidi dao.  
Tama tialima, nago sesabi gana elama,  
me tonalugio. Polo asao.

## Salmo 71

**Monu dabe bidigo gedu haluasa po wali**

- 1 Genuai Bidi, ena nage dali bidibaso,  
tama te boi bidi dabego ena me dologobeo.  
Nago ena te augwaligo elalumainu me sula tagaligio.
- 2 Nage doloba pai mu da,  
tama tiyu, nago ena tau selama,

- tama ena te boi bidi dabego nogode ma sao.  
 Nago eno gedu haluasa po wabo odama,  
 tama ena ma sao.
- <sup>3</sup> Nage te bomai obo tiwai elalu,  
 tama te bomai be tiwai elalubaso,  
 teda ena te tomoba aselama,  
 tama nago ena tonalubao, magi baso meni,  
 ena te nageba naga aselama, te ena duala sai.  
 Nago naga ena bugagia tonalubaso,  
 tama ena bugagia bidibao.
- <sup>4</sup> Ena God, nago ena te  
 dwai bidi dabego nogode ma sao.  
 Augwaligo bomu mu eyu,  
 tama augwaligo kolesaga dwai mu ebao.
- <sup>5</sup> Genuai Bidi, eno konealubo homu  
 nageba naga muani.  
 Polobadu ena gesi ogwa bidide digi,  
 te nageba konealubo homu daų wali,  
 tama eno konealubo homu daų ola asali,  
 megiba usu nagasobao.
- <sup>6</sup> Sesemane sogo ena nago nogode naga bidiyu bilali.  
 Idago ena ame nabode,  
 te nago ena tonalua asali,  
 te megiba usu nagasobao.  
 Tama tialima, te eno sesemane sogo  
 nago nogi ugwaba saibao.
- <sup>7</sup> Te we bidi hauwago ena sulama,  
 tama eno ebo se dabede  
 te augwali homu hauwa dogia pai.  
 Tiali goli, te eno bomogo me ebeo. Menio.  
 Nago naga te ena tonalubo bomu mu ebo dao.
- <sup>8</sup> Te tigidali sogo te eno nago nogi ugwaba siyu,  
 tama nago genuai nogi  
 te we bidi dabeba hanilama, pusubo dao.
- <sup>9</sup> Megi da, ena monu dabe ebaso,  
 te eno bomu me menio,  
 tialima tiyu, nago ena tagalama tudiba muidalio.
- <sup>10</sup> Te boi bidi dabego ena ela muainu,  
 tama augwali sisinama, tama po daų waliyu,  
 ena dolaibao po wai.
- <sup>11</sup> Augwa te tama po wali,

- “Ae, tegoba, dago aga pobelama,  
 tama tola sinao,” wali.  
 “Te aga tau sabo bidi me deli menio.  
 Godigo aga tagalai dao,” wali.
- 12 Tialima, God, nage enade digibulu me bidigio.  
 Eno God, nage polo tama aselama, ena tau sagasao.
- 13 Te enaba po kisilama wabo bidi dabe,  
 nago augwali elaluama, tama augwali mu silao.  
 Augwaligo ena dolainu yali,  
 tialima, nago augwaligo homu  
 kolesaga puna palama,  
 tama augwali hale dwai mu emainu yao.
- 14 Tiali goli, eno sesemane konealubo  
 homu nageba dąų olalu,  
 tama eno nago ena tau sabo tonalubao.  
 Te eno nago nogi ugwaba mu saibao.
- 15 Te eno te we bidi augwaliba  
 te nago doloba pai kolesaga ebo po te pusaibao.  
 Eno te nago ebo sę page tigidali  
 te bugagia konesiąbadi digi,  
 tiali goli tagalao, te tigidali side eno  
 te augwaliba weyu,  
 te nago ena ma sali po waibao.
- 16 God, Genuai Bidi, te eno nago  
 genuai bomode homu kone palu,  
 tama te eno nago nogi ugwaba sobao.  
 Eno te tiwai po waibao,  
 “Genuai Bidi naga, aga te doloba pai dao,” waibao.
- 17 God, nago ena te sogo  
 te dwasianude digi ola mani,  
 tama megi e sogoba usu nagasobao,  
 tama eno nago te wiegi wiegi yai  
 sę dabe ebo po pusudu gebo dao.
- 18 Megi da, ena monu dabe elama,  
 te ena tobolu nisi ayadeba yalio,  
 tiali digi God, nago ena me tagagio.  
 Nage ena dali bidiyu,  
 tama eno nago genuai bomode po  
 te nosali pedalubo we bidi dabe pusaibao.
- 19 God, nago doloba pai kolesagago



- te tigidali badu usu nani,  
tama te tigidali we bidigo gedude  
te pepeli dilide elalubao.
- Nago genuai se mu yai.  
Te tęde bidi me deli te nage tiwai me elalubeo.  
Menio. Nago tigidali mu elaluai dao.
- 20 Nago te deli tigi poai seęę enaba tagala palali.  
Tiali digi, eno koneai,  
te nago ena ma daę walainu yai.  
Te ena gę pageba pidali weyu,  
te nago ena ma hodolaibao.
- 21 Te nago eno nogi te genuai mu igi pomainu yali,  
tama nago eno haliga te dua nagame  
ma emainu yai dao.
- 22 Te eno gita me musik eliyu,  
te eno nago nogi ugwaba sobao.  
Eno God, nago ena me tagalisięwai,  
nago po te mu naga dao,  
tama tialima, te eno nago nogi ugwaba sobao.  
Te Israelgo God, nage tedali wiegi yai elalubao.  
Te eno gita eliyu, tama tęębi weyu,  
nago nogi ugwaba sabo dao.
- 23 Eno te musik weyu, te ena wiegi yai pemene elama,  
i waibao.  
Te eno nageba tęębi po wabo,  
te pedauwaligo naga me wagobeo. Menio.  
Te homu kolesaga tigidaligo me, haliga daligo me obao,  
magi baso meni, nago ena ma sai dao.
- 24 Tama tialima, tigidali sogo te eno te we bidi dabeba  
te nago doloba pai kolesagade po  
hanilama pusaibao.  
Magi baso meni, te bidi dabego ena dolainu usu sali,  
tiali goli, nago augwali aiyaba elaluama,  
tama augwali hale mu ilali.

## Salmo 72

**Bidigo gedu haluasa po weyu, Godigo te king tau somainu wali**

- 1 God, nago te king doloba pai kolesaga  
bugagia ola mao.  
Tama agai te we bidi dabe

- po tųde bugagia dagalumainao.  
 Nago po tų te doloba pai naga ebo dao,  
 tama nago te king tau sobaso da,  
 teda agai me te doloba pai po tų emainao.
- 2 Tama agai te nago we bidi dabe me,  
 te dwai bidi dabe me,  
 te doloba pai kolesagago tonaluaibao.
- 3 Nago te wiegi yai sę hauwa  
 te augwaligo sęde pedalumainu yao.  
 Tama nago te we bidi dabego  
 te doloba pai kolesaga sesemane sogo emainu yao.
- 4 Kingo te dwai bidi dabego sęęę bugagia dodolama,  
 tama agai te doado bage sọą pabo  
 bidi dabe tau somainu yao.  
 Tama agai te gasa bidi dabeba  
 te dwai sę yainu ebo bidi dabe elalumainu yao.
- 5 Te giliga me polua ula elalubadi,  
 te naga we bidi dabego nageba lotu po omainu yao.
- 6 Nago te king wiegi yai bidi pedalumainu ilao,  
 teda agai kolesaga wiegi yai eyu,  
 te tulubage te gi nasi dabeba tulama,  
 tama te nai wiegi yai pedalubo tiwai emainu yao.
- 7 Tama aga bidibo sogo te bidi dabego  
 te doloba pai kolesaga naga wali pomainu yao.  
 Tama te wiegi yai nai hauwa te tigidali sogo  
 te polua pedelama elalubo sogo te pedalumainu yao.
- 8 Aga te king bidiyu, tama te tamu ąi pąbadu bidalubo  
 tigidali we bidi me,  
 te tamu ąi digibulu badu bidalubo  
 we bidi me, te tonaluaibao.  
 Tama agai tọ dąi te wę Yufretisde gagalasa palama,  
 te tigidali bulu tọ pedaiba usu nigi paibao.<sup>e</sup>
- 9 Te masigi kemi tọ yai bulude  
 bidalubo hani bage dabe,  
 teda augwali te king dologode bidaibao.  
 Tama aga boi bidi dabe te tọba dolo pigulaibao.
- 10 Te Spen king, me te tamu ąi tomo  
 bulu ailan king dabego, teda augwaligo agaba

---

<sup>e</sup> 72:8 Sek 9:10

- te wiegi yai nai presen dabe mawaibao.  
 Tama te Arebia king me, Itiopia kingo me,  
 teda augwaligo agaba takis mawaibao.
- 11 Tigidali kingo agaba kidu sugunaibao.  
 Tama tigidali hani we bidigo te agai sę yaibao.
- 12 Agai te magi nai meni yai bidi  
 dabego agaba i obaso,  
 te agai augwali tau sabo dao.  
 Tama te we bidi dabe  
 te doado bage sę pelama,  
 tama te tau sabo menibaso da,  
 teda aga digi te augwali tau saibao.
- 13 Agai te bomo meni yai we bidi dabe  
 te dwai bidibo, te agai augwali homu dene ebo dao.  
 Tama te magi doado bage meni yai  
 we bidi dabe agai augwali ma sabo dao.
- 14 Te dwai sę ebo bidi dabego augwali elaluama,  
 tama augwali dolainu ebaso da,  
 agai augwali ma siyu ebo dao.  
 Agai augwali godolo elama,  
 wei ebaso te tiwai eyu ebo dao.
- 15 Eno homugo te king te sesabi  
 gana elama, bidimainu yao.  
 Te Arebia dabego agaba te gol momainao.  
 Tama te we bidi dabego Godiba  
 gedu haluasa po weyu, te Godigo aga sesemane  
 tau somainu yao, tama Godigo agaba  
 te wiegi yai sę agaba emainao po wai.
- 16 Te yuyu me wit hauwa te we bidi  
 dabego gide pedalumainu yao,  
 te Lebanonde pedalubo usu tiwai.  
 Tama te we bidi dabe  
 te taunde hauwa pedalumainu yao,  
 te nosa hauwa te tigidali pedaide  
 pedalubo tiwai emainao.
- 17 Tama te bidi hani bagego  
 te kingo nogi homu kone me gegeda palu tagaligio,  
 tama agai genuai te sesabi gana elama,  
 te giliga nanalubo sogo usu nama elalumainu yaibao.  
 Tama tigidali hani we bidigo aga nogi ugwaba sao.

Tama augwa te Godiba hanalu,  
 te augwali wiegi yai homu ilibo nai  
 momainu yao wao,  
 te agai te king wiegi yai homu ilali tiwai emainu yao.

- 18 Te God nogi ugwaba sao,  
 te Israel dabe augwa Genuai Bidi dao.  
 Agaduba deligo naga te wiegi yai seḡ dabe ebo dao.
- 19 Te agai wiegi yai nogi te sesemane sesemane sogo  
 ugwaba sao.  
 Te agai Genuai nogigo te tigidali tḡ badu usu nai dao.  
 Te mu tama dao.
- 20 Te Jesigo ogwa, Devitgo wali  
 te gedu haluasa po dabe  
 te megi eba tama siminagasobao.

### **Buku 3**

*(Tib 73-89)*

## **Salmo 73**

**Godigo te dwai seḡ ebo bidi dabeba dwai dene mawai**

- 1 Godigo te Israel dabeba  
 wiegi yai mu yai.  
 Godigo te wiegi yai haliga elalubo  
 we bidi dabeba te wiegi yai seḡ mu ebo dao.
- 2 Tiali goli, paḡde ena te dwai seḡeḡba tulaluainu yali.  
 Ena te saḡa pasega muyu,  
 tama ena tagalainu ebo tiwai yali.
- 3 Magi baso meni, eno suali, te dwai seḡ ebo bidi dabe  
 te moni bidi pedalubaso,  
 tama eno te hagoma ebo bidi dabego  
 nai dabede pesa yali.
- 4 Augwali te augwa tigide te dene me sisawani.  
 Augwali te bomai bidi dabe,  
 tama augwa tigi te wiegi yai naga elalubao.
- 5 Augwali te seḡeḡ meba tolisiayū,  
 te gasa bidi dabego seḡeḡ tolobo tiwai me ebo meni.

- Te gasa bidi dabe augwali te haniani seḡe tolali,  
tiali goli te tobage seḡ augwaliba me pedalisiḡbo.
- 6 Tama augwali te odolali hagoma elama,  
tama augwa tigi pemene dogia pabo dao.  
Tama augwaligo gasa olo bidi dabe elama,  
tama aga doliyu ebo dao.
- 7 Te augwa haligade homugo,  
augwa yainu homu ebo  
te haniani dwai kolesaga augwaligo  
ebaso, te pedelali.
- 8 Augwaligo te posobo po gasa bidi dabeba weyu,  
tama augwaligo te bidiba  
te dwai seḡ yabo po wabo dao.  
Augwa te hagoma mu eyu,  
tama augwa te gasa we bidi dabe  
dolabo sunumi gegebo po mia sabo dao.
- 9 Augwaligo po dwai  
te dagalude bidibo Godiba wabo dao.  
Tama augwa digi te augwa nogi ugwaba selama,  
tama augwaligo te we bidi dabede bomu eyu,  
te augwaligo homu wali pao po weyu ebo dao.
- 10 Tama te Godigo we bidi dabego  
te hagoma ebo bidi dabego po wei elama,  
tama augwaligo te poba homu keḡ pai.
- 11 Te dwai seḡ ebo bidi dabego te tiwai po wabo,  
“Godigo te dago ebo seḡ  
te mena tama me konegobeo,” wai.  
“Te Ugwade Mu Bidibo Godigo te dago ebo kolesaga  
te gegelama hanilama  
sunumi me elalubeo,” wabo dao.
- 12 Te dwai seḡ ebo bidi dabego te tama tibo dao.  
Augwaligo doado bage te hauwa elaluali,  
tiali goli augwaligo umabo mu sabo seḡ ebo dao.
- 13 Ena bugagia tonalubaso,  
tama eno haliga te wiegi yai elaluali,  
tama eno te dwai seḡ meba me ebeo.  
Te tiali seḡ te odolali hagawaibao, agawe?
- 14 Magi baso meni, te giligade me hulide  
God, nago dene enaba mani, tama tigidali kigamude  
nago te dene enabolo mawai.
- 15 Eno te bidi dwai dabego wabo po tiwai,

- te nago we bidi dabeba wagi da,  
teda eno augwali tibo po ola mayu,  
te augwali homu puna palagi dao.
- 16 Eno homu hauwa elama,  
tama eno te sę page konemainu ebao,  
te dwai sę ebo bidi dabego ebo sę page.  
Tiali goli, te enade sesabo sę mu ebo dao.
- 17 God te eno usu sesa pidubadi,  
te ena nago be tomoba peyu, usu nigi pai.  
Ena te nago bede bidiyu,  
tama eno homu peda pelama,  
tama te dwai sę ebo bidi dabeba  
mena nai pedelabo te eno koneai dao.
- 18 Nago augwali bilabo sunumi  
te bedege mu emainu ilama,  
tama nago augwali tula mumainu elama,  
tama augwali mu dolomainu ilaibao.
- 19 Augwali te polo tama dolali.  
Tama augwali te isibo te dwai mu ebo dao.
- 20 Genuai Bidi, augwali te na ebo bidi tiwai elama,  
tama te na yali te kigamu be posobode silaibao.  
Bidigo te kigamu hodaluama,  
tama te na yali te agai homude me ma elalugobeo.
- 21 Te sogo eno homu te midigi selama,  
tama eno haligago te dwai mu yai.
- 22 Tama eno homu te pania selama,  
tama eno nago kolesaga me konesiąwai.  
Eno te nago gedude kolesaga yali,  
te uni hasago homu kolesaga umuna pabo tiwai ilali.
- 23 Tiali goli, ena nage dali sesemane bidibaso,  
tama nago ena nogo tolalubo dao.
- 24 Nago ena bugagia bilimainu ebo po mawai,  
tama nosali nago ena sobaso, tama ena nage dali  
te dagalude bidaibao.
- 25 Te gasa de te dagalude bidiyu,  
tama ena tonalubo dawę?  
Te gasa bidi me meni, naga deli naga dao.  
Tialima, God, eno nage godolo mu ebao.  
Eno te tigidali tęde nai wei ebo tiwai gilama me ebeo.
- 26 Te eno tigi, me homu kolesaga,

- te bomo me elalusiąbaso da,  
teda God, nago digi nago ena daų walao.  
Tama nage ena dali bidiyu,  
tama ena sesemane bidada peyu,  
bidada pabo sogode te ena usu mu elaluaibao.
- 27 Mu tama, te nage tudiba mubo we bidi dabe,  
teda augwali mu hagawaibao.  
Tama nage polobadu te wali pali bidi dabe,  
tama megi te augwaligo nage tagalubaso da,  
teda nago augwali dolaibao.
- 28 Tiali goli, ena, te ena nage pađe bidibaso,  
tama te wiegi yai mu ebao.  
God, Genuai Bidi, nago ena mu seselalubo da,  
tama eno nago yali seų po tigidali  
hanilama, pusainu ebo dao.

## Salmo 74

### Bidigo te gedu haluasa po weyu, te Godigo te Israel dabe tau somainu yai

- 1 God, magi baso nago da tudiba mubawe?  
Te nago wado po sesemane  
te naga we bidi daba ududa, agawe?
- 2 Nago te naga hani bage dabolo  
te homu kone ma palao.  
Polobadu mu nago te naga we bidi da sa muai.  
Nago da ma abelama,  
tama da naga hani bidimainu yai.  
Nago te Saion bulu duba homu kone ma paliyu,  
te polobadu tede nage bidai dao.
- 3 Te dago boi bidi dabego  
te dago moni lotu be tempelde  
doado bage tigidali dolalio.  
Te doado bage dolali elalubo, te nage aselama, suagasao.
- 4 Te nago boi bidi dabego te tempel be selama,  
tama augwali te nago tedali  
te wiegi yai pesage elalubo madi tomode dolalu,  
tama augwaligo win yai da olama, i wali.
- 5 Augwaligo te nago bede ni name togwali,  
te bidi dabego te buside ni togobo tiwai yalio.

- 6 Te ni name dabe augwa nigilama,  
tama te wiegi yai nai dabego au ilai,  
te boi bidi dabego te sigi hwa me  
seḡe yai hamago aluai dao.
- 7 Augwaligo te nago tedali wiegi yai be te siago ulali.  
Augwaligo te tedali wiegi yai pesage elaluali dolali,  
te nago we bidi dabego nageba lotu wabo madi,  
te dolai.  
Augwaligo aluama, tigidali mu dolai dao.
- 8 Augwaligo te da mu dolabo homu yalio.  
Tama tialima, augwaligo te Godigo lotu be tigidali  
dago tḡde elalubo, te siago ulai.
- 9 Te nago dabolo mani te tigidali sa muani nai,  
te augwaligo sela saḡwanio.  
Tama dago profet megi me bidibeo.  
Te da me deligo te seḡe te mena sogo silabo,  
te dago me konebeo.
- 10 God, nisu sogo naga te boi bidi dabego dabolo  
te posobo po udumainu yaibawe?  
Te augwaligo naga nogide  
te sesemane sogo po dwai omainu yaibawe?
- 11 Magi baso nago da tau sisama ebawe?  
Magi baso nage odolali naga dulalubo daweo?
- 12 Tiali goli God, polobadu mu nage dago king bidali,  
tama megi me nage dago king bidibao.  
Tama hauwa sogo nago da tau selama,  
tama da te hwiḡani digi da me dolobeo.
- 13 Te nago bomode naga,  
nago te genuai tamu aḡ togolama,  
tama me badu buga siyu,  
meba buga siyu elama, dolaluali.  
Tama nago te Isip we bidi dabe dolali.  
Augwali te tamu aḡde moni suḡu tiwai yalio.<sup>f</sup>
- 14 Tama nago te genuai pukpuk dabego tobolu aluali,  
te Isip tobolu bidi dabe da,  
tama nago agai tigi te augwali  
te kemi tḡ wa pai bulude bidibo  
uni hasa dabeba menama, tama augwa tuai dao.<sup>g</sup>
- 15 Nago te weḡ dabe te tḡde pedalumainu elama,

<sup>f</sup> 74:13 Sai 14:21    <sup>g</sup> 74:14 Jop 41:1; Tib 104:26; Ais 27:1



- tama te wę dabe tedu palio.  
 Tama nago te genuai wę dabe  
 tigidali mu sula somainu ilai dao.
- 16 Nago te be posobo me be hulibo nigali,  
 tama nago te giliga me polua  
 te ugwadu muai elalubao.
- 17 Tama nago te tigidali tęo dę muanio.  
 Tama nago te tigidali kibu bede  
 giliga nanobo sogo muyu,  
 te tulubage tulubo sogo muyu yai elalubo dao.
- 18 Genuai Bidi, nago homu kone ebo me tagaligio.  
 Te nago boi bidi dabego te posobo po nageba obao.  
 Augwali te esela pabo kolesaga  
 meni yai bidi tiwai eyu,  
 tama augwa homugo nage  
 te olo bage me tiwai da homu ebo dao.
- 19 Te nago hani bage te augwali bomo meni yai.  
 Tama tiyu, nago da tagalubaso,  
 tama te boi bidi dabego daba  
 te dwai sę mu elama mu dolaibao.  
 Te boi bidi dabego te naga we bidi dabolo  
 te dwai dene mabo sę ebao.
- Iya, nago da homu kone me gegeda paligio.
- 20 Te tigidali tę pedaide, te dago tęde me  
 te bidi dabego wabi hwę hwę pai.  
 Tama tialima, nago da dali te dę walali bomai po  
 te homu kone ma palao.
- 21 Nago te dwai bidi dabego te gasa bidi dabe agalama,  
 tama augwali aiyaba mu elalumainu  
 me sula tagaligio.  
 Nago te magi doado meni yai te nai dabe  
 sę pabo bidi dabe tau sobaso da,  
 teda augwaligo te nago nogi ugwaba somainao.
- 22 God, nage aselama, te boi bidi dabe dali  
 po bomu elama wagasao.  
 Nago te hagoma ebo bidi dabego te  
 tigidali sogo posobo po nageba wabo,  
 te nago homugo koneao.
- 23 Te nago boi bidi dabego  
 te genuai po dęę ola biliyu,

nageba po dwai weyu ebao.  
 Augwaligo te sesemane genuai i naga wabo dao.  
 God, nago te augwaligo kolesagade  
 homu kone me gegeda paligio.

## Salmo 75

**Godigo te dwai sę ebo bidi dabe aiyaba elaluama,  
 te wiegi yai bidi dabe tau sabo dao**

- 1 God, dago usu da olama,  
 tama nago nogi sesemane ugwaba sabo dao.  
 Tama dago nago genuai nogide po hanilama pusuyu,  
 tama augwaliba te nago haniani  
 wiegi yai sę ebo po pusubo dao.
- 2 Godigo te tama po wali, “Eno te po tų yabo sogo  
 bodolu me deli te daį ilai elalubao.  
 Tama eno po tų te dolo mu paibao.  
 Te me kone tua pogobeo.
- 3 Tų dali tede bidalubo nai tigidali te hagawaibao.  
 Tiali goli, te tų page da,  
 te eno tolalu, tama bomo elalueibao.
- 4 Eno te hagoma ebo bidi dabebolo po walali,  
 ‘Dagego te hagoma me igio,’ po wali.  
 Tama eno te dwai sę ebo bidi dabebolo walali,  
 ‘Dagego te duga nogi ugwaba me sigio,’ po wai.
- 5 ‘Dagego duga bomogo digi  
 te wiegi yai pemene me igio,  
 tama dagego po daęą genuai weyu,  
 tama ena posoyu me elamu dao,’ wali.”
- 6 Te we bidigo kolesaga dagalubo sę  
 te giliga asobo badu, me te giliga dega sabo badu,  
 ma te not badu me, saut badu me  
 pedalubeo. Menio.
- 7 God agaduba deligo naga dago  
 kolesaga dagalaibao.  
 Agai te bidi me deli aiyaba elalu, tama te gasa bidi  
 ugwaba sagoa sabo dao.
- 8 Genuai Bidigo te bomo yai gesi wain wę te kap  
 me delide paęąwai tolaluai.

Agai gea palama, tama tigidali bidi dwaigo tulama,  
tama mu siminanio.

Te tama tiwai naga te dwai sę̄ yali we bidi dabe  
te Godigo po tų̄ba pedelama,  
tama te augwali mu hagawaibao.

<sup>9</sup> Tiali goli, eno te Jekopgo God po  
te sesemane hanilama pusaibao,  
tama eno agai nogide  
te tę̄abi umabo mu udubadi geaibao.

<sup>10</sup> Te Godigo te dwai sę̄ ebo bidi  
dabego bomo silimainu yaibao,  
tiali goli, agai te doloba pai bidi dabebolo  
te genuai bomo mu mawaibao.

## Salmo 76

### Godigo te hw̄iani ugaba ela holali

<sup>1</sup> Te Juda dabego God bugagia koneai.  
Tama te Israel dabego  
agai genuai nogi ugwaba salio.

<sup>2</sup> Aga be te Jerusalemde elalubao.  
Tama aga sesemane sogo  
te Saion bulu dude bidibo dao.

<sup>3</sup> Te bulude agai te boi bidi dabego  
enesigi ene dabe me,  
te sabele delage me tologali, tama augwaligo  
bainat hw̄a me togwai.  
Godigo te hw̄ibo doado bage tigidali dolai dao.

<sup>4</sup> God, nago genuai nogi elalu,  
tama nage te polalubo king dao.  
Nage ugwanu mu elalu,  
tama nago genuai nogigo te genuai  
bulu du dabego genuai nogi aiyaba mu elaluai.  
Te bulu du pesagede nago  
te boi bidi dabe dali hw̄inama,  
tama nago augwali elaluama,  
tama nage ma begasa asai dao.

<sup>5</sup> Augwaligo te augwa bomai ami dabego  
wiegi yai doado bage dagala siyu yai.

- Tama megi da, te ami dabe isalio.  
 Tama augwaligo te hwįani  
 doado bage sabo bidi dabe meni yanio.
- 6 Te Jekopgo God, nago augwali wado ilama palialio.  
 Tama tibaso, te hos dabe dali,  
 te hosde dugawali bidi dabe me,  
 tigidali isila silama, tama tęde te pila mubao.
- 7 Tiali goli, God, te bidi dabego nagede  
 te wi umabo mu ebo dao.  
 Te nago augwaliba wado po obaso da,  
 teda de te nago gedude  
 dolalubo sogo usu egowe?  
 Te me deligo usu me egobeo.
- 8-9 Nage te dagalude bidiyu,  
 tama nago te tigidali we bidi po tų ela mawaibao.  
 Te sogo nage dolugulama,  
 tama nago te bidi dabe augwaba  
 te augwa po tų yabo po pusaibao,  
 tama nage asiyu, te gasa bidi dabego  
 dolali we bidi dabe tau sagasaibao.  
 Tama tigidali we bidi wi mu ebaso,  
 tama po me wagobeo.  
 Augwa pedauwali pania siyu naga yaibao.
- 10 Te bidi dabego haliga seęę yali,  
 tiali goli, te tebogo te gasa bidi dabego  
 nago nogi ugwaba somainu ebao.  
 Tama te hwįbode dolisawąni bidi dabego  
 te genuai lotu wabo sogode te nageba lotu waibao.
- 11 Nago te naga Genuai Bidi  
 Godiba te bomai po daų walali,  
 teda nago te daų walali po wali pao.  
 Nago tibo po me wagio.  
 Dago te Genuai Bidide wi elama,  
 tama tiyu, te tigidali we bidigo  
 te agaba wiegi yai olo maiyabo nai dabe selasa pao.
- 12 Agai te hagoma ebo king dabe te aiyaba elalueibao.  
 Agai te tęde king dabe te wi mu ilibo dao.

## Salmo 77

Godigo te bidi me deliba te seḡe ebo sogo  
te nagamea pai homu mawaibao

- 1 Eno Godiba i bomo elama obao.  
Eno homugo te agai eno gedu haluasa po wabo  
odomainu ebao.
- 2 Te seḡe ebo sogo, eno te Genuai Bidiba  
gedu haluasa po agaba weyu yali,  
tiali goli, eno te nagame pai homu ebo me sabeo.
- 3 Eno homugo Godiba kone palama,  
tama eno haligade gela wali.  
Eno homu konealubode tama  
eno haliga seḡe elalui.
- 4 Godigo ena godege pimainu me ebeo.  
Eno haliga te seḡe mu ebaso,  
tama tiyu, eno po wabo usu me ebeo.
- 5 Eno te polobadu yali wiegi yai sogoba  
homu kone palali.  
Mu tama, eno te bidali kibu be dabe  
tede homu kone ma yalio.
- 6 Te hulide eno homu kone paludubo seḡe yali.  
Eno homu hauwa elama, tama enaba digi ena te tiwai  
hanalu wai.
- 7 “Te Genuai Bidigo ena te sesemane sogo  
tudiba muba homu ebawe?  
Te agai ena godolo homu mu  
me isiḡo homu ebo agawe?”
- 8 Agai megi ena homu dene me ebewe?  
Te aga daḡ wali po te tulalumainu eba, agawe?”
- 9 Te Godigo homu kone gegeda paliyu,  
tama te olo tau sabo wiegi yai  
kolesaga dabolo me egobe homu eba, agawe?  
Te agai wado ebogo te olo tau sabo  
wiegi yai kolesaga te palia sali homu ebawe?”
- 10 Eno te tama homu eyu, tama eno te po wali,  
“Te Ugwade Mu Bidibo Godigo te ena megi me tau sabeo.  
Tama tialima, eno tede te haliga seḡe mu ebao,” wali.
- 11 God, te eno nago te genuai seḡe dabe yaliba  
te homu kone ma palobao.

- Awe, te eno nago polobadu te haniani sę dabe yaliba  
te homu kone ma palubo dao.
- 12 Te eno nago yali tigidali sęba  
ma homu kone palaibao.  
Nago te bomai sę dabe yali,  
tama eno te me homugo koneaibao.
- 13 God, nago kolesaga tigidali  
te tedali wiegi yai naga dao.  
Te tibo god me deligo nage dali usu me egobeo.  
Nago augwali aiyaba mu elaluai dao.
- 14 God, nagaduba deligo naga te bidi mego isąwai  
bomai sę ebo dao.  
Polobadu nago genuai bomo te tigidali  
we bidi haniba ola mawai dao.
- 15 Te naga bomogo digi nago  
te naga we bidi dabe ma sali,  
te Jekop de Josep sigo wąj nęų hani dabe,  
te augwali si tudi badu nosali pedelali bage dao.
- 16 God, te polobadu te wę dabego  
nage sulama, augwali wi mu yali,  
tama te aiyadu mu elaluali  
tamu ąj me te gęų yai dao.
- 17 Genuai tulubage mu tuluyu,  
tama pę bomonama kulukulu weyu,  
tama te pęgo be sele ula edaba asiyu, uba peyu yai.
- 18 Nago te pę te popoge ebo wali tomode  
kulukulu omainu ilali.  
Te pęgo be sele eyu, ula ebo  
te tigidali tę pedaiba ula yali, tama tę aga digi  
te mumunu mumunu yai.
- 19 Nage wali te tamu wę tomode bilali.  
Nago sunumi te genuai tamu ąj tomode elaluali.  
Tiali goli, dago te nago sęąą pasalu me susiębo dao.
- 20 Nago te tonalubo bidi mu tiwai elama,  
tama nage polasa pobaso,  
tama te we bidi dabe nage wali pelawai.  
Nago sę te Moses de Aron sibolo menama,  
tama augwali sigo te augwali tonaluai dao.

## Salmo 78

God aga we bidi dabe dali yali sę po wai

- <sup>1</sup> Eno hani bage dabe,  
dagego eno po bugagia odao.  
Dagego eno wainogo ebo poba olo bugagia muao.
- <sup>2</sup> Eno dageba te po dabe pusainu ebao.  
Eno te haniani sę dabe te polobadu geme dualaluali sę  
me te megi e sogoba usu nagasu, te po pusaibao,  
tama eno te po dabego  
page dagebolo pusaibao.<sup>h</sup>
- <sup>3</sup> Polobadu te wąj nų dabego dabolo  
te tiali sę dabe po wali,  
tama dago odolama, tama dago te koneai dao.
- <sup>4</sup> Dago te po te dena wai dabeba  
geme me dualugobeo.  
Menio, te dago te gesi tamadi ame nabo  
wai dabeba te po waibao.  
Te dago Godigo genuai bomogo yali sę po pusaibao,  
tama te bomai sę dabe me agai yali,  
tama te bidigo isiąwai sę  
te haniani bomai sę agai yai dao.
- <sup>5</sup> Godigo aga bomai po  
te aga we bidi Israel dabebolo mawai.  
Agai po te Jekipgo wąj nų dabebolo menama,  
te augwa wali pomainu yai.  
Agai te polobadu wąj nų dabebolo te tama po wai,  
“Dagego te duga wai dabeba te eno bomai po tigidali  
te bugagia ma mao,” po wai.
- <sup>6</sup> Tama tialima, te nosali pedalubo hani wai dabego  
te nosali augwa me ola mayu,  
tama te hanigo te augwa wai dabeba  
te po omainao, te po wai.
- <sup>7</sup> Te augwa te tiwai eyu da, teda te hani dabego me te  
Godiba konealubo homu daų waibao,  
tama agai te yali sę dabe  
te augwaligo homu kone gegeda  
pidali weyu, te tiwai yao.  
Tama te augwa agai bomai po tigidali wali pomainu yao.
- <sup>8</sup> Tiyu, augwali te augwa wąj nų dabe

<sup>h</sup> 78:2 Mat 13:35

- tobage tiwai pedelabuo.  
 Te wąj nqđ dabego te hagoma eyu,  
 tama Godigo po sela şanama,  
 tama augwa konealubo homu agaba  
 dąđ mu me wasiąwai,  
 tama augwaligo te agai po sesemane wali me pabeo.
- <sup>9</sup> Polobadu te Efraim dabego hwįani,  
 te enesigi enego te hwįai.  
 Tiali goli, te sogo te wąbi hodolama hwįbaso,  
 tama augwali wi pai dao.
- <sup>10</sup> Augwaligo te Godigo dąđ walali  
 bomai po wali pisąyu,  
 tama augwaligo agai bomai po  
 wali pabo homu isiąwai dao.
- <sup>11</sup> Augwaligo te agai yali sę dabe  
 te homu kone gegeda pali,  
 tama te bidigo isiąwai bomai sę  
 agai te augwali gedude yai,  
 te me augwaligo gegeda pali.
- <sup>12</sup> Te wąj nqđ dabego gedude Godigo  
 bomai sę me deli te Soan bulu,  
 te Isip tq pedaide, yai dao.<sup>i</sup>
- <sup>13</sup> Godigo te tamu ąį togolama,  
 tama tamu ąį te me badu buga siyu,  
 me badu buga siyu elama, dolaluali,  
 tama agai te Israel dabe tomodu  
 odasa palio.<sup>j</sup>
- <sup>14</sup> Te giligade aga te pđdu polasa pali,  
 tama hulide aga te sia ulade  
 te augwali asobodu polasa pai.<sup>k</sup>
- <sup>15</sup> Agai te masigi tq bulude  
 te masigiba elama,  
 tama te wę aiyadu pedalumainu  
 elama, te augwaligo tuali.
- <sup>16</sup> Agai te masigide wę pedalumainu  
 elama, tama wę te busidu soabo  
 genuai wę tiwai soali.<sup>l</sup>
- <sup>17</sup> Tiali goli, augwaligo te Ugwade Mu Bidibo Godiba

<sup>i</sup> 78:12 Sai 7:8-12:32    <sup>j</sup> 78:13 Sai 14:21-22    <sup>k</sup> 78:14 Sai 13:21-22    <sup>l</sup> 78:16 Sai 17:1-7;  
 Nam 20:2-13



- dwai se yali,  
tama augwali te kemi to bulude  
bidiyu, agaba hagoma yalio.
- 18 Augwaligo God usu siyu, te tiwai yai.  
Augwaligo i bomonama agaba weyu,  
te augwaligo wei ebo nai agai momainu yai.
- 19 Augwaligo te tiwai posobo po Godiba wali,  
“Godigo dabolo te to wa pai bulude  
te nai hauwa mabo usu yaiba, agawe?
- 20 Mu tama, hasiabolo agai  
te genuai masigiba elibaso, tama te we pedelali.  
Tiali goli, magi ebawe?  
Agai dabolo te bret meba me  
te tubo mi magowe?” wali.
- 21 Tialima, Genuai Bidigo augwaligo po odolama,  
tama agai wado po wali.  
Agai te Jekopgo hani dabeba te sia tula palali.  
Tama agai wado po te genuai mu pedelalio.
- 22 Magi baso meni, augwaligo konealubo  
homu agaba musiḗwai.  
Tama te agai augwali tau selama,  
te bugagia bidimainu yaibao,  
tede augwaligo agaba konealubo  
homu ḗ me wabeo.
- 23 Tiali goli, tagalao, agai te ugwadu elalubo dagaluba  
po olama, tama te dagalu dalaluai dao.
- 24 Tialima, agai te nai mana tagala palama, tulalubosi,  
te augwaligo selama, tuali.  
Agai te dagalude nai te we bidi dabe augwaliba  
mawai dao.<sup>m</sup>
- 25 Tama tialima, augwa te enselgo nai salio.  
Godigo te nai hauwa mu augwaliba menama,  
tama augwali usu mu yai.
- 26 Tama nosali agai te giliga  
pedalubo badu te wali hodolali,  
tama agai bomogo naga,  
agai te saut badu wali hodolali.
- 27 Tama agai te ba sibi hauwa mu  
te to hogomu tiwai me,

---

<sup>m</sup> 78:24 Jon 6:31

- te nabis wę sande te kemi tiwai,  
te augwali tomoba tulalumainu yai dao.
- 28 Godigo te ba dabe te augwa  
bidalubo pesage tomoba tulalumainu ilali,  
tama augwaligo ugwa be bagua salio.
- 29 Tama tialima,  
te we bidi dabego tulama,  
tama augwa mu paęana peyu, tabia palio.  
Te we bidi dabego sainu te gela wali nai,  
te Godigo augwali manio.
- 30 Augwa te nai tutubo sę yai.  
Mu tama, augwa te nai tula silisąbadi,
- 31 tama Godigo augwaliba wado po weyu,  
tama te bomai bidi dabe ela muani,  
te Israel wiegi yai ogwa bidi dabe dao.<sup>n</sup>
- 32 Godigo te bidigo isiąwai  
te tobage bomai sę dabe yali,  
tiali goli, te we bidi dabego  
te dwai sę umabo mu idu geyu,  
tama augwaligo konealubo homu  
agaba daę me wabeo.
- 33 Tialima, polo tama mu, te agai augwali dola silalio,  
te pedauwalide mobo pedelama,  
te polo pela silibo tiwai yalio.  
Agai augwali polo tama mu dolama,  
tama augwali isai dao.
- 34 Te Godigo meba ela mubo sogo,  
te gasa bage ge neyu, augwa homu begelama,  
tama agaba ma begasa aselama,  
tama agaba gedu haluasa po bomonama walio.
- 35 Te megı da, augwaligo homugo ma koneama,  
God te augwa tonalubo bidi dao homu yai.  
Te Ugwadu Mu Bidıbo Godigo agai  
te augwali tau sabo bidi dao.
- 36 Tiali goli, augwa tıbo po olama,  
tama agaba te odolali pedauwalide  
ąı soabo tiwai elama, daganobo po walio.
- 37 Augwaligo agai po wali me pabe,  
tama augwaligo te aga dali daę walali

---

<sup>n</sup> 78:31 Sai 16:2-15; Nam 11:4-23, 31-35

bomai po bolama, togalio.<sup>o</sup>

- 38 Tiali goli, Godigo te olo tau mabo  
wiegi yai kolesaga augwaliba elama,  
tama augwaligo te dwai sęęę sela sęwani,  
tama agai augwali me dolobeo.  
Hauwa sogo te agai wado yali, te palia selama elalu,  
tama augwaliba haliga sębę me ebeo.
- 39 Agai te tama tiwai homu augwaliba yai.  
Augwali te we bidi naga tama tiwai,  
augwali te wali aselama pabo tiwai ebao.
- 40 Hauwa sogo augwa hagoma eyu, agai po sela sęyu,  
te bidi meni yai tę wa pai bulude bidiyu tiali.  
Tama hauwa augwaligo aga haliga sęęę ilali.
- 41 Te Israel dabego God  
te tedali gasa wiegi yai mu dao.  
Tiali goli, hauwa sogo augwaligo aga usu sabo sę eyu,  
tama agai wado yabo sę ilali.
- 42 Augwaligo te agai genuai bomo  
teba homu konesięwai,  
tama agai augwali te boi bidi dabego  
nogode ma sali, te sogoba augwaligo homu  
kone me palobeo.
- 43 Te sogo agai te bidigo isięwai bomai sę dabe  
te Soan bulude yali, te Isip tę pedaide dao.
- 44 Godigo te wę dabede te kaneme  
pedalumainu elama,  
tama te Isip dabego tuainu yali usu me ebeo.<sup>p</sup>
- 45 Tama agai te bolia hauwa,  
me te gedeli hauwa te augwaliba tagala palai.  
Tama te bolia dabego augwali gęę kela tuyu yali,  
tama te gedeli dabego  
te Isip bagego gide nai dabe  
hauwa dolali.<sup>q</sup>
- 46 Tama Godigo te suma digi me,  
kauwa bidi dabe me,  
te kuli mano dabe dali tagala palama,  
tama augwaligo te augwa gide nai dabe  
tula silai.<sup>r</sup>

- 47 Agai te talua ge tulubage tagala palama,  
tama tego te augwaligo wain ni dabe dolali.  
Tama agai te talua ge tulubagego te augwaligo ni kaya  
dolomainu yai dao.
- 48 Agai te genuai tulubage,  
te talua ge tulubage, tagala palama,  
tama augwaligo bulmakau dabe ela muai dao.<sup>s</sup>
- 49 Agai augwaliba te wado umabo mu  
udubadi udubadi genama,  
tama augwaliba te dene mu mawai.  
Tama agai te ensel bidi meba tagala palama,  
te augwali doligi pali,  
tama augwali te seęę genuai mu salio.
- 50 Agai augwaliba haliga sebę elama,  
tama agai augwali me gogolobeo. Menio.  
Agai te genuai gasi tagala palama,  
tama augwali isila palio.
- 51 Agai te Isip hani tigidaligo te gomunai ogwa dabe  
ela muna silali.<sup>t</sup>
- 52 Tama agai te sipsip tonalubo bidi tiwai elama,  
tama aga polasa peyu tama,  
aga we bidi dabe tonaluali.  
Tama te tọ wa pai bulude agai augwaliba  
te sunumi ola mawai.<sup>u</sup>
- 53 Agai augwali odasa peyu,  
tama augwali bugagia bidali,  
tama tiyu, augwali wi me ebeo.  
Tiali goli, te tamu aįigo augwa  
boi bidi dabe mesega salio.<sup>v</sup>
- 54 Agai augwali te aga tọba digi odasa asali.  
Te bulu du te pesage te aga digi bomogo sali bulu dao.<sup>w</sup>
- 55 Agai te gasa hani dabe te aga hani dabe asobo si,  
te augwali sela sałwani.  
Tama agai te tọ te Israel hani dabeba doba yali.  
Tama agai augwali te augwa ugwa be dabede  
bugagia bidimainu yai dao.<sup>x</sup>
- 56 Tiali goli, te Israel dabego  
te Ugwadu Mu Bidibo God usu selama,

---

<sup>s</sup> 78:48 Sai 9:22-25    <sup>t</sup> 78:51 Sai 12:29    <sup>u</sup> 78:52 Sai 13:17-22    <sup>v</sup> 78:53 Sai 14:26-28

<sup>w</sup> 78:54 Sai 15:17; Jos 3:14-17    <sup>x</sup> 78:55 Jos 11:16-23

- tama agaba hagoma yai.  
 Augwaligo agai bomai po  
 wali me pişawai.<sup>y</sup>
- 57 Augwa hagoma elama, agai po sela şawani,  
 te augwa wai nõę dabego  
 te polobadu yali tiwai yalio.  
 Augwali te gagea pai enesigi  
 te enebo dolo pişabo tiwai yai dao.
- 58 Augwaligo te tibo godigo alta dabe nigali,  
 tama te tebogo te Godigo wado po omainu ilali.  
 Augwaligo te tibo god dabe nigilama ebaso,  
 tama Godigo augwaliba dwai haliga yai dao.
- 59 Godigo augwaligo te tebo kolesaga sulama,  
 tama agai augwaliba haliga şeęę dwai mu yai,  
 tama tibaso agai te Israel dabe tudiba mu muanio.
- 60 Tama agai te aga Silode elaluali ugwa be tagalalio.  
 Te bede aga te we bidi dabe tomode bidali.<sup>z</sup>
- 61 Tama agai te boi bidi dabego  
 te daę walali bomai po muani halobage,  
 te bokis kontrak, sela pomainu ilali.  
 Te bokis halobagede augwaligo  
 te agai bomo me ula suali.<sup>a</sup>
- 62 Agai te aga we bidi dabeba wado po olama,  
 tama te boi bidi dabego  
 augwali ela mumainogo yai dao.
- 63 Te gesi ogwa bidi dabe  
 te genuai boi hwęani madi isali,  
 tama te gesi ogwa we wegı dabe  
 te augwali sabo bidi dabe meni yai dao.
- 64 Te boi bidi dabego te pris dabe ela mubaso,  
 tama augwa we dabego  
 te augwalide homu dene eyu,  
 tama gela wainu ebo te usu ebeo.
- 65 Tialima, megi da, Genuai Bidi hodaluali,  
 te bidi betde pilama hodalubo  
 tiwai gilama yali, tama te bomai bidigo  
 te wain wę hauwa tulama, tama te i hai ola bilibo  
 tiwai gilama yali.
- 66 Tama agai te boi bidi dabe dali hwınama,  
 tama augwa asaliba ma pobeasa pali.

<sup>y</sup> 78:56 Tob 2:11-15    <sup>z</sup> 78:60 Jos 18:1; Jer 7:12-14; 26:6    <sup>a</sup> 78:61 1 Sml 4:4-22

- Agai augwali aiyaba mu elalubaso,  
 tama augwali hale dwai mu yali,  
 tama augwaligo ma hwjabo usu ebeo.
- 67 Tiali goli, agai te Josepgo  
 wjı nqı hani bage te wei isiawai,  
 tama agai te Efraingo hani bage  
 te sa me mubeo. Menio.
- 68 Agai te Juda hani bage dali,  
 te Saion bulu dali sa muani, te bulu du te agai  
 wei mu ebo bulu dao.
- 69 Agai te aga genuai tempel be te bulu dude nigali,  
 te aga dagalude elalubo be tiwai.  
 Tama agai te tempel be sesemane  
 te bomo dali elalumainu yali,  
 te e tı dıli dıq elalubo tiwai gilama emainu yai dao.
- 70 Godigo Devit sa muani,  
 te aga sę bidi, tama aga selama,  
 te genuai sipsip dabe tonalubo sę me,  
 te sipsip wai dabe  
 tonalubo sę emainu sa muai dao.
- 71 Tama Godigo aga  
 te Israel king bidi mubaso bidali,  
 tama aga te Godigo we bidi  
 tonalubo bidi bidai dao.<sup>b</sup>
- 72 Devitgo te aga sęba naga homu kone palama,  
 tama augwali bugagia tonaluai.  
 Tama aga te augwaligo  
 wiegi yai polalubo bidi bidai dao.

## Salmo 79

**Te Israel dabego gedu haluasa po weyu, te  
 Godigo augwali tau somainu yalio**

- 1 God, te gasa hani dabe dago tıba asalio,  
 tama augwaligo te naga we bidi dabe  
 da dali hwjani ebao.  
 Augwaligo te nago tedali wiegi yai be dwai ilama,  
 tama meda mu pedelali.

---

<sup>b</sup> 78:71 1 Sml 16:11-12; 2 Sml 7:8; 1 Sto 17:7

- Tama augwaligo te Jerusalem  
dwai mu ilama, dolalio.<sup>c</sup>
- 2 Augwaligo te we bidi dabe ela muyu,  
tama nago sę bidi dabe me ela tagalali,  
tama te ba dabe dali, te uni hasa dabe daligo  
te augwaligo tigi tualio.
- 3 Te boi bidi dabego nago we bidi dabe ela munama,  
tama augwaligo kaneme gelama, tama te wę tiwai  
te Jerusalem tomodu pai.  
Tama augwaligo tigi dabe  
pubulabo bidi deli me bidibeo.
- 4 Te da pąde bidalubo we bidi hani dabe,  
augwa te posobo po weyu, te gisugu weyu,  
tama te po dwai dabolo wali.
- 5 Genuai Bidio, nisu naga sogo nago dade  
wado po wabo me elalu, elaibawe?  
Te nago wado po wabo  
te sesemane elaluabo homu eba, agawe?  
Te nago wado ebo me elalu,  
tama te sia bogoli elalubo tiwai eyu,  
tama me sula sogobe da, agawe?
- 6 Te nageba lotu po wasiąbo we bidi dabeba  
nago te wado po wao,  
te we bidi dabe augwaligo  
te nage tudiba mubo dao.
- 7 Magi baso meni, te hani dabe  
augwaligo te nago hani we bidi dabe ela muani,  
tama augwaligo te nago tą mu dolai dao.
- 8 Tiyu, nago daba te dago wąi nų dabego  
dwai kolesaga yalide te dabolo dene maidalio.  
Megi da, nago te olo tau mabo  
wiegi yai kolesaga dabolo yao, magi baso meni,  
te dago konealubo homu te bomo kimi meni yanio.
- 9 God, nage te da ma sabo God dao.  
Nago te naga genuai nogi sabode  
koneama, te da tau sao.  
Nago da ma siyu, tama dago dwai sęęę tigidali  
te sela sąyao,  
tama dago te nago nogi ugwaba saibao.

---

<sup>c</sup> 79:1 2 Kin 25:8-10; 2 Sto 36:17-19; Jer 52:12-14

- 10 Magi baso te gasa hani dabego  
 dabolo te tiwai hanalu,  
 “Te dagego God mena bidibo?” waibawe?  
 Dago nago te gasa hani dabeba te  
 dago kaneme gelali wei ponoyu,  
 te dene mabo dago suabo  
 homu ebao, magi baso meni,  
 augwaligo te nago seḡ bidi dabe ela muai dao.
- 11 Nago te kalabuside bidibo bidi  
 dabego gela wabo odao.  
 Tama te nago genuai bomogo, nago te bidi dabe  
 te boi bidi dabego po weyu,  
 te isimainao po wali bidi dabe, augwali ma sao.
- 12 Te boi bidi dabego nageba te dwai po wali.  
 Tama tialima, Genuai Bidi, nago  
 te augwaligo yali dwai kolesaga  
 te nogo a naga olama,  
 me badu si sogo te wei ponao.
- 13 Nago te tama tibaso da,  
 teda da naga we bidi dabe,  
 da te nago sipsip wai tiwai yaibao,  
 teda dago nageba te usu da weyu,  
 gedu haluasa po sesemane sesemane sogo waibao.  
 Tama te nosali nosali pedalubo wai nḡ dabego,  
 teda augwaligo me te nago nogi ugwaba saibao.

## Salmo 80

**Te Israel dabego gedu haluasa po weyu, te Godigo  
 augwali tau selama, ma dolalumainu yali**

- 1 Te Israel dabe tonalubo bidi, nago te naga  
 sipsip dabe da bilibo dodolobo dao.  
 Te dago gela wabo odao.  
 Nage te ensel dabe daide  
 ugwadu king bidibo dao.<sup>d</sup>
- 2 Nago te Efraim dabe, me Benjamin dabe,  
 me te Manase hani bage augwali homu dene yao.  
 Nago te homu dene ebo

<sup>d</sup> 80:1 Sai 25:22



- te pepeli diliba hanilama, pedalumainu ilao.  
 Te nago genuai bomo dabolo ola mayu,  
 tama aselama, da tau sagasobaso da,  
 teda da me dologobeo.
- 3 God, nago da selasa, te nagaba ma pao.  
 Nago te olo tau sabo wiegi yai kolesaga  
 dabolo eyu, tama da tau sobaso da,  
 teda da munu me hagagobeo.
- 4 Genuai Bidi, nage  
 te Tigidali Bomo Elalubo God dao,  
 nisu naga sogo digi te nago  
 naga we bidi dabego gedu haluasa po wabode te  
 wado po me nago elalu odaibawe?
- 5 Nago da te gela mu udumainu elama,  
 tama dena gedu ąi te tubo nai,  
 me te genuai tubo ąi tiwai ebao.
- 6 Nago te gasa hani we bidi dabe  
 te da pąba asomainu ilama,  
 te augwaligo dago tų sainu hwįbao.  
 Tama te boi bidi dabego dabolo  
 te posobo po weyu, gisugu mayu, ebo dao.
- 7 Te Tigidali Bomo Elalubo God,  
 nago da edaba ma sao.  
 Nago te olo tau sabo wiegi yai kolesaga  
 dabolo eyu, tama da tau sobaso da,  
 te da me hagagobeo.
- 8 Polobadu nago te ni wain deli te Isipdu selasa asali.  
 Tama nago gasa hani dabe te tųde sela sąnama,  
 tama nago te ni wain te augwaligo tųde bulai dao.
- 9 Nago aga tų delide peda selama, tama nago bulalio.  
 Aga holama, tama aga sele te aiyanu mu dulalio,  
 tama aga genuai mu holama,  
 tama te tigidali tų pedai mesega sai dao.
- 10 Tama te ni wain nologogo te tigidali bulu du me,  
 tama te moni dobo dwai ni sida dabe mesegelai dao.
- 11 Te aga nologo pali, te genuai tamu ąi  
 Mediterenian si, te dąi igi pelama,  
 tama giliga asobo badu me pali,  
 te wę Yufretisba usu nigı pai dao.
- 12 Tiali goli, magi baso nago

- te wain gi bagulali obo dabe alualiwe?  
 Megi da, te sunumidu soabo we bidi dabe  
 augwaligo te wain gi du dabe wi saibao.
- 13 Tama te uni kibu dabego agayu,  
 tama te uni hasa dabego tubo dao.
- 14 Te Tigidali Bomo Elalubo God,  
 nago daba homu kone ma palao.  
 Nage te dagalude bidiyu, tama nago daba aiya tonalua.  
 Tama nage aselama, da tau sagasao,  
 da naga nago ni wain tiwai dao.
- 15 Nago da tau sagasao, naga digi nago  
 te naga bomogo da bulali.  
 Da te gesi ni wain tiwai nago  
 te bomonama mu pedalumainu yai dao.
- 16 Te dago boi bidi dabego togolama,  
 tama siaba ulalio.  
 Te nago augwaliba wado eyu, tama augwali mu dolao.
- 17 Tiali goli, nago da we bidi dabe tau sao,  
 nago te naga da weyu, sa munama,  
 tama da tonalubao.  
 Nago da genuai pedalumainu elama, tama bomo ilali.
- 18 Nago tama tibaso da,  
 teda dago nage ma tagalugobeo.  
 Nago da bugagia bidimainu eyu, tau sobaso da,  
 tama te nageba gedu haluasa po weyu,  
 tama nago nogi ugwaba saibao.
- 19 Genuai Bidi, nage te Tigidali Bomo Elalubo God dao,  
 nago da te nagaba ma sao.  
 Nago te olo tau mabo  
 wiegi yai kolesaga dabolo eyu,  
 te da tau sao, te da me hagagobeo.

## Salmo 81

### Te genuai side wabo tęąbi po me deli e dao

- 1 Te wiegi yai pemene elama, te Godiba i wao,  
 te da tau seselalubo bidi dao.  
 Te Jekopgo God nogi ugwaba sabo tęąbi po wao.
- 2 Te wiegi yai musik te tobage temborin dali,  
 wiegi yai gita dabego, me te kulelede wao.

- 3 Te biugel bu wabo te genuai side  
te gesi polua nanama,  
tama te polua genuai pedalubo  
sogode, te biugel bu waiya. <sup>e</sup>
- 4 Te da Israel dabego bomo yai po elalui.  
Te Jekopgo Godigo te bomo yai po dabolo mawai dao.
- 5 Te polobadu Godigo te Isip dabe dali hwięi pali sogo,  
agai te bomo yai po da Israel dabeba mawai dao.
- 6 Eno te bidi me deligo dogonide  
po odolama, tama te dego dogoni te eno konesiąwai.  
Agai te tama po wali, “Eno te dagego nagede elaluali  
seęę tigidali tega sańanio,” wali.  
“Tama eno dagego te seę ebo basket dabe  
te tęba mumainu yai dao.
- 7 Te dagege genuai seęę elalubaso,  
tama enaba i wabo sogo, eno dage tau selama,  
tama dage bugagia bidai.  
Ena te geme dulalubo pesagede  
te pę kulukulu wabo tomode ena bidibao,  
tama eno dagego gedu haluasa po wabo odali.  
Polobadu dage te Meriba wę ulu pedalubode bidibadi,  
tama eno dage usu sai dao.” <sup>f</sup>
- 8 “Eno we bidi dabeo, eno dageba  
te bomai po mawainu ebao.  
Mu tama, te Israel dabe, eno homugo  
te dagego eno po odomainu homu ebao.
- 9 Dagego te gasa hani dabego tibo god wali me pigio.  
Tama dagego gasa godiba lotu me wagimio.  
Dagego ena deliba naga lotu waiya. <sup>g</sup>
- 10 Ena naga ena Genuai Bidi da, ena dagego God dao.  
Ena digi dage selama, te Isip taga soyu asai.  
Dagego pedauwali a olalubadi,  
tama eno te dage pedauwaliba nai muaibao,” walio.
- 11 “Tiali goli, eno we bidi dabego  
te eno po me odisąwai.  
Mu tama, te Israel dabego eno po wali  
homu me isiąwai dao.

<sup>e</sup> 81:3 Nam 10:10    <sup>f</sup> 81:7 Sai 17:7; Nam 20:13    <sup>g</sup> 81:9 Sai 20:2-3; Bom 5:6-7

- 12 Tama tibaso, eno te augwa  
 hagoma ebo kolesagade  
 wali bilimainu sula tagalali,  
 tama augwa te mena augwa homugo ela palio.
- 13 Eno wei mu ebaso, tama eno hani bage  
 augwaligo te eno po odomainu homu yali.  
 Tama eno homugo te Israel dabego  
 te eno homu sesemane  
 wali pomainu homu ebao.
- 14 Te augwaligo tama tibaso da,  
 teda polo tama eno te augwaligo  
 boi bidi dabe doligi da.  
 Te eno boi bidi dabe augwali dali hwiņama,  
 tama augwali aiyaba mu elalualigi da.
- 15 Te ena wei homu isiąbo we bidi augwali,  
 teda augwali wi mu dwai elama,  
 tama enaba kidu sugunagasaibao.  
 Tama eno augwaliba te sesemane sogo dene magi dao.
- 16 Tiali goli, eno wiegi yai nai mu  
 dageba maiyabo homu eyu,  
 tama dage te buside elalubo tubo nai  
 te hani menama, tama dagego haliga  
 te paęana peyu igi da,” wali.

## Salmo 82

### God te polalubo king dao

- 1 God te dagalude genuai kaunsel miting  
 po mibo polalubo bidi bidibao.  
 Te tobolu bidi dabe sisinama,  
 tama God agai homude elalubo po pusubo dao.
- 2 Agai te tama po wali,  
 “Dagego te tibo po tu eyu,  
 te po me bugagia dodolobeo.  
 Tama dagego te bidi dwai dabe  
 te po tuęde tau sabo se eyu yali.  
 Te tobage dwai kolesaga ebo tagaliąo.
- 3 Dagego te magi nai meni yai bidi dabe,  
 me te tiana wai dabe tau sao.  
 Tama te seęę toloyu, bugagia bidisąbo bidi dabe,  
 dagego augwali bugagia wiegi yai ilao.

- 4 Tama te dwai bidiyu,  
te doado bage sęą pai bidibo we bidi dabe,  
dagego augwali te dwai bidi dabego  
nogode ma dobola sao,” po wai.
- 5 “Dagego kolesaga me konebeo,  
tama dage kolesaga me konesiąyu,  
tama umuna pai mu dao.  
Dage te hulide biliyu, tama te we bidi dabego  
doloba pai kolesaga wali me pabeo.
- 6 Eno te po wali, ‘Dage tigidali deli deli te god dao.  
Dage te Ugwanu Mu Bidibo  
Godigo wai dao.’<sup>h</sup>
- 7 Tiali goli, dage te isibo bidi dabe  
tobage tiwai gilama, te dage me isaibao.  
Te dagego bidibo ula te silaibao,  
te kingo wai dabe te bidali ula tagalu,  
te isibo tiwai gilama te silaibao.”
- 8 God, nage aselama, tama te tęde we bidi tigidali  
tonaluagasao.  
Te tigidali bage te naga hani naga dao.

## Salmo 83

### Bidigo gedu haluasa po obaso da, teda Godigo te Israel dabego boi bidi tigidali silaibao

- 1 God, nago pedauwali me pania sigio.  
Nage odolali me dualalugio.  
God, nage odolali me bidigio.
- 2 Suao. Te nago boi bidi dabego te hwı̄bao.  
Augwa te nage wei me isiąyu,  
te nageba hagoma ebo dao.
- 3 Augwa te geme duala selama,  
tama nago we bidi dabeba  
te dwai sę yabo po mia salio.  
Nago te we bidi dabe  
augwali bugagia tonaluali,  
tiali goli, te boi bidi dabego

<sup>h</sup> 82:6 Jon 10:34

- augwali dolabo po mia sai dao.
- 4 Augwa te po wai, “Ae, tegobao.  
Dago te Israel dabe mu silinao,  
teda te we bidi dabego te augwaliba  
homu kone munu me ma egobeo,” wali.
- 5 Augwa te deli homu elama, te sę yalio.  
Tama augwa te nage elaluainu,  
te hai namu dali ola sai dao.
- 6 Augwali te hani dabego te tiwai yainu yali,  
te augwali Idom dabe me, Ismael dabe me,  
tama te Moap dabe me, te Hakri dabe me dao.
- 7 Tama te Gebal dabe me,  
te Amon dabe, tama te Amalek dabe me dao.  
Te hani bage dabe, augwali te augwali  
te Filistia badu, me Tair badu bidali.
- 8 Siria me te augwali dali sisinani.  
Te bomai hani augwali te Lotgo hani tau salio.
- 9 Nago te tobage tiwai kolesaga te augwaliba yao,  
te polobadu nago te Midian dabeba yali tiwai,  
me te Sisera, me Jabin dabe,  
te genuai wę Kisonde yali tiwai yao.<sup>i</sup>
- 10 Te sogo nago augwali te Endor bulude dolama,  
tama augwa tigi te tōde munaluama,  
tama damua pai dao.
- 11 Nago te augwa ami dabego kepten  
bidi dabebolo te dwai dene mao,  
te polobadu nago te Orep de Sep side  
yali tiwai gilama yalio.  
Nago te augwaligo tobolu bidi dabe aiyaba elaluao,  
te nago te Seba de Salmuna side yali  
tiwai gilama yalio.<sup>j</sup>
- 12 Te bidi dabe augwaligo te tama po wai,  
“Dago Godigo te tō sobaso da,  
teda te dena tō mu naga tama pedelaibao,” wali.
- 13 Eno God, nago augwali te tō hogomu tiwai  
sela sayu, tedela palao.  
Augwali sela sayao, te waligo te wit bo sela sayu,  
tedela palubo tiwai yao.

---

<sup>i</sup> 83:9 Tob 4:6-22; 7:1-23    <sup>j</sup> 83:11 Tob 7:25; 8:12

- 14 Siago te kala dobaso, tama te kala elalubo bulu dude  
te sia genuai dabo dao.
- 15 Te tiwai naga gilama,  
nago te genuai tulubage tagala palama,  
tama te hani bage te pobeasa pobaso,  
te augwali wi paibao.  
Tama nago te bomai wali mu augwaliba  
tagala palubaso, te augwali wi yaibao.
- 16 Genuai Bidi, nago augwali aiyaba mu elalubaso,  
tama augwali hale dwai mu eyu,  
tama augwaligo nage wali pabo homu yaibao.
- 17 Eno homugo te nago augwali elalubaso,  
tama augwali te sesemane wi dwai mu yaibao.  
Nago augwali hale ilama, tama augwali ela muao.
- 18 Eno homugo nago te tiwai yao homu ebao,  
teda augwa mu konemainu ebao,  
nagaduba deli naga, nage te Genuai Bidi,  
tama nage te Ugwade Mu Bidibo God da,  
tama nago te tigidali tę tonalubo dao.

## Salmo 84

### Bidigo te Godigo be wei mu yali

- 1 Te Tigidali Bomo Elalubo God, eno nago be  
wei mu ebao.
- 2 Ena tede bidabo homu wei mu ebao.  
Te eno homu kolesaga tigidaligo  
te nago be wei mu ebao.  
Te tigo, me homu tigidaligo, eno te  
wiegi yai pemene ebo tęąbi po nageba obao,  
God te bidabo ula elalubo God dao.
- 3 Genuai Bidi Te Tigidali Bomo Elalubao,  
nage te king, me eno God dao.  
Te dwasianu ba dabe te nago alta pąde be sęnama,  
tama augwaligo  
te augwa wai dabe tonalubo dao.
- 4 Te nago bede bidalubo we bidi dabe  
augwa te bugai homu mu elama bidibo dao,  
tama sesemane sogo augwa te tęąbi po weyu,  
tama nago nogi ugwaba sabo dao.

- 5 Te we bidi dabe augwa te nagede bomo selama,  
tama te Saion bulu duba pabo homu wei elama,  
augwa te sesemane pemene yabo homu ebo dao.
- 6 Augwa pelayu, te wa pai bulu odogo pesageba dulama,  
tama te bulude te wę ulu hauwa  
pedalubo pesage elalubao.  
Tama te kigamu tulubage tulama, tama te dedageba  
te węgo paęąbo dao.
- 7 Te bidi dabe bilama, te bomo yai pedelaibao.  
Te augwali pelama, te Saionba sabolama,  
tama te God bidibo sueibao.  
Aga te tigidali tibo godide  
te ugwadu elalubo God dao.
- 8 Genuai Bidi, nage te Tigidali Bomo Elalubo God,  
te eno gedu haluasa po wabo odao.  
Nage te Jekopgo God,  
te olo bugagia munama, eno po odao.
- 9 God, nago dago kingba wiegi yai sę yao.  
Naga digi aga sa mubaso, tama aga te king bidibao.
- 10 Te ena deli sogo naga  
te nago tempel bede bidibaso da,  
tego te 1,000 sogo te gasa bulude bidibo  
te aiyaba mu elalui.  
Ena te ena Godigo be sunumide  
dolaluabo homu wei mu ebao.  
Tiali goli, ena te dwai bidi dabego  
bede bidabo hagela homu ebo dao.
- 11 Genuai Bidi, te da seselalubo bidi,  
te dago genuai nogi elalubo king dao.  
Agai te olo tau sabo wiegi yai kolesaga dabolo eyu,  
tama daba genuai nogi mayu yali.  
Agai te bugagia dolasa bilibo we bidi dabede  
te mena nai me deli me daę me ela sogobeo.
- 12 Godigo Te Tigidali Bomo Elalubao,  
te nageba konealubo homu daę wabo we bidi dabe,  
augwa te wiegi yai pemene  
sesemane emainu yagameo!



## Salmo 85

**Bidigo gedu haluasa po weyu, te Godigo aga hani tonalumainu yai**

- 1 Genuai Bidi, nago naga tęba  
wiegi yai yali.  
Nago da Israel dabe ma tau selama,  
tama da bugagia mu bidibao.
- 2 Nago naga we bidi dago dwai seęę dagala sęnama,  
tama dago yali seęę sela sęwai dao.
- 3 Polobadu nago daba wado yali,  
tiali goli, megi nago wado po ma wabeo.  
Mu tama, nago daba haliga seęę yali,  
tiali goli megi da, menio wali.
- 4 God, nago da ma selama, megi da, nago da te nagaba  
odasa ma pao.  
Ya, nago dabolo wado ma igio.
- 5 Magi yaliwe, te nago dabolo sesemane  
wado iduaiabwe?  
Te nago wado po me sia sogobe da, agawe?
- 6 Nago dago bidibo ula ma daę walao,  
te nago we bidi dago te wiegi yai pemene elama,  
tama nago nogi ugwaba saibao.
- 7 Genuai Bidi, nago dabolo te nago  
da sesemane wei ebo ola mao,  
tama da ma selama, te da bugagia bidaibao.
- 8 Eno te Genuai Bidi Godigo  
pusubo poba olo muani.  
Agai te wiegi yai nagame yai homu,  
me te da bugagia bidabo po wali,  
te dago polobadu yali dwai kolesagaba  
da ma begasa pişąbaso da te tama tiaibao wali.
- 9 Mu tama, agai te agaba lotu weyu,  
agai homu wali pabo we bidi dabe  
ma sainu te sisi yalio.  
Tama agai da ma selama, tama aga digi da dali dago  
tęde bidaibao.
- 10 Te sogo da, te we bidi dabego  
te gasa bage wei mu elama,  
tama wiegi yai kolesaga augwaliba yaibao.  
Tama augwa dolasa bidiyu,

- tama haliga nagame elama,  
tama hodobo bugagia bidaibao.
- 11 Te tęde te we bidi dabego  
te Genuai Bidi wali mu paibao,  
tama te dagalude Godigo augwali  
doloba pai pedalumainu ilaibao.
- 12 Genuai Bidigo te da bugagia  
bidimainu tau saibao, tama dago ebo sę dabe  
te wiegi yai pedelaibao.  
Tama dago tęde te nai hauwa walaibao.
- 13 Genuai Bidigo te we bidigo doloba pai kolesaga  
wali pomainu elama,  
tama te tebogo te aga asabo sunumi dodolubo dao.

## Salmo 86

*Te Devitgo asęani gedu haluasa po me deli dao.*

**Godigo aga tau somainogo, bidigo te gedu haluasa po wali**

- 1 Genuai Bidi, ena bomo meniama,  
tama ena digi ena tau sabo usu ebeo.  
Tama tialima, eno homugo nago  
eno gedu haluasa po wabo odolama,  
te ena tau sao.
- 2 Nago ena ma siyu, tama ena me isigobeo,  
magi baso meni, ena nage wali asai.  
Nage da, te eno God dao.  
Ena naga sę bidi da, tama eno konealubo  
homu nageba muai,  
tama tiyu, nago ena tau sao.
- 3 Naga digi nage eno God dao.  
Ya, nago ena homu dene eyu,  
tau mabo kolesaga enaba yao.  
Tigidali sogo, giligade me hulide,  
eno gedu haluasa po nageba wabo dao.
- 4 Genuai Bidi, nago eno haliga  
wiegi yai pemene mu ilao, te naga sę bidi dao.  
Magi baso meni, eno gedu haluasa po  
nageba naga wabo dao.
- 5 Genuai Bidi, nago  
te wiegi yai sę mu elama,

- tama nago eno dwai seḡe sela ṣabo dao.  
 Nago te nageba gedu haluasa po wabo  
 we bidi tigidali wei mu eyu,  
 tama naga homugo augwali dali keḡ pai dao.
- 6 Genuai Bidi, nago eno gedu haluasa  
 po wabo bugagia odao.  
 Eno nageba i wabo, te nago ena dali  
 homu dene eyu, tau somainu wali.  
 Eno i wabo odao.
- 7 Te eno nageba i wabo sogo,  
 te nago ena tau sabo dao.  
 Tama tiyu, tigidali sogo ena seḡe tolobaso,  
 eno te nageba gedu haluasa po waibao.
- 8 Genuai Bidi, te God nage tiwai me deli elalubeo.  
 Te Israel hani isaḡwai dabego  
 augwa god wabo nai dabe da,  
 augwali te tibo god dabe naga dao.  
 Nago augwali aiyaba elaluai.  
 Tama te bidi me deligo te nago  
 ebo seḡ tobage tiwai me elalubeo.
- 9 Tigidali hani we bidi nago augwali nigali,  
 te augwaligo lotu po wainogo eyu,  
 nageba kidu sugunagasaibao,  
 tama augwaligo te nago nogi ugwaba saibao.<sup>k</sup>
- 10 Magi baso meni, nago naga te genuai bomo elaluyu,  
 tama nago te we bidigo  
 isiḡbo genuai seḡ dabe ebo dao.  
 Tama nago naga te haniani wiegi wiegi yai seḡ ebo dao.  
 Nagaduba deli naga, nage God mu dao.
- 11 Genuai Bidi, eno homugo te nago eno emainu ebo  
 kolesaga te ena bugagia ola mao,  
 tama eno te nago mu po wali sesemane paibao.  
 Te ena bugagia ola mayu,  
 te eno nageba naga konealu, tama eno nago seḡ  
 sesemane sogo yaibao.
- 12 God, eno Genuai Bidi, eno te usu da wabo  
 te eno homu sesego nageba mobao.  
 Tama eno nago genuai nogi  
 te sesemane bidada pabo sogo ugwaba saibao.
- 13 Magi baso meni, nago sesemane sogo

---

<sup>k</sup> 86:9 Ped 15:4

- ena wei mu ebo dao.  
 Nago ena te isabode ma dobola selama,  
 tama ena te isibo bidi dabego pesageba pabeo.
- 14 God, megi te hagoma ebo bidi dabe meba aselama,  
 tama ena dali hwjainu ebao.  
 Te dwai sę ebo bidi dabego te bidi hasi homu dene eyu,  
 tau sabo kolesaga eyu, me sogobeo,  
 tama augwali sisinama, ena ela muainu yali.  
 Augwaligo te nago po wali me pisawai,  
 augwaligo te sela sayu naga ebo dao.
- 15 Tiali goli, Genuai Bidi, nagede  
 te homu dene ebo,  
 me olo tau mabo wiegi yai kolesaga  
 paęanalubao, tama nage da, te bobobage  
 guni yai bidi dao.  
 Nago da wei mu eyu,  
 tama nago homugo da dali keę mu pai dao.
- 16 Nage enaba ma aselama,  
 ena homu dene eyu, tau sao.  
 Ena bomo mao, tama ena ma sao, magi baso meni,  
 eno nago sę ebo te ena idago yali tiwai ebo dao.
- 17 Genuai Bidi, eno homugo  
 te nago ena wei ebo da homu ebo  
 te nago enabolo ola mao.  
 Tama te boi bidi dabego suyu, te nago ena tau siyu,  
 te daę walobo te augwa konemainu yao.  
 Tama augwa ebo kolesagade te augwa  
 hale mu somainu yao.

## Salmo 87

### Augwaligo Jerusalemde wiegi yai pemene yali

- 1 Godigo aga taun te aga bulu dude digi nigali.  
 2 Genuai Bidigo Israelde gasa tigidali  
 elalubo bulu te wei homu yali,  
 tiali goli agai te Jerusalem te wei mu yai dao.  
 3 Te Godigo taunde we bidi dabego, odao.  
 Godigo te wiegi wiegi yai sę dageba ebo dao.  
 4 Godigo te tama po wali,  
 “Te eno ena po wali pabo hani bage

augwali nedebo sogo da, teda eno te Isip me Babilon  
te augwali dali nedaibao.

Tama eno te Filistia, me Tair,  
me Itiopia bulu dabeba te tama po waibao,  
augwali me te Jerusalem bage dao, waibao.

5 Te eno Jerusalemba te tama po waibao,  
‘Te bulu te tigidali hani we bidigo bulu da.’

“Tama te Ugwadu Mu Bidibo God,  
aga digi te Jerusalem dodolama,  
tama bomai mu elaluaibao.

6 Te Genuai Bidigo te gasa hani  
we bidi dabe augwaligo nogi asęnama,  
tama augwali sisinama, tama augwali dali nedeyu,  
te Jerusalem we bidi dali nedaibao.

7 Tama te Jerusalemda bidali we bidi dabe,  
te augwaligo tęabi weyu, wiegi yai pemene yaibao.  
Tama augwa te tama po waibao,  
“Jerusalem da, te nago dolo mu tama,  
tama nage te wiegi yai kolesaga  
tigidali ebo page mu dao,” waibao.

## Salmo 88

**Bidigo te Godiba i weyu, te aga tau somainu yai.**

1 God, Genuai Bidi, nago ena tau sabo da.

Te giligade eno nageba i weyu,  
te ena nago tau somainu yai,  
tama hulide me eno nageba  
gedu haluasa po wabo dao.

2 Nago eno gedu haluasa po wabo odao.  
Te nago ena tau somainu, eno nageba i wabo odao.

3 Te seęę hauwa enaba pedalubaso,  
tama te tebogo naga ena pade isabo homu ebao.

4 Ena te gasa bidi dabe isainu ebo tiwai gilama yai.  
Te eno bomo tigidali mu silalio.

5 Augwa ena tagalubaso,  
tama ena te isali bidi dabe dali bidibao.

Ena te gasa bidigo ela muai bidi tiwai gilama,  
tama te gų pagede munaluai.

Ena te bidi dabe nago te homu kone mu

- gegeda palubo bidi dabe tiwai gilama yali,  
tama te nago augwali munu ma tau sisąbo tiwai yai dao.
- 6 Nago ena te ayanu mu yai dedage pageba sąnama,  
tama ena te be huliasai mude,  
te aiyadu dologode mu bidai.
- 7 Nago haliga sębęgo ena mu elaluama,  
tama te moni tamu ąi dinigo  
ena mu mesegelibo tiwai yai dao.
- 8 Nago te ena abagi dabego ena tudi ola momainu ilali.  
Nago ena te dwai mu pedalumainu elama,  
tama augwaligo enade wi mu yai.  
Tego ena kalabus ilama,  
tama eno pedelabo usu meni yai dao.
- 9 Ena dene tolu, tama eno gedu dolama,  
tama eno bugagia suabo usu isąwai.  
Tama tigidali sogo eno gedu haluasa po nageba weyu,  
te nago ena tau somainu yali.
- 10 Nago te isali bidi dabe tau sabo  
bomai sę ebo da, agawe?  
Te isali bidi dabe ma hodaluama,  
tama nago nogi ugwaba saibawe?
- 11 Te gų pagede te isali bidi dabego nage dali po miyu,  
te nago augwali sesemane wei mu  
ebo da po wabo da, agawe?  
Te dolabo bulude augwaligo nageba po weyu,  
te nago augwali bugagia tonaluai  
dao po wabo dawe?
- 12 Te gų pagede bidibo bidi dabego  
te nago bomai sę ebo subo dawe?  
Tama te dolabo pesagede bidalubo bidi dabe,  
augwaligo nago te wiegi yai kolesaga  
subo da, agawe?
- 13 Genuai Bidi, eno nageba i wabo,  
te nago ena tau somainu ebao.  
Te tigidali sogo kigamu eno  
gedu haluasa po wabo dao.
- 14 Tiali goli, Genuai Bidi, magi baso  
ena nago tudiba mubawe?  
Magi baso nage enade geme duala sobawe?
- 15 Te ena gesi ogwa bidide digi  
gagalasa, te e sogoba megi usu nagasobao,  
ena te sęęę tolu, tama pąde ena isainu ebao.

Nago enaba te dene mabogo  
te ena nogo saęą dili kimi isalio.

16 Genuai Bidi, nago haliga seęęo ena mesegelali.

Nago ena dodologia mu elama,  
tama ena mu dolai dao.

17 Nago enaba te tiwai te giligade me hulide dali yai,  
tama te bidi dabego ena te tigidali pedai badu  
pobeasa bilali, te weę ge bo deyu,  
te tų tigidaliba mesega sabo tiwai yai dao.

18 Nago te eno wiegi yai abagi dabego  
ena tagalumainu ilali.

Te be hulia sabo naga te eno abagi bidalio.

## Salmo 89

*Etan te Sera hani bidi me deligo aseęani balia po me deli dao. [1 Kin 4:31]*

**Te augwa bidibo bulu tų pedaibate seęę pedalubo sogo te balia po me deli wali**

1 Genuai Bidi, nago da sesemane sogo godolo  
homu ebo dao,

tama te kolesaga ebode eno e balia udaibao.

Mu tama, te nosali ame nabo bagego konemainu eyu,  
te eno nago po te me hasegelibo meni da po olama,  
te po hanilama pusaibao.

2 Eno koneani, nago da sesemane  
bidada pabo sogo wei homu ebo koneani.

Awe, te nago mu po te me hasegeligobeo,  
te dagalu bomo elalubo tiwai gilama elaluaibao.

3 Nago te tama po wali,  
“Eno te bidi me deli sa muai da,” wali,  
“tama eno daę wabo po me deli  
aga dali wai dao,” po wai.

“Eno ena seę bidi Devitba po daę walalio,” po wai.

4 “Tama eno te po wali,  
“Te king dabe nago hanide naga pedelaibao,” wali.  
‘Mu tama, sesemane sogo eno te nago hani bidi me deli  
te king bidi mudaibao,’ te po wai.”

Nago te po wai dao.<sup>1</sup>

5 Genuai Bidi, te ensel dabego

<sup>1</sup> 89:4 2 Sml 7:12-16; 1 Sto 17:11-14; Tib 132:11; Tpi 2:30

- te nago ebo wiegi yai sę dabe balia po wabo dao,  
tama augwaligo te nago nogi ugwaba sabo dao.  
Me te dagalude konealubo homu daų wai  
mobo bidi dabego  
te nageba balia po weyu,  
tama nago po wali mu pabo dao.
- 6 Genuai Bidi, te dagalude  
nage tiwai tobage me deli me elalubeo.  
Te ensel me te nage tobage tiwai deli me menio.
- 7 Te ensel dabe augwa polalubo dabe  
te po miting ebo sogo augwali  
te nagede wi ebo dao.  
Tama te nage bagualubo gasa ensel tigidali,  
augwali te nagede wi mu ebo dao.
- 8 Genuai Bidi, nage te Tigidali Bomo Elalubo God dao,  
te me deligo nago te genuai bomo tiwai me elalubeo.  
Nago naga po sesemane sogo wali peyu yaibao.  
Nago po me hasegelama eyu, me egobeo.
- 9 Nago te bomai tamu aų tonalubao.  
Te aų dini hogodobo sogo, nago aiyaba elalubaso,  
tama memenege me eyu me egobeo.
- 10 Nago te Isip dabego genuai bomo togolama,  
tigidali mu dolalio.  
Tama nago nogogo genuai bomogo,  
nago naga boi bidi dabe aiyaba elalualio.
- 11 Dagalu me tų te nago naga dao.  
Nago tų nigali, te tųde tigidali nai me bugagia nigali.
- 12 Nago te not badu, me saut badu dali, te nigai.  
Te Tabor bulu du, me Hermon bulu du sigo  
te wiegi yai pemene eyu, nageba balia po obao.
- 13 Iya, tegoba. Nago bomo genuai mu elalubao.  
Nago bomo te umabo mu dao.
- 14 Nage te king bidiyu, tama nago te we bidi dabe  
doloba pai kolesagade tonalubao.  
Tama nago po tų dolo naga ebao.  
Nago te tigidali we bidi wei mu elama,  
tama nago naga po sesemane wali peyu yali,  
tama nago po hasegelama eyu, me egobeo.  
Te tobage kolesaga ebo da,  
te nago naga we bidi tonalubo sę page mu dao.



- 15 Te we bidi dabego nageba  
     balia weyu, lotu po weyu yali,  
     tama nago te olo tau mabo  
     wiegi yai kolesagade biliyu,  
     te augwa te ulade bilibo tiwai ebao,  
     te augwa wiegi yai pemene emainao.
- 16 Augwaligo te nago wiegi yai  
     kolesaga augwaliba ebo te homu kone palu,  
     tama tigidali sogo giligade me hulide  
     augwa te wiegi yai pemene eyu,  
     tama nago nogi ugwaba sabo dao.
- 17 Magi baso meni, nage naga  
     te nagede dago bomo elalubaso,  
     tama dago wiegi yai pemene nageba ebao.  
     Nago te olo tau sabo wiegi yai kolesaga dabolo elama,  
     tama da te hwɨbode tau selama,  
     te boi bidi aiyaba elaluai dao.
- 18 Awe, nago digi te da seselalubo bidi sa muai.  
     Nage te da Israelgo Tedali Wiegi Yai God,  
     nago te dena king dabolo mawai dao.

### Godigo Devitba po daḡ walali

- 19 Te ugwadu sogo polobadu,  
     nago te nage wali pabo bidi dabe  
     muba te na menama,  
     tama nago augwaliba te tama po wali,  
     “Eno te polaluabo ami bidi me deli sa munama,  
     tama eno agaba te kingo hat madi muai.  
     Eno aga te we bidi dabe tomode selama,  
     tama aga te king munama bidai.
- 20 Eno Devit nigilalio, ena seḡ bidi da,  
     tama eno aga te dagego king  
     pedalumainu yai dao.<sup>m</sup>
- 21 Tama tiyu, eno bomo te aga dali sesemane bidaibao.  
     Mu tama, eno bomogo aga tau saibao.
- 22 Te aga boi bidi dabego te hwɨbode  
     aga aiyaba elaluyu, mone mao me wagobeo,  
     tama te dwai seḡ ebo bidi dabego aga me elalugobeo.
- 23 Te ena digi eno agai boi bidi dabe agala selama,

<sup>m</sup> 89:20 1 Sml 13:14; 16:12; Tpi 13:22

- tama te aga wei isiąbo bidi dabe ela muyu yaibao.
- 24 Te eno aga wei mu elama,  
tama ena aga dali sesemane sogo bididuaibao.  
Te aga boi bidi dabe dali hwıbo sogo,  
te eno agai tigidali sogo augwali  
aiyaba elalumainu ilaibao.
- 25 Te eno elama, tama agai tonalubo tų  
te genuai tamu ąi Mediterenian  
tedu gagalasa peyu, te wę Yufretis  
elalubo madiba usu nigı paibao.
- 26 Tama agai enabolo te tama po waibao,  
'Nage Aya me eno God dao.  
Nago ena tonalu, tama ena sesemane tau sabo dao.'
- 27 Tialima, te eno polalubo gomunai wai aga munama,  
tama aga te polalubo king pedelama,  
te tigidali tųde king aiyaba elalueibao.<sup>n</sup>
- 28 Te eno sesemane sogo aga wei mu iduaibao.  
Tama eno te po dą wabo kontrak aga dali elama,  
tama te dą walali po kontrak  
te sesemane elalua peyu,  
elalua paibao po wai dao.
- 29 Sesemane sogo te aga hani bidi me deli  
te king pedalu, ela piduaibao wali.  
Tama aga hani king me deligo  
te Israel dabe sesemane tonaluaibao,  
te dagalu ugwadu sesemane elalubo  
tiwai gilama yaibao."
- 30 "Tiali goli, te agai wai nų hani dabego  
te eno bomai po sela şanama,  
tama augwaligo eno kolesaga wali me pişama,  
31 tama augwaligo eno po tudiba munama,  
tama augwaligo eno bomai po wali me pişabaso da,  
32 teda eno augwaligo dwai şęba homu kone paliyu,  
tama augwaliba te dene mawaibao.  
Tama eno te augwa yali dwai şede homu kone palu,  
te augwali keloago elaiba wai.
- 33 Tiali goli, te sogo me te Devit  
te eno wei mu elaludaibao.  
Tama eno aga me tagalogobeo, tama eno agade

---

<sup>n</sup> 89:27 Ped 1:5

te daę walali po mu me tagalogobeo.

34 Tama eno aga dali te daę walali bomai po  
te kontrak me tagalisięma,  
tama eno te ena po deli me  
hasegeliyu me egobeo. Mu menio.”

35 “Eno daę walubo po te deli sogo naga weyu,  
tama eno ena digi tedali wiegi yai  
nogi nogilama weyu, te po daę walali,  
tama te sesemane sogo me  
elalua pidu, elalua paibao.

Eno te tama wai.

Eno te tibo po Devitba me wagobeo wai.

36 Te aga hani waę nõę dabe me sia sisęma,  
te sesemane me elaludaibao wai.

Tama aga hanigo te we bidi dabe  
sesabi elama, mu tonalu,  
te giliga me elalubo tiwai gilama yaibao.

37 Te augwali sesemane elaludu,  
te polua dagalude elalubo tiwai eyu,  
tama te we bidi dabeba te eno po mu da weyu,  
te ola mawaibao,” wali.

**Te boi bidi dabego te king te hwięyu, aiyaba elalubaso, agai te gela wali**

38 Genuai Bidi, nago te po Devit dali  
polobadu daę walai goli,  
megi nago te sa muani kingba nago wado po wali.

Nago aga tagalama, aga tudiba muani.

39 Nago te naga sę bidi dali daę walali  
te kontrak po togwali.

Nago agai te kingo tobolude mubo madi  
te tęba sęnama, tama meda yali.

40 Nago agai taun bagulali obo dabe togolama,  
tama agai te ami bidi dabego  
bomai be dabe te dolalio.

41 Te paędu soabo bage tigidaligo  
te agai doado bage dabe wi sabo dao.

Tama te abagi dabego agaba posobo po wabo dao.

42 Nago aga te boi bidi dabego elalumainu ilali,  
tama nago augwali deliba sisinama,  
te dili bubo sę emainu yai.

43 Nago agai ami bidi dabego

- te hwįbo nai dabe usu isąbo sę ilali,  
 tama nago aga te hwįbo side aiyaba elalumainu ilalio.  
 44 Nago aga elaluama, tama aga te king ma bidibeo,  
 tama agai te we bidi munu ma tonalubeo.  
 Tialima, agai genuai nogi dali, bomo dali si silalio.  
 45 Nago aga monu dabe polo tama pedalumainu ebaso,  
 tama hale genuai mugo aga mesegelalio.

**Agai te gedu haluasa po weyu, te Godigo augwali tau somainu yai**

- 46 Genuai Bidi, nisu naga sogo  
 te nage dualaludaibawe?  
 Te sesemane sogo usu nama da, agawe?  
 Nisu naga sogo te nago haliga sębę  
 te sia posolo mu ebo tiwai elaluaibawe?  
 47 Genuai Bidi, iya, nago  
 te pęwadage sogo naga bidabo bidiba  
 homu kone palao.  
 Nago da nigali, tiali goli da te isaibao.  
 Nago odolali da nigali da, agawe?  
 48 De mu te sesemane bidada pidu, bidada pelama,  
 tama te me isigobe dawę?  
 De te bomo elama bididu,  
 te aga gų pageba me pogobewe?  
 Te mena bidi deli me tegobeo, mu menio.  
 49 Genuai Bidi, magi yaliwe?  
 Nago megi da, da wei me ebe da, agawe?  
 Te nago Devit dali te daų walali pode menagi yaibawe?  
 50 Genuai Bidi, nago naga sę bidi,  
 ena homu kone palao.  
 Te bidi dabego enaba posobo po obao.  
 Eno te gasa hani dabego  
 te kęęę po wabo sęęę tolobo dao.  
 51 Genuai Bidi, te nago boi bidi dabego  
 enaba po dwai wali, te naga sa muai king dao.  
 Te ena tigidaliba pabode te augwaligo  
 dwai po enaba weyu ebo dao.  
 52 Dago te Genuai Bidigo nogi  
 te sesemane bidada pabo sogo ugwaba sao.  
 Te mu tama dao.

**Buku 4**  
(Tib 90-106)

**Salmo 90**

**Godigo po, me bidigo po wai**

- 1 Genuai Bidi, sesemane sogo nage te dago be  
mu tiwai dao.  
Te wąj nų dabe nage dali bidali,  
tama megi da me te tiwai bidibo dao.
- 2 Te sesemane bidada peyu, bidada pabo sogo,  
nage te God bidibao,  
te polobadu me bidali, nosali me bidaibao.  
Tigidali bulu du pedalisąbadi,  
tama nago te tųde nai tigidali nigisąbadi,  
tiali goli, nage God bidai dao.
- 3 Nago te we bidi dabe isimainu elama,  
tama augwali te tų ma pedalumainu ebo da.  
Tama nago te tama po wali,  
“Dage tųde we bidi, dage isilama,  
tama te tų ma gagawaibao,” wai dao.
- 4 Nago homu kone palu,  
tama te kibu be 1,000 dąj yabo homu  
te deli sogo bubugade tiwai naga elama,  
tama te polo tama pela silaibao, te pilama hodalu,  
te do bidali sogo tiwai gagawaibao.  
Awe, te kibu be 1,000 te hulide pęwadage sogo naga  
tiwai ebo dao.°
- 5 Nago te bidi dabe sela sąbo, te wę asiyu, bidi selama,  
tama augwali isibo tiwai yaibao.  
Augwali te pęwadage sogo bidiyu,  
te naa tiwai naga ebao.  
Augwali te gesi nosa te kigamu pedalubo tiwai elama,
- 6 tama te genuai holama, tama duduli pedelai.  
Tiali goli, te piode te sasia pelama, tulalubo dao.
- 7 Nago dade wado elalubaso, tama nago da dolobo dao.

- Nago dade haliga sębę ebaso, tama da wi mu ebo dao.  
 8 Nago dago dwai kolesaga tigidali subo da.  
 Tama dago geme dualama ebo sęęę tigidali,  
 te nago pepeli diliba hanilama,  
 munama, tama nago sualio.
- 9 Nago wado ebogo te da tęde bidibo  
 bodolu pęwadage ilali.  
 Mu tama, te dago bidibo sogo polo silali,  
 te dago mobo deli sogo naga sabo tiwai ebo dao.
- 10 Da bidibo kibu be te 70 usu naga bidaibao.  
 Tama dago bomo elalubaso,  
 da te kibu be 80 usu naga bidaibao.  
 Tiali goli, te tigidali kibu bede da te sę dene naga eyu,  
 tama sęęę naga gegaibao.  
 Te tigidali kibu be polo silama,  
 tama da me pela silaibao.
- 11 Dego te nago wado ebo genuai bomo  
 te bugagia konebawe?  
 Tama nago augwaliba te wado ebo homu ebode  
 genuai wi te we bidi augwaliba pedalubo te koneaniwe?
- 12 Nago da bugagia ola mobaso,  
 te dago koneaibao,  
 da te tęde sesabi elama me bidigobeo.  
 Tama tiyu, dago wiegi yai kolesaga koneama elaluaibao.
- 13 Genuai Bidi, nisu naga nago haliga  
 sębę ebo me elaludaibawe?  
 Nago naga sę bidi da homu dene yao.
- 14 Nago da sesemane sogo wei yali,  
 tama tego te tigidali sogo kigamu  
 te da paęanumainu yao.  
 Tama tiyu, te tigidali sogo da  
 te bidibo ula dali bidiyu,  
 dago homu wiegi yai pemene elama,  
 te bugai haliga yaibao.
- 15 Hasiabolo nago daba sęęę mawai.  
 Tialima, megi da, nago da  
 te wiegi yai pemene yabo usu nao,  
 te sogo dabe da te sęęę tolali.  
 Mu tama, hauwa kibu bede  
 te da dwai bidali, tama nago da

- te wiegi yai pemene ilibo  
 te tigidali kibu bede dwai bidali  
 usu nama, tama tiwai yao.
- 16 Nago te naga bomai sę dabe  
 te naga sę bidi dabolo ola mao.  
 Nago te wiegi wiegi yai bomo  
 te dago nosali pedalubo wąj nęę dabebolo ola mao.
- 17 Genuai Bidi, nage dago God da, dago homugo  
 te nago olo tau sabo wiegi yai kolesaga dabolo eyu,  
 tama da wiegi yai bugagia ilao.  
 Tama dago ebo sę tigidali te wiegi yai pedalumainu ilao.  
 Mu tama, nago te dago ebo sę tigidali dąę walama,  
 tama te bugagia elalumainao.

## Salmo 91

### God te da tonalubo bidi dao

- 1 Bidi te Ugwade Mu Bidibo Godiba pelama,  
 te agai aga tonalumainu yali,  
 aga te Tigidali Bomo Elalubo God pąde bidiyu,  
 tama agai aga mesegalubo dao.
- 2 Te bidigo te tama po Genuai Bidiba waibao,  
 “Nago ena bagualu, tama nago  
 ena bugagia seselalubo dao.  
 Nage eno God dao.  
 Eno konealubo homu nageba muai dao.”
- 3 Mu tama, te Godigo nage bugagia tonalu,  
 tama te geme dualalubo naigo  
 nage me dologobeo.  
 Tama agai nage bagualubaso,  
 tama te dwai gasi dabego nageba me sogobeo.
- 4 Te agai nage bugagia mesegalu,  
 te kakarukgo aga wai dabe  
 te bogogo mesega sabo tiwai yaibao.  
 Nage te bugagia Genuai Bidigo bogo  
 dologode dualaluaibao,  
 tama agai nage tonalubao.  
 Agai nage tonaluabo po te tibo po me wagobeo.  
 Tama tiyu, nage Genuai Bidi dali bidiyu,  
 te bidi aga te hwıbo sabelede  
 duala sabo tiwai ebo dao.

- 5 Nago te magi nai me deli nageba  
te hulide pedelaiba homu eyu, wi me egobeo.  
Tama te giligade nage te magi nai me delide wi eyu,  
te nage dolabo nai me deli te polo  
pedelabo homu wi me elamu dao.
- 6 Tama te genuai gasi nageba te hulide  
pedelabo te wi me igio,  
tama te giliga tomode me te dwai nai  
nageba pedaliyu,  
tama nage dolainu me egobeo.
- 7 Te 1,000 bidi nage pąde isibaso me,  
tama te 10,000 bidi nago  
dolo nogo badu isibaso,  
te tagalao, te dwai nai nage pąba me asogobeo.
- 8 Te naga digi te Godigo te dwai sę ebo bidi dabe  
augwa yali sęde wei ponobo te nago suaibao.
- 9 Nage te Godiba pelama,  
te dwai nai dabede geme duala sao,  
tama te Ugwadu Mu Bidibo Godigo  
te nage mu seselalubo bidi dao.
- 10 Tama tiyu, te dwai nai nageba me pedalugobeo.  
Tama genuai gasi te nago be pąba me asogobeo.
- 11 Te Genuai Bidigo aga ensel dabeba  
te nage menaba pabo madi tigidali badu  
te nage tonalubo sę mawaibao.<sup>p</sup>
- 12 Tama te ensel dabego nogogo nage tolalu,  
tama tiyu, te masigigo nago saęade  
me dologobeo.<sup>q</sup>
- 13 Te nago laion me hasamani agayu,  
tama te gesi ogwa bidi laion,  
me genuai hasamani dwai mu me  
agayu, yaibao.<sup>r</sup>
- 14 Godigo te tama po wali,  
“Te eno te ena wei mu ebo bidi dabe  
augwali ma saibao,  
tama te eno te ena mu koneani  
bidi dabe seselalubo dao.



- 15 Te augwaligo enaba gedu haluasa po wabo sogo,  
 te eno augwaligo wabo po odaibao.  
 Tama te seęę augwaliba pedalubaso da,  
 te ena augwali dali bidaibao.  
 Tama eno augwali ma selama, tama augwaliba  
 te genuai nogi mawaibao.
- 16 Te augwaligo bidabo ula  
 te ibanu gana bobage kidilama,  
 te augwa gasa ugwadu me daganobo tiwai yaibao.  
 Tama eno augwali ma selama,  
 tama augwali ena dali bidaibao,” wali.

## Salmo 92

### Te God nogi ugwaba sabo tęąbi po dao

- 1 Genuai Bidi, nage Ugwadu Mu Bidibo God  
 da, te eno nageba usu da wabo te wiegi yai da,  
 tama te nago nogi ugwaba sabo tęąbi dabe waibao.
- 2 Tama te tigidali kigamude te eno nageba  
 te nago ena wei ebo po hanilama  
 wabo, te wiegi yai ebao,  
 tama tigidali sogo hulide te nago ena bugagia  
 tonalubo da po hanilama, nageba waibao.
- 3 Eno te wiegi yai musik te gitade weyu,  
 te nage nogi ugwaba saibao.
- 4 Eno te nago bomai sęba homu kone palama,  
 tama ena bugai haliga mu elama,  
 tama eno te wiegi yai homu  
 pemene ebo tęąbi ebo dao.
- 5 Genuai Bidi, nago te genuai sę mu ebo dao.  
 Nago homu kolesaga te genuai mu elalubao.
- 6 Te homu kolesaga meni yai bidi, te umawai bidigo,  
 te tama sę ebo dabe me koneainu  
 ebaso, usu me egobeo.
- 7 Te dwai bidi dabe te wiegi yai nosa  
 tiwai ma pedaliyu,  
 tama te dwai kolesaga ebo bidi dabego  
 te doado bage hauwa selama,  
 tama augwa bugagia bidaibao,  
 tiali goli, nago augwali mu dolaibao.
- 8 Magi baso meni, Genuai Bidi,

naga digi te sesemane king  
bidada peyu, bidada paibao.

<sup>9</sup> Dago koneai, te nageba boi bidi  
ebo bidi dabe te augwali isaibao,  
tama nago te dwai sę ebo bidi dabe  
aiyaba elaluaibao.

<sup>10</sup> Nago enaba genuai bomo mawai,  
te uni bulmakau omaigo bomo tiwai mawai.  
Nago enaba wiegi yai sę ebaso,  
tama ena wiegi yai pemene mu ebo dao.

<sup>11</sup> Eno te ena boi bidi dabe dolobo sulama,  
tama eno te dwai bidi dabego gela wabo odali.

<sup>12</sup> Te doloba pai kolesaga ebo we  
bidi dabe te wiegi yai pedalu,  
te nigo wiegi yai du walubo tiwai yaibao,  
tama te genuai holama,  
te Lebanonde te wiegi yai ni  
sida dabe tiwai yaibao.

<sup>13</sup> Augwali te Genuai Bidigo bede  
bulai ni dabe tiwai yaibao.  
Augwali te dena Godigo be tomode  
te wiegi yai mu pedalubo tiwai dao.

<sup>14</sup> Te augwali monu dabe pedalubo sogo,  
te augwa nai du me waludaibao.  
Augwali te bomo elalu, tama augwali me sasia pabeo.  
Te augwa yabe te ni yabe gesi sogo  
elalubo tiwai sesemane elaluaibao.

<sup>15</sup> Te kolesaga augwaligo te we bidi  
augwaliba ola mabo dao,  
Genuai Bidi te mu doloba pai dao.  
Agai te ena seselalubo bomo elalu,  
tama agade dwai sę ebo me elalubeo.  
Mu menio.

## Salmo 93

God te king bidi bidibao

<sup>1</sup> Genuai Bidi king bidibao.  
Agai genuai nogi mu elalubao,

- tama genuai bomo me elalubo.  
 Agai e tḡ te aga bidibo pesagede bomo elama,  
 mu elalumainu yai dao.
- 2 Genuai Bidi, te tigidali nai me  
 pedalisabadi, nage bidali.  
 Nage sesemane bidada peyu, bidada pali,  
 tama nage te king sesemane  
 bidada peyu, bidada pabo dao.
- 3 Genuai Bidi, tamu aḡ ge bo dali aiyanu mu igulali,  
 te kulukulu umabo mu waibao.  
 Te bomonama, mu kulukulu wabo dao.
- 4 Genuai Bidi, te nago genuai bomogo  
 nago te dagalude tigidali nai tonalubao.  
 Te tamu aḡgo kulukulu wabo bomo  
 te dwasianu naga ebao.  
 Tiali goli, nago bomo te genuai mu elalubao.  
 Te tamu aḡ dini peda peyu, te nambisde  
 bomonama kulukulu wabo,  
 tiali goli, te aḡ dini dabego bomo  
 te nago bomo dali tiwai si me usugobeo.
- 5 Te nago tigidali bomai po te sesemane  
 elalua peyu, elalua pobao.  
 Mu tama, Genuai Bidi, te nago tempel be  
 te tedali wiegi yai sesemane elalubo dao.

## Salmo 94

**Godigo dwai se ebo bidi tigidali aiyaba elaluama,  
 dwagi yai bidi tigidali tau saibao**

- 1 Genuai Bidi, nage da  
 te dwai se ebo we bidi augwaliba wei ponobo  
 God dao.  
 Megi nago seḡe ebo augwaligo sumainogo waselao.
- 2 Nage hogodama, nago po tuḡba tigidali  
 we bidi pedelaibao.  
 Megi nage aselama, hagoma eyu dwai se ebo bidi  
 augwaligo ebo kolesaga wei ponao.
- 3 Nisu nago sogo dwai se ebo bidi  
 augwaligo ebo kolesagade dwagi yai homu egowe?  
 Genuai Bidi, augwaligo bidabo sogo  
 nisu naga elalubawe?

- 4 Nisu naga sogo elalui dwai sę ebo bidi dabe  
 augwaligo dwai kolesaga ebo dali dwagi yai homu  
 te dwai sę dali yaibawe?
- 5 Genuai bidi, augwaligo nago we bidi  
 aiyaba elaluama,  
 tama genuai sęge augwalibolo mabo dao.
- 6 Augwaligo te wilawe we dabe, augwali ela muyu,  
 tama te tiana wai dabe me ela muyu,  
 tama gasa bulu we bidi dago tęde bidibadi,  
 augwaligo ela muyu ebo dao.
- 7 Tama augwaligo te po wabo,  
 “Genuai Bidi agai da subo menio.  
 Israel bidigo God, agai dago  
 te sę ebo agai tede homu palobo menio,”  
 augwaligo te po wabo dao.
- 8 Dage eno we bidi, magi baso dagego gegeda pobawe?  
 Dage kolesaga meni yai, nisu sogo dagego koneaibawe?
- 9 Godigo dago olo nigai. Tama agai odogobewe?  
 Tama God agai dago gedu me nigai.  
 Tialima, aga digi tonolo bilibo meniwe?
- 10 Agai te tigidali tęde bidibo bidi hani tonalubo dao.  
 Tialima, agai augwali dodolobo meniwe?  
 Tama aga tigidali we bidigo po ola mabo bidi.  
 Agai konebewe?
- 11 Genuai Bidi agai tigidali we bidigo homu koneai.  
 Agai koneai, augwaligo homu kolesaga  
 te olo magi nai me tiwai yaibao.<sup>s</sup>
- 12 Genuai Bidi, nago te bidi me deli  
 dodolomainu eyu, nago bomo yai po  
 te bidi ola mayu da, te bidi aga dwagi yai  
 homu emainao.
- 13 Nago te sę ebo aga olo bidimainogo tiwai,  
 tama sęgego aga gegeidali weyu,  
 tama te dwai bidi dabe isilama, gų pageba paboba  
 usu nigai pabo dao.
- 14 Magi basowe, Genuai Bidigo  
 aga we bidi augwali tagalobo menio.

---

<sup>s</sup> 94:11 1 Ko 3:20

Mu tama, aga sa muani we bidi augwali  
tudiba me mugubeo.

15 Tama nosali bidi dabego po tų ebode,  
augwaligo sę dolo naga yaibao,  
tama dwagi yai doloba pai bidi  
augwaligo usu dao po weyu,  
te kolesaga wali paibao.

16 Niwai bidigo ena tau selama,  
tama te dwai sę ebo bidi aiyaba elaluaibawe?  
Niwai bidigo ena tau selama,  
te dwai sę ebo bidi sela sęwaibawe?

17 God agai ena tau sigi menigi sogo da,  
ena polobadu isai gų pagede  
polo pila mugi dao.

18 Eno te homu yai, “Eno sęą kıkıla peyu,  
ena tula muaibao,” wai.  
Tiali goli, menio.

Genuai Bidi nago ena godolo mu eyu,  
tama nago ena nogo tola selama,  
ena te dwai sęę ebo digi tulalubeo.

19 Tama eno homu sęę yali sogo  
tama eno homu nai hauwa dali yai,  
nago eno homu dwagi yai eyu,  
tama nagame elama bidai,  
tama eno homu dwagi yai emainogo yai.

20 Te bomo yai po mubo bidi dabe  
augwaligo te we bidibolo  
augwaligo dwai sę emainao wai.  
Nago te tobage dwai sę ebo tobolu bidi  
dabe dali abagi homu ebo menio.

21 Augwaligo dwagi yai sę ebo bidi  
dwai sęgo aga dolainogo sisinama, po mibo dao,  
tama augwaligo dwai sę isęwai bidi  
dabe dali po tų ebo dao, augwali elainogo tiwai.

22 Tiali goli, Genuai Bidi agai  
bomo mu elama, ena tau sai.  
Ena agaba pelama, eno God agai  
ena bugagia tonalubo dao.

23 Augwaligo dwai kolesaga hauwa mu yai,  
tama agai augwaligo dwai sę yali wei begelaibao.

Genuai Bidi dago God, megi agai  
augwali tigidali dolaibao.

## Salmo 95

### Te God nogi ugwaba sabo balia po dao

- 1 Dage asiąo. Dago te Genuai Bidi nogi  
ugwaba sabo balia po wainao.  
Dago te bomai Godigo da ma sali, te homu koneama,  
tama dena balia weyu,  
tama agaba wiegi yai pemene yao.
- 2 Da te aga pąba pelama, tama agaba usu da po wao.  
Dago te wiegi yai pemene ebo balia po meba weyu,  
tama agai nogi ugwaba sinoa.
- 3 Magi baso meni, Genuai Bidi aga te bomai God dao.  
Aga te bomai king,  
tama te tigidali tibo god daide  
aga ugwadu daide bidibao.
- 4 Agai te tigidali bulu tų pedai tonalubao,  
te aiyaba odogo gulali bulu tigidali,  
me te ugwanu igiluali bulu du tigidali,  
te agai naga tonalubo dao.
- 5 Aga digi te tų, me tamu ąi nigilama,  
tama tialima, agai augwali tonalubao.
- 6 Dage asiąo, dago tobolu basi gulama,  
tama agaba lotu wainao.  
Genuai Bidigo da nigai.  
Tialima, da aga pąba pelama, tama kidu sugunao.
- 7 Aga digi dago God dao.  
Aga digi da we bidi te sipsip wai tiwai tonalubao,  
tama agai da nai mobao.  
Te e sogo megi tama dagego agai pedauwalide po odiąo.
- 8 Genuai Bidigo te po wai,  
“Dagego te duga haliga bomonama daų ola sigimio,  
te polobadu duga wąj nų dabego  
te bulu Meriba me Masa,  
te tų wa pai bulude yali homu tiwai  
igimio,” po wai.<sup>t</sup>
- 9 “Te bulude augwaligo ena usu sali.

<sup>t</sup> 95:8 Hib 3:15; 4:7

- Augwaligo te eno ebo tigidali bomai sę suali,  
 tiali goli, augwaligo ena usu sai dao."<sup>10</sup>  
 Eno te hani we bidide dwai haliga iduali,  
 te kibu be bidi sese siba usu nai.  
 Tama tibaso, eno te po wali, augwa hagoma mu yali.  
 Augwaligo te eno wali pabo homu me isiąwai.  
<sup>11</sup> Tama tialima, te ena haliga sębę elama,  
 tama augwaliba te tama po daų weyu wali,  
 ‘Mu tama, dage te bulu tomoba me pogobeo,  
 eno te dage toma nomainu mawainu yali  
 buluba me pogobeo,’ po wai dao,” wali.”

## Salmo 96

**God te polalubo king, tama agai tigidali we bidi tonalubao**

- <sup>1</sup> Dagego gesi balia Genuai Bidiba waiyaą.  
 Dage tigidali tąde we bidigo  
 te Genuai Bidiba balia po waiyaą.  
<sup>2</sup> Genuai Bidiba balia wao.  
 Agai nogi ugwaba sao. Agai da ma sai.  
 Te tigidali side dago te po te we bidi dabeba pusa maiyaą.  
<sup>3</sup> Dagego agai genuai nogide po  
 te tigidali tą pedai kantride bidibo  
 we bidi hani dabe pusiyaą.  
 Te tigidali we bidiba te agai  
 genuai wiegi yai sę dabe yali po pusa mao.  
<sup>4</sup> Genuai Bidigo te genuai nogi elalubao.  
 Dago agai nogi ugwanu mu sidu geao.  
 Da te tibo god dabe wi me igio.  
 Dago te Genuai Bidide naga wi yao.  
<sup>5</sup> Magi baso meni, te gasa hani  
 we bidi dabego tibo god dabe  
 te augwali tibo god naga dao.  
 Tiali goli, Genuai Bidigo te dagalu dali,  
 te ugwadu elalubo nai tigidali nigai dao.  
<sup>6</sup> Genuai Bidi te genuai nogi elalu, te king bidibao.  
 Te aga tedali wiegi yai tempel bede

<sup>10</sup> 95:9 Sai 17:1-7; Nam 20:2-13    <sup>11</sup> 95:11 Nam 14:20-23; Bom 1:34-36; 12:9-10; Hib 3:7-11;  
 4:3, 5

te tigidali doado bagego te agai bomo ąai ilama,  
tama aga gasa sawi yai au te elalubao.

- 7 Dage tigidali tęde bidibo hani we bidi,  
dagego agai genuai nogi me bomo te ugwaba sao.
- 8 Dagego Genuai Bidigo genuai nogi ugwaba sao.  
Te ofa yabo nai me deli selasa,  
te agai tempel be tomoba pao.
- 9 Dage tigidali we bidi te tedali wiegi yai bidiyu,  
tama Genuai Bidiba lotu waiyaęo,  
tama dage agade noma siąo.<sup>w</sup>
- 10 Dagego te tigidali we bidi haniba te tama po waiyaęo,  
“Genuai Bidi te king bidibao,” wao.  
“Agai te tę ąai walama, tama te tę bugagia bidiyu,  
tama te mumunu me egobeo.  
Nosali te Genuai Bidigo po tę eyu,  
tama tigidali bidi dolo dagalaibao.”  
Te po wao.
- 11 Dagalu, me tę, dage pemene yao.  
Tamu ąi, nage dali, te nage tomode bidibo tigidali nai,  
dagego kidagalo weyu, i hae waiyaęo.
- 12 Tigidali gi me, dage dali te dagede  
elalubo nai tigidali, dage wiegi yai pemene mu iyaęo.  
Tama te Godigo gedude, te buside tigidali nigo  
augwa te wiegi yai pemene ebo balia waibao.
- 13 Magi baso meni, Genuai Bidi te aselama,  
te tigidali tę tonaluagasaibao.  
Agai te tigidali tęde we bidi  
te doloba pai kolesagade tonaluaibao.  
Tama agai augwali te mu pogo naga dagalaibao.

## Salmo 97

### God polalubo king dao

- 1 Genuai Bidi king bidibao!  
Tę, nage pemene yao.  
Tama te tamu ąi tomode elalubo bulu  
ailan dabe, dage bugai haliga iyaęo.
- 2 Te pę dabe me hulua sabogo aga mesegelebo dao,

<sup>w</sup> 96:9 Tib 29:1-2



tama agai te we bidi dabe te  
doloba pai kolesagade tonalubao.

3 Sia te aga pabodu polasa peyu,  
tama aga te pobeasa biliduali  
boi bidi dabe ulaibao.

4 Agai te be selego ula pedalumainu  
ilama, tama te tų ula ilibao.

Togo sulama, tama noma sabo dao.

5 God te tigidali tųo Genuai Bidi dao.  
Aga asobaso, tama te bulu du dabe  
te wę tiwai pedelaibao.

6 Te ugwadu elalubo dagalugo te agai  
doloba pai kolesaga po pusuyu,  
tama tigidali hani we bidigo agai  
te boma pai ula subo dao.

7 Te tibo god dabeba lotu weyu,  
te nogi ugwaba sabo we bidi dabe,  
augwali te hale dwai mu saibao.

Genuai Bidigo te tibo god wabo nai  
tigidali aiyaba elalubo dao.

8 Te Saion we bidi tigidali,  
me te Juda taun we bidi dabe,  
augwa te bugai haliga elama,  
tama nago po tųde wiegi yai pemene yaibao.

9 Genuai Bidi, nage te Tigidali Bomo Elalubo God,  
nago te tigidali tų pedai tonalubao.

Nago genuai nogi elalu,  
tama nago tigidali tibo god aiyaba elaluai dao.

10 Genuai Bidigo te dwai kolesaga  
wei isąbo we bidi dabe augwali  
te agai wei homu mu ebao.

Agai te aga we bidi dabe bugagia tonalu,  
tama augwali te dwai bidi dabego  
nogode ma sabo dao.

11 Godigo te doloba pai we bidi dabeba ula mayu,  
tama augwali homu pemene ilibo dao.

12 Dage doloba pai we bidi,  
te Genuai Bidigo ebo sę dabede pemene yao.  
Te homu kone palama, tama agaba usu da weyu,  
aga te tedali wiegi yai da wao.

## Salmo 98

### God te tigidali bagego king dao

- 1 Dago gesi balia Genuai Bidiba wao.  
 Agai te haniani wiegi yai sę yai.  
 Te agai genuai bomogo,  
 tama aga tedali wiegi yai kolesagade naga, agai te  
 hwıbo boi bidigo bomo aiyaba elalui.
- 2 Genuai Bidi agai te hwınama,  
 te boi bidi aiyaba elalui po pusali,  
 tama agai augwali ma dobola sabo bomo  
 te aga hani we bidi dabeba ola mawai,  
 te agai Israel dabe ma sali sogo tialio.
- 3 Agai te aga dą walali pode homu konealui,  
 tama agai te Israel dabe homu dene eyu,  
 tama augwali me tagalubeo.  
 Tigidali bulu te tigidali we bidigo sualio.  
 Te dena Godigo te boi bidigo bomo  
 aiyaba elaluama, tama da ma sai dao.
- 4 Dage tęde we bidi dabe i hae weyu,  
 Genuai Bidiba pemene yao.  
 Te bugai haliga ebo tęąbi hodolama weyu,  
 tama agai nogi ugwaba sao.
- 5 Te gita eliyu, tama te tęąbi dabe weyu,  
 te Genuai Bidi nogi ugwaba sao.  
 Te gitago wiegi yai musik mu waiyąo.
- 6 Te biugel me ona eliyu, me bu weyu,  
 tama i weyu, te wiegi yai pemene  
 Genuai Bidiba yao, aga te king dao.
- 7 Tama tamu ąı, nage dali te nagede elalubo tigidali  
 sųę me, dagego te tęąbi waiyąo.
- 8 Te genuai soabo ąı dabe, dagego te nogo eliyąo.  
 Tama te bulu du dabe, dagego tęąbi weyu,  
 te Genuai Bidi gedude pemene yao.
- 9 Magi baso meni, aga te tigidali bulu  
 tę tonaluainu asobao.  
 Tama aga te king bidu, tama tigidali we bidi  
 te doloba pai kolesagade tonaluyu,  
 te po tų ebo dolo naga yaibao.

## Salmo 99

### God te polalubo king dao

- 1 Genuai Bidi king bidibao.  
Te we bidi dabe wi elama, noma sai.  
Aga te sia kingde te ensel dabe daide dugulalubaso,  
tama te tų mali ebo dao.<sup>x</sup>
- 2 Te Saionde Genuai Bidigo  
te genuai bomo mu elalubao,  
tama agai te tigidali tųde bidibo  
hani bage tonalubao.
- 3 Tigidali we bidigo aga te polalubo king  
te genuai nogi elalubo homu koneaibao.  
Tama augwa aga genuai nogi  
ugwaba somainu yaibao.  
Aga te tedali wiegi yai mu dao.
- 4 Bomai king, nago te doloba pai kolesaga wei ebo dao.  
Nago da Israel we bidi dabeba  
te doloba pai me wiegi yai kolesaga menama,  
tama dago wali pali.  
Tama nago dago te gasa we bidi dabe  
te doloba pai kolesagade dagalumainu ilali.
- 5 Dagego te Genuai Bidigo nogi  
ugwaba siąo, aga te dena God dao.  
Dage pąba pelama, tama agaba lotu waiyaąo.  
Aga te tedali wiegi yai mu dao.
- 6 Moses dali Aron si te Genuai Bidigo pris bidali,  
tama Samuel me augwalide te  
Godiba lotu wali bidi me deli dao.  
Augwa te Genuai Bidiba gedu haluasa po obaso,  
tama agai augwaligo gedu haluasa  
po wabo odai dao.
- 7 Aga te genuai dagalu pųde bidama,  
tama augwaliba te bomai po mani.  
Tama te Godigo augwaliba mani bomai  
po tigidali te augwaligo wali pai dao.<sup>y</sup>

---

<sup>x</sup> 99:1 Sai 25:22

- 8 God, dago Genuai Bidi, nago te naga we bidi  
 augwaligo gedu haluasa po odali.  
 Nago augwaliba ola mawai, naga digi nage te God,  
 tama nago te augwaligo seęę sela sębo dao,  
 tiali goli, nago te augwa ebo  
 dwai seęde te dene mayu yai dao.
- 9 Te dena Genuai Bidi Godigo nogi ugwaba sao.  
 Tama aga bulu dude te agaba lotu wao.  
 God, dena Genuai Bidi, aga  
 te tedali wiegi yai mu bidibo dao.

## Salmo 100

### Godigo nogi ugwaba sabo tęąbi me deli dao

- 1 Tigidali tęde we bidi,  
 dagego God dali dwagi yai homu elama,  
 tęąbi wao.
- 2 Dagego dwagi yai homu Genuai Bidi  
 dali eyu, lotu po waiyęo.  
 Dagego dwagi yai homu ebo tęąbi weyu,  
 tama aga pageba pao.
- 3 Dagego Genuai Bidi homugo konebo tagaligio,  
 aga deli te God mu dao.  
 Aga deligo da nigai, tama da aga we bidi dao.  
 Da agai we bidi, da agai te kibu sipsip tiwai dao.
- 4 Da agai dwagi yai be tomoba pelama,  
 agabolo puba hwi po olama, gedu haluasa po weyu,  
 aga nogi ugwaba sao.  
 Dago aga dali usu da olama, gedu haluasa po weyu,  
 tama agabolo genuai nogi mao.
- 5 Genuai Bidigo dwagi yai kolesaga naga ebo dao.  
 Sesemane sogo agai da godolo mu ebo dao.  
 Agai sesemane bidada pabo sogo mu po wabo  
 wali pabo dao.<sup>z</sup>

<sup>z</sup> 100:5 1 Sto 16:34; 2 Sto 5:13; 7:3; Esr 3:11; Tib 106:1; 107:1; 118:1; 136:1; Jer 33:11

## Salmo 101

### Kingo daę walali po dao

- 1 Genuai Bidi, eno te nage  
wali mu pabo kolesaga,  
me te doloba pai kolesagade tęąbi po obao.  
Genuai Bidi, eno nageba homu kone palama,  
tama eno te tęąbi po obao.
- 2 Te eno doloba pai kolesaga naga wali paibao.  
Genuai Bidi, mena sogo nago ena tau sagasaibawe?
- Eno te doloba pai kolesaga naga ena bede ebo dao.
- 3 Eno te dwai sę ebo kolesagade  
usu da me wagobeo. Mu menio.  
Eno te God tudiba mubo bidi dabego  
kolesaga wei me egobeo.  
Ena augwali dali me biligobeo.
- 4 Eno te tibo po wabo kolesaga me wali pogobeo.  
Tama eno te dwai sę ebo kolesaga  
dabeba homu kone me palogobeo.
- 5 Te eno te gasa bidi dabeba  
posobo po wabo bidi dolaibao.  
Tama eno te hagoma ebo bidi dabe  
bidimainu me sula tagalogobeo.
- 6 Te eno te God wei elama, te wali pabo bidi dabe  
augwali naga te eno genuai wiegi yai bede  
ena dali bidimainu yaibao.  
Tama te wiegi yai kolesaga sesemane ebo bidi dabe,  
te bidi dabe naga te eno sę emainu yaibao.
- 7 Te tibo po wabo bidi dabe,  
augwali te eno genuai bede me bidigobeo.  
Tama te tibo po wabo bidi dabe ena dali  
bidimainu me egobeo. Mu menio.
- 8 Tigidali side eno te dwai sę ebo bidi  
te dago bulu tę pedaide dolaibao.  
Eno te dwai sę ebo bidi dabe sela sayu,  
tama augwali te Genuai Bidigo  
taunde bidimainu me egobeo.

## Salmo 102

Te seḡe tolobo gesi bidigo gedu haluasa po wali

- 1 Genuai Bidi, eno gedu haluasa po wabo  
 odao.  
 Eno nageba i wabo, te nago ena tau somainu ebao.  
 Eno i wabo odao.
- 2 Te ena seḡe genuai tolobo sogo,  
 nage enade geme me duala sigio.  
 Eno gedu haluasa po odao.  
 Tama eno nageba i wabo sogo, nago eno i polo odolama,  
 tama ena tau sao.
- 3 Te eno bidibo ula te sia hano tiwai dao,  
 te dwasianu sogo naga elaluama,  
 tama pela silaibao.  
 Tama eno tigi posolo mu dao,  
 te genuai siago ulubo posolo tiwai ebo dao.
- 4 Godigo ena elalubo,  
 te bidigo wa pai nosa agabo tiwai yali.  
 Tama eno haligago te nai tuabo wei me ebeo.
- 5 Ena dene ebaso, tama eno i dwagilama mu wai.  
 Tama eno tigi te me nisibeo, ena mu nomona salio.
- 6 Ena te wa pai bulude te ba kemodage  
 bidibo tiwai bidibo,  
 tama te hulide bilibo ba me deli  
 te tolabo pesagede bidibo tiwai eyu,  
 tama te bidi mu meni yai pesagede mu bidibao.
- 7 Ena te betde piali, tiali goli eno gedu pedaluai.  
 Iya, enaduba deli te ba me deli te be pedu daide  
 ugwadu dulalubo tiwai ebao.
- 8 Te giligade, me hulide, te boi bidi dabego enaba  
 dwai po wabo.  
 Augwaligo posobo po enaba weyu, tama ena nogi weyu,  
 te ena dolobo seḡo gegebo sogo te dwai po wabo.
- 9-10 Nago wado po genuai enade elalubaso,  
 tama ena te sia keli naga tudu,  
 tama gedu aḡi gela guga te kapba tulaluama,  
 tama eno tuyu ebo dao.  
 Nago ena selama, tama ena meba me  
 te pobele bage saḡo tiwai yalio.

- 11 Eno bidibo ula te pęwadage sogo naga bidibao,  
te giliga pio dega sabo tiwai yali.  
Ena te nosa wa pai tiwai yai dao.
- 12 Tiali goli, Genuai Bidi,  
nage sesemane sogo king bidibao.  
Te nosali pedalubo hani we bidi tigidaligo  
te augwaligo nage koneaibao.
- 13 Megi da, nage aselama, tama nago te olo tau sabo  
wiegi yai kolesaga te Saion taunba yagasu,  
tama aga tau sao.  
Te nago aga homu dene yabo sogo te pedelalio.  
Megi naga tama, te tiwai sę ebo sogo dao.
- 14 Te Saion taun dolali,  
tiali goli te nago we bidi dabego aga wei mu ebao.  
Megi da, aga dolali, tiali goli augwaligo aga homu dene  
mu yai dao.
- 15 Tigidali hani bage te Genuai Bidide wi elama,  
tama aga dologode bidibao.  
Tama tigidali tęde king dabe,  
te augwali agai bomode wi yaibao.
- 16 Nosali, Godigo te Saion taun ma nigibo sogo,  
agai te aga bomo te we bidi dabeba ola mawaibao.
- 17 Tama agai te aga we bidi dabego  
gedu haluasa po odaibao,  
te polobadu agai augwali tagalama,  
te augwali odolali bidali.  
Te agai augwaligo gedu haluasa po wabo  
te tudiba ma mugobeo.
- 18 Te sę Genuai Bidigo yali,  
dago te bukude asęnama muao,  
te nosali pedalubo te wąj nęę dabe  
augwaligo konemainu yao.  
Nosali te idago augwali ame nabo side,  
teda augwaligo me te Genuai Bidigo  
yali sę po odolama,  
tama augwaligo me te aga nogi  
ugwaba somainu yai dao.
- 19 Dago te tama po asęaibao:  
Genuai Bidi te ugwadu aga tedali  
wiegi yai pesagede bidibao, tama aiyaba tonalubao.  
Aga te dagalude bidiyu, tama te tęba aiya tonalubo dao.

- 20 Agai te kalabus bidi dabe augwa  
tolali seḡede gela wabo odali.  
Tama agai te po tų silama tama augwa  
te kalabus silali bidi dabe tau siyu,  
te augwali me isidali weyu yalio.
- 21 Tama tibaso te Jerusalemde te we bidi dabego  
te Genuai Bidigo nogide po pusama,  
tama augwaligo agaba usu da po waibao.
- 22 Augwaligo te tama tiaibao, te we bidi hani dali,  
te augwa king dabe dali, te Jerusalemba sisinama,  
te Genuai Bidiba lotu wabo sogo  
te tama tiaibao.
- 23 Ena gesi ogwa bidide digi,  
tama Genuai Bidigo eno bomo dolali.  
Ena te eno bidibo ula sesabi elama, bidimainu ebeo.  
Agai ena bidabo sogo bodolu togwai dao.
- 24 Eno God, nage sesemane bidada peyu, bidada pobao.  
Nago megi ena me tagaligio.  
Ena monu dabe me ebeo, ena gesi bidi tigi me elalubao.
- 25 Polobadu mu nago te tų nigali.  
Tama naga nogogo digi nago te dagalu nigiyu,  
tama ugwade elalubo nai tigidali nigai dao.
- 26 Te tigidali nai te hagawaibao.  
Tiali goli, nage te sesemane bidaibao.  
Te augwali te poloba ugwa  
badia pabo tiwai pedelama, te dolaibao.  
Tama nago augwali hasegelama,  
te bidigo ugwa hasegelibo tiwai yaibao,  
tama augwali pela siliyu, tama me elalugobeo.
- 27 Tiali goli, nage da, me bididubadi,  
tama nage me isigobeo.<sup>a</sup>
- 28 Tama nago dago wai dabe tonalu,  
tama augwali bugagia bidaibao.  
Tama nago te augwa wų nų nosali  
pedalubo hani dabe selama,  
tama augwali te nage dali sesemane  
bidada pomainu yaibao.

---

<sup>a</sup> 102:27 Hib 1:10-12



## Salmo 103

### Godigo da godolo mu yai

- 1 Eno Genuai Bidigo nogi ugwaba saibao.  
Ao, eno tigi me homu kolesaga tomode  
elalubo nai tigidaligo  
Genuai Bidigo dwagi yai nogi ugwaba sainogo ebo dao.
- 2 Eno Genuai Bidigo nogi ugwaba siyu,  
tama agai dwagi yai sę ena dali ebo  
te eno homugo tagalogobo.
- 3 Agai eno dwai sę ebo tigidali sela sęwai,  
tama eno gasi ebo tigidali usu yai.
- 4 Genuai Bidigo ena ma sai, tama ena isibeo.  
Agai olo ena tau sabo dwagi yai homu eyu,  
ena hobede mu ebo dao.
- 5 Tigidali sogo ena tęde bidibo Genuai Bidi agai  
dwagi yai nai ena mabo usu mu ebo dao.  
Agai tama tiyu, ena gesi ma pedaliyu,  
tama te ba kemedagego bomo tiwai  
elalubo ena bidibao.
- 6 Genuai Bidigo dwagi yai sę we bidi  
augwali gasa dwai bidi dabego  
dwai sę dologode bidibadi tau sabo dao.  
Tama agai augwali ma hodolama,  
augwali bugagia bidibo dao.
- 7 Polobadu Moses dali agai yabo te sę po wai.  
Tama agai Israel we bidigo  
te agai bomo yai sę ebo sumainu yai.
- 8 Genuai Bidi agai dwagi yai homu eyu,  
da hobede mu elama, olo tau sabo dao.<sup>b</sup>  
Agai sębę polo isęma, tama agai  
da sesemane godolo mu ebo dao.
- 9 Agai da dali odolali olo wado po me wabo menio.  
Tama agai sębę ebo hauwa sogo elalubo menio.
- 10 Dago dwai sę ebode da dene sabo digi,  
agai te dago yali dwai sę usu nama  
dene dabolo mabo menio.  
Dago dwai kolesaga hauwa yai,

<sup>b</sup> 103:8 Jer 5:11

tama agai genuai seḡe dabolo  
 wei begelaibao homu yai,  
 tialima agai te se ebo menio.

- 11 Aga dali wi ebo we bidi,  
 agai augwali godolo mu ebo dao.  
 Agai genuai godolo ebo homu augwali dali ebao,  
 te dagadu digibulu ugwaba mu  
 elaluyu, tḡ aiyadu mu elalubo tiwai dao.
- 12 Giliga pedalobo dali,  
 te giliga iba dega sigi pabo dali,  
 te si pade elalubo menio.  
 Te digibulu mu elalubao.  
 Te tiwai Godigo dago dwai se ebo  
 aga digibulu bidiyu, te dwai se sela saḡo dao.
- 13 Ayago aga wai dabe hobede ebo dao.  
 Tiwai Genuai Bidigo aga dali wi ebo  
 we bidi augwali hobede ebo dao.
- 14 Agai koneai, agai da tḡ selama nigai,  
 tama agai homugo da te tḡ hogomu ebo tiwai dao  
 homu ebao.
- 15 Da we bidi bidibo ula peḡwadage mu, te nosa tiwai.  
 Da peḡwadage sogo bidilama,  
 da te plaua nosa du walama, isibo tiwai yaibao.
- 16 Wali asu, te plaua memenege elama, tulalubo dao,  
 tama bidi dabego te plaua elalubo ma subeo.
- 17 Tialima, Genuai Bidi agai nogi  
 ugwaba sabo we bidi augwali  
 sesemane bidada pabo sogo agai godolo mu ebo dao.  
 Tama aga te dwagi yai aga waḡ  
 dabe augwali nosali pedalobo te dwagi yai yaibao.
- 18 Tama augwaligo Genuai Bidigo  
 daḡ olama muani po wali peyu,  
 tama augwaligo agai te bomo yai po  
 tigidali wali pai pobaso da,  
 agai augwali dwagi yai we bidi nogi nogi yaibao.
- 19 Genuai Bidi dagalude tuni bidi bidiyu,  
 tama aga tigidali nai tonalubo bidi dao.
- 20 Dage tigidali Genuai Bidigo ensel mobo bidi,  
 dagego genuai bomo elalubao.  
 Dagego agai po wali pabo bage,

- dagego olo agai po wabo digi bugagia mubo dao.  
 Tialima, dagego Genuai Bidi nogi ugwaba sao.
- 21 Dage Genuai Bidigo seḗ bidi, dage dagalude bidiyu,  
 agai homu wali pabo bage,  
 dagego agai nogi ugwaba sao.
- 22 Dagego koneao, tigidali nai Genuai Bidigo nigai,  
 tama tigidali toḗde elalubo,  
 tama aga dagego tuni bidi bidibao,  
 dagego Genuai Bidigo nogi ugwaba sao.  
 Tama eno me agai nogi ugwaba saibao.

## Salmo 104

### Godigo tigidali nai nigibaso, dago aga nogi ugwaba sao

- 1 Eno Genuai Bidigo nogi ugwaba saibao.  
 Genuai Bidi, nage eno God,  
 nage ugwadu mu dao.  
 Nage genuai polalubo tuni bidi,  
 nago nogi genuai mu yai.
- 2 Nage naga ulago digi ma mesegelebo dao,  
 te bidigo aga tigi ugwago mesegelebo tiwai ebo dao.  
 Tama nago dagalu dali, tigidali hoḗ munama elalubao,  
 te bidigo ugwa be seḗnama,  
 tama baklain bonogo kekelama  
 daḗ elalubo tiwai yai.
- 3 Tama nago be aḗ daide ugwadu seḗwai.  
 Dagalu poḗ te nago dulalubo nai karis tiwai,  
 tama waligo nage selasa pabo dao.
- 4 Nago te wali tagala palama,  
 tama waligo nago po sela pabo dao.  
 Tama nago te be selego ula ebo  
 te nago seḗ bidi pedalobo dao.<sup>c</sup>
- 5 Nago te toḗ aga bulude munama elalubao,  
 tama toḗgo bomo mu elalubo dao.  
 Aga memenege me egobe. Menio.
- 6 Nago tamu aḗ muani, te toḗ mesegelai elalubao.  
 Tama aḗgo tigidali bulu du mesegelai.
- 7 Tialima, nosali nago tamu aḗ dali po

- bomo elama wai, tama aga wi pai.  
 Awe, tamu ąigo odali, nago i bomo elama wai,  
 tama aga bomonama mu pai.
- 8 Tama peyu, tamu ąigo tigidali bulu du tagalama,  
 tama aga tų odogo dwagi yai digi pai.  
 Nago tamu ąi tede bidao wai,  
 tama megi aga tede bidibo dao.
- 9 Nago dąi muai,  
 tama tamu ąigo te dąi muani bolobeo.  
 Tama tamu ąigo tigidali tų ma halugobeo.
- 10 Nago te ąi ulu bulu du odogo yai digi  
 tomode asomainogo pedelao wai,  
 tama nago te ąi dwagi yai digi dolo pomainogo yai.
- 11 Bulude bidibo uni hasa dabe,  
 augwaligo te ąi tumainogo yai,  
 tama te uni donki dabe augwaligo me te ąi tuyu,  
 tama augwali dogoni wa pogobeo.
- 12 Ba dabe augwaligo pibo be te ąi sesegede  
 elalubo nide be sę yai, tama augwali ni nologode  
 dulaluyu, augwa po wabo dao.
- 13 Nage bulu ugwade bidiyu, nago tulubage bulu duba  
 tulumainogo tagala palobo dao.  
 Tama tiyu, nago te tųde elalubo nai  
 tigidali dali dwagi yai sę ebo dao.
- 14 Nago te kibu bulmakaugo tuabo nosa  
 dabe pedalao wai, tama nai dabe meba da  
 we bidigo bulama, sela tuabo nai me pedelai.
- 15 Tama dago bono ni du wain wai  
 bulama, wain ąi tuyu, dago homu dwagi yai  
 emainogo tiwai.  
 Tama dago te ni oliv wel ąi selama,  
 dago gesabidide pilama, tama gesabi ula  
 emainogo yagameo.  
 Tama dago te wit ge bulama,  
 dago tigi dąi omainogo tubo nai bret nigibo dao.
- 16 Tulubage tuluyu, Lebanon tede elalubo sida ni dabe  
 augwaligo ąi genuai sabo dao.  
 Te ni sida Genuai Bidigo ni mu dao, polobadu aga bulai.
- 17 Ba dabe augwaligo te ni sidade be sę ebo dao.  
 Tialima, dogoni bobobage yai bago be gasa nide

sębo dao.

18 Uni meme dabe, augwali te genuai  
bulu dude bilibo dao,  
tama hasa kesebe me, hoiyu me,  
augwali te genuai masigi dedagede  
geme bidibo dao.

19 Nago polua nigai, tama agai  
tigidali kibu be koneabo ɗaj̄ ela pabo dao.  
Tama giliga aga aiyaba dulabo sogo  
koneama, dulubo dao.

20 Nago be huliao wabo dao,  
tama hulide uni hasa dabe bilibo dao.

21 Gesi laion dabe augwaligo tuabo hasa dabe gegeyu,  
i bomonama ebo dao.  
Augwaligo hasa Godigo augwali momainogo gegebo dao.

22 Tama giliga asobode, augwa bidibo  
dedageba ma pabo dao.

23 Tama bidi dabe hodaluama, augwali sęba pabo dao,  
tama augwali sę idubadi,  
giliga iba dega sigi pabo dao.

24 Genuai Bidi, nago nai hauwa nigai!  
Nago genuai homu kolesagago koneama,  
te nai tigidali nigai.  
Nago nigali nai tigidali tɔde mu paḡawai.

25 Tamu aḡ genuai mu yai,  
tama genuai sųḡ, me dwasianu sųḡ,  
me gasa nai meba hauwa te tamu aḡide bidibao.  
Dago nedebo usu egobeo.

26 Tama tamu aḡide sip geba dabe augwali uga soayu,  
eda soayu elama, bilibo dao.<sup>d</sup>

Tama polobadu nago nigali genuai sųḡ,  
augwali me te tamu aḡ tomode biliyu,  
posoga palu ela bilibo dao.

27 Tigidali sųḡ augwali nage tonalubo dao,  
augwali nasi ebode nago nai momainogo ebo dao.

28 Nago nai augwali mobaso,  
te nai augwaligo tubo dao.  
Nago naga augwali nai mabo dao,

---

<sup>d</sup> 104:26 Jop 41:1; Tib 74:14; Ais 27:1

- tama augwaligo haliga paęawai.  
 29 Nago augwali tudiba mubaso, augwali wi ebo dao.  
 Tama nago augwaligo mobo sela saęani da,  
 te augwali isilama, tę tiwai ma gagawaibao.  
 30 Nago mobo augwali mobaso,  
 augwaligo bidibo ula sabo dao.  
 Nago tigidali nai tęde gesi ma pedelabo dao.
- 31 Eno homugo Genuai Bidigo genuai  
 nogi dali, ula dali, sesemane  
 sogo bidada peyu, bidada pao.  
 Tama Genuai Bidigo aga nigali nai  
 tigidali dali dwagi yai homu yagameo.  
 32 Agai tęba tonalubaso,  
 te tę memenege eyu, mali ebo dao.  
 Agai te bulu duba nogo mubaso,  
 te bulu dude sia hano ebo dao.
- 33 Eno bidibo ula elalubo te sogo,  
 eno Genuai Bidi dali tęąbi yaibao.  
 Eno Godigo nogi ugwaba selama,  
 tęąbi eyu, ena isiboba usu nigi paibao.  
 34 Agai ena dwagi yai homu ilai,  
 tama eno homugo agai eno tęąbi ebo  
 godolo emainogo ebao.
- 35 Genuai Bidi, nago te dwai seę ebo  
 we bidi tigidali dolao.  
 Eno homugo dwai seę ebo bidi dabe  
 augwali mu haga yabo homu yai.  
 Eno Genuai Bidigo nogi ugwaba sobao.  
 Genuai Bidi agai nogi ugwaba mu saibao.

## Salmo 105

God dali aga we bidi augwaligo te po wali

- 1 Dago Genuai Bidi dali usu da weyu,  
 tama agai genuai nogi elalubo po  
 hania pusao.  
 Dago tigidali tęde we bidi dali  
 agai genuai seę yali po pusao.

- 2 Dago tęabi po agabolo weyu,  
tama aga nogi ugwaba sao.  
Tama agai dwagi dwagi yai sę yali hania pusao.
- 3 Da Genuai Bidi aga hani,  
tama dago aga dali dwagi yai homu yao.  
Genuai Bidi wali pabo we bidi,  
augwaligo homu dwagi yai mu yao.
- 4 Da Genuai Bidi agai tau somainogo pinao.  
Tama da sesemane sogo aga dali pade bidainogo.
- 5-6 Dage Abrahamgo wai dabe,  
aga Genuai Bidigo sę bidi,  
dage Jekop agai wai dabe nosali pedelai,  
te bidi Godigo dai muani bidi,  
dagego homugo agai polobadu gasagi yai bomo yai  
genuai sę yali koneyu,  
tama agai te dwai sę ebo bidi dabe  
augwali dene mabo,  
te kolesaga dagego homugo koneao.
- 7 Genuai Bidi aga dago God dao.  
Agai bomo yai po te tigidali tade  
we bidibolo mabo po dao.
- 8 Agai dai olama muani,  
te po sesemane sogo elaluaibao.  
Tama agai po me elaluama, nosali pedalobo bidi hanigo  
te po odaibao.
- 9 Polobadu agai Abraham dali  
te po augwali si dai wai, tama  
agai te dai wali po Aisak po wai.<sup>e</sup>
- 10 Genuai Bidigo Israel hani dali po dai wai,  
tama te dai wali po sesemane sogo  
me elaluyu, bidada paibao.  
Agai te dai wali po Jekopgo hani dali  
dai wali, te po siligobeo.
- 11 Agai Jekop dali te po wai,  
“Nage eno te Kenan tade mawaibao,” wai,  
“tama te tade naga tade, te naga hani dali.”<sup>f</sup>
- 12 Godigo we bidi augwali dwasianu hani,

<sup>e</sup> 105:9 Gag 12:7; 17:8; 26:3 <sup>e</sup> <sup>f</sup> 105:11 Gag 28:13

- tama augwali gasa bulu we bidi te tęde bidibo tiwai.
- 13 Augwali bugagia duabe, augwali dodolama biliyu,  
gasa bulude bilama, gasa buluba peyu yai.  
Augwali dwasianu sogo tuni bidi me deligo tęde bidai,  
tama augwaligo te tę tagalama,  
gasa tuni bidi mego tęba bidigi pai.
- 14 Tialima, Genuai Bidigo augwali gasa bidi dabego  
augwali me dolomainogo ebeo.  
Tama agai tuni bidi meba dali wado po weyu,  
augwali dali dwai sę me igio wai.
- 15 Agai te po wali, “Eno te we bidi augwali daę muai,  
augwaligo eno sę emainogo.  
Dagego dwai sę augwali dali me elamo dao,” wai.  
“Tama dagego eno po pusubo bidi  
augwali dologio. Mu menio,” wai.<sup>g</sup>
- 16 Genuai Bidigo augwaligo tęde nasi emainao wai,  
tama augwaligo nai tigidali agai sela sęwai.<sup>h</sup>
- 17 Tialima, agai Josep  
aga polasa pomainogo tagala palai.  
Tama aga te Isip bulude bidigi pai.  
Augwaligo Josep te olo mu sę ebo bidi  
abelebo tiwai yai.<sup>i</sup>
- 18 Augwaligo te sen aga sęęade daę olama kęai,  
tama aga sęęa dene yai.  
Tama augwaligo te genuai ain aga dogonide daę wai.
- 19 Tama te tiwai me bidaluai, tama agai pusali po  
te mu pedalobo suainogo yai.  
Genuai Bidigo po augwalibolo ola mayu,  
te Josepgo po mu dao wai.<sup>j</sup>
- 20 Tialima, Isip tuni bidi agai bidi me deli tagala palai,  
Josep kalabuside bidali tagalama,  
buluba asomainogo tiwai.  
Awe, te gasa tuni bidi hani tonalubo bidi  
agai Josep kalabus yali silama, tagalai.<sup>k</sup>
- 21 Tama tuni bidi agai Josep agai  
gavman tobolu bidi bidao wai.  
Tama Josep aga te Isip gavman polalubo bidi bidai.<sup>l</sup>
- 22 Agai te tuni bidigo sę ebo ofisa

<sup>g</sup> 105:15 Gag 20:3-7    <sup>h</sup> 105:16 Gag 41:53-57    <sup>i</sup> 105:17 Gag 37:28; 45:5

<sup>j</sup> 105:19 Gag 39:20-40:23    <sup>k</sup> 105:20 Gag 41:14    <sup>l</sup> 105:21 Gag 41:39-41



bidi dabe augwali agai tonalubo seḡ yai,  
 tama agai bomogo te tuni bidi  
 homu kolesaga ola mabo bidi  
 dabe agai augwali ola mawai.

<sup>23</sup> Nosali Jekop te Isip buluba bidigi pai.<sup>m</sup>

<sup>24</sup> Tama nosali Genuai Bidigo aga we bidi tau selama,  
 augwaligo wai dabe hauwa ame nai.

Tama agai augwaligo bomogo  
 boi bidi dabego bomo aiyaba elalumainogo yai.

<sup>25</sup> Agai te Isip bidi dabego agai  
 we bidi dali boi bidi emainogo yai,  
 tama augwaligo tibo seḡ agai seḡ bidi dali yai.<sup>n</sup>

<sup>26</sup> Nosali Genuai Bidigo Moses,  
 agai seḡ bidi daḡ munama bidai,  
 te Aron me agai seḡ bidi muani,  
 tama augwali si Isip te buluba tagala palai.<sup>o</sup>

<sup>27</sup> Augwali sigo Godigo bomo yai seḡ yai,  
 tama augwali sigo gasagi yai  
 bomo yai seḡ Isip bulude yai.

<sup>28</sup> Tama Godigo augwaligo toḡ  
 be hulua siyu, mesega sai,  
 tialima, Isip bidi dabego agai po sela saḡwai.<sup>p</sup>

<sup>29</sup> Agai augwaligo aḡi tigidali kaneme emainogo begelai,  
 tama tigidali te aḡide bidali  
 suḡu tigidali ela silai.<sup>q</sup>

<sup>30</sup> Tama gedeli dabe hauwa pedelama,  
 augwaligo toḡ paḡana sai,  
 tama genuai tuni bidigo be tomode  
 me paḡana sai.<sup>r</sup>

<sup>31</sup> Godigo po olama, tama bolia me,  
 dina me, hauwa pedelama,  
 tigidali toḡ, me bulu dabe tigidali mu  
 paḡana sai.<sup>s</sup>

<sup>32</sup> Agai te tulubage mu augwaligo toḡba tagala palobeo.  
 Agai te tulubage te talua ge tiwai yai, te toḡba tulalwai,  
 tama te be sele hauwa ula yai.

<sup>m</sup> 105:23 Gag 46:6; 47:11    <sup>n</sup> 105:25 Sai 1:7-14    <sup>o</sup> 105:26 Sai 3:1-4:17

<sup>p</sup> 105:28 Sai 10:21-23    <sup>q</sup> 105:29 Sai 7:17-21<sup>r</sup> 105:30 Sai 8:1-6    <sup>s</sup> 105:31 Sai 8:16-17, 20-24

- 33 Agai augwaligo te bono ni du wain me,  
ni kaya me, dolai,  
tama tigidali ni dabe mu dola silai.<sup>t</sup>
- 34 Agai po obadi, te kuli mano dabe pedelai,  
te hauwa mu pedelai, dago nedebo usu egobeo wai.
- 35 Te kuli mano dabe augwaligo  
tigidali nai yabe tula silai,  
tama augwaligo te bulali nai yabe me  
tigidali mu silai.<sup>u</sup>
- 36 Tama Godigo Isip hanigo  
gomunai ogwa wai dabe tigidali ela muai.<sup>v</sup>
- 37 Nosali agai Israel bidi hani augwali  
Isip bulu tagalama, augwali odasa pai.  
Augwaligo silva, me gol, te me sela pai.  
Tigidali Israel we bidi bugagia bidai, me deli dolobeo.
- 38 Isip hani augwali Israel hani dali wi yai.  
Tama Isip hani augwaligo suali,  
Israel bidi hani augwali paibaso,  
tama augwali dwagi yai homu yai.<sup>w</sup>
- 39 Godigo pọ hauwa ugwadu munama,  
aga hani bidi haluai.  
Tama hulide agai genuai sia ula munama,  
augwali te ulade bidai.<sup>x</sup>
- 40 Augwaligo agabolo nai po hanaluai,  
tama agai ba dabe augwalibolo mawai,  
tama te ba augwali sela tuai.  
Agai dagalude giguai nai bret augwali mawai,  
tama augwali te nai tulama,  
haliga mu paḡawai.<sup>y</sup>
- 41 Agai aḡi masigide pedela wai.  
Tama genuai aḡi te masigide pedelama,  
tama te aḡi masigi kemi wa pai digi te aḡi pai,  
te genuai aḡi bulude asobo tiwai yai.<sup>z</sup>
- 42 Agai homugo te polobadu  
aga seḡ bidi Abraham dali daḡ wali bomo yai po  
homude me konealuai.
- 43 Tama tiyu, agai we bidi augwali agai

<sup>t</sup> 105:33 Sai 9:22-25    <sup>u</sup> 105:35 Sai 10:12-15    <sup>v</sup> 105:36 Sai 12:29    <sup>w</sup> 105:38 Sai 12:33-36

<sup>x</sup> 105:39 Sai 13:21-22    <sup>y</sup> 105:40 Sai 16:2-15    <sup>z</sup> 105:41 Sai 17:1-7; Nam 20:2-13

- te Isip buludu odasa pai.  
 Tama augwaligo tęąbi ela peyu,  
 dwagi yai homu dali pai.  
 Te we bidi augwali aga digi dąi muyu  
 sa muai, augwaligo i weyu,  
 dwagi yai homu elama, augwali pai.
- 44 Gasa we bidi augwaligo tų agai  
 augwalibolo te tų mayu,  
 tama augwaligo te tųde elaluali  
 gi dabe me sai.<sup>a</sup>
- 45 Agai tama tiwai, te Israel hani  
 augwaligo agai tigidali bomo yai  
 po wali pomainogo tiwai.  
 Tama Genuai Bidi agai nogi ugwaba sao.

## Salmo 106

**Godigo wiegi yai kolesaga aga we bidiba yali**  
*(1 Sto 16:34; 2 Sto 5:13; 7:3; Esr 3:11; Tib 100:5;  
 107:1; 118:1; 136:1; Jer 33:11)*

- 1 Genuai Bidigo nogi ugwaba sao.  
 Dago agaba usu da waiyąo,  
 magi baso meni agai  
 te wiegi yai kolesaga sesemane ebo dao,  
 tama agai da sesemane bidada peyu,  
 bidada pabo wei mu ebo dao.
- 2 Dego te agai genuai sę dabe yali po pusaibawe?  
 Tama dego agai te wiegi yai kolesaga  
 yalide te agai nogi ugwaba saibawe?
- 3 Te agai po wali peyu,  
 te doloba pai kolesaga ebo bidi dabe  
 augwa te pemene yao.
- 4 Genuai Bidi, nago te naga we bidi  
 dabe tau sabo sogo,  
 nago ena me homugo koneao.  
 Tama nago augwali ma sabo sogo,  
 nago te ena me ma sao.

---

<sup>a</sup> 105:44 Jos 11:16-23

- 5 Eno te nago hani bage te bugagia dugulama,  
 tama te wiegi yai nai dabe sabo suabo homu yai,  
 tama eno augwali dali wiegi yai  
 pemene yabo homu yali.  
 Dago te pemene yaibao, magi baso meni,  
 da te nago hani bidibao.
- 6 Dago te dwai sę yalio,  
 te polobadu dago wąj nęq dabego  
 yali tiwai sę yalio.  
 Dago te dwai sę haniani yai.
- 7 Te Isipde te wąj nęq dabego  
 te nago yali genuai sę dabe  
 te bugagia me konesiąwai.  
 Nago augwali hauwa sogo tau sali,  
 te nago augwali wei mu ebo homu  
 te augwaligo koneai.  
 Tiali goli, augwa te homu tagalu,  
 tama augwali te nosa elaluali  
 tamu aąba sabolali sogo,  
 augwa te nage Tigidali Bomo  
 Elalubo Godiba hagoma yai dao.<sup>b</sup>
- 8 Tiali goli, Genuai Bidigo te aga genuai bomo  
 augwaliba ola mawainu yali.  
 Tama tiyu, agai augwali ma selama,  
 tama augwali me dolobeo,  
 te agai augwaliba daę walali po  
 tiwai gilama yali.
- 9 Agai te nosa elaluali tamu aąba po bomonama obaso,  
 tama tamu aą te wa pai tęq tiwai pedelali.  
 Tama agai te we bidi dabe peyu,  
 tama augwa te tamu aą nogegi pali,  
 te bidi te wa pai tędu pabo tiwai aę yai dao.
- 10 Agai augwali te augwa boi bidi  
 dabego nogode ma sali.  
 Agai augwali tą selama,  
 tama te boi bidi dabego augwali me dolobeo.
- 11 Tiali goli, te węgo te boi bidi dabe mesega selama,  
 tama augwali isai dao.  
 Tama me deli te bidibo ula me elalubeo.

---

<sup>b</sup> 106:7 Sai 14:10-12

- 12 Genuai Bidigo tama tibaso,  
tama aga we bidi dabe augwaligo augwa  
te agai daų walali poba homu kęą pelama,  
tama augwa tęąbi wabode  
te agai nogi ugwaba sabo po walio.<sup>c</sup>
- 13 Tiali goli, polo tama mu, te augwaligo  
Genuai Bidigo yali sę dabede  
homu kone ebo tagalalio.  
Tama augwaligo te Godigo po bolo hasia me sabeo.  
Augwaligo yali sę dabe te augwa  
homugo digi nigilama yalio.
- 14 Te masigi tų wa pai bulude,  
augwaligo haliga te tuabo naiba homu hogodalu,  
tama augwaligo te God usu sai dao.
- 15 Augwaligo Godiba te nai po  
hanalubaso, tama agai augwaliba  
mawai, tiali goli, agai te genuai gasi augwaliba  
pedalumainu ilalio.<sup>d</sup>
- 16 Augwali te wa pai bulu pesagede  
bidalu, tama bidi mebago  
te Moses de Aron sigo ebo sęde  
pesa homu yalio, te bidi si  
te Genuai Bidigo sę yali sę bidi si dao.
- 17 Tialima, genuai dedage  
te tųde pedelama,  
tama Datan dali, Abiram,  
me te augwa si hani dabe dali,  
augwali te dedageba tulaluama,  
tama te tų pania selama,  
tama augwali mesega sai dao.
- 18 Tama augwali wali pali bidi dabeba te sia tulaluama,  
tama te siago te dwai sę yali we bidi  
dabe ulai dao.<sup>e</sup>
- 19 Augwali te bulu du Horepde bidalu,  
tama augwa te bulmakau me deli te golgo nigilama,  
tama augwa te tibo godiba lotu wai dao.
- 20 Augwaligo te nosa tubo bulmakau

<sup>c</sup> 106:12 Sai 14:21-31; 15:1-21    <sup>d</sup> 106:15 Nam 11:4-34

- piksa selama, tama augwa teba lotu wali.  
 Te kolesagago augwaligo  
 te Godigo genuai nogi aiyaba elalubo sę yali.
- 21 Godigo te Isipde bomai sę mu elama,  
 tama te Israel dabe te Isip dabego  
 nogode ma dobola sali.  
 Tiali goli te Israel dabego te tiali sę  
 te homu kone me palubeo.
- 22 Godigo te genuai polalubo bomai  
 sę dabe te Isipde yali,  
 tama te nosa yai tamu aḡide  
 te agai gasagi yai sę mu yalio,  
 tama te we bidi dabe dwai noma mu sai dao.
- 23 Tialima, me sogo nosali  
 Godigo te aga we bidi augwali dolaibao po wali.  
 Tiali goli, Moses, te Godigo daḡ  
 muani sę bidi, aga te God geduba doligi pelama,  
 tama agai te Israel dabe tau siyu,  
 tama Godigo haliga sębe yali togolama panibaso,  
 tama Godigo augwali me dolobeo.<sup>f</sup>
- 24 Tama nosali augwaligo te wiegi yai  
 tḡ wei isiḡwai, magi baso meni,  
 augwaligo te Godigo daḡ walali poba  
 homu keḡ pabeo.
- 25 Augwali te ugwa bede bidalu,  
 tama Godiba wado po weyu yai,  
 tama augwaligo te Genuai Bidigo po wali me pabeo.
- 26 Tialima, Godigo bomai po augwaliba  
 mayu, tama augwali te tḡ wa pai  
 masigi tḡ bulude isaibao po walio.<sup>g</sup>
- 27 Tama agai te nosali pedalubo  
 waḡ nḡ dabe ela gudulama sela sayu,  
 te augwali gasa hani dabe tomoba bidigi pelama,  
 tama augwali te gasa bulu tḡ pedaide  
 isaibao, te po wai dao.<sup>h</sup>
- 28 Nosali augwaligo te bulu Peorde  
 te tibo god Bal dabeba lotu wai dao,  
 tama augwa te bidibo ula elalusiḡbo

---

<sup>f</sup> 106:23 Sai 32:1-14    <sup>g</sup> 106:26 Nam 14:1-35    <sup>h</sup> 106:27 Prs 26:33

- te god dabeba ofa mabo nai dabe tuai dao.
- 29 Te kolesagade te Genuai Bidigo  
augwaliba wado yabo se ilibaso,  
tama agai te dwai genuai gasi augwaliba  
tagala palai dao.
- 30 Tiali goli, Finias hogodalu,  
tama te dwai se ebo bidi dabeba  
te dwai dene mobaso, tama te genuai gasi silalio.
- 31 Tama megi sogoba usu nagasu dago  
agai te doloba pai kolesaga yali homu kone palubao,  
tama nosali nosali me, tigidali we bidigo  
te tiwai homu emainu ebo dao.<sup>i</sup>
- 32 Te Israel dabego te Godigo wado  
te Meriba weḍe yabo se ilali,  
tama Moses te augwaligo yali seḍe seḡe salio.
- 33 Augwaligo te Moses haliga dwai mu yabo se ebaso,  
tama te agai te dolo isaḅo po wai.<sup>j</sup>
- 34 Te Genuai Bidigo augwalibolo  
te gasa hani dabe tigidali ela muao po wali.  
Tiali goli, augwaligo te bage tigidali me  
ela mubeo. Menio.
- 35 Te Israel dabego te Godigo po  
odisaḡwani hani bagede we sali,  
tama augwaligo ebo dwai kolesaga wali palio.
- 36 Tama augwa te tibo godiba lotu obaso,  
tama tego te Godigo augwa  
dolomainu ilai dao.<sup>k</sup>
- 37 Augwaligo te augwa wai ogwa me,  
wegi me, ela munama,  
te tibo god dabeba ofa yai dao.<sup>l</sup>
- 38 Augwaligo te augwa ogwa me  
wegi dabe digi elalio.  
Te wai dabego te magi dwai se me isiaḡwani,  
tiali goli, augwa te augwali elama,  
tama augwali te Kenan tibo god dabeba  
ofa tiwai elama mawai.  
Tama tialima, augwaligo kanemego

<sup>i</sup> 106:31 Nam 25:1-13    <sup>j</sup> 106:33 Nam 20:2-13    <sup>k</sup> 106:36 Tob 2:1-3; 3:5-6

<sup>l</sup> 106:37 2 Kin 17:17

- te tọ meda pedelai dao.<sup>m</sup>
- 39 Te kolesagago augwali te God  
gedude meda yai pedelalio,  
tama augwaligo te God tudiba munama,  
tama augwaligo aga wali me pabeo.
- 40 Tialima, Genuai Bidigo aga we bidi dabeba  
te wado mu elama,  
tama agai augwali wei ma ebeo.
- 41 Tama agai augwali tagalama,  
te gasa hanigo augwali tonalumainu yali.  
Tama tiyu, augwali te boi bidi dabego dologode bidiyu,  
tama te boi bidi dabego nogode bidai dao.
- 42 Te boi bidi dabego augwaliba seęę hauwa menama,  
tama augwali te augwaligo bomo  
dologode mu bidalio.
- 43 Te hauwa sogo mu Genuai Bidigo  
te aga hani bage tau sali,  
tiali goli, augwa digi te augwa homu wali ma peyu,  
tama augwa hagoma elama, tama agai po sela saęu,  
tama augwa te dwai seę ebo kolesaga  
tomoba mu palio.
- 44 Tiali goli, augwa te Genuai Bidiba  
i weyu, gedu haluasa po wabo sogo,  
agai te augwaligo gedu haluasa po odolama,  
tama augwali te dwai bidibo te homu dene yalio.
- 45 Agai augwali homu dene mu elama,  
tama aga daę walali poba homu kone ma palali.  
Tama aga homu ma hasegelalio.
- 46 Agai te Israel dabe kalabus yali  
boi bidi dabego homu hodolobaso,  
tama augwaligo te Israel dabe  
homu dene yalio.<sup>n</sup>
- 47 God, dena Genuai Bidi, nago da te  
gasa hani dabego nogode ma sao.  
Tama nago da te dena tọba ma odasa asao.  
Tama tiyu, dago nageba homu kone paliyu,  
te nage tedali wiegi yai mu da, te homu elama,  
tama dago nago nogi ugwaba siyu,  
tama nageba te usu da weyu,



te wiegi yai pemene dali mabo dao po wagameo.

- 48 Dago te Genuai Bidigo nogi  
 ugwaba sao, te da Israel dabego God,  
 megi, me tigidali sogo nosali.  
 Tama tigidali we bidigo te po waiyaḡo, “Mu dao,” wao.  
 Genuai Bidi nogi ugwaba sao po wao.<sup>o</sup>

## Buku 5

(Tib 107-150)

## Salmo 107

**Dago Godigo te wiegi yai kolesagade pemene yao**  
 (1 Sto 16:34; 2 Sto 5:13; 7:3; Esr 3:11; Tib 100:5;  
 106:1; 118:1; 136:1; Jer 33:11)

- 1 Dago Genuai Bidiba puba hwi po wao.  
 Magi baso meni, agai daba  
 te wiegi yai mu ebaḡo.  
 Sesemane sesemane sogo agai da wei mu ebo dao.
- 2 Dage tigidali we bidi, Genuai Bidigo dage  
 te boi bidi dabego nogode ma sali,  
 dage dali, ena me, dago te Genuai Bidi  
 nogi ugwaba sinaḡo.
- 3 Agai dage we bidi dabe te gasa bulu tḡo badu,  
 te giliga pedalubo badu, ma giliga dega sabo badu,  
 me te not badu, ma saut badu, te ma sai dao.
- 4 Meba te genuai bulu te kemi tḡo  
 wa pai bulude bilaluai dao.  
 Te augwali bidigi pabo madi  
 te taunba pabo sunumi me deli te me subeo.
- 5 Augwali te nasi mu elama, tama te weḡo nogonego siyu,  
 tama augwa homugo te augwali dolaiba homu yai.
- 6 Augwali te tiwai dwai bidibaso,  
 teda augwa te Genuai Bidiba i obaso,  
 tama agai wiegi yai seḡo mu eyu,  
 te augwali tau sai dao.
- 7 Agai augwali pabo dodolama,

- tama augwali odasa peyu, tama augwali te taun me  
deliba pedelama, te augwali tede bidai.
- 8 Tialima, augwaligo te Genuai Bidiba  
usu da mu waiya, te sesemane agai augwali  
homu dene mu elama,  
tama agai augwali tau sabo se wiegi yai mu yalio.
- 9 Agai te we nogonego dogoni wa sali  
we bidi dabeba te we mayu,  
tama augwa te we tulama mu usu yali.  
Tama agai te nai hauwa te nasi ebo bidi dabeba  
menama,  
tama augwa te dwagi yai nai tulama,  
tama augwa tabi paana pali.
- 10 Meba te be hulua sai madi,  
te kalabus be tomode bidali.  
Te bidi dabego augwali te sengo kalabus elama,  
tama augwaliba te sege mawai.
- 11 Magi baso meni, augwaligo  
te Tigidali Bomo Elalubo Godigo pode hagoma eyu,  
tama augwaligo agai po sela sayu ebaso,  
te augwali kalabus eyu, sege mawai dao.
- 12 Augwali te tigi dene se mu elama,  
tama augwa bomo tigidali sia sai.  
Tama augwali te tba degasa dulama,  
tama augwali tau sabo bidi meni yani.
- 13 Augwali te tiwai dwai bidibaso,  
teda augwa te Genuai Bidiba i obaso,  
tama agai augwali tau selama,  
tama augwalide elaluali te sege dagala sawani.
- 14 Genuai Bidigo augwali selama,  
tama augwali te hulua saide bidali tagalu,  
tama agai augwaligo te sen togolama,  
tama augwali te kalabus ma elalubeo.
- 15 Tialima, augwa te usu da mu te Genuai Bidi wao.  
Sesemane sogo agai augwali homu dene mu elama,  
tama agai wiegi yai se mu eyu, augwali tau salio.
- 16 Agai augwaligo te brasgo nigali sunumi dabe aluali,  
tama te kalabus be bagulali obo  
ain ba aluama, togogo pai dao.
- 17 Meba te augwa yali dwai kolesagade gasi sali.

- Augwa te dwai seḡ hauwa ebaso,  
tama tialigo augwa te seḡeḡ tolai dao.
- 18 Augwa te nai tubo hagela yai,  
tama tiyu, augwa paḡe isainu yali.
- 19 Augwa te tiwai dwai bidiyu,  
tialima augwa te Genuai Bidiba i obaso,  
tama agai augwalide te seḡeḡ dagala sayu yalio.
- 20 Aga digi po obaso, tama augwa tigi usu ma ilama,  
tama augwali te guḡ pagede ma dobola sai dao.
- 21 Tialima, augwaligo te Genuai Bidiba  
usu da mu waiyaḡo,  
sesemane sogo agai augwali homu dene mu elama,  
tama agai augwali tau selama,  
te wiegi yai seḡ mu yai dao.
- 22 Augwa te agaba usu da wabo ofa emainu yao.  
Tama augwa te pemene ebo teḡabi po weyu,  
tama te we bidi dabeba  
te agai wiegi yai seḡ yali po pusao.
- 23 Bidi meba te moni geba sipde boskru seḡ eyu,  
tama augwali te genuai tamu aḡidu  
te tigidali buluba tedelama pobao,  
tama te walu selasa pabo bisnis seḡ  
te bidi dabede ebo dao.
- 24 Te boskru dabego te Genuai Bidigo  
ebo seḡ dabe subao.  
Augwaligo agai te genuai tamu aḡide  
wiegi yai seḡ ebo subo dao.
- 25 Genuai Bidigo po weyu,  
tama agai te genuai boma pai wali te nai hodolama,  
tama tego te moni dobo dwai biksi hodolubo dao.
- 26 Te sip dabe ugwaba mu holama,  
tama aiyaba mu dulu ebao.  
Tama tiyu, te boskru dabego te augwali  
dolaiba homu elama,  
tama augwa wi dwai ebo dao.
- 27 Augwali te sipde umuna sai biliyu,  
te bomai weḡ tuai bidi tiwai ebao,  
tama augwaligo te sip tau siyu,  
te magi seḡ me deli ebaso, te usugobeo.
- 28 Augwali te tiwai dwai bididubaso,  
teda augwa te Genuai Bidiba i olama,

- tama agai augwali tau selama, tama augwalide  
te seęę dagala sąwaibao.
- 29 Agai te moni wali me biksi silimainu elama,  
tama te tamu ąi ma hogodalugobeo.
- 30 Augwaligo te tamu ąi dua digi bidibo sulama,  
tama augwa wiegi yai pemene mu elama,  
tama Genuai Bidigo augwali odasa pelama,  
te taun sesege, te augwa painu yali  
madiba, sabalubo dao.
- 31 Tialima, augwa te Genuai Bidiba  
usu da wao, sesemane sogo  
agai augwali wei mu ebao,  
tama agai augwali tau siyu,  
wiegi yai seę mu ebo dao.
- 32 Te augwali Godigo we bidi dali  
sisinibo sogo, augwaligo  
te agai genuai nogide po pusa mao.  
Augwali te tobolu bidi dabe dali  
sisinama, tama augwaligo agai nogi  
augwa tomode ugwaba somainao.
- 33 Genuai Bidigo te genuai weę  
te mu sula somainu elama,  
tama te tųdu pedalubo weę tigidali  
sula somainu ebo dao.
- 34 Te ili elalubo tųgo te tamu elalubo tų  
pedalumainu elama,  
tama tede te magi nai deli me pedalisiaęwai.  
Magi baso meni, te badu bidi dabego  
te dwai kolesaga ebaso,  
tama Genuai Bidigo te tama tiwai seę ebo dao.
- 35 Genuai Bidigo te tų wa pai bulude  
te weę hauwa pedalumainu elama,  
tama te wa pai bulude weę hauwa elalumainu yalio.
- 36 Tama agai te tubo nai meni yai  
bidi dabe tede bidimainu ilama, augwali tede  
bidalu,  
tama augwa te taun nigilama,  
tama augwa tede bidali.
- 37 Augwa te nai dabe, me te ni wain dabe bulama,  
tama augwa te nai me wain hauwa salio.
- 38 Genuai Bidigo te aga we bidi dabeba

wiegi yai sę ela mani.

Tama tiyu, augwa te wai hauwa ame neyu,  
tama agai te bulmakau dabe me  
hauwa pedalumainu ilalio.

39 Te boi bidi dabego augwali te hwįyu,  
aiyaba elaluama,  
te augwali hale emainu ebo sogo,  
tama augwali aiyaba mu elaluama,  
tama augwaliba dene mawai.

40 Genuai Bidigo te boi bidi dabego  
tobolu bidi dabe te olo nai tiwai naga  
pedalumainu elama,  
tama agai augwali te wa pai bulude  
te sunumi meni yai madi bilalumainu yalio.

41 Tiali goli, te magi doado bage  
meni yai bidi dabe te dwai bidibaso,  
agai augwali tau sali.  
Tama agai te augwaligo wai dabe  
te hauwa te sipsip dabe tiwai pedalumainu yai.

42 Te doloba pai we bidi dabego te sulama,  
tama augwa bugai haliga yalio.  
Tiali goli, te dwai bidi dabego po meni yani.  
Augwa pedauwali pania siyu naga yalio.

43 Tialima, dage te wiegi yai homu  
elalubo we bidi dagego  
te sę tigidali bugagia homu kone palao.  
Tama dagego te Genuai Bidiba po hanilama pusuyu,  
te sesemane sogo da wei mu ebo da po waiya.

## Salmo 108

**Bidigo te gedu haluasa po obaso, te Godigo aga we bidi tau saibao**

1 God, eno homu te sisi ilama, dodolali  
elalubao.

Megi da, te eno tęąbi weyu,  
tama nago nogi ugwaba saibao.

Ena me pigobeo, te ena hogodama tama tiaibao.

2 Eno te gita me eliyu, tama musik waibao.  
Te kigamu mu te eno tęąbi waibao.

3 Genuai Bidi, te eno nageba usu da wabo po

- te gasa hani dabe tomode waibao.  
 Te eno nago nogi te augwali tomode ugwaba saibao.
- 4 Te sesemane sogo nago da wei mu ebao.  
 Te nago wei ebo homu te genuai mu dao.  
 Tama nago te nago po sesemane wali pabo dao.
- 5 God, te dagalude nago te genuai bomo elalubo  
 nago te tigidali we bidiba ola mao,  
 tama tigidali bulude te tigidali we bidigo  
 nago genuai nogi konemainu yao.
- 6 Nago da wei mu eyu,  
 tama nago dago gedu haluasa po wabo odolama,  
 tama nago genuai bomogo nago da ma selama,  
 tama da bugagia bidimainu yao.
- 7 God te aga tedali wiegi yai bede bidiyu, te po wai,  
 “Eno te hwḡani aiyaba elalubaso,  
 tama ena te pemene elama,  
 tama te Sekem dobyu, tama te Sukot bulu odogo  
 te ena we bidi dabeba dobawaibao.
- 8 Gileat dali Manase, te eno dao.  
 Efraim te eno kapago nigai tobolu madi tiwai gagawali.  
 Tama Juda te king bidigo wiegi yai dono tiwai dao.
- 9 Tiali goli, Moap te eno wḡ paubo  
 dis pḡu gagawai tiwai,  
 tama Idom te eno su mubo pesage tiwai dao.  
 Tama ena pemene elama,  
 tama eno te Filistia dabe aiyaba elaluali i waibao.”
- 10 God, dego ena augwaligo te bomonama bagulali  
 te taun tomoba odasa pogowe?  
 Tama dego ena te Idomba odasa pogowe?
- 11 God, nago da tudiba muani da, agawe?  
 Te nago dago ami dabe te tau sogobe da  
 homu ebo da, agawe?
- 12 Te dago boi bidi dabe dali hwḡbo tau sao,  
 magi baso meni, te bidi dabego naga da  
 tau me sogobeo.
- 13 Te Godigo da tau sobaso da,  
 teda dago te hwḡbo ugaba ela holaibao.  
 Tama aga digi te boi bidi dabe aiyaba elaluaibao.

## Salmo 109

Te seṣe elalubo bidigo i walio

- 1 God, eno nago nogi ugwaba sabo da.  
Iya, nago eno gedu haluasa po wabo  
odoyu, tama wei ponao.
- 2 Magi baso meni, te dwai bidi dabego,  
me te tibo po wabo bidi dabego  
enaba boi bidi eyu,  
tama gasa we bidibolo enade tibo po obao.
- 3 Augwaligo po dwai mu enade wali,  
tiali goli augwaligo po te odolali walio.  
Te po page menio.
- 4 Eno augwali wei elama,  
tama eno gedu haluasa po weyu, augwali tau sali,  
tiali goli augwaligo ena wei me ebeo.
- 5 Eno wiegi yai kolesaga augwaliba yali,  
tiali goli, augwaligo dwai kolesaga  
enaba wei ponani.  
Eno augwali wei mu yali, tiali goli, augwaligo ena  
wei homu meni yai.
- 6 Te bidi dwai me deli nigilama, te agai eno boi bidigo  
po te po tuḍe dagalumainu emainao.  
Te aga boi bidi me deligo digi aga po tuḍe ela momainao.
- 7 Te po tuḍe odobo bidigo te bidigo  
dwai seṣe yali hanila palama,  
tama aga te kalabusiba tagala palao.  
Tama agai te bidigo gedu haluasa  
po wali me te seṣe da homu yaibao.
- 8 Eno homugo te aga polo tama isimainu homu elama,  
tama gasa bidigo te agai seṣe yali  
pesage somainu yao po wai.<sup>p</sup>
- 9 Tama eno homugo aga isimainu elama,  
tama aga wai dabego aya meniama,  
tama aga wego te bidi me te meni emainu yao.
- 10 Tama eno homugo te aga wai dabego be meniye,  
tama augwa dwai mu bidimainu yao, wali.  
Augwaligo te augwa bidibo bede te tologa pali bede  
megi bidibadi te ela gudulama, sela saṣainu yao.

- 11 Te boi bidigo te bidi mebade negeli elalubaso da,  
 eno homugo te bidi dabe aselama,  
 tama te bidi dabego te agai tḡ  
 dagala sagasomainu yao,  
 te tigidali doado bage agai te bidigo abelimainu  
 sḡ yali nai tigidali te somainu yao.
- 12 Eno homugo te bidi me deligo agaba  
 te olo tau sabo wiegi yai kolesaga  
 me egobe, homu yai.  
 Tama te me deligo te aga aya meni yai wai dabe  
 homu dene me egobe, homu ebao.
- 13 Eno homugo te agai wai dabe isimainu homu ebao,  
 tama te nosali pedalubo hani dabego  
 te bidigo nogide homu kone me isiḡyu me egobeo.
- 14 Eno homugo Genuai Bidigo te dwai kolesaga  
 te aga hani wḡi nḡ dabego yali sḡba  
 homu kone palumainu ebao.  
 Tama agai te aga idago sḡḡ sela sḡmainu  
 me egobe homu ebo dao.
- 15 Genuai Bidigo te augwa yali  
 dwai sḡba me konealudubaso,  
 tama te we bidi dabego aga haniba  
 te homu kone isiḡmainu yao.  
 Eno te homu ebao.
- 16 Te bidigo te gasa bidiba olo tau sabo  
 wiegi yai kolesaga yabo homu isiḡwani.  
 Agai te magi doado bage meni yai bidi dabe,  
 me te doado bage sḡḡ pai bidi dabe,  
 me te bomo meni yai bidi dabeba boi bidi eyu,  
 tama te bidi dabe haliga sḡḡ ilama,  
 tama agai augwali ela muyu yai dao.
- 17 Polobadu agai te gasa bidi dolomainu  
 dwai po wainu yali,  
 teda megī da, aga digi te dolomainao.  
 Agai te gasa bidi dabeba  
 te wiegi yai sḡ yabo po te Godiba me hanalube,  
 teda agai me te wiegi yai mabo sḡ me selamuo.
- 18 Agai te gasa bidi dolabo po wabo  
 te sḡ dene tiwai me ebeo,  
 te bidigo ugwa name te tigde bebo  
 te sḡ dene me ebo menio.  
 Eno homugo te agai te i ola mabo po



te aga tigi tomoba pomainao, te wę tiwai yao,  
tama aga dili tomoba pabo  
te wel tiwai gilama emainao.

19 Tama aga te pogo aga te ugwago  
mesege sabo tiwai elama,  
tama aga haliga te kukulu gudubo  
tiwai elalumainao.

20 Eno homugo te Genuai Bidigo ena po tų ebo bidiba  
te tiwai dene momainu yaibao,  
magi baso meni, augwaligo te dwai po enaba walio.

21 Tiali goli, Genuai Bidi, eno God,  
eno homugo nago ena tau somainu homu ebao,  
te nago po dą wali gilama yao.  
Nage wiegi yai mu eyu, tama nago ena sesemane  
wei homu elama,  
tama tiyu, nago ena ma sao.

22 Ena dwai bidi mu bidiyu, tama ena odolali bidibao,  
tama ena dwai dene mu ebao.

23 Ena te pabo tiwai eyu, te eno noma te giligade subo  
tiwai elama, tama te giliga dega sigilubo sogo,  
te pio ebode silaibao.

Ena te tųde bidalubo nai tiwai te  
waligo selasa pabo tiwai ebo dao.

24 Ena te nai habu selama,  
tama eno kidu te bomo meni yai.  
Ena te nomona selama, tama eno dili tigidali  
te kimi mu isalio.

25 Te we bidi dabego ena sulama,  
tama enaba posobo po wabo dao.  
Tama augwa tobolu bebegelu, tama ena gisugu mobao.<sup>9</sup>

26 Genuai Bidi, eno God,  
nago ena sesemane wei mu ebao.  
Nago ena tau selama, tama ena ma sao.

27 Te boi bidi dabego konemainu elama,  
nago naga nago ena tau selama,  
tama ena ma sabo dao.

28 Augwa te po weyu, te Godigo ena dolaibao po wali,  
tiali goli nago enabolo wiegi yai sę yaibao.

---

<sup>9</sup> 109:25 Mat 27:39; Mak 15:29

- Eno homugo te enaba dwai se ebo bidi dabe aiyaba  
elalumi homu yai, tama ena naga se bidigo,  
eno bugai haliga yaibao.
- 29 Eno homugo te eno boi bidi dabe  
te genuai hale somainu yaibao,  
tama augwali te hale dwai mu ebo  
te we bidi dabego sumainu yao.
- 30 Tiali goli, eno genuai po daḡa weyu,  
te Genuai Bidiba puba hwi po waibao.  
Te we bidi dabego lotu weyu sisinibo madi,  
teda eno nago nogi ugwaba saibao.
- 31 Magi baso meni, agai te magi  
nai meni yai bidi dabe tau selama, tonalu ebao,  
te bidi dabego augwali po tu eyu,  
tama te augwali isimaina obaso, te usu me egobeo.

## Salmo 110

*Te Devitgo aseḡani balia po me deli dao.*

**Genuai Bidi dali, te aga sa muani king dali side po wali**  
(*Mat 22:44; Mak 12:36; Luk 20:42-43; Tpi 2:34-35;*  
*1 Ko 15:25; Ef 1:20-22; Kol 3:1; Hib 1:13; 8:1; 10:12-13*)

- 1 Yawe Genuai Bidigo eno genuai bidiba te  
tama po wali,  
“Nago eno dolo nogode dugulalu, te nago boi bidi dabe  
te eno nage dologoba mubo sogoba usu naibao.”
- 2 Yawe Genuai Bidi te Saionde bidiyu,  
tama agai nago te bulu hauwa tonalumainu  
nigilama, tama agai te po waibao,  
“Nago naga boi bidi dabe tonaluo,” waibao.
- 3 Te nago te boi bidi dabe dali hwiainu ebo sogo,  
te naga hani bidi dabego usu da,  
pinao po weyu, te nage dali pelama,  
tama nage tau somainu yaibao,  
tama dage te Godigo bulu duba ugwaba holaibao.  
Tigidali sogo hulide tulubage we segeni te nosade pedalu,  
tama te nosago gesi bomu siyu ebo dao.  
Tama nage me nage te tigidali sogo bomu saibao.

- 4 Yawe Genuai Bidigo nageba po  
 daḡ waliyu, te tiwai wali,  
 “Nage te pris sesemane bidada peyu,  
 bidada pagameo,” wali.  
 “Nage te pris Melkisedek tobage tiwai dao.”  
 Genuai Bidigo te mu po naga weyu,  
 tama agai te aga po me  
 hasegeligobeo.<sup>r</sup>
- 5 King bidi, Yawe Genuai Bidi nage dali dolalu,  
 te daḡ walainu yaibao.  
 Te aga haliga seḡe ebo sogo  
 agai te king dabe dali hwiṅama,  
 te agai hwiḡbo te ugwaba ela holama,  
 tama augwali aiyaba mu elaluaibao.
- 6 Agai te we bidi hani dabego  
 dwai seḡ yali wei ponama,  
 tama te hwiḡbo pesagede agai  
 te bidi hauwa ela muaibao.  
 Agai te tigidali toḡ pedai badu te king  
 dabe aiyaba elaluyu, agawaibao.
- 7 Agai te sunumi paḡde elalubo  
 te dwasianu aḡ gamiade elalubo weḡ tuaibao.  
 Tama tialima, aga te bomo selama,  
 tama te hwiḡbo ugwaba ela holaibao.

## Salmo 111

### Dago te Genuai Bidi nogi ugwaba sao wali

- 1 Genuai Bidi nogi ugwaba sao.  
 Eno wei ebo homu te bomo elalubao,  
 tama tiyu, eno agaba usu da  
 po wabo genuai mayu,  
 te aga we bidi tigidali sisinibo madi tiaibao.
- 2 Genuai Bidigo te polalubo seḡ dabe mu ebo dao.  
 Te we bidi dabego te Genuai Bidigo  
 ebo seḡ te wei mu yali, augwaligo te seḡ dabe  
 te bugagia koneainu homu yalio.

<sup>r</sup> 110:4 Hib 5:6; 6:20; 7:17, 21

- 3 Tigidali sę agai ebo te aga genuai nogi  
pedalumainu yai, tama te wiegi yai mu yali.  
Te agai doloba pai kolesaga te sesemane elalua pidu,  
elalua pabo dao.
- 4 Genuai Bidigo te we bidigo homu hodolama,  
te augwaligo agai ebo wiegi yai  
sę dabe te sesemane sogo  
homu konealumainu yai.  
Sesemane sogo Genuai Bidigo te olo  
tau sabo wiegi yai kolesaga eyu,  
tama da homu dene eyu, tau sabo dao.
- 5 Agai te agade wi ebo we bidi dabe  
tubo nai mabo dao.  
Agai te aga hani bage dali daę walali pode  
te homu kone gegeda peyu me egobeo.
- 6 Agai te meba hanigo tę  
te aga hani we bidi dabeba mawai.  
Tama tiyu, te kolesagade agai te aga bomo  
te aga te augwaliba ola mawai dao.
- 7 Agai kolesaga te mu elalu, te dolo mu elalubao.  
Dago te agai bomai po tigidaliba  
homu kęą pelama, wali pobaso, te usu dao.
- 8 Te Godigo bomai po sesemane elalubao.  
Godigo te wiegi yai doloba pai kolesaga naga elama,  
tama te bomai po dodolama, elalubo dao.
- 9 Agai aga we bidi augwali ma abelali.  
Tama agai augwali dali te bomai po me deli daę walali,  
tama te daę walali bomai po te  
sesemane elalua peyu, elalua pobao.  
Genuai Bidi aga te tedali wiegi yai da,  
tama agai te tigidali bomo elalubao.
- 10 Te bidi te kolesaga koneai bidi  
pedelainogo eyu da, aga te Godide wi yao.  
Agai te wiegi yai homu kolesaga  
te agaba homu mubo we bidiba mabo dao.  
Dago aga nogi sesemane bidada pabo sogo ugwaba sao.<sup>s</sup>

<sup>s</sup> 111:10 Jop 28:28; Prs 1:7; 9:10

## Salmo 112

Dwagi yai we bidi augwaligo homu pemene ebo dao

- <sup>1</sup> Genuai Bidigo nogi ugwaba sao.  
 Genuai Bidi dali wi eyu,  
 agai bomo yai po wali pabo bidi,  
 agai dwagi yai homu yaibao.
- <sup>2</sup> Agai wai dabego genuai nogi  
 augwali we bidi tomode elaluaibao.  
 Godigo te dwagi yai bidigo hani dali dwagi yai se yaibao.
- <sup>3</sup> Agai we wai augwaligo mone dali nai hauwa siyu,  
 tama augwali bugagia sesemane sogo bidaibao.
- <sup>4</sup> Hulua sai elaluai, tialima ula pedelama,  
 dwagi yai bidi dabe augwali te ulago tau sabo dao.  
 Dwagi yai bidigo gasa we bidi dali dwagi yai se eyu,  
 augwali bugagia olo tau sabo homu elama,  
 dolo bugagia bilibo dao.
- <sup>5</sup> Dwagi yai kolesaga ebo bidi aga dali  
 gasa bidigo nai negeli aga dali somainogo ebo,  
 tama aga masigi sabo se bisnis ebo  
 tigidali bugagia dolo pabo,  
 te bidigo homu dwagi yai yao.
- <sup>6</sup> Dwagi yai bidi aga tula mugobeo,  
 tama we bidi augwaligo homugo  
 aga gegeda pogobeo.
- <sup>7</sup> Agai te seḡe pedelabo po odolama,  
 aga wi homu me egobeo.  
 Agai Genuai Bidi dali konealubo po  
 bomo elama, daḡ wabo dao.
- <sup>8</sup> Agai te magi nai dabe dali wi eyu,  
 moni homu me ebo menio.  
 Tama agai koneai, te boi dabe augwali  
 hwibo digi hagabo dao.
- <sup>9</sup> Agai nai hauwa nai meni yai bidi dabe  
 augwali mabo dao.  
 Agai dwagi yai kolesaga sesemane sogo ebo dao.  
 Tama agai genuai nogi agai bulude elaluaibao,  
 tama augwaligo aga nogi ugwaba saibao.<sup>t</sup>

<sup>t</sup> 112:9 2 Ko 9:9

- 10 Dwai sę ebo bidi dabe, augwaligo te sę ebo sulama,  
 wado po wabo dao.  
 Augwaligo te dwagi yai bidi dali dwai homu ebo dao,  
 tama nosali augwali mu dolobo dao.  
 Tama augwaligo te dwagi yai nai  
 sainogo tonaluali nai mu sogobeo.

## Salmo 113

**Te Godigo wiegi yai sę augwaliba ebaso, te augwa wiegi yai pemene yai**

- 1 Genuai Bidigo nogi ugwaba sao.  
 Dage Genuai Bidigo sę bidigo,  
 te Genuai Bidigo nogi ugwaba sao.
- 2 Da tigidaligo te wiegi yai pemene  
 te Genuai Bidigo nogide yao,  
 megi, me tigidali bidada pabo sogo  
 nosali, te tama tiao.
- 3 Te giliga pedalubo badu,  
 me giliga dega sigulubo badu,  
 teba usu nigi peyu, da tigidali we bidigo te Genuai  
 Bidi nogi ugwa sao.
- 4 Genuai Bidigo te tigidali hani bage tonalubao.  
 Te aga genuai nogigo te tigidali  
 dagalude nai aiyaba elalui dao.
- 5 Dago God Genuai Bidi tiwai bidi me deli elalubeo.  
 Aga te ugwadu mu bidibao.
- 6 Agai te dagalu me tę dali suainu, aiyaba tonalubao.
- 7 Agai te magi nai meni yai bidi dabe tau sobaso,  
 tama augwali dwai me ma bidibeo.  
 Augwali bugagia naga bidibao.  
 Agai te doado bage sęq pali bidi dabe tau selama,  
 tama augwa usu nama sabo dao.
- 8 Agai te aga bage tobolu bidi  
 dabe dali munama, bidibo dao.
- 9 Tama agai te wai ame nisębo we  
 dabeba bugai sę elama,  
 tama augwa te wai hauwa ame nomainu ebaso,  
 tama te we dabe augwa pemene mu ebo dao.  
 Te Genuai Bidigo nogi ugwaba sao.

## Salmo 114

### Pasovago tęąbi po e dao

- <sup>1</sup> Polobadu Israel dabego te Isip tagalama  
pelawalio.  
Te Jekopgo hani dabego te gasa hani  
dabego bulu taga soai dao.<sup>u</sup>
- <sup>2</sup> Te augwaligo tama tiali sogo,  
te Juda te Genuai Bidigo  
tedali gasagi yai hani bage pedaliyu,  
te Israel dabe me tama tiali.
- <sup>3</sup> Te nosa elalubo tamu ąi agai  
te tonono elama, tama wi palio,  
tama te wę Jordan dolalu,  
tama te wę ma soabeo.<sup>v</sup>
- <sup>4</sup> Te genuai bulu du dabe  
te meme sasa mano pelabo tiwai eyu,  
tama te dwasianu bulu du dabe  
te sipsip dabe sasa mano pelabo tiwai yalio.
- <sup>5</sup> Tamu ąi, magi nai pedalubaso, nage wi paliwe?  
Jordan wę, magi baso tama nage ma soabewe?
- <sup>6</sup> Te bulu du dabe, magi baso dage te meme sasa mano  
pelabo tiwai ebawe?  
Te dwasianu bulu du dabe, magi baso dage  
te sipsip sasa mano pelabo tiwai ebawe?
- <sup>7</sup> Tq, megi da Genuai Bidi asobaso,  
tama nage mumunu yao.  
Te Jekopgo God asalio, tama nage mumunu yao.
- <sup>8</sup> Agai te masigigo ulu wę pedalumainu ilali,  
tama te bulu du masigigo  
te genuai soabo wę pedalubo dao.<sup>w</sup>

## Salmo 115

### God deli naga te God mu dao

- <sup>1</sup> Genuai Bidi, sesemane sogo nago da wei  
mu ebo da, tama nago da me

tagalubo menio.

Tama tialima, dago nago genuai nogi  
naga ugwaba saibao.

Dago digi dena nogi ugwaba me sogobeo.

2 Magi baso te gasa hani dabego dabolo  
te tiwai po hanalu obawe,

“Te duga God menade bidibawe?”

3 Dago God te dagalude bidibao.

Te agai magi sę me deli yabo homu ebaso da,  
teda agai te sę eyu naga ebo dao.

4 Te gasa hani dabego te augwa tibo god dabe  
te gol me silvago nigali.

Te bidi dabego naga te augwali nigibo dao.

5 Te tibo god dabe pedauwali elalubao,

tiali goli augwaligo po obaso, usu me egobeo.

Augwaligo gedu elalubo,

tiali goli augwa tonono bilibaso, usu me egobeo.

6 Augwa olo elalubao, tiali goli augwa po me odogobeo.

Augwa guni elalubo, tiali goli augwa  
te nai denami odogobeo.

7 Augwa nogo elalubao, tiali goli augwa

te nai me tola sogobeo.

Tama augwa saęa me elalubo,

tiali goli augwali me biligobeo.

Tama augwaligo te i me deli weyu,

ma gela deli me wagobeo.

8 Eno homugo te bidi dabego te tibo god nigibaso,

augwali te augwa tibo god tobage tiwai nigali god  
dabe pedelaibao.<sup>x</sup>

Tama te tibo god dabeba homu kęa pabo we bidi dabe,  
augwali me te tiwai pedelaibao.

9 Dage Israel we bidi, dagego konealubo homu  
te duga Genuai Bidiba muiąo.

Agai dage tau siyu, tama dage tonalubo dao.

10 Dage te Godigo pris te Arongo hani,

dagego homu te Genuai Bidiba kęa pao.

Agai dage tau siyu, tama dage tonalubo dao.

11 Dage te Genuai Bidide wi ebo

<sup>w</sup> 114:8 Sai 17:1-7; Nam 20:2-13



we bidi, dagego konealubo homu agaba daų wao.  
 Agaduba deligo naga dage tau selama,  
 tama dage tonalubo dao.

- 12 Genuai Bidigo te sesemane sogo  
 dade homu kone paliyu,  
 tama agai da wiegi yai bugagia ilaibao.  
 Agai te Israel dabe bugagia wiegi yai ilama, tama  
 te Godigo pris haniba tama tiaibao.
- 13 Genuai Bidigo te agade wi ebo we  
 bidi bugagia wiegi yai ilaibao,  
 te nogi yai we bidi, me te nogi  
 meni yai we bidi dabeba,  
 te tama tiwai sę yaibao.<sup>y</sup>
- 14 Eno homugo te Genuai Bidigo  
 dageba te wai hauwa momainu homu yai,  
 tama te duga wų nų nosali pedalubo haniba me,  
 te tama temainu yaibao.
- 15 Genuai Bidigo te dagalu de tų si pedalumainu ilali,  
 tama eno homugo agai te wiegi yai sę ebo kolesaga  
 dageba emainao.
- 16 Dagalu te Godigo pesage naga elalubao,  
 tama agai te tų da we bidiba mawai dao.
- 17 Te isibo bidi dabe  
 te augwa isali bidi dabego pesageba pobao,  
 augwaligo te Genuai Bidigo nogi  
 ugwaba me sogobeo.
- 18 Tiali goli, da bidibo bagego digi,  
 teda te Genuai Bidiba usu da po wabo,  
 te megi me nosali waiya.
- Te Genuai Bidigo nogi ugwaba sao.

## Salmo 116

**Godigo te bidi me deli ma sobaso, tama aga te Godiba usu da wali**

- 1 Genuai Bidigo eno i wabo odobo dao.  
 Tama tibaso, eno aga wei mu ebao.  
 Mu tama, agai eno gedu haluasa po wabo odobo dao.
- 2 Agai eno i wabo tigidali odali.

- Tama tialima, tigidali sogo ena  
 bidibo ula dali bidibo sogo  
 te eno agaba gedu haluasa po waibao.
- 3 Isibogo te bonogo ena kębo tiwai yali.  
 Eno te isibo bidi dabego pesageba homu kone ebode,  
 tama tego ena wi mu ilama,  
 tama ena gasa homu tedali mu yai dao.
- 4 Tama tibaso, eno Genuai Bidiba i olama,  
 tama eno te tama po wali,  
 “Genuai Bidi, eno i wabo te nago ena somainu ebao,  
 tiyu ena isidalio,” wali.
- 5 Genuai Bidigo te olo tau sabo  
 wiegi yai kolesaga elama,  
 tama dabolo wiegi yai sę ebao.  
 Te dena God agai da homu dene eyu, tau sabo dao.
- 6 Genuai Bidigo te bidi dabe  
 augwa digi augwa tau sabo usu isąbo  
 bidi dabe seselalubo dao.  
 Polobadu gasa bidi augwaligo ena dolainu ebadi,  
 tama agai ena ma dobola sai dao.
- 7 Megi da, eno homu dua digi ma tegalubao,  
 magi baso meni, Genuai Bidigo enaba  
 wiegi yai sę mu yalio.
- 8 Genuai Bidi, nago ena ma selama, tama me isigobeo.  
 Nago eno gedu gela gua wa palama,  
 tama nago ena tonalubaso, tama ena me tulalubeo.
- 9 Tama ena te Genuai Bidi dali te tigidali sogo  
 ena te tęde bidibo bilaibao.
- 10 Eno tama po wabo sogo,  
 te eno homu Godiba kęą pali,  
 “Te genuai seęęgo mu ena mesegelalio.”<sup>z</sup>
- 11 Tama ena wi eyu, eno te po wabo sogo,  
 “Eno konealubo homu te mena bidi me  
 deliba me mugobeo,”  
 te sogo me eno konealubo homu te Godiba muanio.
- 12 Genuai Bidigo enaba wiegi yai sę mu yalio.  
 Tama tialima, eno magi nai agaba mawaibawe?
- 13 Te eno kap wain wę me deli te Genuai Bidi  
 selasa paibao, te Godigo ena ma salio weyu,  
 te dąi ebo ofa tiwai dao.

Eno te tama tiyu, te Genuai Bidigo ena ma salide  
te puba hwi wabo tiwai dao.

14 Te aga we bidi tigidali sisinibo madi  
te eno po daḡ wali gilama te tama tiwai yaibao.

15 Te Godigo we bidi dabe aga gedude  
te usu mu elaluali.

Tama me deli isibaso da, te aga magi homu me ebe,  
te olo nai da homu ebeo.

16 Genuai Bidi, ena naga seḡ bidi dao.

Eno nago seḡ ebao, te polobadu idago yali tiwai.

Nago ena te keḡluali bono pisigina saḡnama,  
tama ena magi naigo me daḡ wasiaḡma,  
te olo wiegi yai pedelama bidibao.

17 Te eno nageba usu da wabo ofa eyu,  
tama eno nageba gedu haluasa po waibao po wali.

18 Polobadu eno po nageba daḡ walali,  
tama megi da, eno te seḡ  
nago we bidi tigidali gedude yaibao.

19 Genuai Bidi, eno te tama seḡ  
te Jerusalemde, te nago tempel be  
tomode, te seḡ yaibao.

Dago te Genuai Bidigo nogi ugwaba sao.

## Salmo 117

### Te Genuai Bidigo nogi ugwaba sao

1 Dage tigidali toḡde bidibo hani bage,  
te Genuai Bidi nogi ugwaba sao.

Awe, dage tigidali we bidi, aga nogi ugwanu sao.<sup>a</sup>

2 Agai bomonama, da sesemane godolo mu ebao.

Agai te aga po sesemane wali peyu,  
tama agai da me tagalogobeo.

Te Genuai Bidigo nogi ugwanu sao.

<sup>a</sup> 117:1 Rom 15:11

## Salmo 118

**Te Godigo augwali tau salide te gedu haluasa po weyu, usu da po walio**

*(1 Sto 16:34; 2 Sto 5:13; 7:3; Esr 3:11; Tib 100:5;  
106:1; 107:1; 136:1; Jer 33:11)*

- 1 Dago te Genuai Bidiba usu da wao,  
agai dabolo wiegi yai sę yai.  
Sesemane bidada peyu, bidada pabo sogo  
agai da godolo mu ebo dao.
- 2 Da Israel dabego te tama po waięo,  
“Agai da sesemane bidada pabo sogo godolo mu ebao.”
- 3 Te Godigo pris dabego me te tiwai po wao,  
“Agai da sesemane bidada pabo sogo  
godolo mu ebo dao,” po waięo.
- 4 Te Genuai Bidide wi ebo we bidi tigidali, augwaligo  
te tiwai po waięo, “Agai da sesemane bidada peyu,  
bidada pabo sogo godolo mu ebo da,” waięo.
- 5 Eno seęę genuai elalubaso, tama eno Genuai Bidiba  
gedu haluasa po wali,  
tama agai eno te wabo po odolama,  
tama te seęę dagala sęwani.
- 6 Genuai Bidi ena dali bidibaso, tama ena wi me egobeo.  
Te bidi dabego enaba magi sę deli me  
yainu usu egobeo.<sup>b</sup>
- 7 Genuai Bidigo digi ena tau sabo dao.  
Tama te Genuai Bidigo te boi bidi dabe elaluama,  
tama augwali dolobo te eno suaibao.
- 8 Te dago konealubo homu te Genuai Bidiba muani,  
te wiegi yai da, tama dago te olo bidi dabeba  
te konealubo me usugobeo.
- 9 Te dago konealubo te Genuai Bidiba  
mubaso, te wiegi yai ebao,  
tama dago te konealubo homu te king dabeba,  
me te tobolu bidi dabeba muyu, me usugobe dao.
- 10 Te boi bidi hauwago ena bagua sali,  
tiali goli, te Genuai Bidigo bomogo  
eno augwali silalio.
- 11 Augwaligo ena te tigidali badu bagua sali,  
tiali goli, te Genuai Bidigo bomode

---

<sup>b</sup> 118:6 Hib 13:6

eno augwali ela silalio.

12 Augwaligo ena te bulude elalua pabo  
hauwa nai tiwai bagua sali.

Tiali goli, augwali te kala sia polo  
sula sabo tiwai eyu, isalio.

Te Genuai Bidigo bomode eno augwali ela silalio.

13 Augwaligo ena dali bomonama mu hwḗani,  
tama ena hagawainu yali.

Tiali goli, Genuai Bidigo ena tau salio.

14 Genuai Bidigo ena bomai mu pedalumainu ilalio.  
Agai digi ena tau siyu, ma dobola sai dao.<sup>c</sup>

15 Te Godigo we bidi dabe te augwa ugwa be tomode  
i wabo odao.

Augwa te po obao,

“Te Genuai Bidigo bomogo naga te tiwai ebo dao,” wali.

16 “Genuai Bidigo genuai bomogo da tau selama,  
tama dago te boi bidi dabego bomo  
aiyaba elaluai dao,” wali.

17 Ena me isisabadi tegobeo.

Menio, te ena bidibo ula elalu,

tama eno te Genuai Bidigo yali seḗ po dabe pusaibao.

18 Eno dwai seḗ ebaso,

Genuai Bidigo enaba te dene mabo seḗ mu yali, tiali goli,  
agai ena isimainu me ebeo.

19 Te tempel be sunumi dabe dalao,

tama ena te tomoba pelama,

tama Genuai Bidigo nogi ugwaba saibao.

20 Te e da te Genuai Bidigo sunumi dao.

Te doloba pai we bidi dabe naga

te tomoba pabo usu yaibao.

21 Genuai Bidi, nago eno gedu haluasa

po wabo odolama, tama nago ena tau selama,

te ena bugagia bidibao.

Tama tiyu, eno nago nogi ugwaba sobao.

22 Te masigi te kamda dabego te dwai da homu elama,

tama augwaligo sela saḗwani, te masigi da

te be daga daḗ elalu, polalubo masigi pedelali.<sup>d</sup>

<sup>c</sup> 118:14 Sai 15:2; Ais 12:2    <sup>d</sup> 118:22 Luk 20:17; Tpi 4:11; 1 Pi 2:7

- 23 Genuai Bidigo digi te tiwai elama,  
tama dago suali, te wiegi yai mu yai dao.<sup>e</sup>
- 24 Genuai Bidigo te wiegi yai side dabolo mawai.  
Dago wiegi yai pemene elama,  
tama agaba bugai haliga yao.
- 25 Genuai Bidi, dago nageba hanalu, te da ma sao.  
Nago da tau sobaso, tama dago ebo seę  
tigidali te wiegi yai pedelaibao.<sup>f</sup>
- 26 Godigo te Genuai Bidigo nogide  
asali bidiba wiegi yai seę emainao.  
Dago aga nogi te Genuai Bidigo lotu be  
tempelde ugwaba sao.<sup>g</sup>
- 27 Genuai Bidi naga aga te God mu dao.  
Aga da bugagia tonalubao.  
Te ni nologo dabe tulama,  
tama peyu, te alta sai bagua sigi pao.
- 28 Nage eno God da weyu,  
tama eno nageba puba hwi waibao. Nage eno God,  
tama te eno nage nogi ugwaba saibao.
- 29 Dagego Genuai Bidiba usu da po wao.  
Aga daba wiegi yai seę yai.  
Aga da wei mu elama, tama dabolo te olo tau sabo  
wiegi yai kolesaga sesemane idubo dao.

## Salmo 119

### Godigo bomo yai po te dwagi yai mu po dao

- 1 Niwai bidi dabe augwaligo magi seę me  
isiąama, bugagia biliyu,  
tama augwaligo Genuai Bidigo  
oda mabo bomo yai po wali pali bidi, augwaligo  
homu dwagi yai yaibao.
- 2 Homu si isiąawai bidi dabe, augwali Godigo po tigidali  
wali pabo bidi dabe, augwaligo homu dwagi yai yao.
- 3 Mu tama, te bidi dabe augwaligo

<sup>d</sup> 118:22 Luk 20:17; Tpi 4:11; 1 Pi 2:7    <sup>e</sup> 118:23 Mat 21:42; Mak 12:10-11

<sup>f</sup> 118:25 Mat 21:9; Mak 11:9; Jon 12:13    <sup>g</sup> 118:26 Mat 21:9; 23:39; Mak 11:9; Luk 13:35;  
19:38; Jon 12:13

- dwai kolesaga wali pabo menio.  
 Augwaligo Genuai Bidigo bilibo  
 kolesaga tiwai wali bilibo dao.
- 4 Genuai Bidi, nago bomo yai po tigidali dabolo mayu,  
 tama nago te po wai, da dua bugagia bidiyu,  
 nago bomo yai po wali pabo dolo tama yao.
- 5 Eno homugo godolo mu elama,  
 bomu eyu, nago po tigidali wali painogo ebo dao.
- 6 Tama tiyu, eno hale homu me isaḡwai, magi basowe,  
 eno homugo nago bomu yai po naga konealwai.
- 7 Eno nago da dagalabo doloba pai kolesaga tigidali  
 konea sainu idubadi, eno homu dolo elaluyu,  
 tama eno nago nogi ugwaba sainogo ebo dao.
- 8 Eno nago bomu yai po tigidali wali pabo homu ebao.  
 Tama nago ena tagaligio.

#### Godigo bomu yai po wali pabo bidi po

- 9 Mena tama tiyu, gesi bidigo  
 dwagi yai kolesaga dali biligowe?  
 Agai nago po wali peyu da,  
 aga magi se me isaḡama, dwagi yai bidaibao.
- 10 Eno homu deli naga elalubao.  
 Tama eno homugo nago se yainogo ebo dao.  
 Eno nago bomu yai po wali pabo  
 tagalidali weyu, nago ena tau sao.
- 11 Eno nago po eno homude munama,  
 tama eno konealwai.  
 Magi baso meni, eno nage dali dwai se idali weyu tibao.
- 12 Genuai Bidi, eno nage nogi ugwaba sobao.  
 Nago dwagi yai bomu yai po ena ola mao.
- 13 Nago bomu yai po tigidali dabolo pusa mabo po,  
 eno te we bidi augwaliba te po nedama,  
 tama te po augwa homude daḡ omainogo tiaibao.
- 14 Te eno nago po wali pabo homu  
 ebogo te mone hauwa saibao  
 homu ebo aiyaba elalubo dao.
- 15 Eno homugo nago eno  
 te se emainogo ebo homu eno kone palobo dao,  
 tama nago dabolo mabo  
 te po eno bugagia osola subo dao.
- 16 Nago bomu yai po eno godolo mu ebao.  
 Tama eno homugo te po gegeda peyu, tagalogobeo.

**Godigo bomo yai po dali dwagi yai homu ebo bidi po**

- 17 Naga sę bidi ena bugagia bidimainogo,  
nago dwagi yai sę ena dali emai homu ebao.  
Tama ena bidibo ula dali bidiyu,  
nago po eno wali paio.
- 18 Nago eno homu dwagi yai iliyu,  
tama nago dwagi dwagi yai bomo yai po tigidali  
eno bugagia koneaibao.
- 19 Ena hauwa sogo e tęde bidigobeo.  
Tama nago te bomo yai po ena dali dualigio.
- 20 Eno homugo eno te nago tigidali dwagi yai kolesaga  
dolo wali pabo homu ebao,  
tama tede eno moni nasi tiwai elalubao.
- 21 Nago te dwai sę ebo bidi augwali dali  
wado ebo dao.  
Tama te bidi dabe augwaligo  
nago bomo yai po tudiba muyu,  
tama augwa homu kolesaga wali pai,  
tebo bidi dabe augwali hagawaibao.
- 22 Augwaligo ena dali posobo po weyu,  
tama dwai po me weyu yai.  
Magi basowe, nago bomo yai po eno wali peyu,  
dwagi yai kolesaga ebaso,  
augwaligo dwai po ena dali wabo dao.  
Augwaligo ena dali te tiwai po ma waidalio,  
nago augwaligo te po wabo sula tagaligio.
- 23 Tobolu bidi augwaligo po miyu,  
ena elabo tų gegebo dao.  
Tiali digi, ena nago sę bidi,  
te eno homugo sesemane sogo  
nago dwagi yai bomo yai po koneaibao.
- 24 Eno saę geselebo po nago  
enabolo mabo, te pode eno homu godolo mu ebao.  
Nago po ena sesemane sogo eno  
konemainogo ola mabo dao.

**Godigo po bomo elama wali pabo bidi po**

- 25 Augwaligo ena dolama, tęba aiyaba elalui.  
Nago ena hodolama, bomo ma mawai,  
te nago wali po wali pelama tiwai.
- 26 Eno tigidali kolesaga te po eno nage dali obadi,



- tama nago eno po wei ponai.  
 Nago tigidali bomo yai po ola mawai.  
 27 Nago ena ola mayu,  
 nago bomo yai po wali pao weyu,  
 tama eno nago tigidali dwagi  
 dwagi yai homugo koneaibao.  
 28 Tialima, eno homude seḡe mu ebadi.  
 Nago te wali po wali peyu, ena bomo mabo dao.  
 29 Nago ena tonaluali da, te nago tu eno tagalogobeo.  
 Nago dwagi yai kolesaga ena dali  
 nago dwagi yai po ena ola mawai.  
 30 Eno homugo nage mu wali paibao wai.  
 Sesemane sogo nago dwagi yai po eno  
 homugo konebo dao.  
 31 Genuai Bidi, nago enabolo mabo po  
 te eno wali pabo dao.  
 Te nago magi se me ena dali ebode,  
 ena te seḡe hale maḡidali homu ebo dao.  
 32 Eno nago po polo wali painogo yaibao,  
 magi basowe, nago dwagi yai  
 kolesaga meba enabolo momainogo  
 eno te homu ebo dao.

**Bidigo Godigo kolesaga momainogo hanalubo bidi po**

- 33 Genuai Bidi, nago dwagi yai po ena  
 bugagia ola mayu,  
 tama tigidali sogo eno te po wali paio.  
 34 Nago te dwagi yai po enabolo  
 hania bugagia ola mayu da, te eno wali paibao.  
 Eno homugo ena hodolobaso da,  
 te eno te dwagi yai po tigidali wali paibao.  
 35 Nago eno saḡago bilibo tu dodoliyu,  
 tama eno nago dwagi yai po  
 wabo wali bilainogo yai, magi basowe,  
 eno te dwagi yai po godolo mu ebo dao.  
 36 Nago eno homu hodoloyu da,  
 te eno nago po wali pabo homu yaibao.  
 Tama eno homugo te mena gasa bidigo  
 nai dabe suyu, homu hodolidalio.  
 37 Nago ena tau selama, te dwai se ebo tudiba muaibao.  
 Nago ena dwagi yai bugagia ilao,  
 te nago ena dali wali po wali pao.

- 38 Nago te bidi nage dali wi ebo bidi  
 augwalibolo te po mabo dao.  
 Tialima, naga sę bidi, ena dali, nago tiwai yao.
- 39 Eno te dwai po wabo dali wi ebaso da,  
 nago ena tau sali da, te pogo ena aiyaba elalugobeo.
- 40 Eno homugo nago po tigidali wali painogo ebo dao.  
 Nage dwagi yai mu, tama nago bidibo ula  
 ena mawai dao.

**Godigo bomo yai po daę wabo bidi po**

- 41 Genuai Bidi, nago ena ola mani,  
 nago ena godolo mu eyu, nago ena ma sai.  
 Polobadu nago po weyu, tama tiaiba wai dao.
- 42 Nago ena tau siyu, te dwai bidi dabego ena dali  
 wabo po wei ponomainogo yai, magi basowe,  
 eno nago po koneama daę wabo dao.
- 43 Nago ena bomo mayu da,  
 te nago mu po tigidali sogo eno pusainogo yaibao,  
 magi basowe, eno nago doloba pai po  
 koneama daę wai.
- 44 Te nage dwagi yai po eno  
 sesemane bidada pabo sogo wali paibao.
- 45 Eno usu selama, nago po wali painogo yai,  
 tama te badi te dwai kolesgago ena daę wagobeo.
- 46 Nago po te eno tuni bidi augwali dali waibao.  
 Eno te sę ebo ena hale me egobeo.
- 47 Eno dwagi yai dali nago po wali painogo yai.  
 Magi basowe, eno te dwagi yai po godolo mu ebo dao.
- 48 Eno homugo nago po dwagi yai eyu,  
 tama eno godolo mu ebao.  
 Tama sesemane sogo eno homugo  
 te nago dwagi yai po eno koneaibao.

**Godigo po bidigo daę wabo te nai mu dao**

- 49 Nago te naga sę bidi enabolo hasia mani,  
 te daę walali po nago ma koneao.  
 Te tiali eno te pode konealubo po daę wai dao.
- 50 Ena te homu sęę ebo sogo  
 te eno homu nagame yai,  
 magi basowe, nago wali po wali peyu,  
 ena bidibo ula mawai.
- 51 Dwai kolesaga ebo bidi

- augwaligo dwai po ena dali dwai posobo po wai,  
 tama augwaligo ena dali te po obadi,  
 eno nago dwagi yai po tudiba mubo menio.  
 52 Genuai Bidi, nago polobadu enabolo mani  
 te po eno homugo koneyu yai,  
 tama te pogo ena bomo mabo dao.  
 53 Eno suali, dwai bidi dabego  
 nago dwagi yai po bolai,  
 tama eno augwali dali wado po wabo dao.  
 54 Ena eno bulu digibulu bidiyu,  
 tama eno nago dwagi yai po koneama,  
 te eno tęąbi po wabo dao.  
 55 Genuai Bidi, hulide eno homugo nage koneyu,  
 tama nago dwagi yai po eno wali pabo dao.  
 56 Eno nago dwagi yai po tigidali wali painogo eyu,  
 tama tego ena homu dwagi yai ilibo dao.

**Bidigo te Godigo bomai po wali pabo kolesaga godolo mu ebo dao**

- 57 Genuai Bidi, nage mu nage enade usu yaibao.  
 Eno nagebolo po daų olama weyu, tama wai,  
 eno nago bomai po tigidali wali paibao.  
 58 Eno nage bomonama hanalubao,  
 nago ena homu dene eyu tau sao,  
 magi baso meni, nago po daų weyu tama wai.  
 59 Eno te ena bilibo kolesagade homugo kone palama,  
 tama megı da, eno po nage dali daų weyu,  
 tama ena nago po wali paibao.  
 60 Eno tonalugobeo.  
 Eno polo nago bomai po wali paibao.  
 61 Te dwai bidigo usu sabo homugo ena paliyu,  
 tama ena augwaligo kolesagaba oda sainogo ebao,  
 tiali digi eno nago bomai po tagalobeo.  
 62 Te hulide mu ena hodaluama,  
 nago nogi ugwaba siyu,  
 te me badu doloba pai po nago po tu  
 ilibode wali tiai.  
 63 Ena te nago se ebo bidi dabe dali biliyu,  
 te nago bomo yai po wali bilibo bage  
 te eno abagi dabe dao.  
 64 Genuai Bidi, nago te tęde we bidi

tigidali godolo mu ebao.

Nago tigidali bomo yai po enabolo ola mao.

**Godigo bomo yai pogo da tau sabo sę elalubao**

65 Genuai Bidi, nago wiegi yai kolesaga

naga sę bidi, enabolo yai dao.

Nago naga daę wali po wali mu pabo dao.

66 Nago bomo yai po tigidalide eno

homu daę mu obaso,

tama tiyu, nago wiegi yai kolesaga

te ola mabo sę ena dali yao.

67 Nago dene me enaba wasiřbadi digi,

te eno nago sunumi wali asobeo.

Tiali goli, megi da, eno nago po wali pabo dao.

68 Nago wiegi yai mu eyu,

tama nago olo mu tau sabo kolesaga enade ebao.

Nago bomo yai po ena bugagia ola maduao.

69 Te dwai hagoma ebo bidi dabego

tibo po hauwa enade

te gasa we bidibolo weyu ebao.

Tiali goli, eno gasa homu me isaęyu,

te eno nago bomai po naga tigidali wali pabo dao.

70 Te bidi dabe augwaligo

wiegi yai homu kolesaga me elalubeo.

Tiali goli, eno te nago bomo yai po

godolo homu mu ebo dao.

71 Te wiegi yai mu da, te nago dene

mabo sę enabolo yali.

Te tiali sęgo nago bomo yai po wali pomainogo

ena bugagia ola mawai dao.

72 Eno te mone godolo homu me egobeo,

te eno nago bomo yai po godolo ebo

tiwai gilama me egobeo.

**Godigo bomo yai po te doloba pai mu elalubao**

73 Nago digi nago ena nigali,

tama nago ena bugagia tonalubao.

Nago wiegi yai homu kolesaga enaba mao,

te eno nago bomo yai po tigidali bugagia konea sabo

sę emainogo yao.

74 Te we bidi augwali nagede wi eyu,

nage dologode bidibo bage,

- te augwaligo ena sulama, homu pemene yaibao,  
 magi baso meni,  
 eno nago ąą wali pode homu ąą wabo dao.
- 75 Genuai Bidio, eno koneani,  
 nago bomu yai po tigidali te dolo naga mu elalubao.  
 Nago eno ebo kolesaga deli naga dodolabo homu eyu,  
 tama nago enabolo sęę mawai dao.
- 76 Nago ąą wabo po walio,  
 te nago sesemane sogo ena godolo eyu,  
 te naga sę bidi ena haliga ąą walabo po wai.  
 Tialima, megi da, eno homugo nago  
 tama sę emainogo homu ebao.
- 77 Nago ena megi hobede eyu da,  
 te ena bidabo ula saibao,  
 magi baso meni, eno nago bomu yai po godolo mu ebao.
- 78 Te hagoma ebo bidi dabe augwaligo  
 tibo po weyu, ena olo po tų ilaibao.  
 Augwa te ebo kolesagade hale mu ebo sę ilao.  
 Tiali digi ena, te eno sesemane sogo nago bomu yai po  
 homu konealueibao.
- 79 Mena bidi dabe te nagede wi eyu,  
 tama te bidi dabego nago bomu yai po koneyu, te  
 augwali enaba asomainao.
- 80 Te eno homugo nago ena tau sobaso,  
 te nago bomu yai po tigidali eno wali peyu,  
 tama ena te ena ebo kolesagade  
 hale sabo sę me egobeo.

**Te bidigo Godigo ena ma dobola somainogo gedu haluasa po wali**

- 81 Nago ena ma sogowe weyu tonalu,  
 te ena haliga sęę mu ebao,  
 tama eno bomu tigidali silibao.  
 Tiali goli, eno nago pode konealubo  
 homu ąą wai mu elalubo dao.
- 82 Eno te nago ąą wali po mu usu nugowe weyu,  
 nage tonalubadi, te eno gedu  
 magane eyu, hagela mu ebao.  
 Tama eno te po weyu,  
 “Nisu sogo nago eno haliga dua digi nagame  
 iligowe?” eno te po wabo dao.
- 83 Ena te kibu meme wale te augwaligo wain ąi bulama,  
 te dobaso, badia pai sębo tiwai yali.

- Tiali digi te eno nago bomo yai po  
te eno homude gegeda pabo menio.
- 84 Nisu naga sogo eno tonalueibawe?  
Nisu sogo mu enabolo te dwai dene mabo bidi dabeba  
nago augwaliba dene magowe?
- 85 Te dwai hagoma ebo bidi dabego  
te nago bomo yai po wali pabo meni.  
Augwaligo geme dualubo kolesaga  
me badu eyu, te ena tola sainu ebao.
- 86 Da we bidigo nago bomo yai po  
tigidali ąą wabo homu ebao.  
Tama nago po te tulalugobeo.  
Te bidi dabe augwaligo tibo po dabego ena dolobao.  
Tama tibaso, nago ena tau somainu homu ebao.
- 87 Pąde tama te augwaligo ena ela mueinu yai.  
Tiali goli, te eno nago bomo yai po  
tagala homu me ebeo.
- 88 Nago ena bugagia tonalubao, magi baso meni,  
nago sesemane sogo ena godolo homu ebao.  
Tama tibaso, eno nago bomo yai po  
tigidali wali mu pabo dao.

**Godigo bomo yai pode konealubo homu ąą wabo bidi dao**

- 89 Genuai Bidi, nago po da,  
sesemane sogo elalua pidu elalua paibao.  
Te nago bidibo bulude nago pogo bomu  
munu me siligobeo.
- 90 Nago sesemane sogo naga wali po wali pidu bidibao.  
Nago e tą naga gesabidi badu munama elalubao,  
tama elalubo tiwai tama elalu,  
te ibaba me kila sesa me pabeo.
- 91 Naga digi nago po wali gilama  
te tigidali nai sibi te polobadu elalua asali,  
megi e sogoba usu nagaselama,  
megi me elalubao.  
Magi baso meni, tigidali nai sibigo nago sę naga ebao.
- 92 Te eno nago bomu yai po godolo menigi sogo da,  
teda nago enaba dene mabo sę ebaso, te isigi dao.
- 93 Eno nago bomu yai po me tagalogobeo,  
magi baso meni, eno te po dabe wali pobaso,  
te nago ena bidabo ula mobaso ena bidibao.
- 94 Ena naga nai mu tama, tama tiyu,

nago ena ma sao.

Sesemane sogo eno nago po wali pabo homu ebao.

95 Te dwai se ebo bidi dabe geme duala sagaselama,  
ena ela mueinu ebao.

Tiali goli, eno nago bombo yai po tigidali konealubaso,  
te tama se eno homu si me egobeo.

96 Eno megi konebao, te mena nai  
te wiegi yai deli mu me elalubeo.

Tialima, te nago po te mu polalubao,  
tama tego te tigidali nai usu elama,  
te tigidali side elalua pidu, elalueibao.

**Godigo bombo yai po godolo mu ebo bidi po**

97 Eno nago bombo yai po godolo mu ebao!

Eno tede homu kone palobo se  
te siade me hulide ebo dao.

98 Nago bombo yai po ena dali sesemane sogo elalu,  
tama te konebo homu kolesaga enabolo mabo dao.

Tama tebo sego te ena kolesaga  
koneai bidi mu tiwai elama,  
tama eno te ena boi bidi dabe  
koneani homu kolesaga aiyaba elaluai dao.

99 Te sesemane sogo eno nago mu poba  
naga homu kone palobo dao,  
tama tiyu, eno wiegi yai homu kolesaga mu selama,  
tama eno ena po ola mabo tisa bidi  
aiyaba elaluai dao.

100 Tama eno koneani kolesagago  
te monu dabego koneani kolesaga te aiyaba elaluali,  
magi baso meni, eno nago doloba pai  
bombo yai po wali mu pobaso, tebo dao.

101 Ena dwai kolesaga wali pabo  
homu eyu, iba kila sabo dao, magi baso meni,  
eno homugo nago po naga wali pabo homu ebo dao.

102 Naga digi nago po dabe ena ola mani.  
Tama tiyu, eno te po me tagalobo menio.

103 Te bunu ge nai hani eno  
pedauwalide tubo pusu yaibao,  
tiali goli, nago po pusu ebo te umagi mu yaibao.

104 Nago bommai pogo enabolo  
te wiegi yai homu kolesaga mawaibao,  
tama tialima, eno te dwai kolesaga tigidali ebo

te eno homu hagela mu ebao.

**Godigo bomai pode bidi ula sabo po wai**

- 105 Nago po te lam sole ula tiwai eyu,  
te ena tau sobaso, dolo paibao,  
tama te ula tiwai eyu, ena sunumi ola mabo dao.
- 106 Eno po ąą weyu, te eno nago doloba pai po  
tigidali wali paibao po walio.  
Tialima, eno te tiwai tama yaibao.  
Eno tibo po me wagobeo.
- 107 Genuai Bidio, odao.  
Genuai dene mugo ena mesegelali.  
Nago ena te bidibo ula elalumainogo  
te nago po ąą tiwai gilama yao.
- 108 Genuai Bidio, eno gedu haluasa  
po weyu, te nageba puba hwi obao.  
Nago eno puba hwi wali po selama,  
tama ena nago po bugagia ola magameo.
- 109 Sesemane sogo eno ena bidibo ula  
tagalabo sisi elalubao.  
Tiali goli, eno nago bomai po  
homu kone ebo me tagalobeo.
- 110 Te dwai bidi dabego ena tola sabo  
bono ąąą po diliginama, dalubao.  
Tiali goli, eno nago po me tagalobeo.
- 111 Eno nago po sesemane sogo totalua pidubo dao.  
Tama te pogo eno haliga pemene ilibo dao.
- 112 Eno po ąą weyu, te eno nago bomo yai po  
tigidali wali pidubadi,  
te ena isibo sogoba usu naibao po wai dao.

**Godigo bomo yai pogo da bugagia bidimainogo ilibo dao**

- 113 Nage wali paibao weyu,  
tibo po wabo bidi dabe te eno godolo me egobeo,  
tiali goli, eno nago bomo yai po  
wali pabo homu eyu, godolo ebao.
- 114 Nage naga tama ena seselalubo bidi elalubao,  
te eno bomai obo elalubo tiwai dao.  
Eno nago ąą wali pode konealubo  
homu ąą wai elalubao.
- 115 Dage dwai seęę sabo we bidigo ena tagalao.  
Eno ena Godigo bomai po wali painogo homu ebo dao.



- 116 Genuai Bidi, nago po ąą weyu,  
 te nago ena ąą walama,  
 te ena bidibo ıla elalueibao po wali,  
 tama eno nago ąą wali pode homu konealuyu bidali.  
 Nago te bomo enabolo mao,  
 tiyu eno konealubo homu odolali tagalidalio.
- 117 Ena nogo tolalubaso, te ena bugagia bidaibao.  
 Tama sesemane sogo eno olo  
 nago poba bugagia munama elalu,  
 te eno wali paibao.
- 118 Te nago bomo yai po wali piąama  
 tagalobo we bidi tigidali te nago tudiba mubo dao.  
 Te augwaligo tibo po wabo dabe te odolali waibao.
- 119 Nago homugo te dwai ąę ebo  
 we bidi dabe te pobelebage tiwai  
 naga homu ebo dao,  
 tama tibaso, eno nago po godolo mu ebo dao.
- 120 Ena nagede wi mu elama, tama ena didibili ebao.  
 Eno nago po tų ebode homu kone palama,  
 te wi ebo dao.

**Godigo bomo yai po wali pabo bidi po**

- 121 Eno te wiegi yai doloba pai kolesaga ebao.  
 Eno homugo nago ena tagaligi homu ebao,  
 tiyu te boi bidi dabego enaba dwai ąę idalio.
- 122 Eno homugo te nago naga ąę bidi  
 ena tau sabo bomai po ąą omainogo homu ebao.  
 Te nago te dwai hagoma ebo bidi dabego  
 enabolo te ąęę momai hagede sula tagaligio.
- 123 Te nago ena te dwai bidi dabego  
 nogode ma dobola sogowe weyu,  
 te nageba tonalu tonalu ebao,  
 te nago polobadu tama tiabo po ąą wai dao.  
 Tiali goli, ena tonalubadi digi,  
 te ena dwai dene mu ebo dao.
- 124 Eno homugo nago ena godolo ebo  
 kolesaga wali peyu, te nago mu po te bugagia  
 ıla magameo.
- 125 Ena nago ąę bidi da, tibaso enabolo wiegi yai  
 homu kolesaga mobaso da,  
 te eno nago po page koneaibao.
- 126 Te we bidi dabe augwaligo nago

- bomo yai po bolobao.  
 Tama tibaso, megi da te nago dene  
 augwaliba mabo sogo dao.
- 127 Eno nago bomo yai po godolo mu ebao.  
 Eno te polalubo nai te mone gol  
 eno godolo homu elalubeo,  
 tialima te eno nago po godolo homu ebo dao.
- 128 Tama tiyu, eno nago po tigidali wali pobao.  
 Eno homugo te gasa sunumi dabego  
 te nago sunumi ela soabo  
 te eno homugo hagela homu mu ebao.

**Godigo sunumi wali pabo homu ebo bidi po**

- 129 Nago po te wiegi yai mu elalubao.  
 Tama tiyu, eno homu si isiayyu,  
 eno te po tigidali wali pabo dao.
- 130 Te bidi me deligo gasa bidi  
 tau siyu, te nago po page konemainogo tibaso da,  
 teda aga haligaba ula mabo te saibao.  
 Tama te pogo te homu kolesaga  
 bugagia konesiqwani bidibolo  
 te homu kolesaga mabo dao.
- 131 Eno nago bomo yai po homu godolo mu ebao,  
 tama eno haliga umagia hogodaluyu,  
 wali pabo homu ebao.
- 132 Nage aselama, te nago homu  
 dene eyu, tau sabo kolesaga enabolo yao.  
 Te nage godolo homu ebo we bidi  
 tigidaliba te tiwai se nago ebo dao.
- 133 Te nago tonalubaso da,  
 teda ena te dwai segeba tulalugobeo,  
 te nago tama tiabo se po polobadu day wai.  
 Te dwai kolesagago ena aiyaba elalu  
 idali weyu, te nago tona tagaligio.
- 134 Te ena aiyaba elalubo se bidi dabego,  
 te ena augwaligo dolidali dabego,  
 te nago ena ma sao.  
 Tama tiwai se augwaligo enaba isabaso,  
 te eno nago po wali paibao.
- 135 Eno homugo te nage ena paba bidagaselama,  
 te nago bomo yai po tigidali enabolo ola mayu,  
 te ena bugagia wiegi yai ilao.

- 136 Eno gela hauwa weyu,  
 tama eno gedu ąi gela gigua umagi mu yaibao,  
 magi baso meni, te bidi dabe augwaligo  
 nago bomo yai po wali pişabaso,  
 te ena gela wabo dao.

**Godigo bomai po te dolo elalubao**

- 137 Genuai Bidi, nage doloba pai mu tama elalubao,  
 tama nago bomo yai po tigidali  
 te doloba pai mu naga elalubo dao.
- 138 Nago dabolo mani bomo yai po  
 tigidali doloba pai elalu,  
 tama wiegi yai naga elalubo dao.
- 139 Te eno boi bidi dabe augwaligo  
 nago pode homu kone palobo şę me ebo menio.  
 Tama tibaso, eno haliga te isi dabo posolo tiwai ebo dao.
- 140 Nago po daų wabo te mu po naga waibao,  
 te eno usu sela suai dao.  
 Tama ena, nago şę bidigo, eno homugo nago te tiwai  
 daų wabo po godolo homu naga ebo dao.
- 141 Ena olo bidi da, te bidi dabe  
 augwaligo enabolo posobo po obadi,  
 tiali goli, te eno nago ola mabo po  
 homu kone palobo me tagalogobeo.
- 142 Te nago doloba pai kolesaga  
 sesemane sogo elalua pidu bidaibao,  
 tama sesemane sogo nago bomai po te mu naga dao.
- 143 Te şęę hauwa enaba pedelai,  
 tiali goli, eno nago bomo yai pode  
 homu pemene yaibao.
- 144 Nago po doloba pai sesemane sogo elalubao.  
 Nago ena tau sobaso da, teda eno te po page koneama,  
 tama ena te bidabo ula dali bidaibao.

**Bidigo te Godigo aga ma somainogo gedu haluasa po wali**

- 145 Genuai Bidi, eno gedu haluasa po  
 bomonama mu nageba obao.  
 Eno gedu haluasa po odao,  
 tialima te eno nago po tigidali wali paibao.
- 146 Megi eno nageba i obao.  
 Ena ma dobola sao, tama tibaso da,  
 te eno nago bomo yai po tigidali wali paibao.

- 147 Te be posisabadi digi,  
te eno nageba gedu haluasa po weyu,  
ena tau sao po obao.  
Eno nago daų wali poba homu daų wagasai elalubo dao.
- 148 Te hulide ena godege me pigobeo.  
Eno sesemane sogo nago poba naga  
homu kone elalubo dao.
- 149 Genuai Bidio, nago sesemane sogo  
ena godolo ebaso,  
tama nago eno gedu haluasa po wabo odao.  
Nago ena homu dene eyu, tau sao.  
Tama tiyu,  
nago ena bugagia tonalubaso da,  
te ena bidibo ula dali bidaibao.
- 150 Te dwai homu elalubo bidi dabego  
te ena dolabo homu eyu, te augwali pąba asobao.  
Augwaligo nago bomo yai po wali pabo  
homu munu me ebeo.
- 151 Tiali goli, Genuai Bidi, nage ena pade bidibao,  
tama nago hasegelesiąbo bomo yai po  
tigidali te mu po naga elalubao.
- 152 Te bidada asali sogo polobadu mu  
eno nago po konea salio.  
Nago te wali pogo te sesemane sogo  
bidada pabo po wai dao.

**Bidigo te Godigo aga tau somainogo i wai dao**

- 153 Nago suali, ena te genuai seęę elalubo,  
tama tialima, nago te seęę sela sayao.  
Eno nago bomo yai po homu kone me  
gegeda palobo menio.
- 154 Ena tau siyu, ena ma selama,  
te ena bidabo ula mao,  
te nago tama tiabo po daų wai dao, te tiwai yao.
- 155 Te dwai kolesaga ebo bidi dabego  
nago doloba pai po wali pisąbaso,  
tama tiyu te nago augwali ma sogobeo po wali.
- 156 Tiali goli, Genuai Bidio, nago olo tau mabo  
wiegi yai kolesaga te genuai mu elalubao.  
Nago ena ma sabo po daų walai elalubao,  
tialima, eno homugo nago te seę  
megi tama yao homu ebao.

- 157 Bidi hauwago ena dolobo sę eyu,  
te enaba boi bidi ebao, tiali goli,  
eno nago wiegi yai mu bomai po me tagalogobeo.
- 158 Te bidi dabego konealubo homu daų wali  
te eno suali sela sębaso,  
te eno augwaliba wado po wabo dao,  
magi baso meni, augwaligo nago po  
wali pisębaso tebo dao.
- 159 Nago ena subao,  
eno nago ola mabo po godolo mu ebao.  
Nago ena godolo ebo kolesaga me hasegelegobeo,  
tama tiyu nago ena ma sao.
- 160 Nago bomo yai po page da,  
te mu po naga tama elalubao.  
Tama nago doloba pai bomo yai po  
tigidali te sesemane sogo elalua pidu,  
elalua pabo dao.

**Bidigo godolo homu eyu, Godigo bomo yai po wali mu pabo bidi po**

- 161 Te tobolu bidi dabego enabolo dwai sę ebo,  
tama augwaligo te tiwai sę kolesaga page menio.  
Tiali goli, eno nago poba homu  
kone palobo sę elalubao.
- 162 Eno te nago daų wali pode homu daų weyu,  
wiegi yai pemene homu umagi mu ebao,  
te bidi me deligo te gol mone hauwa sobaso,  
pemene ebo tiwai ebao.
- 163 Eno te tibo po wabo kolesaga  
hagela homu mu eyu,  
tama tede eno haliga dwai ebo dao.  
Me ma, eno te nago po godolo homu mu ebo dao.
- 164 Te nogo a naga olama, me badu si wabo side,  
tigidali sogo eno nageba puba hwi weyu,  
te nago po tųde ebo doloba pai po  
naga obaso, tebo dao.
- 165 Te we bidi augwaligo nago  
bomo yai po godolo mu eyu,  
tama augwali bugagia mu bidibao,  
te magi nai me deligo augwali  
tulaluabo sę me ilibeo.
- 166 Genuai Bidio, te nago ena ma sogowe weyu,  
te nage eno tonaluyu,

te nago po weyu, nago enabolo yao  
wali kolesaga eno ebao.

167 Eno nago bomai po dabe wai pabo dao.

Eno te bomo yai po dabe wali pabo  
homu godolo ebo dao.

168 Eno nago bomai po dabe tigidali,

me te nago po tigidali me wali pabo dao,  
tama eno tama tebo kolesaga tigidali nago subo dao.

**Bidigo gedu haluasa po weyu, te Godigo aga tau somainu yali**

169 Genuai Bidi, eno nageba

i wabo odama, te ena tau sao.

Te wiegi yai homu kolesaga enaba mao,

te nago polobadu enabolo po  
daę wali tiwai gilama yao.

170 Eno gedu haluasa po waboba olo muao,

tama nago polobadu po wali gilama ena ma sao.

171 Te nago tigidali bomo yai po enaba

bugagia ola mobaso,  
tama te eno nago nogi sesemane  
sogo ugaba mu saibao.

172 Te eno nago bomo yai po

nogi ugaba sabo balia po waibao,  
magi baso meni, te nago bomo yai po tigidali  
te doloba pai naga elalubo dao.

173 Eno nago bomo yai po tigidali wali paibao,

tama tiyu, nago ena sesemane sogo  
tau sabo sisi elaluo.

174 Genuai Bidi, eno haligago nagede gela obao,

te nago ena ma sao.

Nago bomo yai pogo ena homu pemene ilibo dao.

175 Eno te nago nogi ugwaba somainogo,

nago enaba te bidabo ula mao.

Eno homugo te nago pogo ena

tau somainogo homu ebaso.

176 Eno te sunumi tagalama olo bilibao,

te kibu sipsip wai hagabo tiwai ebao.

Tama tibaso, nago ena naga se bidi gegagasao.

Magi baso meni, eno nago bomo yai po homu  
kone palobo, me gegeda pabo meni dao.

## Salmo 120

**Bidigo te Godigo aga tau somainu, gedu haluasa po wai**

- 1 Te seęę enaba pedalubo sogo, eno te  
Genuai Bidiba  
i wali, tama agai eno gedu haluasa  
po odoyu, tama wei ponani.
- 2 Eno gedu haluasa po te tiwai wali,  
“Genuai Bidi, ena tau sao.  
Tiyu, te tibo po wabo bidi dabego  
ena dolidalio,” wali.
- 3 Dage tibo po wabo bidi dabe da,  
Godigo mena seę dageba egowe?  
Agai dageba te magi dene mawaiabwe?
- 4 Te agai dage te ami bidi dabego  
poa pai enego enaibao,  
tama posolai sia te dage tigiba gea palaibao.
- 5 Ena dage tomode dwai dugulalu,  
tama te ena te bulu Mesek,  
me te Kedar dabe tomode  
dwai dugulaluali tobage tiwai ebao.
- 6 Ena te gasa we bidi dabe dali bugagia  
wei elama dugulalu,  
te sesabi elama dugulaluama bidabo tiwai ebeo.
- 7 Te eno augwali bugagia dugaya  
wabo sogo, augwaligo hwiainu naga yai dao.

## Salmo 121

**Genuai Bidi te da tonalubo bidi dao**

- 1 Eno te bulu du dabeba tonono ebao.  
Tiali goli, ena tau sabo bidi menadu  
pedelaibawe?
- 2 Menio. Genuai Bidigo dagalu dali, tę dali nigali,  
agai deligo naga ena tau sabo dao.
- 3 Te agai nage tulalumainu me egobeo.  
Te agai nage tonalu,  
tama aga me pigobeo.
- 4 Bugagia odao.

- Agai te Israel dabe tonalubo dao,  
tama aga dwasianu me pibeo. Mu menio.
- 5 Genuai Bidi agai te nage tonalubo bidi dao.  
Aga te nage pađe dolalu, tama nage tonalubo dao.
- 6 Te giliga sesani te nago tigde me egobeo,  
tama te hulide te poluago nage me dologobeo.
- 7 Genuai Bidigo te nage tonalu,  
tama te dwai naigo nage dolidali weyu tiaibao.  
Agai nage tonaluaibao.
- 8 Te nago be taga pabo sogo,  
te Genuai Bidigo nage tonaluaibao.  
Tama te nago ma asobo sogo me, te agai nage tonalubao,  
tama megi me, te tigidali sogo  
nosali bidibode me, te tiaibao.

## Salmo 122

Te Jerusalemba wiegi yai pemene eyu wabo tęąbi po dao

- 1 Augwaligo enabolo walali, “Iya, tegoba,  
da te Genuai Bidigo beba pinao.”  
Augwaligo te tiwai po obaso,  
te ena bugai haliga mu yalio.
- 2 Tialima, megi da, da sabolama,  
tama te Jerusalem bagulali obo tomode dolalubao.
- 3 Augwaligo te Jerusalem ma nigilama,  
tama te wiegi yai mu dodolama elalubao.
- 4 Te Israel hani dabe teba aselama,  
te Genuai Bidiba puba hwi po wagasobo dao,  
te polobadu agai augwaliba wali po  
tiwai gilama ebo dao.
- 5 Te pesagede te po tų ebo be elalubao,  
tama Israel king dabego te we bidigo  
po tų odolama, tama po dodoliyu ebo dao.
- 6 Dagego te gedu haluasa po waiyaọ,  
te Jerusalem dabe bugagia dugulalumainogo yao.  
Dagego te tiwai gedu haluasa po waiyaọ,  
“Te Jerusalem wei ebo we bidi dabe  
augwa bugagia bidimainao.
- 7 Te Jerusalem obo tomode bidibo



we bidi dabe augwa te bugagia dugulalu,  
te hwibo menia somainao.

Tama king dali, te tobolu bidi dabe me,  
te bugagia dugulalumainao,” wao.

8 Eno te abagi me hai namu homu koneama,  
tama eno te tiwai po Jerusalemba obao,  
“Eno homugo naga te bugagia bidiyu,  
tama te hwibo meni yaibao.”

9 Eno te dena Genuai Bidi, Godigo beba  
homu kone paliyu,  
tama eno te gedu haluasa po obao,  
te nago tigidali nai te bugagia mu pedalumainao.

### Salmo 123

**Bidigo homugo te Godigo agade homu dene eyu,  
tau somainogo eyu, gedu haluasa po wai**

- 1 Genuai Bidi, nage te dagalude king  
bidibaso,  
tama eno konealubo homu nageba muani.
- 2 Te se ebo bidigo te aga tonalubo bidiba homu muyu,  
tama te se ebo wego me  
te aga tonalubo weba homu muaibao.  
Te tiwai naga gilama,  
dago konealubo homu me nageba muyu,  
Genuai Bidi, te dago God dao,  
te nago olo tau sabo wiegi yai kolesaga  
dabolo ebaso, te usu dao.
- 3 Genuai Bidio, nago te homu dene eyu,  
olo tau sabo kolesaga daba yao, magi baso meni,  
te we bidi dabego daba te dwai se  
hauwa sogo ilibo dao.
- 4 Te sesabi elama bidibo sogo,  
te mone bisnis se ebo bidigo  
dabolo te posobo po wali,  
tama te hagoma ebo bidi dabego  
da aiyaba elalubo dao.

## Salmo 124

### Godigo te aga we bidi tau sabo dao

- 1 “Te Genuai Bidigo da me  
tau sigi menigi sogo da, teda magi igi dawę?”  
Te Israel dabęgo te hanalubo wei ponao.
- 2-3 “Polobadu te bidi dabęgo dabolo haliga sębę elama,  
tama augwaligo da dali hwjani.  
Tama Genuai Bidigo da tau sigi menigi sogo da,  
te boi bidi dabęgo augwa haliga  
sębęgo da mu doligi dao.
- 4 Te da węgo bomogo sabo tiwai elama hagagi da,  
tama te węgo da mesęgelibo tiwai igi dao.
- 5 Tama te węg bomo yai asiyu, da sigibaso,  
tama da isigi dao.  
Tiali goli, me tebeo menio.”
- 6 Dago Genuai Bidiba usu da mu wao.  
Aga te boi bidi dabęgo da silimainu me ebeo.
- 7 Dago augwali tagalali,  
te ba te bidi me deligo muani wade tola sali  
te tagalubo tiwai elama, tama bola pali.  
Te wa alua pelama, tama da tede ma dąq me elalubeo.
- 8 Te dagalu dali, tų dali nigali Genuai Bidigo, aga digi  
te da tau sabo dao.

## Salmo 125

### Godigo aga we bidi dabe bugagia dugulalumainu yali

- 1 Te Genuai Bidiba homu  
kęą pali we bidi dabe,  
augwali te Saion bulu du tiwai dao.  
Te bulu du mumunu me isiąma,  
tama aga page dąq mu elalubao.
- 2 Te Jerusalem bagualu elalubo  
bulu du dabe, te tiwai naga megi,  
me nosali tigidali sogo telaluaibao,  
te Genuai Bidigo aga we bidi bagualubo dao.
- 3 Te dwai bidi dabęgo te Godigo we bidi dabęgo

- tę te sesemane me tonaludugobeo.  
 Te tiwai augwaligo igi sogo da,  
 teda te Godigo we bidigo me  
 te dwai kolesaga eba homu igi da.
- 4 Genuai Bidi, nago wiegi yai kolesaga  
 te wiegi yai we bidiba yao,  
 te naga bomai po wali pabo we bidi dabe dao.
- 5 Tiali goli, nago te augwa digi augwa  
 dwai kolesaga wali pabo we bidiba  
 te dwai dene mabo sogo da,  
 teda nago kolesaga tagalubo  
 we bidi tigidaliba nago te dene mao.

## Salmo 126

Te Israel dabego gedu haluasa po weyu, te  
 Godigo augwali tau somainu yai

- 1 Te Genuai Bidigo da te Saionba  
 ma odasa asali sogo,  
 dago homugo te dago olo nade ebo tiwai homu yai.
- 2 Tama dago gisugu kisu selama mu wali,  
 tama dago pemene umabo mu ebo tęąbi wali.  
 Tama te Genuai Bidigo po konesiąbo  
 bidi dabego te tiwai po wali,  
 “Genuai Bidigo te genuai sę mu ebogo  
 te Israel dabe tau sabo dao,” wali.
- 3 Mu dao, Genuai Bidigo  
 te genuai sę mu da tau siyu yai dao.  
 Tama tibaso, da bugai haliga mu ebo dao.
- 4 Genuai Bidi, nago da tigidal dena  
 tęba ma odasa asao.  
 Te tama tiali, te buside wę gamia soabo  
 te wa pomainu ebo tiwai bolo yali,  
 tiali goli, nago te tulubage tulumainu  
 elama, tama wę te ąi gamiade paęamainu yao.
- 5 Te gela wabo sę eyu, te nai bulali bidi dabe,  
 te augwa wiegi yai pemene elama,  
 te inayu tau yali nai nosali saibao.
- 6 Mu tama dao. Te gela weyu, te nai wai sela pelama,  
 bulugi pali bidi dabe, nosali augwa te wiegi yai

pemene ebo tęąbi weyu,  
tama te tau yali nai dabe selama, asaibao.

## Salmo 127

**Godigo wiegi yai sę augwaliba ebaso, tama  
augwaligo agai nogi ugwaba salio**

- <sup>1</sup> Te Genuai Bidigo te be me deli sę igi  
menigi sogo  
da, te kamda dabego sę odolali igi dao.  
Te Genuai Bidigo taun me deli tonalugi menigi sogo da,  
teda te tonalubo bidi dabe augwali  
te odolali tonalugi dao.
- <sup>2</sup> Da te kigamu digi mu hodaluama,  
tama sę dene ela pidubadi,  
te be hulua saboba usu nani,  
te mone me nai dabe sabo sę eyu tebao.  
Tiali goli, teyu, te da odolali sę dene yabuo.  
Magi baso meni, Godigo te aga  
wei ebo we bidi dabeba  
te toma nabo sogo mabo dao.
- <sup>3</sup> Godigo dabolo dwagi yai sę eyu,  
tama te wai dabe te wiegi yai nai  
mu tiwai mabo dao.  
Te wiegi yai nai dabe mu dago te Godide sabo dao.
- <sup>4</sup> Te gesi bidigo wai ogwa te ami bidi me deligo nogode  
te enesigi ene tolalubo tiwai ebao.
- <sup>5</sup> Te wai ogwa hauwa elalubo bidi,  
aga te wiegi yai pemene yao.  
Te agai te aga boi bidi dabe dali  
te po tų ebo pesagede te po tų ebo sogo,  
te augwaligo aga tau saibao.  
Tama aga te po tųde hagamainu me egobeo.

## Salmo 128

**Godigo te aga po wali pabo we bidiba wiegi yai sę bugagia ebo dao**

- <sup>1</sup> Te Genuai Bidide wi elama, tama agai

po wali pabo we bidi dabe,  
augwali te wiegi yai pemene ebo dao.

<sup>2</sup> Tama te naga yali sęde te mone selama,  
te nago sęą pali doado bage abelibaso, te usu yaibao.  
Tama nago ebo sę tigidali te wiegi yai  
pedelama, tama nage pemene yaibao.

<sup>3</sup> Te nago we da,  
te wain bonogo te nai hauwa walubo tiwai yaibao.  
Tama nago wai dabego te nago nai tuabo  
tebol sai bagua selama,  
te gesi ni oliv dugo bagua sabo tiwai yaibao.

<sup>4</sup> Mu tama, te Genuai Bidigo po wali pabo bidi da,  
te aga te tiwai wiegi yai nai sabo dao.

<sup>5</sup> Genuai Bidi te Saionde bidibao, eno homugo agai  
te nage wiegi yai sę ilaibao.  
Me eno homugo te tigidali sogo nage te tęde bidibo sogo  
te nago te Jerusalemde tigidali nai te bugagia mu  
pedalubo suaibao.

<sup>6</sup> Eno homugo nage sesabi elama,  
bidimainu homu elama, te nago naga wąj nõų dabe  
sumainu ebo dao.  
Te Israel dabe bugagia dugulalumainu elama,  
tama te hwįbo menia somainu yao.

## Salmo 129

**Te Israel dabego Godiba gedu haluasa po olama,  
te augwa boi bidi dabe dolomainu yali**

<sup>1</sup> Israel, nago dabolo te boi bidi dabego  
nage dwai mu ilibo sę ebo po pusali,  
te nage gesi bidide gagalasa,  
megiba te usu nagasobao.

<sup>2</sup> Nago te tiwai po wali, “Te boi bidi dabego enaba  
dwai sę mu yali,  
te ena gesi ogwa bidide gagalasa,  
megiba usu nagasobao.  
Tiali goli, augwaligo ena aiyaba me elalubeo,” po wai.

- 3 “Augwaligo ena dodolagia mu elama,  
tama elali bįgo ena tigiwali tudi badu togwali.  
Augwaligo te bobobage keni hauwa  
te gide wę gamia tiwai pedalumainu ilali.
- 4 Tiali goli, Genuai Bidi te doloba pai mu da,  
tama agai ena tau selama,  
tama ena te dwai bidi dabego nogode tagalama,  
tama ena te olo sę ebo bidi ma bidibeo,” wali.
- 5 Eno homugo dago te Saionba boi bidi  
ebo bidi aiyaba elalumainu homu yai,  
tama augwali pobeasa te augwa buluba ma pao.
- 6 Te tialima, augwali te be daide  
ugwadu pedalubo nosa tiwai ebao.  
Augwaligo te nosa togosiąbadi, tama polo sasia pabo dao.
- 7 Te bidi me deligo te nosa me sisinama,  
tama dunama, tama me tolasa pabeo.
- 8 Tama te we bidi dabe augwali pąba pobaso,  
te augwaligo te tama po me wagobeo,  
“Te dago homugo Genuai Bidigo nage wiegi yai sę yaibao.  
Te Genuai Bidigo nogide, dago dagebolo  
te tobage wiegi yai po mobao,”  
augwaligo te tobage po wagobeo.

## Salmo 130

**Bidigo gedu haluasa po Godiba weyu, te aga tau somainu yali**

- 1 Genuai Bidi, ena haliga sęęę dwai mu  
ebaso, tama eno nageba i obao.
- 2 Genuai Bidi, eno gela wabo odao.  
Te nago ena tau sao olama, te eno nageba i wabo odao.
- 3 Te nago dago yali dwai sę tigidali nedebaso da,  
teda dego nago te po tų ebo ugwaba  
ela holobo usu egowe?
- 4 Tiali goli, nago dago dwai sęde sali sęęę sela sąbo da,  
tama tiyu, dago nagede noma siyu, wi ebo dao.
- 5 Eno homugo te Genuai Bidigo  
ena tau somainu homu elama,

tama eno aga tonalubao.

Tama eno konealubo homu agai poba daų mu wabo dao.

<sup>6</sup> Eno te Genuai Bidi tonalu, tama eno homugo  
te agai ena tau somainu homu mu ebao.

Tama tego te be posobo tonalubo bidi  
dabego wei ebo homu te aiyaba elalubao.

Te bagego hulide te taun bugagia tonalubo se ebo dao,  
tama augwaligo homugo te be posobo  
polo asao homu ebo dao.

<sup>7</sup> Da Israel dabe, dago konealubo homu  
te Genuai Bidiba muiyaę, magi baso meni,  
agai da sesemane wei mu idubao.

Tama sesemane sogo te agai da tau sabo homu eyu,  
te da dolidali olama tebo dao.

<sup>8</sup> Agai aga we bidi dabe te ma saibao, te da Israel,  
tama dago yali dwai seęde sali seęę  
tigidali sela saęwaibao.<sup>h</sup>

## Salmo 131

**Bidigo te konealubo po daų olama, Godiba gedu haluasa po wali**

<sup>1</sup> Genuai Bidi, eno te hagoma yali kolesaga  
tagalama, tama eno te ena digi te nogi  
ugwaba me sabeo.

Eno te genuai nai dabede homu kone me isięma,  
tama te eno konesięwai nai dabede  
me eno homu kone me ebo menio.

<sup>2</sup> Tiali goli, ena te bugagia duagulama,  
tama ena homu dua tegaluai.

Ena te wai bęų aga idago nogode digi  
pagealubo tiwai elalubao.

Tama tiwai naga, eno haliga me te dua digi elalubao.

<sup>3</sup> Te Israel dabe, dagego konealubo  
homu Genuai Bidiba muiyaę,  
megi me, tigidali sogo nosali me, te tama tiao.

<sup>h</sup> 130:8 Mat 1:21; Tai 2:14

## Salmo 132

Te Godigo wiegi yai tedali bede te augwa wiegi yai pemene yali

- 1 Genuai Bidi, nago te Devit homu kone  
ebo me tagaligio,  
tama te tigidali seḡe agai bugagia tolali,  
te homu kone tagaligio.
- 2 Te Israelgo Bomai God, nago te Devitgo nageba  
te daḡ walali po meba koneao.
- 3 Agai te tama po wali, “Ena te beba me piṣama,  
tama ena te betba me pigi pogobeo,” wali.
- 4 “Ena toma neyu, tama me pila mudugobeo.
- 5 Hasiabolo eno te Genuai Bidigo  
pesage me deli nigaibao, te Israelgo Bomai God,  
te aga bidimainu yabo pesage nigilaibao.  
Tama nosali te ena toma naibao,” wai.
- 6 Te Betlehemde dago te Genuai Bidigo  
Daḡ Wali Bomai Po Munalubo Halobage po odali.  
Tama dago te Kiriati Jearim tḡde elalubo gegelama suai.
- 7 Tama dago te po wai, “Iya, tegoba,  
da te Genuai Bidigo beba pinao,” wali.  
“Dago te aga sia king paḡa lotu wagi pinao,” wai dao.
- 8 Genuai Bidi, nage te naga toma nabo  
pesageba dulao,  
tama te Daḡ Wali Bomai Po Munalubo Halobage  
nage dali selasa asao.  
Te nago genuai bomo daḡ ilali te dao.  
Tama nage aselama,  
tama tede bidada peyu, bidada pao.
- 9 Te nago naga pris dabe tau selama,  
tama augwaligo te doloba pai kolesaga naga  
tigidali sogo emainao.  
Tama naga we bidi dabe augwa  
wiegi yai pemene elama, i omainao.
- 10 Genuai Bidi, nago te naga seḡ bidi Devitba  
te bomai po me deli daḡ walali elalubao.  
Tama tiyu, nago te naga sa muani king  
te tudiba me mugio.<sup>i</sup>

---

<sup>i</sup> 132:10 2 Sto 6:41-42



- 11 Polobadu nago Devitba bomai po me  
 deli daę walali,  
 tama nago te naga po me hasegeligobeo.  
 Nago te tama po wai, “Te eno nago ogwa me deli  
 te king pedalumainu yaibao,” wali,  
 “tama aęai te nage hasegelaibao.<sup>j</sup>
- 12 Te nago ogwa dabego eno  
 daę wali po kontrak wali peyu,  
 tama eno augwaliba mani bomai po  
 tigidali wali pobaso da,  
 teda nago waęi nęę dabego  
 te augwa ogwa dabe augwali me te king pedelaibao,  
 te tigidali sogo tama tede piduaibao,” wali.
- 13 Genuai Bidigo te Saion sa muanio,  
 tama aęa tede sesemane bidainu yai.
- 14 Aęai te po wali, “Te ena te taunde  
 sesemane bidada peyu, bidada paibao,” wali.  
 “Eno te pesage te ena king bidabo madi sa muai dao.
- 15 Eno te Saionba usu nama nai mayu,  
 tama te we bidi dabe te nai me sęę pogobeo.  
 Tama eno te magi nai meni yai bidi dabe nai menama,  
 tama augwa mu paęawaibao.
- 16 Eno te Saion pris dabeba sęę menama,  
 eno te tęde we bidi ma sabo po te pusumainu ebao.  
 Tama te Saion we bidi dabe augwa tęąbi weyu,  
 tama pemene elama, tama i omainu yaibao.
- 17 Te eno te Devitgo hanide bidi me deli selama,  
 tama aęa te bulude king pedalumainu elama,  
 tama aęa hani te sęde me hagagobeo.<sup>k</sup>
- 18 Te eno aęai boi bidi dabe  
 te dwai hale mu somainu ilaibao,  
 tiali goli, te aęai tonalubo we bidi dabe da,  
 te augwali wiegi yai pedelama,  
 tama bomo elalu bidaibao,” po wai dao.

<sup>j</sup> 132:11 2 Sml 7:12-16; 1 Sto 17:11-14; Tib 89:3-4; Tpi 2:30    <sup>k</sup> 132:17 1 Kin 11:36

## Salmo 133

Augwaligo te ama wei ebo kolesagade pemene yali

- 1 Te Godigo we bidi dabe deliba bugagia  
dugulalu, tama te deli haliga elama,  
te ama dabe tiwai mu elama bidiyu ebaso da,  
te wiegi yai mu dao, tama augwa bugai haliga elama  
bidimainu yao.
- 2 Te kolesaga te oliv ni dugo  
te wiegi yai wel tiwai ebao,  
augwaligo te Arongo toboluba gelama,  
tama te naboge tobolu nisiba dulama,  
tama aga bobage gudali ugwa sabiba usu nugulali.
- 3 Te deli haliga ebo kolesaga te hulide genuai wę segeni  
te Hermon bulu duba,  
me te Saion bulu du dabeba tulalubo tiwai ebao.  
Te bulude Genuai Bidigo te bidi dabe  
bugagia mu te deli haliga elama, bidimainu ebo dao.  
Agai augwaliba te bugagia mu bidada peyu,  
bidada pabo ula augwaliba mawaiba.

## Salmo 134

Dago te God nogi ugwaba sao

- 1 Dage Genuai Bidigo sę bidi tigidali,  
te agai tedali wiegi yai tempel bede  
te hulide sę ebo da, dagego agai nogi ugwaba siao.
- 2 Dagego te tempel be tomode  
gedu haluasa po bomo elama weyu,  
tama Genuai Bidigo nogi ugwaba sao.
- 3 Genuai Bidigo te dagalu me tọ nigali,  
tama te Saionde bidiyu, eno homugo agai dage dali  
wiegi yai sę emainao.

## Salmo 135

Te Genuai Bidiba wiegi yai pemene eyu, wabo tęąbi po dao

- 1 Genuai Bidi nogi ugwaba sao.  
Te Genuai Bidigo sę bidi dabe,

- dagego aga nogi ugwaba sao.
- 2 Dage te Genuai Bidigo be tomode dolalubao,  
te dena Godigo tedali wiegi yai tempel be dao.
- 3 Aga nogi te ugwaba sao, magi baso meni,  
agai wiegi yai seḡ daba ebao.  
Agai te olo tau sabo wiegi yai kolesaga dabolo ebao,  
tama tiyu, dago te teḡabi dabe weyu,  
agai nogi ugwaba siḡo.
- 4 Genuai Bidigo Jekop te aga mu da weyu, te sa muani,  
tama tialima, te Israel dabe  
te Godigo hani mu gagawai dao.
- 5 Eno koneani, Genuai Bidigo nogi  
te genuai mu elalubao,  
tama aga te tibo god tigidali daide  
ugwadu aga bidibao.
- 6 Genuai Bidigo mena seḡ te dagalude  
me, te tḡde me, te tamu weḡde me,  
te tamu weḡ pagede yabo homu ebaso da,  
teda agai te seḡ ebo dao.
- 7 Agai te tulubage tulubo pḡ  
te tigidali tḡ badu pedalumainu elama,  
tama be sele te tulubage dali  
pedalumainu ebo dao, tama te wali hodolama,  
te tedela palobo dao.
- 8 Te Isip tḡ pedai kantride agai  
te Isip dabego gomunai ogwa dabe ela mubadi,  
te augwa kibu bulmakau omai dabe me ela silali.
- 9 Tama te Isipde agai te bidigo me  
isiḡawai bomai seḡ dabe  
te kingba me, aga ofisa dabeba dali,  
te dene mawai dao.
- 10 Genuai Bidigo te bulu tḡ pedai hauwa dolama,  
tama te bomai king meba ela muai dao.
- 11 Agai te Sihon elali, te Amor dabego king,  
tama Ok, te Basan bulu king da,  
tama te Kenan tḡ king tigidali ela silai dao.
- 12 Tama agai te king dabego tḡ  
te aga hani bageba mani,  
te Israel dabebolo mawai dao.

- 13 Genuai Bidi, sesemane sogo  
 te we bidi dabego te nage koneama,  
 te naga digi nage te God da homu yaibao.  
 Tama te nosali pedalubo hani dabe,  
 augwaligo me te nage homu konealuaibao.
- 14 Tama Genuai Bidigo te seselalubo  
 kolesaga te aga we bidi dabeba eyu,  
 tama aga te seḡ bidi dabeba homu dene yaibao.
- 15 Te gasa hani dabe augwaligo  
 te augwa tibo god dabe te silva me golgo nigali.  
 Te bidi dabe augwa nogogo digi  
 te tibo god dabe nigai.
- 16 Te tibo god dabe augwa pedauwali elalubao,  
 tiali goli augwa po wabo usu meni yai.  
 Tama augwa gedu elalubao,  
 tiali goli augwa nai dabe me subeo.
- 17 Tama augwa olo elalubao,  
 tiali goli augwa po wabo me odosiḡwai,  
 tama augwa mobo sabo usu meni yai.
- 18 Eno homugo te tibo god nigibo bidi dabego  
 tama augwa homu te nai dabeba  
 mubaso, augwa te tibo god dabe  
 tobage tiwai pedelaibao.<sup>l</sup>
- 19 Dage Israel we bidi dabe,  
 te Genuai Bidi nogi ugwaba siḡo.  
 Dage Genuai Bidigo pris dabe,  
 te Genuai Bidigo nogi ugwaba sao.
- 20 Te Livai hani dabe, te Genuai Bidigo  
 nogi ugwaba siḡo.  
 Dage te Genuai Bidide wi eyu  
 aga dologode bidibo we bidi dabe,  
 te aga nogi ugwaba sao.
- 21 Te Saionde bidalubo we bidi dabe,  
 te Jerusalem, te Genuai Bidigo pesage mu da,  
 te agai nogi ugwanu sao.  
 Genuai Bidigo nogi ugwanu mu sao.

## Salmo 136

Te Godiba usu da wabo teḡbi po dao

(1 Sto 16:34; 2 Sto 5:13; 7:3; Esr 3:11; Tib 100:5; 106:1; 107:1; 118:1; Jer 33:11)

- 1 Dago Genuai Bidiba usu da wao, magi  
baso meni, agai dabolo wiegi yai se yai.  
Sesemane bidada pabo sogo agai da wei mu ebao.
- 2 Dago Genuai Bidiba usu da waiyaḡo.  
Agai te tigidali tibo god aiyaba elalui.  
Sesemane sesemane sogo agai da wei mu ebo dao.
- 3 Dago usu da po te Genuai Bidiba wao.  
Agai te tḡde genuai bidi tigidali aiyaba elaluali.  
Agai da sesemane bidada pabo sogo wei mu ebao.
- 4 Agaduba deligo te genuai se  
te bidigo me isiḡwai bomai se dabe ebo dao.  
Agai da sesemane bidada pabo sogo wei mu ebo dao.
- 5 Te aga koneani kolesagade digi agai  
te dagalu nigilama,  
te ugwadu elalubo nai dabe me nigalio.  
Sesemane bidada pabo agai da wei mu ebao.<sup>m</sup>
- 6 Agai te tḡ ugwadu munama,  
tama te weḡ dabe aiyadu elalubao.  
Agai da sesemane bidada pabo sogo  
wei mu ebo dao.<sup>n</sup>
- 7 Agai te giliga me, polua me, nigali.  
Sesemane bidada pabo sogo agai da wei mu ebo dao.
- 8 Agai te be posobo sogo te ulade  
te giligago tonalumainu ilali.  
Agai da sesemane bidada pabo sogo wei mu ebao.
- 9 Agai te polua me hḡ dabego te be hulua sabo sogode  
tonalumainu ilali.<sup>o</sup>  
Agai da sesemane bidada pabo sogo wei mu ebo dao.
- 10 Agai te Isip dabego gomunai ogwa dabe ela muani.  
Te sesemane bidada pabo sogo agai  
da wei mu ebo dao.<sup>p</sup>
- 11 Agai te Israel dabe odasa peyu,  
tama augwaligo te Isip taga palio.  
Agai da sesemane bidada pabo sogo  
wei mu ebo dao.<sup>q</sup>

<sup>m</sup> 136:5 Gag 1:1   <sup>n</sup> 136:6 Gag 1:2   <sup>o</sup> 136:9 Gag 1:16   <sup>p</sup> 136:10 Sai 12:29

<sup>q</sup> 136:11 Sai 12:51

- 12 Te agai genuai bomogo digi,  
 agai augwali odasa palio.  
 Sesemane bidada pabo sogo agai da wei mu ebo dao.
- 13 Agai te nosa elaluali tamu ąi  
 te si badu peda somainu bugulali.  
 Agai da sesemane bidada pabo sogo wei mu ebo dao.
- 14 Aga polasa peyu,  
 tama aga we bidi dabe odasa peyu,  
 tama augwali te tamu ąi nogealio.  
 Agai te sesemane bidada pabo sogo da wei mu ebo dao.
- 15 Agai te Fero me, aga ami bidi dabe dali,  
 te wę tulama tama isimainu ilalio.  
 Agai sesemane bidada pabo sogo  
 da wei mu edubao.<sup>r</sup>
- 16 Te aga we bidi dabede aga  
 te wa pai bulude polasa palio.  
 Agai da sesemane bidada pabo sogo wei mu ebao.
- 17 Agai te bomai king dabe ela muani.  
 Agai da sesemane sogo wei mu eyu, tama tialio.
- 18 Tama agai te genuai nogi elalubo  
 king dabe ela muai.  
 Agai da bidada pabo sogo sesemane wei mu eyu, tiali.
- 19 Agai te Sihon ela muai,  
 te Amor dabego king dao.  
 Te sesemane bidada pabo sogo agai  
 da wei mu ebo dao.<sup>s</sup>
- 20 Tama agai te Ok elali, te Basan bulu king bidi dao.  
 Te agai sesemane bidada pabo sogo  
 da wei mu ebo dao.<sup>t</sup>
- 21 Tama agai te king dabego tọ  
 te aga we bidi dabeba mawai.  
 Te agai sesemane bidada pabo sogo da wei mu ebo dao.
- 22 Agai te tọ te Israel dabeba mawai,  
 te aga sę bidi dabeba mawai dao.  
 Agai te bidada pabo sogo sesemane te  
 da wei mu ebo dao.
- 23 Te boi bidi dabego da aiyaba elalubo sogo,  
 agai dade homu kone me elaludalio.  
 Te agai bidada pabo sogo sesemane da wei mu ebo dao.

---

<sup>r</sup> 136:15 Sai 14:21-29    <sup>s</sup> 136:19 Nam 21:21-30    <sup>t</sup> 136:20 Nam 21:31-35

- 24 Tama agai da te boi bidi dabego nogode ma salio.  
 Agai te bidada pabo sogo sesemane  
 da wei mu idubo dao.
- 25 Agai te tigidali we bidiba nai mayu,  
 tama te tigidali kibu hasa dabe me nai mabo dao.  
 Agai te bidada pabo sogo sesemane  
 te da wei mu ebo dao.
- 26 Tama tialima, dago te dagalude bidibo Godiba  
 te usu da po waiyaọ.  
 Te sesemane bidada pabo sogo agai  
 da wei mu ebo dao.

### Salmo 137

**Te Israel dabe gasa bulude bidalu, te augwa page bulu hagede gela wali**

- 1 Da te Babilon dabego wę sesegede bidalu,  
 tama dago te Saionba homu kone palubao.  
 Tama tiyu, da gela udubao.
- 2 Dago dena gita dabe te pađe elalubo  
 ni nologode walama, elaluali.
- 3 Tama da te kalabus yali bidi dabego te tama po wali,  
 “Dago homugo te dagego da bugai haliga yabo  
 tęąbi meba omainu homu ebao,” wali.  
 “Te Saion tęąbi me deli waiyaọ,” po walio.
- 4 Tiali goli, magi baso dago te Genuai Bidiba tęąbi  
 te dago bulude wabo aọ te mena bulude waibawe?  
 Te usu mu me egobeo.
- 5 Jerusalem, te eno nageba homu kone isiayı da,  
 teda eno te gita ma elainu ebaso, te usu me egobeo.
- 6 Jerusalem, te eno nageba homu kone me isiayı,  
 tama te eno polalubo pemene ebo  
 homu nageba sa munama, bidisaąbaso da,  
 teda eno dogoni dolobaso,  
 tama eno tęąbi ma wainu ebaso, usu me egobeo.
- 7 Genuai Bidi, nago te Idom dabego  
 yali kolesaga homugo ma kone palao,  
 te augwa hwįani sogo te Jerusalem sai.  
 Augwa te wali po ma homude koneao.  
 Augwaligo te tama po wali,

- “Te Jerusalemde tigidali be me te tigidali aluama,  
tama tigidali dolao,” po wai dao.
- 8 Babilon, odao. Te nage dolaibao.  
Te nago dabolo yali dwai sę wei ponobo bidi da,  
te bidi aga pemene yagameo.”
- 9 Te bidigo te nago dwasianu wai puluba dabe selama,  
tama augwali te masigiba aiya sęnama  
tama augwali mu dolagameo.

## Salmo 138

### Bidigo Godiba puba hwi po wali

- 1 Genuai Bidi, te eno haliga tigidali mugo  
nageba usu da obao.  
Te tigidali tibo godigo gedude  
te eno nago nogi ugwaba sabo tęąbi po obao.
- 2 Eno te nago tedali wiegi yai tempel  
bego gedude kidu sugunama,  
tama nago nogi ugwaba sobao.  
Magi baso meni,  
nago ena sesemane sogo godolo mu elama,  
tama nago ena bugagia tonalubo dao.  
Nago dabolo ola manio,  
nage dali, te nago po dali, te mu polalubo dao.
- 3 Te eno nageba i wabo sogo,  
nago eno gedu haluasa po wabo odolama,  
tama nago naga bomo digi enaba menama,  
tama ena bomo mu elalu bidalio.
- 4 Te tigidali tęde kingo nago daę walali po odola silama,  
tama tiyu, augwa te nago nogi ugwaba saibao.
- 5 Tama augwaligo te nago yali sę dabede  
te augwa tęąbi po weyu,  
tama nago genuai nogide te tęąbi po me waibao.
- 6 Genuai Bidi, nage te ugwadu mu bidiyu,  
tama nage polalubao,  
tiali goli, nago te hagoma homu isiąbo  
we bidi dabeba homu kone ebao.  
Tama te hagoma ebo bidi dabe me



te nagede geme me duala sogobeo.

7 Te seḡe hauwa enaba pedalubo sogo,  
 nago ena tonalubaso, tama ena bugagia bidibao.  
 Te boi bidi dabego enaba wado ebo dao,  
 tiali goli, nago augwali dali hwiyu elama,  
 tama nago bomogo naga nago ena ma sabo dao.

8 Genuai Bidi, eno koneani,  
 te nago enabolo po daḡ walali  
 gilama te tigidali se yaibao.  
 Tama nago ena te sesemane  
 bidada pabo sogo godolo mu ebo dao.  
 Eno homugo nago te hodolali se tigidali  
 silimainu homu ebao.

## Salmo 139

*Te Devitgo aseḡani balia po me deli dao.*

**Godigo da mu konea pelama, tama da bugagia mu tonalubao**

1 Genuai Bidi, nago eno homu osola sulama,  
 tama nago ena mu konea pai dao.  
 2 Nago te eno ebo se tigidali mu konea pali.  
 Nage digibulu bidibao,  
 tiali goli nago eno homu kolesaga  
 tigidali konea pai dao.  
 3 Nago ena te se ebadi,  
 me te godege pibo sogo, te subo dao.  
 Nago eno kolesaga tigidali koneanio.  
 4 Tama eno te po me deli wainu ebaso da,  
 nago te po polo koneanio.  
 5 Nago ena tigidali mu bagua selama,  
 tama te nago bomogo te nago ena tonalubo dao.  
 6 Nago te koneani homu kolesaga  
 te ena daide ugwanu mu elalu,  
 tama eno homu kolesaga te aiyaba elalui dao.  
 7 Te ena menaba peyu, tama eno  
 te nago hoboludu ogwa wai taga pogowe?  
 Tama ena menaba wi pelama,  
 te nagede geme duala sigi paibawe?  
 Woo, te duala sigi pabo bulu menio.

- 8 Ma, te ena dagaluba ugwaba holama, bidainu ebaso,  
 nage te dagalude bidibao.  
 Ma, ena te isali bidi dabego pesageba bidigi pobaso da,  
 nage te bulude me bidibao.
- 9 Te ena te giliga pedalubo badu  
 te digibulu bola pigi sogo da,  
 ma ena te giliga dega sigilubo badu  
 digibulu bidigi peyu da,
- 10 teda nage te pesagede me bidiyu,  
 te ena bilibode te saḡa dodolu,  
 tama te ena tau sigi dao.
- 11 Tama eno te po weyu,  
 “Te hulua sabogo ena geme duala sao,” po obaso,  
 “tama te giliga ulago ena bagua selama,  
 te hulua somainu yao,”
- 12 tiali goli, tagalao, te nago gedude te be hulua sabo  
 te be mu hulua sabo tiwai egobeo.  
 Tama hulide te ula mu eyu,  
 te giliga ula tiwai yaibao.  
 Be hulibo, me be posobo, te nago gedude  
 te deli tigi tiwai naga dao.
- 13 Nago eno tigi pedai tigidali badu nigali.  
 Nago ena tigidali te idago haliga tomode nigai dao.
- 14 Ena nagede wi ebaso,  
 tama eno nago nogi ugwaba sobao.  
 Tigidali nai nago nigali, tede eno midigi sabo dao,  
 te tedali gasagi yai mu elama,  
 tama te wiegi yai sawi yai mu dao.  
 Nago te ena mu bugagia koneama,  
 tama ena mu konebao.
- 15 Te ena idago haliga tomode  
 geme dua dua pedalubo sogo,  
 nago te eno tigi dili ununama,  
 te deliba daḡ wabo te nago tigidali suai dao.
- 16 Ena te haga piligai wai idago  
 haligade bidibadi digi, nago ena suai.  
 Ena te tḡde pedalisiaḡbadi,  
 tiali goli, nago te naga bukude aseḡani  
 te nago homugo te tigidali sogo ena  
 te tḡde sesabi elama, bidabo bodolu aseḡai dao.
- 17 God, te eno nago homu kolesaga

- tigidali koneabo te ena kone tųa pobao.  
 Iya, tegobao. Nago homu kolesaga  
 te dwasianu me menio.
- 18 Te augwali eno nedebaso da, teda nambago  
 te nabisde wę kemi masigi sane  
 te aiyaba mu elaluaibao.  
 Te ena pilama, hodalubo sogo  
 te ena nage dali me bidibao.
- 19 God, eno homugo nago te dwai sę ebo bidi dabe  
 ela mumainu homu ebao.  
 Tama eno homugo te hwįbo bidi dabego  
 ena tagalumainu homu ebo dao.
- 20 Te bidi dabego te nageba po dwai wali.  
 Tama augwaligo te haniani dwai po  
 nago nogide wabo dao.
- 21 Genuai Bidi, eno te nage  
 wei homu isiąbo bidi dabe  
 augwali te eno wei homu me ebeo.  
 Tama eno te nageba hagoma homu ebo bidi dabede  
 te dwai haliga mu ebo dao.
- 22 Mu tama, eno haliga augwalide pania selama,  
 tama eno te bidi dabe wei mu me ebeo.  
 Eno augwali te ena boi bidi dabe subo tiwai ebao.
- 23 God, eno homugo nago ena bugagia dagala sulama,  
 tama nago te enade elalubo  
 homu kolesaga tigidali koneao.  
 Ena usu siyu, tama nago te eno homu kolesaga  
 tigidali bugagia koneao.
- 24 Nago ena bugagia dagalao,  
 tiyu te tibo homu meba enade elalu idalio.  
 Tama nago ena te bidada pabo ula sabo sunumidu  
 odasa pao.

## Salmo 140

*Te Devitgo asęani balia po me deli dao.*

**Bidigo te Godiba gedu haluasa po weyu, te aga bugagia tonalumainu yai**

- 1 Genuai Bidi, nago ena te dwai sę ebo  
 bidi dabego nogode ma sao.

- Awe, te dwai hwḡbo bidi dabego  
 enaba boi bidi me idali weyu, nago ena tau sao.
- 2 Te sesemane sogo augwaligo dwai  
 kolesaga yabo homu ebo dao.  
 Tama te seḡ edelama, sesemane sogo  
 augwaligo te we bidi dabe tomode  
 konila po hodolama, wabo dao.
- 3 Te augwaligo po wabo te hasamanigo  
 kele poa pai tiwai mu elama,  
 tama augwaligo pedauwalide te bidi  
 dolabo po te hasamanigo dwai  
 nabi tiwai elalubo dao.<sup>v</sup>
- 4 Genuai Bidi, nago ena bugagia tonaluo.  
 Tama tiyu, te dwai seḡ ebo bidi dabego  
 bomogo ena aiyaba elaluainu ebaso, usu me egobeo.  
 Nago ena bobogela selama,  
 tama te hwḡabo bidi dabego ena dolabo po miani,  
 te augwaligo te tama me tegobeo.
- 5 Te hagoma ebo bidi dabego  
 te ena tola somainu ebo  
 bono gaḡa munama, elalubao.  
 Te bono gaḡa augwa te bomai kedoago nigai,  
 augwaligo te ena bilibo sunumide  
 gebelama, te ena te hasa tiwai gilama sainu yali.
- 6 Eno Genuai Bidiba te tama po walali,  
 “Nage eno God dao,” obao.  
 Genuai Bidi, nago ena homu dene eyu, tau sao.  
 Eno i wabo odao.
- 7 Genuai Bidi, eno God da,  
 nage te ena ma sali bomai bidi dao.  
 Te polobadu dago te boi bidi dabe dali  
 hwḡani sogo, nago ena bugagia tonaluai dao,  
 bidigo sabelego aga tigi seselalubo tiwai gilama yali.
- 8 Genuai Bidi, nago te dwai seḡ ebo bidi  
 dabeba te augwaligo sainu ebo nai  
 dabe munu me magio.  
 Tama augwali hagoma idali weyu,  
 nago augwaligo te dwai seḡ yainu

---

<sup>v</sup> 140:3 Rom 3:13

po mia sali se emainu me elamu dao.

- 9 Nago te eno boi bidi dabego  
te ena aiyaba elalumainu me igio.  
Augwaligo te ena silabo wado po wali.  
Tiali goli, augwaligo enaba  
te yainu yali se, nago augwaba digi  
ma pedalumainu ilao.
- 10 Awe, te nago augwaliba  
te dabo sia tulalumainu ilao.  
Tama nago augwali te genuai to  
dedageba aiya sanama,  
tama augwa edaba ma holainu ebo  
te usu me egobeo.
- 11 Te gasa bidi odolali po tu ilibo bidi dabe,  
nago augwaligo te po tu de gasa bidi aiyaba  
elalumainu me elamuo.  
Tama eno homugo te dwai nai te hwibo  
bidi dabeba pedelama,  
tama bomonama eyu, augwali mu  
silimainu homu ebao.
- 12 Genuai Bidi, eno te tama koneani,  
nago te nai meni yai bidi dabe  
te po tu ebode tau siyu,  
tama te magi doado bage sa pa  
bidi dabe tau sabo dao,  
te bidi dabego augwaliba  
dwai se ebo sogo tama tibo dao.
- 13 Mu tama, te doloba pai we bidi  
dabego te nago nogi ugwaba siyu,  
tama te augwali nage dali sesemane bidada paibao.

## Salmo 141

*Te Devitgo asani balia po me deli dao.*

**Bidi me deligo gedu haluasa po hulide walio**

- 1 Genuai Bidi, megi eno nageba gedu  
haluasa po obao.  
Eno homugo nago ena polo tama  
tau somainu homu ebao.

- Eno nageba i obao, tama eno homugo nago  
 eno gedu haluasa po odomainu homu ebo dao.
- 2 Eno homugo nago eno gedu haluasa  
 po wabo te nageba denami ebo nai  
 hano asobo tiwai emainao.
- Awe, te eno nogo si ugwaba siyu,  
 nagebolo gedu haluasa po wabo si,  
 eno homugo te ebo te nago gedude  
 te piode mabo ofa tiwai emainao.<sup>w</sup>
- 3 Genuai Bidi, nago eno pedauwali bugagia tonaluo,  
 tama eno po wabo me bugagia tonaluo.
- 4 Ena te dwai kolesaga ebo tomoba  
 pidali weyu, nago ena hageao.  
 Tama nago ena te dwai sę ebo bidi dabe  
 dali deliba sisinama,  
 tama te dwai sę meba emainu me elamuo.  
 Ena te augwali te moni nai daa tuboba pelama,  
 te augwali dali deliba dugamainu me  
 idali weyu, nago ena togolao.
- 5 Wiegı yai bidigo te ena homu dene elama,  
 tama ena sesanobo sę eyu, te enaba wado ilaibao.  
 Awe, usu dao, po menio, te kolesaga ebogo agai  
 ena tau sabo dao.  
 Tiali goli, eno te dwai sę ebo bidi dabe  
 dali abagi me wagobeo.  
 Magi baso meni, te sesemane sogo eno  
 te augwa ebo dwai kolesaga tagalomainu,  
 te gedu haluasa po wabo dao.
- 6 Te bidi mebago te dwai sę ebo bidi  
 dabego tobolu bidi dabe selama,  
 tama augwali te bobobage sauba sęwaibao.  
 Te augwali te tiwai dolobo sogo da,  
 teda te dwai sę ebo bidi dabe augwaligo koneama,  
 te eno polobadu wali po te mu po da waibao.
- 7 Tama augwaligo te bidi dabe  
 augwaligo dili te gų pageba sęwaibao,  
 te bidigo te ni dage kakali miminama,  
 te sęsębo tiwai gilama yaibao.

---

<sup>w</sup> 141:2 Ped 5:8

8 Tiali goli, Tigidali Nai Tonalubo God,  
 Genuai Bidi, eno konealubo homu  
 nageba beagasalio.

Nago ena bugagia tonalua, nago ena isimainu me igio.

9 Te ena te dwai sę ebo tomoba painu eyu,  
 te dwai bidi dabego ena kegebo dao,  
 bidigo te bulu hasa sabo kę geme  
 dualama mubo tiwai ebo dao.

Tiali goli, nago ena bobogela selama,  
 te kę dabede ena daę me wagobeo.

10 Meni. Nago te dwai sę ebo bidi dabe  
 te augwa muani kęde digi te augwa  
 ma tola somainu mu yao.

Tiali goli, ena menio.

Ena te augwali bugagia ela soayu,  
 tama te magi nai me deligo ena me dologobeo.

## Salmo 142

*Te Devit aga te Solde wi pelama, tama ola be tomode geme dualali sogo, te sogo agai e gedu haluasa po wabo balia po asęani. [1 Sml 22:1; 24:3]*

**Bidi me deligo te Godigo aga tau somainu, gedu haluasa po wali**

1 Eno te Genuai Bidiba bomonama i weyu,  
 te agai ena tau somainu ebao.

Eno agaba te hanalubo sę bomonama weyu, te agai  
 homu dene eyu,  
 ena tau somainu ebao.

2 Eno agaba te enade elalubo  
 te homu dogia pabo homu tigidali,  
 me te enaba pedalubo tigidali sęę po walali.

3 Te eno haliga sęę mu ebo sogo,  
 tama eno homugo ena dolaiba homu yai, te eno  
 pabo tų te nago koneanio.

Te eno sunumide te bidi dabego  
 ena tola sabo bono gągą geme dualama, elalubao.

4 Eno ena pąde tonono bilali,  
 tiali goli, te ena tau sabo bidi me  
 elalubo te eno me subeo.

Ena menaba wi pogowe?

Te enade homu kone palobo bidi meni.

- 5 Tama tialima, Genuai Bidi, eno i nageba weyu,  
 te nago ena tau somainu ebao.  
 Nage naga te ena tonalubo bidi dao.  
 Te ena bidibo ula elalubo sogo digi  
 eno homugo te nagaduba deli naga  
 te ena dali bidimainu homu ebo dao.
- 6 Te nago ena tau somainu, te eno nageba i wabo odao.  
 Magi baso meni, eno haliga te sęęę mu ebao.  
 Te enaba dwai sę yainu ebo bidi dabe  
 augwaligo te bomu mu ebaso,  
 tama eno augwali aiyaba elaluainu  
 ebo usu egobeo.  
 Tama tiyu, nago ena  
 te augwaligo nogode ma dobola sao.
- 7 Awe, nago ena te sęęęde ma selama,  
 tama ena te bugagia bidimainu yao.  
 Tama tiyu, te doloba pai we bidi dabe  
 sisinibo pesagede te eno nago nogi ugwaba saibao.  
 Magi baso meni, nago enaba wiegi yai sę ebo dao.

## Salmo 143

*Te Devitgo asęani balia po me deli dao.*

**Bidi me deligo te Godiba gedu haluasa po weyu, aga tau somainu yai**

- 1 Genuai Bidi, eno homugo nago te eno  
 gedu haluasa po wabo odomainu homu  
 ebao.  
 Te eno gela waboba nago olo muao.  
 Nage doloba pelama, tama nago sesemane sogo  
 mu po wabo da,  
 iya, nago eno gedu haluasa po wabo odao, tau sao.
- 2 Te nago po tųde te ena naga sę bidi me dagaligio.  
 Magi baso meni, te mena bidi me deligo  
 te nago gedude magi dwai sę me ebeo.<sup>x</sup>
- 3 Te eno boi bidigo te ena pobeasa bilama,  
 tama ena aiyaba mu elalualio.  
 Aęai ena te be hulua sai pesageba kalabus elama,  
 tama ena polobadu isai bidi tiwai gana yalio.
- 4 Tama tialima, eno homu kolesaga te dolobaso,



- tama eno haliga te seęę mu elalubadi geani.
- 5 Megi da, eno te polobadu pedelali nai  
dabeba homu kone ma ebao.  
Tama eno te nago yali seę dabe,  
me te nago wiegi yai seę dabeba  
te eno homu kone ma ebao.
- 6 Eno nogo si ugwaba siyu,  
gedu haluasa po nageba weyu,  
tama eno homu noma ogwa waigo  
te nage wei mu elama,  
te bidigo dogoni wa selama,  
tama aga te weę nogone mu ebo tiwai ebao.
- 7 Genuai Bidi, nago eno gedu haluasa po polo odao.  
Magi baso meni, te eno konealubo homu te dolali.  
Nage enade geme me duala sigio, tiyu ena isilama,  
te ena isali bidi dabego pesageba pidalio.
- 8 Eno konealubo homu nageba muani.  
Tialima, eno homugo te tigidali sogo  
kigamu nago eno homu  
te nago ena godolo ebo kolesagade  
ma homu kone palomainu ilao.  
Eno gedu haluasa po nageba naga wabo dao.  
Tama tiyu, nago enaba te sunumi  
ola mobaso, te eno wali paibao.
- 9 Genuai Bidi, ena nageba asiyu,  
te nago ena tonalumainu ebao.  
Nago ena te eno boi bidi dabego nogode ma sao.
- 10 Nage eno God da,  
eno homugo te nago ena bugagia  
ola momainu homu eyu,  
te eno nago homu wali pabo homu ebao.  
Eno homugo te nago homu mobo bidigo  
ena bugagia wiegi yai ilimainu homu elama,  
tama ena te wiegi yai sunumiba pabo  
dodolumainu ebo dao.
- 11 Genuai Bidi, nago ena ma sao,  
te nago po daę walali tiwai gilama yao.  
Nage doloba pai bidi mu da,  
tama tiyu te nago nogi aiyaba pidali weyu,  
te tigidali seęę enaba pedalubode  
te nago ena ma sao.
- 12 Nago ena tigidali sogo wei mu ebo dao,

tama te kolesaga ebo sia sogobeo.  
 Tama nago te boi bidi dabe,  
 me te ena dolabo bidi dabe ela muao,  
 magi baso meni, ena te nago seḡ bidi bidibaso,  
 te tama tiao.

## Salmo 144

*Te Devitgo aḡani balia po me deli dao.*

**Te Godigo aga te tau selama, te boi bidi aiyaba  
 elalubaso, te kingo usu da po wali**

- <sup>1</sup> Eno te God nogi ugwaba sobao.  
 Agai ena bomo elama, tonalubo dao.  
 Agai enabolo te hwḡbo kolesaga bugagia ola mobaso,  
 tama agai eno te hwḡbo sisi elalumainu yalio.
- <sup>2</sup> Agai te ena godolo ebo God da, tama ena sesemane  
 bobegelalubo dao.  
 Tama aga te geme duala sabo pesage  
 elalu, te ena ma sali.  
 Eno konealubo homu agaba keḡ pobaso,  
 tama agai ena bugagia bidimainu ebo dao.  
 Agai te Israel hani isaḡwai we bidi dabe aiyaba elaluama,  
 ena dologoba munama, bidibo dao.
- <sup>3</sup> Genuai Bidi, da we bidi te magi nai da weyu,  
 tama nago dade homu kone ebawe?  
 Da te olo bage tiwai, tialima magi baso  
 tama nago dade homu wei ebo dawey?
- <sup>4</sup> Da te pedauwalide mobo  
 deli sogo naga te pedalubo tiwai ebao.  
 Da te peḡwadage sogo naga bidibao,  
 te giligade noma pedelama,  
 tama te polo hagabo tiwai ebao.
- <sup>5</sup> Genuai Bidi, nago te dagalu  
 buga saḡnama, tama dulao.  
 Te nago nogo te bulu du dabeba mubaso,  
 tama te hano genuai pedelaibao.
- <sup>6</sup> Te dagalu be sele pedalumainu elama,  
 tama te boi bidi dabe sela saḡyu, tedela palao.

- Awe, te nago ene baso, tama te augwali wi pomainu yao.
- 7 Nago nogo aiyaba munama,  
tama nago ena te Israel hani isąwai  
we bidi dabego bomode ma sao,  
te bidigo nogo aiyaba munama,  
tama gasa bidi ugwaba keka selama,  
tama aga te moni wę gede mu bidali  
tagalobo tiwai yalio.
- 8 Te bidi dabego te mu po me wasiąwai,  
augwaligo te nogo guni sisu muyu, mu po da weyu,  
tama tibo po dali wabo dao.
- 9 God, megi da, eno te gesi balia po nageba waibao.  
Te eno gita eliyu,  
tama nageba balia waibao.
- 10 Nago te Israel hanigo king dabe te hwıbode tau siyu,  
tama augwaligo te boi bidi dabe aiyaba elalubo dao.  
Tama dwai boi bidigo ena  
te moni hwągo elidali weyu,  
nago naga sę bidi, ena Devit, ma sabo dao.
- 11 Te dwai sę mu ebo boi bidi dabego  
nogode nago ena ma sao.  
Tama ena te Israel hani isąwai dabego nogode ma sao.  
Augwa te mu po me wasiąma,  
tama augwa te nogo guni sisu muyu,  
te mu po da weyu, te tibo po dali wabo dao.
- 12 Dago homugo te dago ogwa dabe  
te gesi ogomani te augwali  
te bomo yai ni dabe tiwai pedalumainu homu ebao.  
Tama dago homugo te wegi dabe  
te kingo te genuai be pos au ilibo  
wiegi yai piksa noma tiwai pedalumainu homu ebao,  
augwali sawi yai wegi dabe pedalumainao.
- 13 Dago homugo te gi dabede te nai  
hauwa walomai homu elama,  
tama te nai mubo be mu paąamainu homu ebao.  
Tama te sipsip dabego te wai dabe  
umabo umabo mu ame nomainu homu ebo dao.
- 14 Tama te bulmakau dabego me  
te wai dabe hauwa umabo ame nenama,  
tama te wai dwai me pedalisąma,

tama te me deli isiyu, me eyu egobeo.  
 Dago homugo te dena hanu tomode  
 bidibo bidi me deligo, ma we me deligo me,  
 te seęę me dene te hanu tomode pedelamuo.

15 Te tiwai wiegi yai nai sabo  
 we bidi hani, augwa te wiegi yai pemene yao.  
 Awe, te we bidi dabego te Genuai Bidi augwa  
 God da homu elama bidibo we bidi dabe,  
 augwali me te wiegi yai pemene yao.

## Salmo 145

*Te Devitgo aęani balia po me deli dao.*

**God nogi ugwa sabo balia po dao**

- 1 God, me eno tuni bidi,  
 te eno nago genuai nogi po pusaibao.  
 Tama sesemane sogo bidada peyu,  
 eno nagebolo usu da po waibao.
- 2 Tigidali sogo eno nagebolo usu da po waibao.  
 Tama sesemane sogo bidada peyu,  
 eno nago nogi ugwaba saibao.
- 3 Genuai Bidigo genuai nogi elalubo,  
 tama dago agai nogi ugwaba mu sidu geao.  
 Agai ugwanu mu elaluyu,  
 tama dago agai genuai nogi tigidali koneainogo ebo  
 te usu me egobeo.  
 Magi baso meni, dago homu kolesaga te habuge dao.
- 4 Megi bidalubo we bidi hani  
 augwaligo te gasa nosali pedalubo hanibolo nago  
 ebo seę po pusuyu,  
 tama augwaligo nago nogi ugwaba saibao.  
 Tama augwaligo nago genuai seę yali po miaibao.
- 5 Te bidi dabe augwaligo nago bomo elalubo po weyu,  
 tama nage genuai tuni bidi mu da waibao.  
 Tama eno digi te eno nago dwagi  
 dwagi yai seę ebo da homu ebo dao.
- 6 Tama te we bidi augwaligo nago  
 bomo yai seę ebo po weyu,  
 te bidigo isiąbo seę naga dao,

tama eno nago genuai se yali po pusaibao.

7 Te augwaligo nago wiegi yai kolesaga  
 hauwa ebo po pusuyu,  
 tama nago olo mu tau sabo kolesaga po olama,  
 wiegi yai homu pemene eyu, balia po waibao.

8 Genuai Bidigo da godolo mu eyu,  
 homu dene eyu, tama da olo tau sabo se ebo dao.  
 Agai wado po polo wasiama,  
 tama sesemane sogo agai da wei mu ebo dao.

9 Agai wiegi yai se tigidali we bidi dali eyu,  
 tama agai nigali nai tigidali homu dene eyu,  
 dolo mu tau selama, mabo dao.

10 Genuai Bidi, nago nigali nai  
 tigidaligo nago nogi ugwaba saibao.

Tama nago we bidi  
 augwaligo nagebolo usu da po waibao.

11 Te augwaligo nago genuai nogi  
 te nago tonalubo bulu tigidalide elalubo po weyu,  
 tama nago genuai bomo elalubo po waibao.

12 Tama tibaso, tigidali we bidi  
 augwaligo nago genuai se ebo konemainogo yaibao.  
 Tama nage bomo yai tuni bidi bidibo  
 te augwaligo konemainogo,  
 tama nago nogi genuai mu dao.

13 Tama nage te tuni bidi bidiyu,  
 tama tigidali we bidi sesemane sogo  
 nago tonaluyu, bidada peyu, bidada paibao.

Genuai Bidi Godigo agai aga we bidi dali daḡ wali po  
 wali naga pabo dao.

Te agai me deli tagalobo menio.

Agai wiegi yai se naga eyu, da tau siyu ebo dao.

14 Agai te tigidali seḡe elalubo we bidi,  
 me te gasa bidi dabego aiyaba elalubo we bidi,  
 augwali tigidali agai ugwaba siyu, tau sabo dao.

15 Tama te bidibo ula elalubo nai  
 tigidaligo agaba tonono ebo dao,  
 tama agai augwali nasi ebo sogo nai mabo dao.

16 Awe, agai augwali usu elama,  
 bugagia bidimainogo tigidali nai mabo dao.

- 17 Godigo doloba pai kolesaga naga wali peyu,  
tama agai da olo mu tau sabo kolesaga mayu,  
te agai tigidali ebo sęde tebo dao.
- 18 Tigidali we bidigo homu agaba mu  
munama, i weyu da,  
teda aga augwali paęde bidibo dao.
- 19 Te agade wi ebo we bidi, te augwali nai meni baso,  
teda agai augwali nai mabo dao.  
Tama agai augwali gela wabo odolama,  
te augwali ma sabo dao.
- 20 Agai te aga godolo mu ebo we bidi  
bugagia tonalubao.  
Tiali goli, te dwai kolesaga ebo we bidi,  
augwali dolaibao.
- 21 Te eno Genuai Bidigo nogi  
sesemane sogo ugwaba saibao.  
Tama tigidali nai agai nigali,  
dagego aga wiegi yai olo bugagia  
bidibo nogi sesemane bidada pabo  
sogo ugwanu mu sao.

## Salmo 146

### Te da tau sabo bidi God nogi dago ugwaba sinao

- 1 Te Genuai Bidigo nogi ugwaba sao.  
Ena digi eno te aga nogi ugwaba sabo dao.
- 2 Te ena tęde bidibo tigidali sogo,  
te eno aga nogi ugwaba saibao.  
Te eno ena Godigo nogi ugwaba sabo balia po odubadi,  
te ena isiboba usu nigi paibao.
- 3 Te king dabego, me te tęde bidi  
dabego nage me dobola sogobeo.  
Tama tiyu, nago homu te nosali isabo  
bage augwaliba me muidalio.
- 4 Te augwali isibo sogo, augwali te begelama,  
te tę ma pedalubao.  
Tama te sogo augwaligo te yaibao po wali sę  
tigidali te me egobeo.

- 5 Te bidi me deligo te Jekopgo Godiba  
 homu keę pelama, te agai aga tau siyu,  
 te God dali keę pelama,  
 te aga Genuai Bidi da homu eyu da,  
 teda aga pemene emainao.
- 6 Godigo te dagalu, me tọ, me tamu ąi,  
 me te tigidali elalubo nai pedalumainu yali.  
 Tama sesemane sogo te Godigo  
 aga daę walali po tigidali wali pabo dao.
- 7 Te boi bidi dabego dologode dwai mu bidibo  
 te we bidi dabe te Genuai Bidigo tau sabo dao.  
 Tama agai te nai sili bidalubo we bidi  
 dabe nai mabo dao.

Genuai Bidigo te kalabuside bidibo  
 bidi dabego kalabus silimainu ebo dao.

- 8 Tama agai te gedu widai bage  
 te ma tonono yabo usu ma elama,  
 tama te seęęgo augwali aiyaba elalubo bidi dabe  
 te seęę augwalide dagala sayu ebo dao.  
 Genuai Bidigo te aga doloba pai  
 we bidi dabe wei mu ebo dao.
- 9 Agai te dago tọde bidibo  
 te gasa bulu bidi dabe tau sabo dao.  
 Tama agai te wilawe we dabe tau siyu,  
 tama te tiana wai puluba me tau sabo dao.  
 Tiali goli, agai te dwai seę ebo bidi  
 dabego yainogo ebo seę dabe te augwali homu  
 kone tuę palobo dao.

- 10 Genuai Bidi te sesemane sogo king  
 bidada peyu, bidada paibao.  
 Te Saion we bidi dabe, dage Israel dabe, te duga God  
 te sesemane king bidada peyu, bidada paibao.

Te Genuai Bidigo nogi ugwanu sinao.

## Salmo 147

Augwaligo te Tigidali Bomo Elalubo God nogi ugwaba sai

- 1 Te Genuai Bidigo nogi ugwaba sao.  
Te dago balia po weyu,  
tama te dena God nogi ugwaba sabo  
te wiegi yai dao.  
Te agai nogi ugwaba sabo te wiegi yai  
doloba pai kolesaga dao.
- 2 Genuai Bidigo te Jerusalem ma dodolama,  
tama te boi bidi dabego sela pelama,  
te kalabus igi pali we bidi dabe  
te ma odasa asai dao.
- 3 Te dwai sęęęgo te augwali homu dolama,  
te augwa dwai dene ebo we bidi dabe,  
te agai usu ma ilibo dao.  
Tama agai te augwaligo keni sįsįbo dao.
- 4 Agai augwaligo namba te hęgo daį ilama,  
tama mu tama, agai te augwali  
deli deligo nogi nodigi pabo dao.
- 5 Te dago Genuai Bidigo nogi me  
te tigidali bomo elalubao.  
Dago agai koneani kolesaga  
te usu me siyu, daį me iligobeo.
- 6 Agai te augwa digi augwa haliga  
aiyaba tegaluama bidibo bidi dabego nogi  
ugwaba saibao,  
tiali goli, agai te dwai sę ebo we bidi dabe augwali  
te bomonama mu agala sabo dao.
- 7 Puba hwi po weyu,  
te Genuai Bidigo nogi ugwaba sabo  
balia po dabe waiyąo.  
Te dena Godiba te gita me musik wao.
- 8 Agai te dagalude pę pedalumainu elama,  
tama te tulubage tagala palama,  
tama te bulu du dabede te nosa  
pedalumainu ebo dao.
- 9 Agai te tigidali kibu hasa dabeba nai mobao,  
tama te gesi tamadi dilibo ba tagadi  
dabego i wabo sogo,



te agai augwaliba nai mabo dao.

10 Genuai Bidigo te bomai hos dabede,  
me te bomai ami bidi dabe  
te wiegi yai pemene me egobeo.

11 Menio, agai te wiegi yai pemene  
te agade wi ebo we bidiba yaibao,  
tama te agai da sesemane godolo ebo dao homu eyu,  
agaba homu kęą pabo we bidi  
dabede, te agai augwalide  
dwagi yai homu ebo dao.

12 Te Jerusalem dabeo,  
te Genuai Bidigo nogi ugwanu سیاو.  
Awe, dage Saion dabe, te duga God nogi ugwaba sao.

13 Agai te nago Jerusalem obo bagulali sunumi  
te daų walama elalu,  
tama te naga we bidi dabeba  
te wiegi yai nai mayu ebo dao.

14 Te boi bidi dabe asidali weyu,  
agai te dagego tų me tonaluyu,  
tama te gide wiegi yai wit mu holomainu elama,  
tama dagego tulama, tama paęana pabo dao.

15 Te agai po me deli obaso da,  
teda polo tama te po te tųba dulubo dao.

16 Agai te talua ge tulubage hauwa  
te aiyaba tagala palama,  
tama te tų mesega sigulobo dao.

17 Agai te talua ge tulubage hauwa  
te wę sane kemi tiwai tagala palama,  
tama te mena bidi me deligo  
te talua ge tulubagego  
kedau te aiyaba me elaluainu ebaso,  
usu me egobeo.

18 Tialima, nosali te agai po ma obaso,  
tama te ais te wę ma pedalobo dao.  
Agai te wali asomainu iliyu,  
tama te aisde pedelai wę pabo dao.

19 Agai aga po te Jekopba mawai.  
Awe, te po dabe me, bomai po me,

agai te Israel dabeba mawai dao.  
 20 Agai te tiwai sę te gasa hani dabeba  
 munu me isiąwai.  
 Augwaligo te aga bomo yai po dabe me konesiąwai.  
 Dago te Genuai Bidigo nogi ugwaba sinao.

## Salmo 148

**Te tigidali dagalude me tęde naigo te Godigo nogi ugwaba somainao**

- 1 Te Genuai Bidigo nogi ugwaba sao.  
 Dage tigidali dagalude, ugwa badu  
 bidibo bage, te Genuai Bidigo nogi ugwaba sao.
- 2 Dage tigidali ensel,  
 te Genuai Bidigo nogi ugwaba siąo.  
 Dage tigidali dagalude ami dabe,  
 te agai nogi ugwaba siąo.
- 3 Giliga me polua, dage sigo me  
 te aga nogi ugwaba sao.  
 Tama te ula mu ebo hę tigidaligo  
 te agai nogi ugwaba sao.
- 4 Te ugwanu mu elalubo dagalu,  
 te agai nogi ugwanu sao.  
 Te dagalude ugwadu elalubo węgo,  
 te agai nogi ugwaba sao.
- 5 Te nai dabego te Genuai Bidigo nogi ugwaba sao,  
 magi baso meni, agai digi po obaso,  
 tama augwali pedelama bidibao.
- 6 Agai te po wali gilama tama augwa  
 te bidimainu yali pesagede mu  
 sesemane sogo bidibao,  
 tama te agai po munu me siligobeo.
- 7 Dage tęde bidibo bage tigidali, dagego  
 Genuai Bidigo nogi ugwaba siąo.  
 Te moni dobo dwai sųę dabe,  
 me te tamu ąi aiya badu mu pagede bidibo nai dabe,
- 8 tama te pęde elalubo be sele,  
 tama te talua ge tulubage me,  
 te pę dabe, te bomai waligo me,

te Genuai Bidigo po wali pabo bage,  
dagego agai nogi ugwaba siaḡ.

- <sup>9</sup> Awe, dage genuai bulu du dabe,  
me dwasianu bulu du dabe,  
tama nai du walobo ni dabe me,  
tama te buside ni dabe,
- <sup>10</sup> tama te bidi dabego tonalubo kibu hasa dabe, me  
te bulu uni hasa dabe,  
tama te hasamani dabe, me te ba dabe, te dagego  
Genuai Bidigo nogi ugwaba sao.
- <sup>11</sup> Te king dabe, me tigidali hani bage,  
tama te gavman dabe me,  
tama te tigidali gasa tobolu bidi dabe me,
- <sup>12</sup> tama te gesi bidi, me gesi wegimani dabe,  
tama te monu dabe, me te wai puluba dabe,  
dage tigidaligo  
te Genuai Bidigo nogi ugwaba sao.
- <sup>13</sup> Mu tama, tigidaligo  
te Genuai Bidigo nogi ugwaba sao.  
Te agaduba genuai nogigo deli te tigidali we bidigo  
genuai nogi aiyaba mu elalubao.  
Agai genuai nogi te ugwanu mu elalu,  
te dagalu me tḡ aiyaba elaluai dao.
- <sup>14</sup> Agai te Israel dabe wei mu eyu,  
tama aga we bidibolo bomo mabo dao,  
tama tiyu, augwaligo  
agai nogi ugwaba sabo dao.  
Te Genuai Bidigo nogi ugwaba sao.

## Salmo 149

**Te Genuai Bidiba wiegi yai pemene ebo balia po wao**

- <sup>1</sup> Te Genuai Bidigo nogi ugwaba sao.  
Te gesi balia Genuai Bidiba waiyaḡo.  
Tama te we bidi dabego aga sesemane sogo wali peyu,  
augwa te lotuba sisinibo sogo,  
dago agai nogi ugwaba sao.
- <sup>2</sup> Dage Israel dabe, te Godigo dage nigalide

- te dagego bugai haliga iyąo.  
 Awe, te Saion we bidi dabe,  
 te duga kingba wiegi yai pemene yao.
- 3 Dagego tęąbi weyu, aga nogi ugwaba sao.  
 Mu tama, te habidi dabe, me taborin,  
 me gita, te tama eliyu, te agai nogi ugwaba sao.
- 4 Magi baso meni, Genuai Bidigo aga  
 we bidi dabe wei eyu,  
 augwalide dwagi yai homu ebo dao.  
 Tama agai te augwa digi te augwa nogi  
 aiyaba elalubo bidi dabego nogi ugwaba siyu,  
 tama augwa te hwı̄bode ugwaba ela pabo dao.
- 5 Te Godigo we bidi dabe augwa te edelebaso,  
 te wiegi yai pemene emainao.  
 Tama augwa te nai tuainu sisinibo sogo,  
 augwa te wiegi yai pemene ebo tęąbi wgameo.
- 6 Augwa te i weyu, tama te Godiba pemene elama,  
 tama te poa pai bainat hwą mu tolalumainao.
- 7 Tama augwa te gasa hani dabe dali hwınama,  
 tama augwaliba te dwai dene mu mayu,  
 te augwali aiyaba elalumainao.
- 8 Tama augwa te augwaligo king dabe,  
 me tobolu bidi dabe,  
 te augwa aingo nigali sen dabego  
 te kęnama, elalumainao.
- 9 Tama augwa te hani dabeba te Godigo  
 wali po tiwai gilama te dene mabo sę emainao.  
 Te Godigo we bidi dabego augwa te tiwai elama,  
 te augwa genuai nogi dali bomo dali si saibao.  
 Te Genuai Bidigo nogi ugwaba sao.

## Salmo 150

### Godigo nogi ugwaba sao

- 1 Te Genuai Bidigo nogi ugwaba sinao.  
 Te Godigo nogi te aga tempel bede  
 ugwaba sao.  
 Dago te aga genuai bomo te dagalude elalubaso,  
 te aga nogi ugwaba mu sao.
- 2 Agai te genuai sę dabe yai.

- Tama tibaso, dago aga nogi ugwaba sao.  
Aga te mu polalu,  
tama te genuai nogi ugwadu mu elalubao.  
Dago aga nogi ugwaba sao.
- <sup>3</sup> Te biugel bu weyu, te aga nogi ugwaba sao.  
Te gita dabe me, musik me eliyu,  
tama te aga nogi ugwaba sao.
- <sup>4</sup> Te tamborin eliyu, te tęąbi weyu,  
tama aga nogi ugwaba sao.  
Te gita eliyu, tama te ona eliyu,  
tama aga nogi ugwaba sao.
- <sup>5</sup> Te simbol eliyu,  
tama te aga hwa ọla peyu,  
tama te Genuai Bidigo nogi ugwaba sao.  
Te simbol bomonama weyu,  
te hwa wabo genuai pedaliyu,  
tama te hwa wabogo  
Genuai Bidigo nogi ugwaba siąo.
- <sup>6</sup> Dage te bidibo ula elalubo tigidali nai,  
dagego te Genuai Bidigo nogi ugwaba sao.  
Te Genuai Bidigo nogi ugwaba sino.